

1772

Zun. F.

84

F-90

1884

Ch. 8

2250

138

ՅՈՐԹԻՐՆԷ ՏԻՒ ՊՈՒԱԿՈՊԷ

ՊԱՐՈՆ ԼԸՔՈՔԻ
ԾԵՐՈՒԹԻՒՆԸ

182

ԹԱՐԳՄԱՆԵԱՑ

Կ. Ս. ԻԻԹԻՃԵԱՆ

Հասարակ

معارف عمومیہ نظارت جلیہ سنک رخصتیلہ
طبع و نشر اولنمشدر

Ի ՏՊԱՐԱՆԻ ԱՐԵՒԵԼԻՔ ԼՐԱԳՐՈՑ

1884

2003

237

84
F-90

ՅՈՐԹԻՒՆԷ ՏԻՒ ՊՈՒԱԿՈՊԷ

ՊԱՐՈՆ ԼԸՔՈՔԻ
ԾԵՐՈՒԹԻՒՆԸ

ԹԱՐԳՄԱՆԵԱՅ

Կ. Ս. ԻԻԹԻՒՃԵԱՆ

Հատոր Բ.

معارف و میده نظارت جلیله سنک رخصتیه
طبع و نشر اولشمسدر

Ի ՏՊԱՐԱՆԻ ԱՐԵՒԵԼԻ ԼՐԱԳՐՈՑ

1884

128

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

Ի ՅԻՇԱՏԱԿ

ՅՈՒՂԱԲԵՐ

ՍԵՐՈՒՅԱՆ-ԻՆՃԻԿՅԱՆԻ

Ի 23-Ն ՇՈՒՆՎԱՐԻ 1929 Թ.

ԹԻՖԼԻՍ

400-42

ՀԱՅԿԱՍՏԱՆԻ ԳՐԱԳԻՏՈՒԹՅԱՆ ԿԵՆՏՐՈՆ

Handwritten signatures and notes in Armenian script.



8
1186-26

ՅՈՐԹԻՒՆԷ ՏԻՒ ՊՈՒԱԿՈՎԷ

ՊԱՐՈՆ ԼԸՔՈՔԻ

ԾԵՐՈՒԹԻՒՆԸ

ՀԻՇՍԱՍԿ

ԻԻԳԱՆԵՐ

ՀԱՏՈՒՔ

ՍԵՐՈՒԹԵԱՆ ԻՆՃԻԿԵՐՆԻ

ՄԱՍՆ ՍՈՒՉԻՅ

ՅՈՐԹԻՒՆԸ 1929 ՎՈՒՅ

ՊԱՐՈՆ ԼԸՔՈՔ ԻՆՔՉԻՆԸ

Է.

Ողջախոհ սիրակցութիւնք երջանիկ ազգաց կը նմանին, պատմութիւն չունին :

Յորմէ հետէ Լուի Լըքոք կը սիրէր զԹէրէզ Լըքոնթ, ոչ մի փոթորիկ վերդոված էր այդ բարեբաստիկ խօսեցելոց խաղաղաւէտ կեանքն, ոչ մի ամպ և ոչ իսկ մէկ վայրկեան՝ նսեմացուցած էր դոցա անայլայլակ բարօրութիւն : Իրենց երկինքը միշտ կապոյտ էր : Կային իսկ օրեր, ուր մեր ժամանակի ամենէն մեծ ուտիկանին որդին

գրեթէ կը ցաւեր որ Թէրէզի հետ
ամուսնանալու համար մեծագոյն խո-
չընդոտներ չէր ունեցած յաղթելու :

Իրարու հանդիպեր էին ընկերու-
թեան մէջ, ոչ այնպիսի ընդունելու-
թեան կամ խրախճանի մ'առթիւ, ուր
միլիոնատէր մը գիշերային տօնի մը կը
հրաւիրէ երկու կիսագնտոց ականա-
ւորներն, այլ երկու ընտանեաց ալ միա-
պէս ծանօթ բարեկամներու տան մէջ,
ուր երկուքն ալ հանդիսատ էին և հա-
մարձակ :

Առաջին անգամ տեսնելով՝ հաւնած
էին իրարու. հակապար մ'որոշած էր
իրենց բաղդը :

Թէրէզ նոյն իրիկուն կը խոստովա-
նէր իւր մօր թէ թխորակ մեծ երիտա-
սարգն՝ որ երեք անգամ ի պար հը-
բաւիրած էր զինք, աւելի լաւ կը յար-
մարէր իրեն՝ քան այն երկու երիտա-
սարգներն, որոց արտօնութիւն տրուած
էր տեսակցիլ իրեն հետ. այն էր բուա-
թուցի ազնուատոհմ շինական մ'և
Սանթիէ փողոցը բնակեալ վաճառա-
կան մը :

Միւս կողմէ ալ Լուի հետեւեալ ա-
ռաւօտուն կանուխ գնացեր հայրը քու-
նէն արթնցուցեր էր՝ աղաչելու համար
որ իւր առջի իրիկուան պարակցուհւոյն
վրայ տեղեկութիւններ առնու, և խոս-
տովանելու համար թէ այն սիրուն օ-
րիորդին գեղեցիկ աչերը տիրած էին
իւր սրտին :

Աւելցուց իսկ որ եթէ օրիորդը զինք
ամուսին ընդունէր, ինք պատրաստ էր
հրաժարիլ ամուրիութենէ :

Ծերունի Լըքօք փարիզցի ընտան-
եաց մեծ մասը կը ճանչէր, և պէտք
չունեցաւ տեղեկութիւն ստանալու,
վասն զի Լըքօնթի մեծափարթամ և
պատուաւոր ընտանիքը քաջածանօթ էր
իրեն :

Միւս կողմէ ուրախանալու առիթ
մ'էր այս իրեն, վասն զի շատ տարիներէ
ի վեր կը փափաքէր իւր որդին մտցը-
նել միջնակարգ քաղաքացեաց հարուստ
և յարգի դասուն մէջ, որ դարերէ ի
վեր կը կառավարէ զմրանսա, գան-
գատելով միշտ թէ ինքն է կառավար-
ուողն :

Ուղղակի նպատակին դիմեց, այսինքն պարզապէս Տիկին Լըքոնթի տունը գնաց ըսելու թէ Լուի կը սիրէր զԹէրէզ, և թէ Լուի վեց հարիւր հազար Փրանքի տէր պիտի լինի հօրը մահուընէն յետոյ, թէ հայրը պատրաստ է այդ գումարին կէսն այժմէն իւր որդւոյն տալ, որպէս զի տուն մը պատրաստէ :

Օրիորդ Լըքոնթ ալ կէս միլիոն օփիա ունէր, և միլիոն մ'ալ յետոյ մայրենի ժառանգութենէն պիտի ըստանար :

Ուստի այս ամուսնութիւն յոյժ շահաւէտ էր Պ. Լըքոքի որդւոյն, կամ մանաւանդ Պ. աը ժանթիլյեի համար, վասն զի Լուի կամովին կը հրաժարէր իւր հայրենի անունէն :

Բայց խելքն աներկրայելի դրամազըլըխ մ'է, մանաւանդ Փարիզի մէջ, և Լուի պէտք եղածէն աւելի ունէր իւր ուղածին պէս ընտիր նօտար, փոխանակիչ, գործարանապետ, և մինչև իսկ ազգային երեսփոխան մը լինելու համար :

Եւ այս ամենէն աւելի՛ անհունապէս հաճոյ եղած էր Թէրէզի :

Տիկին Լըքոնթ ձեւի համար միայն առարկութիւններ ըրաւ. նախ հասարակ պատճառանքներ յառաջ բերաւ, այսինքն թէ իւր աղջիկը գեռ չափահաս չէր, երիտասարդը դեռ որոշ վիճակ մը չունէր :

Սակայն բարի կլինը սրտով յոյժ ուրախ էր իւր երազածին պէս ամուսին մը Թէրէզի դէմն ելնելուն վրայ, վասն զի մայրերն ալ իրենց գաղափարականն ունին, և Լուի աը ժանթիլյեի կիրացնէր սեղանաւորի այրւոյն գաղափարականն :

Ասկէց զատ Պ. Լըքոք, արհեստով դիւանագէտ, կրցաւ իւր անկեղծութեամբն և ձեւացեալ պարզմտութեամբ գրաւել այդ պարկեշտ և բարեսիրտ տիկնոջ սիրտն :

Ապագայ սկեսրայր մը դիւրաւ կը համաձայնի ապագայ զոքանչի մը հետ, քան երկու ապագայ սկեսրայր ու աներ կամ մանաւանդ սկեսուր ու զոքանչ :

Ուստի ամեն բան յաջող գնաց : Շահու վերաբերեալ գործերը փութանակի կարգադրեցան , և իրենց առաջին տեսակցութենէն երեք շաբաթ յետոյ , թէրէզ և Լուի , այնուհետեւ խօսեցեալք , հրաման ստացան տեսակցելու , սպասելով ամուսնութեան մեծ աւուր՝ որ փետրվարի առաջին երեքշաբթին որոշուած էր :

Տեսակցելու հրամանն ընդարձակապէս գործադրեցին :

Ամեն իրիկուն սիրահարը Պուլոյն կը վաղէր , ուր իւր սեղանի սպասը պատրաստ դրուած էր Տիկին Լըքոնթի սեղանին վրայ . կը ճաշէր մօրն ու աղջկան հետ , ջերմաբար կը սիրակցէր նշանածին հետ , վասն զի սաստիկ սիրահարած էր , և ժամ տասնին (կէս դիշերէն երկու ժամ առաջ) կը մեկնէր :

Այրին , իւր ամուսնոյն մահուընէն յետոյ , Փարիզի մէջ սենեակ մը միայն պահած էր , և իւր դստեր հետ Պուլոյնի գեղեցիկ ապարանքը կը բնակէր , շոր այրը գնած էր ժամանակաւ :

Կը փախաքէր իսկ , առանց սակայն պահանջելու , որ դեռատի ամուսինք հաճէին հոն բնակիլ , վասն զի դիւղական ճաշակներ ունէր , և կ'ուզէր որ անոնք ալ ունենան :

Հայր Լըքոք ամեն կիրակի հոն կ'երթար , և երբ ներկայանար , կը թողուր որ ծառայները «Պ. Տը ժանթիյեի եկաւ» ըսելով ծանուցանեն :

Պատրաստ էր ուրիշ զիջումներ ալ ընել Տիկին Լըքոնթի անմեղ սնափառութեան , վասն զի այս ամուսնութիւն բոլորովին իւր սրտին ուղածն էր՝ քանի մը պատճառներով :

Հին ոստիկանն , յորմէ հետէ Աստուած որդի մը տուած էր իրեն , այն ամենասիրելի որդւոյն բնաւորութիւնը կը զննէր խնամով , վասն զի իւր միակ յոյսը , մխիթարութիւնը , կեանքն էր այդ որդին :

Եւ կը զննէր ինչպէս եղեռնական տեղեկագրերու պարութայ մը , պաղարիւնով , անկողմնակալութեամբ , և իւր բնածիր կորովամտութեամբ :

Այս խուզարկուին կոչումն էր պու-
շել, ինչպէս որ կ'ըսէր իւր գործուն-
եայ ժամանակներն :

Իւր որդին ալ պարզելով, գտած
էր անոր վրայ՝ ի մանկութենէ՝ ե-
ռանդուն և միանգամայն զգօն բնաւո-
րութիւն մը :

Լուի լուրջ և խոհուն եղած էր,
բայց ի ծնէ կրքոտ և բուռն էր :

Իւր բնաւորութիւնը չէր համաձայ-
ներ խելքին հետ :

Կրթութիւնը զայն զգաստ, աշխա-
տասէր և մինչև իսկ պաղարին ըրած
էր. գոնէ առ երեսս : Յոյժ կանուխէն
հեռացած էր հեշտին զուարճութիւն-
ներէ, և իւր ընկերներն երբէք տեսած
չէին անոր սիրակցական մէկ զբօսանքն :

Այս զգաստութիւն, որ նուազ սրա-
միտ հօր մ'ուրախութիւն կը պատճա-
ռէր, ծանր մտահոգութիւն կուտար
Պ. Լըբօքի :

Փորձով գիտէր թէ մոխրի տակ ծած-
կուած կրակը վտանգաւոր հրդեհներ
կը վառէ. և թէ վառօդն, ո՛րչափ սաս-

տիկ ճնշեալ լինի, ա՛յնչափ աւելի ա-
ւերմունք կը գործէ երբոր պայթի :

Կը վախնար պայթումներէ, և ի-
րաւունք ունէր :

Ցասն և վեց տարու եղած ժամա-
նակ, Լուի, Անգլիոյ մէջ գիշերօթիկ
վարժարանի մ'աշակերտ, քիչ մնաց
տասներկու տարեկան անգլիացի օրիորդ
մը պիտի առեւանգէր, չըջակայ ազա-
րակի վարձակալի մ'աղջիկ, և Պ. Լը-
բօք հարկադրուեր էր այդ կարի դիւ-
րաբորբօք դպրոցականը Գերմանիա
դրկել կրթութիւնն աւարտելու :

Հոն աւելի գէշ եղաւ : Ազատ մնա-
ցած պարմանին իւր ուսումնաւթայրն
եղող համալսարանական փոքրիկ քա-
ղաքին Կրէչէններուն միոյն տարփալ
սկսաւ, տարփանք մը, որ և յոյժ հե-
ռի կրնար տանիլ զայն, եթէ հայրը չը
միջամտէր :

Երբոր Ֆրանսա վերադարձաւ, Լուի
հանդարտած էր : Իւր իրաւարանական
ուսումն և փաստաբանական վեցամսեայ
վարժութիւնն ըրած էր առանց որ և է

սիրային զգացման , և օրինակելի վարք մ'ունէր :

Բայց հայր Լըքոք կը վախնար որ յանկարծական փոթորիկ մը կրնար տակնուվրայ ընել այս միօրինակ կեանքը , չափազանց միօրինակ ըստ իւր կարծեաց , և ահա այժմ քաղցր զեփիւռ մը կ'ենէր և երիտասարդն յաջողութեամբ ամուսնութեան նաւահանգիստը կը հասցնէր :

Հայր Լըքոք այլ եւս բան մը չէր խնդրեր Աստուծմէ :

Եւ գաղջ սէր մը չէր որ Լուի կ'ըզգար Թէրէզի վրայ :

Առաջին անգամ տեսնելուն՝ ստացեր էր այն շանթի հարուածը զոր վիպագիրք յաճախ կը յիշեն , և որ յոյժ քիչ անգամ կը զարնէ այս դրական դարուս մէջ : Սնոր հետ պարելէ յետոյ տեղը վերադարձուցած ժամանակ երդուած էր արդէն թէ ամուսնութեան պիտի առնուր զայն :

Եւ պիտի առնուր՝ հակառակ ծնողաց կամքին , հակառակ պատշաճից , առանց մէկ սու օժիտի :

— Բարեբաղդ ենք որ լուացարար ծնած չէ , ըսեր էր ինքնիրեն հայր Լըքոք երբոր սարսափելի տղան եկեր ծանուցեր էր իրեն թէ կը սիրէր զօրիորդ Լըքոնթ :

Ամիս մը հանապազօրեայ սիրակցութիւն առաւել ևս աճեցուցեր էր այս դիւրաբորբոք տարփաւորին սէրը : Թէրէզի համար միայն կ'ապրէր , և անկէ հեռի անցուցած ժամերն անտանելի կը թուէին իրեն :

Սակայն հարկ էր , հակառակ իւր բաղձանաց , շատանալ իրիկուններով՝ զորս թոյլ կուտային իրեն անցունել Պուլոյնի ամառանոցին մէջ , և հարկ էր զբաղիլ նաեւ այն ամեն հոգերով , զորս մօտաւոր ամուսնութիւն մը պարտք կը դնէ նշանածի մը վրայ :

Սէրն ազատ չկեցներ հարսին համար զարդանուէր գնելէ , ոչ ալ իւր ամուրի կենաց հաշիւները կարգադրելէ :

Լուիի անցեալը դժուարին չէր կարգադրել , վասն զի բնաւ սիրային կա-

պակցութիւն մը չունէր, և իւր Անդ-
լիոյ ու Գերմանիոյ մէջ ըրած խենդու-
թիւններն հին լուսիններուն գնացած
տեղը հասած էին :

Սակայն մերթ ընդ մերթ տխուր
յոյզեր կուգային վրան, որք շուտով
կը փարատէին թէրէզի ժպիտովն : Ի-
րիկուն մը, քանի մ'որ յետոյ այն կի-
րակիէն՝ ուր հայր Լըքոք բացորոշապէս
մերժեր էր վերսկսիլ իւր հին արհես-
տը, սիրահար երիտասարդը բաւական
սրտատանջ դէմք մը բերաւ Տիկին Լը-
քոնթի տունը :

Բայց ճաշը վերստին զուարթացուց
զայն, և երբոր, սեղանէն ելնելով,
վառարանին առջեւ դէմ առ դէմ ե-
կաւ իւր պաշտած գեղանի օրիորդին
հետ, նշանածներուն ամենէն խանդա-
կալթն ու զուարթագիւնն եղաւ :

Տիկին Լըքոնթ, իւր զաւկները չը
նեղելու համար, — արդէն Լուիի հա-
մար այնպէս կը խօսէր, իբր թէ իւր
փեսայն եղած լինէր—, լրագիր մը կը
վերժանէր, և չէր ուզեր ըսել անոնց սի-

րակցական խօսքերը զորս կէս ձայնիւ
կը փոխանակէին :

Պատուական այրին խառն լուրերը
կը սիրէր կարդալ, և հատ մը տեսա-
որ բացագանչութիւն մը խլեց բերնէն :

— Ա՛հ, վերջապէս պիտի գտնեն
Արպալէթ փողոցի կրկին ոճիրներուն
հեղինակն :

— Ի՞նչ ոճիրներ, մայր իմ, հար-
ցուց թէրէզ մտազբաղութեամբ :

Տիկին Լըքոնթ ընդմիջեց զայն եր-
բոր ցած ձայնիւ իւր մեղրալուսնի ու-
ղեւորութեան վրայ կը խօսէր, գեղե-
ցիկ ուղեւորութիւն մը յիտալիա, զոր
կարդացած էր Լուիի հետ :

Երկու խօսեցեալք Նաբոլիի ծովա-
ծոցն հասած էին, ի Սորէնթէ, ուր
մինչեւ գարուն պիտի կենային կիտրո-
նիներուն հովանւոյն տակ, և ահա Ար-
պալէթ փողոցի գործը կուգար կ'իյնար
իրենց երջանկաւէտ երազներուն մէջ՝
ինչպէս պայթուցիկ ուումը մը հակա-
պարի մը մէջտեղ :

— Ի՞նչ, գոչեց բարի տիկինը՝ ձեռ-

քի թերթը սեղանին վրայ դնելով, չէ՞ս գիտեր թէ գեռատի կին մը ըստ պաննած . . . արկղի մը մէջ դրած էին . . . և թէ զայն սպաննող սրիկայն վաճառական մ'ալ սպաննած է . . . պարոն Լէօրէօ անուն, զոր և ժամանակաւ տեսած լինիլս լաւ կը յիշեմ . . . Իւր արժէթուղթերն հօրդ յանձնած էր:

— Կրօնէլէս կարդացի՞ր, Լուի, միմիջեց թէրէզ:

Աւելի կը սիրէր իւր տարփաւորին հետ խօսակցիլ՝ քան թէ սրտաճմիկ պատմութիւն մը լսել:

— Ես չեմ կարդացած, յարեց. մայրիկս չուզեց որ կարդամ: Բայց բարեկամուհիներէս մին ըսաւ ինձ թէ սխրալի էր: Այն գրքին մէջ նաւակի մը պատմութիւն կայ . . . մեք ալ նաւակ մը պիտի ունենանք, այնպէս չէ՞, Լուի . . . Իրիկունները պտըտելու համար այն ծովուն վրայ, ուր երբէք փոթորիկ չեներ:

— Ստուգիւ, միմուաց այրին քիչ մը գայթակղած, այս աղջիկները խելուը-

նին կը կորսնցնեն երբոր զիրենք ամուսնացնելու խօսք լինի:

Ուրեմն, օրիորդ, քու բնաւ հոգդ չէ երբոր այնպէս անձինք կը խողխողին իրենց տան մէջ, և այն ալ Փարիզի պէս տեղ մը: Օրին մէկն ալ կուգան մեզ կ'սպաննեն հոս, և աւելի դիւրութեամբ, վասն զի մեր տան ետին ծառաստան է, և ձմեռը դրացիներ չունինք:

— Լուի կը պաշտպանէ մեզ, մայրիկ, ըսաւ թէրէզ իւր սիրած գեղեցիկ ու սէզ երիտասարդին նայելով:

— Լուի քեզ հետ նաբողիի ծովածոցին մէջ պտըտած ժամանակ հոս չէ որ պաշտպանէ զիս, պատասխանեց Տիկին Լըքոնթ ծիծաղելով:

— Կը կարծեմ, սիրելի տիկին, թէ Պուլյն բնակիլք Տըլա Բէ փողոցը բնակելէ աւելի վտանգաւոր չէ, ըսաւ երիտասարդը. բայց եթէ մինակ մնալ չէք ուզեր, ինչո՞ւ համար մեզ հետ չուղեւորիք:

— Ո՛չ, որդեակներս, ո՛չ, նեղու-

Թիւն կը պատճառեմ ձեզ : Երբոր խեղճ սիրելի էրկանս հետ ամուսնացայ , գընացինք տասնեհինգ օր Փոնթէնէպոլոյ կեցանք . . . արդարեւ Փոնթէնէպոլոյ անտառը չհասնիր ձեր Իտալիոյ նարըն-ջենիներու անտառներուն . . . և սա-կայն կը յիշեմ որ սխրացած էինք հոն առանձին լինելնուս վրայ :

Թէրէզ ձայն չէր հաներ , բայց աչերուն մէջ կը կարդացուէր թէ մօրը կարծիքէն էր :

— Ասկէ զատ , յարեց պատուական կիսն , ես կատակ կ'ընէի , վասն զի ես բնաւ երկիւղ չունիմ : Գոհութիւն Աստուծոյ , լաւ սպասաւորներ ունինք , որք տասն եւ հինգ տարիէ ի վեր մեր քով կը ծառայեն , և իրենց կեանքը կուտան մեզ համար :

Բայց չէի կրնար ժխտել , սիրելի Լուիս , թէ ոստիկանութիւնը շատ մեղադարտ է այդպիսի սոսկալի ոճիրները չարգիլելուն , և մանաւանդ հեղինակները չձերբակալելուն համար :


Եթէ Տիկին Լըբոնթ գիտնար թէ

իւր փեսացուն հայրը ժամանակաւ ոճրագործաց խուզարկու էր արհեստիւ , անշուշտ չէր գործածեր այս շեղուն , վասն զի գիտէր այն առածն որ կ'ըսէ թէ « Կախուած մարդու մը տան մէջ չուանի խօսք պէտք չէ ընել » :

Բայց Պ. Լըբոք Տը ժանթիյեի ըզգուշացեր էր իւր անցեալն անոր յայտնելէ :

Ինքզինք իբրեւ միջնակարգ քաղաքացի ցոյց տուած էր , որոյ հայրն առուտուրի մէջ գեղեցիկ հարլուտութիւն մը վաստկած էր . և որովհետեւ ինքն ալ իւր ապրուստին համար պէտք եղածէն աւելի ժառանգութեամբ մը մտած էր աշխարհի կենաց մէջ , ուստի այսպէս ըսելով ճշմարտութիւնը չէր խեղաթիւրեր : Միայն թէ ամբողջապէս չէր ըսեր : Մնաց որ , սեղանաւորին այրին՝ խօսք տալէ առաջ՝ տեղեկութիւններ ստանալու մասին անփոյթ եղած չէր , և քննութիւնն հանգուցեալ Լըբոնթի պատուաւոր բարեկամներէն միոյն յանձնուելով յոյժ նը-

176-76



պատարար եղած էր թէ՛ հօրն և թէ՛ որդւոյն :

Ոստիկանութեան պաշտօնատուներ միայն կրնար բռել Պ. Լըբոքի ճշդիւ ինչ եղած լինիր : Բայց ոստիկանութեան պաշտօնատուներ բացարձակապէս խորհրդապահ է այս նիւթոց մէջ , եթէ սակայն չար գործ մ'արգելուլ հարկ չլինի . բայց այս պարագայից մէջ ալ մեծ խոհեմութեամբ կը վարուի :

Սրգ՝ ոստիկանութեան պաշտօնատուներ որ և է ընկերային շահ մը չէր տեսներ , որպէս զի լաւ ամուսնութիւն մ'ընելէ արգելուր այնպիսի մարդու մը որդին , որ աննման հանճարով մ'եւ պարկեշտութեամբ ծառայած էր միշտ իրեն :

Լըբոք ոստիկանութեան խուզարկու մ'էր աներկիւղ և անսողիւտ : Իւր արհեստին գործածութեան մէջ ըրած շահերն օրինաւոր էին : Ինչո՞ւ համար ուրեմն իւր հին պետերը թոյլ չտային որպէս զի պատուաւոր ընտանիքի մը հետ խնամենար : Ինչո՞ւ համար նախապաշարման մը զօհէին զայն :

Ճշմարիտ է թէ տիկին Լըբոնթ ազատ չէր այն նախապաշարումէն , և անշուշտ պիտի զարհուրէր երբոր իմանար իւր փեսին հօր ճշմարիտ նախընթացները :

Բայց օրիորդ Լըբոնթ ականջ չպիտի կախէր այդ նախապաշարումներուն , վասն զի կաթոգին կը սիրէր զԼուի :

Սյդ կապուտակն և քաղցրաւաչ աղջիկն ալ կըբոտ բնաւորութիւն մ'ունէր , բայց իւր նշանածէն տարբեր կերպիւ կըբոտ :

Երիտասարդը սրտի բուռն յոյզեր ունէր , իսկ աղջիկը զեղումներ :

Լուի կը բորբոքէր , Թէրէզ կը խանդաղատէր :

Թէրէզ ինքզինք նուիրելու , իւր անձը զօհելու համար ծնած էր :

Գեղեցկութիւն , հրապոյր , շնորհք տալով անոր Սատուած , ամուսին և մայր յինելու համար ստեղծած էր զայն :

Ուրիշ բաղձանք չունէր , բայց միայն իւր կեանքը նուիրել անոր ոյ զինքըն ընտրած էր , և եթէ խնդրէր որ

մեռնի իրեն համար, ուրախութեամբ կը մեռնէր:

Բայց և միանգամայն չպիտի ներէր անոր որ ուրիշ մը սիրէր, և հաստատապէս կը հաւատար թէ իրմէ զատ ոչ զոք սիրած էր երբէք:

Միջնակարգ քաղաքացեաց մէջ ծընած, ուր Փարիզի միւս ընկերութեանց մէջ ծաւալած գաղափարները մուտ չունին, անծանօթ էր չարին, և մտքէն չէր անցներ թէ իւր նշանածին պատանութիւնն իրենին չափ անմեղ եղած չէր:

Միով բանիւ, Թէրէզ նախանձ լինելու հակում մ'ունէր, մինչեւ իսկ անցելոյն համար:

Բայց անցեալին վրայ չէր խորհեր, վասն զի ներկային մէջ երջանիկ էր, և ապագայն ալ կը ժպտէր իրեն:

Այն սարսափելի պատմութիւններն որով լրագիրք կը խոշտանգեն իրենց բաժանորդները, մտահոգութիւն չէին տար իրեն, ինչպէս նաեւ ոստիկանութեան պակասութիւնները:

Լուի, որ անկէց շատ աւելի չէր բարադեր Խաչ ընկեր, ինքզինք պարտաւորուած կարծեց սակայն պատասխանել Տիկին Լըքոնթի դիտողութեան, որ այսչափ ոճիրներու անպատիժ մնալուն վրայ կը դանգատէր:

— Քիչ մ'առաջ չէիք ըսեր, սիրելի տիկին, հարցուց այնպիսի փութով մը, որ կը ցուցնէր թէ հաճելի լինել կ'ուզէր իւր ապագայ զոքանչին, չէիք ըսեր թէ այդ խեղճ կինն սպաննող ոճրագործին հետքը գտնուած է:

— Դեռ ոչ, պատասխանեց այրին: Միայն կ'երեւի թէ սպանեալը զմոսել տուած և դիակնարանին մէջ ի ցոյց դրած են: Կը յուսան որ կը ճանչուի և այն ժամանակ . . .

— Ո՛հ, մայրիկ, գոչեց Թէրէզ, վերջացուցէք այդ տխուր խօսակցութիւն, և ուրիշ բանի վրայ խօսինք:

Եւ Լուիի դառնալով,

— Եւ ապարանջանն, ըսաւ ժրպտելով. այս իրիկուն պիտի բերէիք աներկբայ եմ որ մոռցաք:

Մոռնա՛լ, ի՛նչ անշահ բառ . ես բան մը չեմ մոռնար, երբէք չսխտի մոռնամ, և չեմ գիտեր մոռնալ :

— Ներեցէ՛ք, օրիորդ, ըսաւ երիտասարդը շփոթելով . հոս գալէ առաջ գոհարավաճառին երթալ կ'ուզէի, արգելքի մը հանդիպեցայ :

— Ի՛նչ արգելքի, պարո՛ն, հարցուց Թէրէզ ժպտելով . իրաւունք ունիմ իմանալու :

— Գործի մը պատճառաւ ուշ մնացի . . . իրաւագիտական գործի մը պատճառաւ :

— Օ՛, աւասիկ ձախող չքմեղանք մը :

— Վաղն, օրիորդ յապաղումը կը դարմանուի . ապարանջանը կուգայ :

— Կը յուսամ, սիրելի՛ Լուիս, ըսաւ Տիկին Լքքոնթ, որ յիմար ծախքեր չէք ըներ հարսանեկան ընծայի համար : Դուք աշխարհ կը մտնէք գեղեցիկ հարստութեամբ մը . բայց խնայութիւնը գէշ բան չէ : Խեղճ այրս անդադար կը յեղյեղէր ինձ, և իրաւունք ունէր : Ուստի կ'աղաչեմ ձեզ որ . . .

Այս իմաստուն խօսքն ընդմիջեցաւ ծեր սպասաւորի մը ներս մտնելովն, այն սպասաւորին, որ քանի մ'օր առաջ ներս մտցուցած էր զՊ. Թոյպիաք :

— Նախասնեկին մէջ մարդ մը կայ որ հիմա Խօսիլ կ'ուզէ Պ. Տը Ժանթիլեի հետ :

— Մա՛րդ մը, կրկնեց Լուի, զարմանալով այս անսովոր եղանակաւ ծանուցման վրայ :

— Այո՛, տէր, բաւական դժուճ կերպարանքով մարդ մը :

— Մուրացիկ մ'անշուշտ . բայց չեմ հասկնար թէ ինչո՛ւ հոս կուգայ կը վնտուէ զիս :

— Հոգ չէ, պարո՛ն, ըսաւ Թէրէզ քիչ մը խոժոռելով, որ առաւել կը գեղեցկացնէր զայն, պէտք է երթալ ողորմութիւն մը տալ : Կը կարծէք թերևս թէ կը ձանձրանամ ձեր բացակայութեան միջոցին : Է՛հ, ամենևին ոչ . գեղեցիկ դերք մ'ունիմ, զոր մայրիկս կարդալու թողաւութիւն ըրաւ ինձ՝ յոյժ բարոյալից լինելուն պատճառաւ . . .

Ալպէրիք Սըքոնտի յօրինած Օրէնքէր
 Բնակչի անուն վէպն : Հիմա նորէն ձեռ-
 քըս պիտի առնում և կ'աղաչեմ ձեզ
 որ երկար մնաք . . . յոյժ երկար . . .
 վասն զի շատ հետաքրքիր եմ իմա-
 նալու թէ այդ երկու քոյրերը պիտի
 ամուսնանան . . . խեղճ աղջիկներ . . .
 նշանած չունին :

— Մուրացիկ չէ, տէ՛ր, ըսաւ սպա-
 սաւորը : Կ'ըսէ թէ յոյժ կարևոր գոր-
 ծի մը համար եկած է :

— Արդեօք այն զարմանալի մարդն
 է որ անցեալ օր զիս տեսնել կ'ուզէր,
 և իմ տեղս Պ. Տը Ժանթիյեի ընդունեց
 զայն :

— Օ, ոչ, տիկին : Այս եկողն աղ-
 քատիկ կերպարանք ունի և դէմքը . . .

Սպասաւորը պէտք չունեցաւ մար-
 դուն դէմքը նկարագրելու, վասն զի
 անոր խօսած միջոցին մարդն երևցաւ
 դահլճին դրան երկու փեղկերուն մէջ-
 տեղէն, որ կէս մը բացուած էին ան-
 քաղաքավար այցելուին ձեռքը :

Նախ թէրէզ տեսաւ այն դէմքն,

լուսաւորեալ երկու մանր գորշ աչերով,
 որք երկիւղալի կերպիւ մ'իրեն կը նա-
 յէին անթարթ :

Շարժում մ'ըրաւ որ իւր մօր ու-
 շադրութիւնն արթնցուց, և Տիկին
 Լըքոնթ տեսնելով յանդուգն ինքնա-
 մուտն, զարհուրանաց ճիչ մ'արձակեց :

Սպանութեանց պատմութիւններով
 խճողեալ լրագրի մ'ընթերցումը քիչ մը
 վրդոված էր զայն : Մտաց այնպիսի
 տրամադրութեան մը մէջ էր, յորում
 ամենէն քաջասիրտներն ալ երբեմն կը
 գտնուին խոլականներու պատմութիւն
 լսելով, և ընտանեկան փոքր գահլճին
 մէջ անծանօթի մ'երևումը նոյն ազդե-
 ցութիւնը կ'ընէր, ինչ որ աւազակնե-
 րու արչաւանք մը կրնար ընել :

Լուի, առաւել բարկանալով քան
 վախնալով, մէկէն ոտքի վրայ ելաւ ը-
 սելով .

— Դուրս ըրէք այդ մարդ :

Սպասաւորն իսկոյն ետ դարձաւ իւր
 ապագայ տիրոջ հրամանը կատարելու,
 բայց շատ ուշ էր :

Անբաղաճաբար մարդն , որ կը համարձակէր այս կերպիւ ներկայանալ , արդէն դահլիճէն ներս մտած և դուռն իւր ետևէն գոցած էր :

Զգուշացաւ սպասաւորին պատահելէ , որուն դիմադրելու կարող էր , և փեղոյրն ի ձեռին յառաջացաւ շուրջանակի ողջունելով :

Ազնուական պարոնի մ' և մանաւանդ միլիոնատերի մը կերպարանք չունէր , վասն զի տօնական նոր լաթերն հագնող գործաւորի մը կը նմանէր . սրիկայի դէմք ալ չունէր , ոչ ալ մուրացկանի , որովհետեւ հանդերձները մաքուր էին :

Այրին , քիչ մը քաջալերուելով , մարդուն դէմքը կը դիտէր՝ որոյ վրայ պարկեշտութիւն կը փայլէր , և արդէն տրամադրութիւն կ'զգար օգնութիւն մ'անոր ընելու :

Թէրէզ քիչ մ'աւելի յուզեալ կ'երեւէր , իսկ նշանածը սաստիկ զայրացած էր :

— Ո՞վ թոյլ տուաւ ձեզ մտնել հոս ,

հարցուց ուղղակի մարդուն վրայ երթալով . ի՞նչ կ'ուզէք , ո՞վ էք :

— Ներեցէք ինձ , պարոն . . . տիկին և համայն ընկերութիւն , պատասխանեց խոնարհութեամբ տարօրինակ այցելուն : Արդեօք Պ. Տը Ժանթիյեի և Տիկին Լըքոնթի հետ խօսելու պատիւն ունիմ :

— Այո՛ , ըսաւ այրին , որ զգուշանալ կ'ուզէր կռիւէ :

Ի՞նչ պիտի ըսէք :

— Ներեցէք , ըսաւ անծանօթն աչքին ծայրով սպասաւորին նայելով , ըսելիքս յոյժ խորհրդաբար է , և կը փափաքիմ . . .

— Զափաղանց յանդգնութիւն է այս , գուցեց Լուի :

Եւ քայլ մ'առաջ դնաց , որպէս զի Ժպիրհին օձիքէն բռնելով դուրս նետէ :

Տիկին Լըքոնթ դարձեալ միջամտեց :

— Լուի , կ'աղաչեմ , ըսաւ :

Եւ սպասաւորին դառնալով .

— Դուրս ելիք , Անթուան , բայց մի հեռանաք :

Անծանօթը չէր ընկրկած երբոր Պ. Տը ժանթիյեի անոր վրայ քալեր էր . ընդհակառակն, երեք քայլ յառաջ եկեր էր և ուշադրութեամբ անոր դէմքը կը դիտէր, զոր սեղանին վրայ դրուած երկու մոմեր լիովին կը լուսաւորէին երբոր յառաջ քալեր էր :

Ձննութիւնն երեք կամ չորս երկվայրկեան չտեւեց, բայց սատանորդի մարդն այնպիսի աչեր ունէր, որք կարծես թէ մինչեւ Պ. Լըքոքի հոգւոյն խորերը կը կարդային :

Թէրէզ զարմանալով այս խուզարկու նայուածքին վրայ, այլազ ունեցաւ, իբր թէ վտանգ մ'սպառնար իւր նշանածին :

— Ահա մինակ ենք, բսաւ մայրը . կ'սպասեմ, պարոն, որ ձեր այցելութեան նպատակն իմացնէք մեզ :

— Շատ պարզ է, տիկին, պատասխանեց անծանօթն առանց վարանման :

Պահ մ'առաջ թղթապանակ մը գըտայ, որոյ մէջ դրամ կայ . . . մեծագումար դրամ . . .

— Է՛յ :

— Ես հարուստ չեմ, ճշմարիտ է, բայց պարկեշտ եմ . . . և որովհետեւ թղթապանակին մէջ թուղթի մը վրայ Տիկին Լըքոնթի անունն ու հասցէն գրուած էր, ըսի ես ինձ թէ փոխանակ թաղիս ոստիկանապետին տանելու, երթամ ու ղղակի այդ տիկնոջ յանձնեմ, որով թերեւս պանքտոմսները կորսնցնողն հանգիստ ննջէ այս դիշեր . . .

— Բարի, շատ բարի գործ մ'է այդ ձեր ըրածը, պարոն, գոչեց բարեսիրտ տիկինը : Միայն թէ կը սխալիք : Ո՛չ ես, ո՛չ աղջիկս դուրս չելանք այսօր . հետեւաբար ստակ կորուսած չենք :

— Ուրեմն Պ Տը ժանթիյեի կը վերաբերի թերեւս . . . որովհետեւ այդ անունն ալ կայ թուղթին վրայ :

— Ոչ . . . ոչ, ես բան մը կորուսած չեմ, ըսաւ երիտասարդը կակազելով :

— Չարմանալի բան է այս, միմնջեց Թէրէզ, որ քաջ կը նշմարէր իւր նշանածին չփոթումը :

Եւ գտնողին դառնալով ըսաւ .

— Կը հաճի՞ք ցուցնել մեզ թղթա-
պանակը :

— Ներեցէք, օրիորդ, պատասխա-
նեց այցելուն չափօզանց աչքի զարնող
վարանմամբ, արդարեւ կասկած չու-
նիմ աստ գտնուող անձանց վրայ . . .
բայց . . . կը հասկնաք . . . չեմ ուզեր
սխալիլ . . . և տիրոջմէն զատ ուրիշի
յանձնել թղթապանակն . . . ո՛ր գիտէ
ի՞նչ կը պատահի . . .

— Տիկին, գոչեց Լուի Լըքոք, այս
ծաղրաշարժ տեսարան շատ երկար
տևեց, և ներեցէք ինձ որ սա թշուա-
ռականին լրբութիւնն այլ եւս չներեմ,
և . . .

— Պարո՛ն, ընդմիջեց Թէրէզ, թըղ-
թապանակը ուստական սեկէ՞ է :

— Ճշմարիտն ըսելով՝ չեմ գիտեր,
պատասխանեց մարդը, բայց եթէ գոյ-
նքն ըսէք ինձ . . .

— Խոր կարմիր . . . ոսկեզօծ ճար-
մանդով . . . և երկու սկզբնատառե-
րով . . . Լ և Ժ :

— Ճշդիւ այդպէս : Եւ մէջը քանի՞
գրպան կայ :

— Երեք :

— Ճիշդ : Գրամոց գումարն :

Այս վերջին հարցման չպատասխա-
նեց Թէրէզ, և ոչ առանց պատճառի :

Մէկէն դարձաւ նշանածին ըսաւ .

— Բայց այդ թղթապանակը ձերն
է, Լուի : Մոռցա՞ք ուրեմն թէ ես տուի
ձեզ :

Այսօր ձեր յիշողութիւնը տկարա-
ցած կ'երեւի, աւելցուց սրտայուզու-
թեամբ մը, զոր ի զուր ծածկելու կ'աշ-
խատէր :

— Ներեցէք ինձ, պատասխանեց
Պ. Լըքոք խեղդուկ ձայնիւ : Չէի կար-
ծեր, չէի կրնար կարծել թէ այս մարդ-
ճշդիւ կը բերէր ինձ . . .

— Սակայն գիտէիք որ կորուսած
էիք, վասն զի . . . ես բան մը չեմ
մոռնար . . . յոյժ տխուր էիք այս
իրիկուն երբոր եկաք . . . և կ'ուզէ՞ք
որ մէջը գտնուածն այլ բան մը ձեզ, հինգ
հազար ֆրանք, ապարանջանիս գինը :

Մի՛ շառագնիք . . . այժմ կը ներեմ
ձեզ ապարանջանս դնած չլինելնիդ . . .

բայց ինչո՞ւ կը ծածկէիք ինձմէ ճըշմարտութիւնը . կը վախնայիք որ կըշտամբանք պիտի լսէիք, աւելցուց աղջկը ծիծաղելով :

Թէրէզ գտած էր վերստին իւր զըւարթութիւնն յորմէ հետէ կը խորհէր որ իւր տարփաւորին վրդովման պատճառը գուշակած էր :

— Հինգ հազար ֆրանք, գոչեց Տիկին Լըքոնթ : Բայց մեծ գումար մ'է այդ, և եթէ այս պարոնը չլինէր, որ կը յուսամ թէ պիտի հաճի արժանաւոր վարձ մ'ընդունիլ . . .

— Ե՞ս, տիկին, ըսաւ մարդն, օ՛, ո՛չ . . . Ես բան մը չեմ ուզեր . պարկեշտութիւնն արժանիք չունենար եթէ վարձք ընդունի . . . Ես բաւական լաւ վարձատրուած եմ, երբ կը մտածեմ որ պարոնին կորսնցնել չտուի հինգ հատ գեղեցիկ հագարնոց պանքտոմս, և այսպիսի գեղեցիկ օրիորդի մ'իրեն տուած յիշատակն . այս կը բաւէ ինձ, ազնիւ տիկին :

Ի՞նչ ըսեմ : Իմ ալ խելքիս վչեց եր-

թալ պտոյտ մ'ընել դիակնարանին մէջ :

— Դիակնարանին մէջ, գոչեց Թէրէզ : Դիակնարանէ՞ն գտաք այդ թըղթապանակ :

— Այո՛ . . . ապակափեղկին առջեւէն . . . և հրաշք է որ ուրիշ մէկը չը վերցուց զայն, վասն զի անթիւ բազմութիւն կար սպանեալ կինը տեսնելու համար :

— Դո՞ւք ալ գնացիք, Լուի՛, հարցուց մանկամարդուհին, աչերը գրեթէ լցուած :

— Այո՛, կակազեց նշանածը . . . դիպուածն այնպէս բերաւ որ առջևէն անցայ . . . և ներս մտայ . . . :

— Շնորհակալ եմ որ չըսիք ինձ զայդ . . . և կ'ուզէի որ չգիտնայի :

— Այժմ, պարոն, ըսաւ անծանօթը, գործը կարգադրուած է : Նկարագրութիւնը ճիշդ է : Դուք ալ պահ մ'առաջ գնացիք տեսաք Մաշայի աղջիկով կինը . . . կ'երևի որ այսպէս կը կոչուի լրագրաց մէջ . . . ինչե՛ր կը հընարեն այդ խմբագիրք . . .

— Համառօտե՛նք , կ'աղաչեմ :

— Օ՛ , հիմա կը լմննայ . ուրիշ բան չմնար ինձ՝ բայց միայն ձեզ յանձնել հազար ֆրանքնոց քուրջերն և զանոնք պարունակող տիփիկն :

Աւասիկ նախ թղթապանակը . ձե՛րըն է :

— Այո՛ . . . կը ճանչեմ . . . տուէք , մըմնջեց Լուի ձեռքն երկնցնելով :

— Վայրկեան մը . պէտք է որ նախ պանքտոմոններն համրեմ ձեր առջև , որպէս զի ցուցնեմ ձեզ թէ ամբողջ են :

— Աւերորդ է , ես կը հաւտամ ձեզ :

— Ոչ , ոչ . կանոնաւորութիւնը լաւ բան է :

Աւասիկ մէկ , երկու , երեք , չորս , հինգ . . . ամբողջ են :

— Ես չէի կասկածեր , և որովհետեւ դուք ստուգեցիք . . .

— Ամենն ասոնք չեն . տակաւին թուղթ մ'ալ կայ , որոյ վրայ ձեր . . . և տիկնոջ անունը գրած էք . . . բարեբաղդաբար . . . վասն զի առանց ադոր չպիտի կրնայի գտնել ձեզ :

Երիտասարդը շարժում մ'ըրաւ թղթապանակն առնլու համար , զոր անձանօթը չէր փութար յանձնել իրեն :

— Այս անգամ թղթապանակին պարունակութեան ցանկն աւարտեցաւ , յարեց խղճամիտ անձանօթն :

Յետոյ աւելցուց .

— Բայց ոչ , Ռոպէր Հուտէնի փեղոյրն է այս թղթապանակ . լուսանկար մ'ալ կը գտնեմ մէջը . . . կնոջ լուսանկար մը . . .

Անշուշտ օրիորդինն է , յարեց թէրէզի ցուցնելով զայն :

Թէրէզ աչքն անդին դարձուց :

Իւր կնոջական բնազդում կ'ազդարարէր իրեն թէ պէտք չէր նայիլ այն պատկերին :

Նախ , աներկբայ էր որ իրենք չէր , վասն զի իւր լուսանկարն հանել տուած չէր երբէք :

Չէր ուզեր իւր գեղեցիկ դէմքը լուսանկարչի մը յանձնել , որ կրնայ ուղածին չափ ընդօրինակել և ուղողին վաճառել :

Իւր դէմքը մի միայն զինքը սիրող-
ներուն պահել կ'ուզէր :

Ասկէ զատ՝ իւր նախանձութիւնը
կ'արթննար արդէն :

Անձանօթը կ'ըսէր իրեն թէ լուսա-
նկարը կնոջ մը պատկերն էր , և այդ
կին գեղեցիկ պարտէր լինել , որովհե-
տեւ մարդը կը սխալէր և Թէրէզի
պատկերը կը կարծէր :

Ինչո՞ւ համար Լուի խնամով կը պա-
հէր այդ պատկեր : Եւ թղթապանակին
իւրը լինելը խոստովանելու համար ցոյց
տուած վարանումն՝ արդեօք անհաւա-
տարմութիւն մը , դաւաճանութիւն մը
ծածկելու համար չէ՞ր :

Դեռատի աղջկանց երեւակայու-
թիւնը շուտ կը քալէ . Թէրէզինն ալ
արդէն դժնդակ ենթադրութիւններ կը
դարբնէր :

Տիկին Լըքոնթ բոլորովին նոյն պատ-
ճառները չունէր վրդովելու , և սակայն
այս տեսարան կը խռովէր զայն և սիրտն
անհանգիստ կ'ընէր :

Աղօտաբար կ'զգար թէ տխուր

գաղտնիք մը կար այս քիչ շատ ակա-
մայ վրիպանաց ներքեւ , և թէ պանք-
տոմսները գտնող պարկեշտ մարդը կա-
տակերգութիւն մը կը խաղար , որոյ
նպատակը չէր կրնար տակաւին հաս-
կընալ :

Գալով Պ. Լըքոքի որդւոյն , իւր
դէմքն ըստ բաւականի կը ծանուցանէր
թէ չարաշուք լուսանկարին յանկարծ
երեւան հանուիլը սարսափելի հարուած
մը տուեր էր իրեն :

Երեսին գոյնը մոխիր կտրած էր , և
կծկեալ ձեռքը թիկնաթոռի մը յենա-
րանը բռնած էր :

Կարծես թէ մահուան վճիռը լսող
դատապարտելոյ մը մեքենական շար-
ժումն էր :

Իրենց նստարանին կը փաթթուին ,
ինչպէս ոգեվարք իրենց անկողնին վեր-
մակներուն :

Կը թուէր թէ Լուի Տը Ժանթիլյեի
ինքզինք կը պաշտպանէր աներեւոյթ
դահճաց դէմ , որք զինք քաշելով կա-
ռափնարան տանելու կ'աշխատէին :

Այս թատերական տեսարանին հեղինակն հանդարտութեամբ կը դիտէր այն տարօրինակ պատկերը զոր Տիկին Լըքոնթի քիչ մ'առաջ խաղաղ դահլիճը կը ներկայէր, և չնչմարել կը ձեւանար այն յուզումը՝ զոր կ'արտադրէր թղթապանակին պարունակութեանց ցանկն, որոյ մանրամասնութիւնները ցոյց տուած ժամանակ հաճոյք կ'զգար կարծես՝ ինչպէս դերասանք հաճոյք կ'զգան իրենց բրած ճարտար ազդեցութեան վրայ :

Սակայն աչքին ծայրով Պ. Տը ժանթիյեի կը նայէր :

— Կ'երեւի թէ սխալած էի, ըսաւ ետ քաշելով լուսանկարը՝ զոր թէրէզի աչքին առջեւ դրած էր. ներեցէք, օրիորդ. կը կարծէի թէ ձեր պատկերն էր, ապա թէ ոչ՝ չէի համարձակեր . . .

— Տուէք, ըսաւ երիտասարդն ընդմիջելով. այդ պատկերն իմն է :

— Պանքտոմաներն ալ . . . թղթապանակն ալ . . . դիտեմ, և ամենն ալ ձեզ պիտի տամ, սիրելի պարոնս . . .

և առանց վարձուց, ինչպէս որ արդէն ըսի ձեզ . . . մեք հարուստ չենք, բայց պարկեշտ ենք :

— Ադոր տարակոյս չունիմ, ըսաւ Լուի խեղդուկ ձայնիւ, և կ'աղաչեմ որ ինձ յանձնէք այդ . . .

— Երբոր առանց վարձուց կ'ըսեմ, անձնագովութիւն կ'ընեմ, յարեց անծանօթը : Բայց կը խնդրեմ վարձք մը . . . որ սուղ չէ ձեզ համար . . . այսինքն թոյլ տաք ինձ որ լուսանկարը դիտեմ . . . գեղեցիկ անձի մը դէմքը . . . զոր հաճոյք կ'զգայ մարդ տեսնելով :

— Կ'արգելում ձեզ զայդ, գոչեց Պ. Տը ժանթիյեի մարդուն վրայ վազելով՝ որպէս զի խլէ ձեռքէն այն չարաչուք պատկերն :

Անծանօթը խլել չտուաւ զայն. իսկոյն ետ քաշուելով՝ սեղանին միւս կողմն անցաւ :

Յետոյ պատկերը կանդեղի մը լուսոյն բռնելով՝ ծռեցաւ որպէս զի մօտէն դիտէ :

Սակայն թէրէզ, սիրտն ելած և աչքը լցուած, յամրաբար նշանածին մօտեցաւ և միմնջեց անոր ականջի վար.

— Ինչո՞ւ կը պնդէք որ մարդ չը տեսնէ այդ լուսանկար :

Եւ տեսնելով որ լուռ կը կենար,

— Պատասխան տուէք ինձ, Լուի, ըսաւ օրիորդն ստիպմամբ . . . պատասխան տուէք . . . գլխաւով ինձ . . . սիրտս կը տրորի . . .

— Աւասիկ նոր . . . և հետաքրքրաշարժ բան մ'ալ, գոչեց յանկարծ այցելուն : Զարմանալի՛ բան, բնաւ մտքէս չէր անցնէր :

— Ի՞նչ կայ, պարո՞ն, հարցուց Տիկին Լըքօնթ դողալով :

— Այս դէմքը ճշդիւ սպանեալ կընոյ դէմքն է :

— Ի՞նչ կ'ըսէք . . . կարելի բան չէ, թոթովեց այրին :

— Օ՛, չեմ կրնար սխալիլ, բարի՛ տիկին : Ես պահ մ'առաջ տեսայ զայն դիակնարանին մէջ, և կը թուի ինձ թէ տակաւին աչքիս առջեւն է : Այնպիսի

գլուխ մը չմոռցուիր . ուրիշ մ'ալ չկայ անոր նման : Ճշդիւ նա է :

Թէրէզ նուազելով ինկաւ թիկնաթուռի մը վրայ :

— Եւ լուսանկարն ալ լաւ յաջողեր է, շարունակեց մարդն, ամեն ինչ ճշդիւ նկարուած է . . . մինչեւ իսկ այն սեւ նիշը՝ զոր ունէր ձախ այտին տակով . . . : Պարոնն, որ ինձ պէս կը ճանչէ զայն, անշուշտ պարտի յիշել . . . հազուստն ալ նոյն է . . . ժանեկազարդ շրջագգեստ մը . . . : Կարծես թէ ըսպաննուելէն մէկ ժամ առաջ հանուած է այս լուսանկար : Եւ կուրծքին վրայ դամուած խաղի թուղթը . . . Մաշային աղջիկը . . . պատկերին մէջ ձեռքը բռնած է . . . :

— Ալ չափն անցաւ, ըսաւ Պ. տը ժանթիյեի անծանօթին վրայ քալելով բռնափակ . ալ չպիտի թողում որ շարունակէք այդ անպատեհ շողակրատութիւններ :

Տուէք ինձ սա թղթապանակ, և անմիջապէս դուրս ելիք . ապա թէ ոչ . . .

— Ապա թէ ոչ, ի՞նչ, հարցուց տարօրինակ անծանօթը՝ պատկերը թող- թապանակին և թղթապանակն ալ իւր գրպանին մէջ դնելով :

— Հիմա մէկը կը կոչեմ որ կ'օգնէ ինձ բռնութեամբ ձեր վրայէն առնլու և ձեզ ալ դռնէն դուրս նետելու :

— Լուի՛, կ'աղաչե՛մ, գոչեց Տիկին Լըքոնթ :

— Ես խորհուրդ չեմ տար ձեզ այդպիսի փորձ մ'ընելու, ըսաւ մարդը պաղութեամբ. նախ՝ վասն զի ուժեղ ձեռք ունիմ, և չէք կրնար զիս վախ- ցընել՝ թէև զիս հոս առաջնորդող ծե- րուկն ալ օգնական ունենաք ձեզ : Երկրորդ՝ կրնաք զղջալ յետոյ, վասն զի ուղղակի թաղիս ոստիկանապետին կ'երթամ :

Պ. Տը ժանթիյեի բարկութենէն գունաթափ եղած էր. այս խօսքին վրայ դէմքը կապարի գոյն առաւ և հեղձամղձուկ ձայնիւ մ'ըսաւ .

— Եթէ համարձակիք հոն երթալ, կ'ըսեմ ոստիկանապետին թէ գող էք . . .

և կ'ապացուցանեմ, կը հասկնա՞ք . վասն զի այդ թղթապանակն իմ վրայէս գողցուած է՝ զգեստիս գրպանը կըտ- րելով, զոր կրնամ ցուցնել : Ձեր բա- ցած ձեղքը կեցած է տակաւին . . . այո՛, գողութիւնն ասկից քանի մը ժամ առաջ եղած է, և գողօնը ձեր ձեռքն է : Շատ պարզ է այս, կարծեմ. ուս- տի կը զարմանամ ձեր լրբութեան վրայ, և ես աւելի շուտ վերջ կուտայի այդ կատակերգին՝ զոր քսան վայրկենէ ի վեր կը խաղաք, եթէ տիկինն ու օ- րիորդը չխնայէի անհաճոյ տեսարանի մը ներկայ գտնուելէ :

— Օ՛, եթէ գործն ինձմէ միայն կախում ունենար, ամեն ինչ քաղցրու- թեամբ կը կատարուէր, ըսաւ այցելուն կատարեալ հանդարտութեամբ : Ես կը յարգեմ տիկնայքն, և չեմ սիրեր աղ- մուկ հանել : Դուք էք, սիրելի՛ պա- րոնս, որ կաթնապուրի պէս կը փըր- փըրիք :

— Բա՛ւ է, գոչեց երիտասարդն ևս առաւել զայրաւնալով անծանօթին

ընտանեկան ձևերէն : Յանձնեցէք ինձ
դա թղթապանակը , կամ պահեցէք ,
հոգս չէ . բայց դուրս ելէք : Աւելի
կ'ընտրեմ ձեզ թողուլ այդ դրամը զոր
գողցած էք ինձմէ , քան գողութեան
գործի մը խառնուիլ , թէև իբր գան-
գատող . և կը կարծեմ որ այժմ ոչ ևս
կը յօժարիք դիմել օստիկանապետին :

Անծանօթը չպատասխանեց , բայց
մեկնելու երևոյթ ալ չունէր :

Թղթապանակը գրպանելէն յետոյ՝
իւր երկայն զգեստը կոճկեց վրայէն ,
և սկսաւ ձեռքը բռնած փեղոյրը դար-
ձունել վարանեալ դէմքով մը , որ ներս
մտնելէն ի վեր ցոյց տուած համարձա-
կութեան հետ հակապատկեր մը կը
ձևացնէր :

Տիկին Լըքոնթ , որոյ սիրտը կը
տրոփէր այս տեսարանին ազդած վըր-
դովումէն , քիչ քիչ հանդարտիլ սկսաւ ,
և կը խորհէր որ անծանօթին բռնած
ընթացքը չարագործութիւն ընող մար-
դու ընթացք չէր :

Թէրէզ , սրտաբեկ , գլուխը կախած ,
կը կրկնէր ցած ձայնիւ .

— Այդ կնոջ պատկերն իւր սրտին
վրայ դրած էր , ուրեմն կը սիրէր զայն :

— Է՛ , ինչ բանի կ'սպասէք մեզ
ազատելու համար ձեր ներկայութե-
նէն , ըսաւ Պ. Տը Ժանթիյեի սպառ-
նալից դէմքով :

— Պիտի ըսեմ ձեզ , սիրելի՛ պա-
րոնս , պատասխանեց մարդը : Նախ ,
համոզուեցէք թէ բան մը չունիմ խըզ-
ճիս վրայ : Կը հաւատամ որ թղթա-
պանակը ձեր վրայէն գողցուած է ,
բայց յայնժամ հարկ կը լինի որ գողը
կորուսած լինի զայն , վասն զի հաւա-
տացէք որ ես գտայ զայն :

— Եթէ այս պարոնը գողցած լի-
նէր , չէր բերեր ձեզ , սիրելի՛ Լուիս ,
ըսաւ Տիկին Լըքոնթ , որ գործն անուշ
տեղը կապել կ'ուզէր :

— Ծնորհակալ եմ , տիկին , ըսաւ
այցելուն քաղաքավարութեամբ . դուք
ձեր մատը բուն ճշմարտութեան վրայ
դրիք , և կը յուսամ որ այդ կը բաւէ
պարոնին : Պիտի հասկնայ որ եթէ
թղթապանակն իրեն չեմ յանձներ ,

պատճառն այս է որ ես յանցաւոր կը լինիմ եթէ թաղիս ոստիկանապետին չյանձնեմ այս թղթապանակն, որոյ մէջ սպանեալ կնոջ պատկերը կայ: Խորհեցէք անգամ մը. ոստիկանութիւնն ութ օրէ ի վեր կ'որոնէ և բան մը չը գտներ... այս պիտի օգնէ թերևս...: Ես ամեն առաւօտ սու մը կուտամ, լրագիր մը կը գնեմ իմ կարողութեանը համեմատ...: Դեռ այսօր կարգացի անոր մէջ թէ ամեն բարի քաղաքացւոյ պարտքն էր լուսաւորել դատական իշխանութիւնն... և ես ալ, պարծանք չլինի, բարի քաղաքացի մը կը ճանչեմ զիս...:

— Ուրեմն, հարցուց Պ. Տը Ժանթիյեի այլայլեալ ձայնիւ, մտադիր էք երթալ...

— Ոստիկանապետին, այո՛, և անյայտալ: Մինչեւ իսկ հոնկէ պարտէի սկսիլ՝ եթէ հոս գալէս առաջ լուսանկարը տեսած լինէի. բայց ես պանքտոմաներուն և ձեր անունը կրող թղթին միայն ուշադրութիւն ըրած էի նախ:

Օ՛, մի՛ վախնաք, աւելցուց մարդը թէրէզի նշանածին նայելով անքթթիթ, թղթապանակն և պանքտոմաները ձեզ կը տրուին:

Եւ աւելի շուտով ստանալու համար լաւ կ'ընէք հետս գալ:

Այս առաջարկին վրայ, զոր դռնէն դուրս ընել ուզած այցելուն սիրալիր դէմքով մը կ'ընէր, Պ. Տը Ժանթիյեի չկրցաւ ջղային ցնցում մը ծածկել:

— Ի՞նչ պէտք, պատասխանեց խքտիւ, ես բան մը չեմ ուզեր ոստիկանապետէն: Միւս կողմէ, այդ դրամը ձերն է, որովհետեւ դուք գտած էք, ուստի ձեզ կուտամ:

— Օ՛, ոչ, իմս չէ, դոչեց անծանօթն ուրախ դէմքով: Ես չեմ թքներ դրամներուն վրայ երբոր ես շահած լինիմ. բայց այս քուրջերն իմս չեն, և դուք չարաչար կը սխալիք կառավարութեան պարգեւեւելով զանոնք:

Դուք շատ հարուստ պարտիք լինիլ որ այդ դումարը բանի տեղ չէք գներ... բայց փոյթ չէ... կը յու-

սամ որ պիտի հաճիք հետս գալ ոստիկանապետին պաշտօնատունը :

— Կը կրկնեմ ձեզ թէ պէտք չկայ :

— Ձեր գաղափարն է այդ : Արդարեւ , ինչպէս որ կ'ուզէք : Բայց վերջապէս ամեն ժամանակ կրնաք պահանջել ձեր պանքտոմոններն , և կը կարծեմ որ յետոյ չէք սպասեր :

Ուրեմն ես միայնակ երթամ խօսիմ թաղիս ոստիկանապետին հետ , ըսաւ մարդն հրաժեշտի ողջոյն տալու պատրաստուելով :

Տիկին Լըքոնթ սփոփանաց հառաչմ'արձակեց :

Բարի կինը կը փափաքէր այս տեսարանին շուտով վերջանալը տեսնել , որ վերջին աստիճան կը վրդովէր զինք :

Լուի կը ջանար ինքզինք անխռով ցուցնել , և չէր յաջողեր :

Թէրէզ անոր կը նայէր այնպիսի աչերով , որոց մէջ սրտատանջութիւն կը կարդացուէր , և ուրիշ աւելի խորին և աւելի դժնդակ զգացում մը :

— Ա՛, չար սատանայ , գոչեց յան-

կարծ այցելուն , կը խորհիմ որ այսչափով չկրնար վերջանալ այս գործ :

— Ի՞նչ բսել կ'ուզէք , հարցուց իսկոյն Պ. Տը Ժանթիլի :

— Ըսել կ'ուզեմ թէ ոստիկանապետը շատ մը տեղեկութիւններ պիտի ուզէ ինձմէ ձեր վրայ : Բարի մարդ մ'է . . . կը ճանչեմ . տասն տարի կայ որ անոր թաղին մէջ կը բնակիմ . . . բայց իւր պաշտօնն է հետաքրքիր լինիլ . . . ասկէց զատ , այս Մաչայի աղջրկան գործէն ի վեր բովանդակ ոստիկանութիւնն յուզման մէջ է . . . և բնական է . . . ուստի տարակոյս չկայ որ եթէ ոստիկանապետն իմանայ թէ սպանեալ կ'նոյ պատկերը կար ձեր քով , պիտի ուզէ հարցաքննել ձեզ իմանալու համար թէ նա՞ տուած է ձեզ :

Յետոյ նշմարելով որ երիտասարդին գոյնը կը նետէր ,

— Սակայն , յարեց , յայտնի է թէ դուք լուսանկարչէ մը գնած էք . . . շատ պարզ է այս , ճշմարիտ չէ՞ . բայց ի՞նչ պիտի ընէք , ոստիկանապետներուն ա-

մենն ալ այսպէս են . . . և մերինը թէև բարի մարդ է, գրաւ կը դնեմ որ ձեզ պիտի կոչէ, և այս իրիկուն :

Երիտասարդն յայտնապէս ցնցուեցաւ :

— Եւ գիտէք թէ մեծ տուներու նշանազգեստով սպասաւոր մը չպիտի լինի ձեզ առնող տանողն :

— Ոստիկանութեան զինուորները պիտի դան տունս, գոչեց այրին սարսափահար :

— Ո՛չ, բայց գրեթէ նոյնն ըսել է : Երկու դործակալ պիտի ղրկէ . . . քաղաքացիի կերպարանքով . բայց տեսնողը կը ճանչէ զանոնք իրենց ձևերէն, և տուն մը մտած ժամանակնին, մէջինները շուտով կը հասկնան անոնց ո՛վ լինին և բնականաբար դող կ'ելնեն . . . մանաւանդ որ այդ մարդիկ շատ անգամ փափուկ զգուշաւորութեամբ չեն վարուիր ամենուն հետ :

Ո՛չ, պատուոյս վրայ կ'երդնում, որ եթէ ես լինէի պարոսին տեղ, ադոնց դալուն չէի սպասեր, և ես կ'ելնէի

համարձակ ոստիկանատունը կ'երթայի : Մէկ ժամու գործ է ասկէց հոն երթալը . . . քսան վայրկենի մէջ կը լմնայ խօսակցութիւնն, և կրնաք երկու ժամէն վերադառնալ և այս տիկիններուն սիրան անդորրել, ձեր պանքատմաներն ալ հետերնիդ բերելով : Միայն լուսանկարը կը պահեն :

Պ. Տը Ժանթիյելի լուռ կը կենար, բայց սիրտը տակնուվրայ ընող զգացումները դէմքին վրայ կը ցոլային :

— Կը կարծեմ թէ, սիրելի Լուիս, այս պարոնն իրաւունք ունի, քսաւ Տիկին Լըքոնկո : Լաւագոյն է շուտով լմնցընել այս անհաճոյ գործ : Աղջիկս և ես հանգիստ չպիտի լինինք մինչև որ չիմացնես մեզ թէ վերջացած է :

Գնացէք ուրեմն : Մեք կ'սպասենք ձեզ, և կը յուսամ որ երկար չենք քսպասեր, վասն զի պիտի հրամայեմ որ մեր ախոռին երկու լաւագոյն ձիերը լծեն մեր փոքր կառքին :

— Պէտք չկայ ադոր, տիկին, ըսաւ մարդն : Ես կառք մը բռնած եմ

ժամով, և բարերազդաբար այնպիսի կառք մը հանդիպեցաւ ինձ, որ սատանայի պէս կ'երթայ: Ներեցէք ինձ յայտնել ձեզ, տիկին, թէ ժամանակ կը կորսնցնենք հոս մինչև որ ձեր կառքը լծուի... ասկէց զատ պետք չէ որ տան կառք մը տեսնուի ստիկանատան դուռը: Գործակալները խօսեցնել կուտան ձեր կառավարն, և բերնէն բան կը քաղեն:

Այս խորհրդածուծիւն լաւ թուեցաւ Տիկին Լըքոնթի, և չպնդեց:

Լուի Տը ժանթիյեի թէրէզի կը նայէր, և այնպէս թուեցաւ իրեն անոր դէմքէն թէ մօրը կարծիքէն էր:

Միւս կողմէ, քիչ մը մտածելով՝ գրեթէ հանդարտած կ'երևէր:

— Լաւ, ձեր հետ կուգամ, պարոն, ըսաւ պարզապէս:

Եւ սեղմելով իւր ապագայ զտրանչին ձեռքը՝ զոր իրեն կ'երկնցնէր, յառաջացաւ որպէս զի հրաժեշտ առնու իւր նշանածէն, որ իրմէ շատ աւելի յուզեալ էր:

— Պիտի ներէ՞ք ինձ, մրմնջեց այնչափ ցած ձայնիւ որ նա միայն կրցաւ լսել, պիտի ներէ՞ք ինձ որ վիշտ պատճառեցի ձեզ:

— Այո՛, պատասխանեց թէրէզնոյն. պէս ցած ձայնիւ, վասն զի կը յուսամ որ պիտի կրնաք արդարացնել զձեզ:

— Կը կասկածի՞ք: Կը կարծէք ուրեմն թէ ե՞ս սպաննած եմ այն կին:

— Այն ոճրին համար չէ որ կ'ամբաստանեմ ձեզ, ընդմիջեց աղջիկը ժպտելով իւր արտասուաց մէջէն: Երբոր վերադառնաք, իմ առջևս պիտի արդարացնէք զձեզ... մոռցած լինելնուդ համար թէ ես իմ պատկերս խոտտացած էի ձեզ... և ուրիշի մը պատկերը ձեր վրայ կրե՞նուդ համար:

— Կ'երդնում ձեզ թէ շատ դիւրին է, ըսաւ սիրահարը շերմութեամբ:

Եւ ողջունելով զՏիկին Լըքոնթ, դուռը ցուցուց մարդուն, որ քաղաքավարութեամբ մէկ կողմ քաշուած էր նշանածներուն հրաժեշտին ժամանակ, և չուզեց առաջ դուրս ելնել:

Սպասաւորին քունը տարեր էր նա-
խասենեկին մէջ, վասն զի անձանօթին
այցելութիւնն երկար տեւեր էր, և
ընդոստմամբ արթնցաւ երբոր Պ. Տը
Ժանթիյեի ձայնը լսեց:

Վազեց փութանակի փեղոյրն ու
կրկնոցը տուաւ. բայց մեծ եղաւ զար-
մանքն երբ տեսաւ որ իւր ապագայ
տէրը կ'երթար այնպիսի մարդու մը
հետ, որ ընկերային մարդու մը դէմք
չունէր բնաւ:

Ծերունի ծառայն, լաւ կրթուած
լինելով, չէր համարձակեր դիտողու-
թիւն ընել. միայն, երբոր վանդակա-
դուռը բանալով կառք մը տեսաւ գե-
տափին վրայ, սա խօսքն համարձակե-
ցաւ ըսել ազդարարութեան ձեւով.

— Լաւ կ'ընէք, կարծեմ, տէ՛ր իմ,
եթէ Բուան—տիւ—ժուրի կողմէն եր-
թաք: Չմեռն ամայի է ծառաստանն:

Երիտասարդը պատասխան չտուաւ
և արագապէս դէպի կառքը դիմեց,
անձանօթն ալ ետեւէն, որ միշտ անոր
ետեւէն կ'երթար՝ փոխանակ առջեւէն
երթալու:

Հակառակ իւր նմաներուն սովո-
րութեան, կառավարը պատշաճ դա-
տած չէր կառքին մէջ պառկիլ՝ փո-
խանակ իւր ձին պահպանելու, և թէ-
պէտ շատ ցուրտ էր, իւր նստարանին
վրայ կ'սպասէր երասանակները մէկ
ձեռքն և խարազանը միւս ձեռքը,
մեծ տան մը կառավարի նման:

Այցելուն վազեց կառքին դռնա-
կին քով, ընկերը մէջը նստուց, և ին-
քը դնաց կառավարին երկու խօսք ը-
սաւ, զորս Պ. Տը Ժանթիյեի չլսեց և
չուզեց լսել:

Ի՛նչ փոյթ կանխաւ գիտնալու ան-
ձանօթին տուած հասցէն, քանի որ
տարակոյս չկար թէ ոստիկանութեան
պետին հասցէն միայն կրնար լինիլ,
ուր որոշուած էր երթալ:

Ձին նետի պէս երթալ սկսաւ եր-
բոր երկու ուղեւորք նստան կառքին
մէջ, և շատ չանցած Պուլոյնի գիւղին
խճուղիներուն մէջէն անցաւ:

— Յիրաւի, ըսաւ անձանօթը, շատ
գոհ եմ որ անտառին մէջէն չէ մեր
երթալու:

երթալու ճանքան : Զեր սպասաւորն ի-
րաւունք ունի : Զմեռն , և գիշեր ժա-
մանակ լաւ չէ . . . մանաւանդ երբ խո-
շոր գումար մ'ունենայ մէկն իւր գըր-
պանին մէջ :

— Մի վախնաք , ես ատրճանակ մը
ունիմ վրաս , ըսաւ Պ. Տը ժանթիյեի :

Եւ այսպէս կ'իմացնէր իւր ուղեկ-
ցին թէ զինեալ էր :

— Լաւ է այդ նախազգուշութիւն
մինչեւ իսկ եթէ տիկնանց քով երթայ
որ, գոչեց ուղեկիցն : Ես իմ մորթս միայն
ունիմ պաշտպանելիք , այս պատճառաւ
երկու բռունցքէս զատ ուրիշ զէնք չեմ
կրեր վրաս : Սակայն , այս իրիկուն ,
մորթէս աւելին ունիմ , որովհետեւ հինգ
հազար ֆրանք կայ վրաս , որ իմս չէ
արդարեւ : Ես կենացս մէջ տեսած չէի
այսչափ դրամ :

— Ս, յժմ որ համամիտ ենք , ըսաւ
Լուի , կը յուսամ որ ոստիկանապետին
հետ տեսակցելնէս յետոյ կը հաճիք
ընդունիլ պանքտոմաներէն մին , զոր
կորուսած չլինելս ձեզ կը պարտիմ :

— Ո՛չ յառաջ , ո՛չ յետոյ : Ժան Բի-
էտուշ՝ իւր պարտականութիւնը կատա-
րելու համար՝ պէտք չունի իւր թաթը
իւղոտելու :

— Բիէտու՛շ , կրկնեց երիտասարդը
զարմանալով այս անհետեթեթ անուան
վրայ :

— Ս, յո՛ , այսպէս կը կոչուիմ : Ի՞նչ
կրնանք ընել , մարդ մը չկրնար կա-
տարեալ լինիլ . ես հանրակառաց ըն-
կերութեան գործարաններուն մէջ իւղ
քսող եմ : Փայլուն գործ մը չէ արդա-
րեւ , բայց կ'ապրեցնէ զիս և ստակ ալ
կ'աւելցնեմ խնայութիւն ընելով :

Թերեւս վաղը հազար ֆրանք պիտի
դնեմ խնայութեան գանձարանն իմ
լաճերուս համար . . . որ երեք են ,
ըսեմ ձեզ :

— Ընդունեցէք իմ ընծայս , և փո-
խանակ հազարի՝ երկու հազար դրէք :

— Վտանգ չկայ . այս թղթապա-
նակ նուիրական է , ըսաւ Բիէտուշ իւր
զգեստին գրպանին զարնելով : Ես չեմ
կրնար ձեռք դպցընել ասոր , անհող-
եղիք :

Օրինակի համար, աւելցուց, չեմ արգելուր ձեզ այս կառքին վարձքը վճարելէ։ Առ նուազն չորս ժամ պիտի ունենանք, երկուքն ամրութիւններէն դուրս։ Վասն զի իմ թաղիս ոստիկանապետը քաղաքադրան մօտ չընակիր։

— Ո՛ւր կը բնակի։

— Սիթէի մէջ... Նօթր-Տամի մօտ։

— Ուրեմն դուք ալ Սիթէի մէջ կը բնակիր, հարցուց Պ. Տը ժանթիյեի։

— Տասն տարիէ ի վեր, պատասխանեց Բիէտուշ։ Պահ մ'առաջ ըսի ձեզ, դահլճին մէջ... բայց դուք շատ ականջ չէիք կախեր իմ խօսքերուս... արդարե՛ւ, կը հասկցուի... օրիորդը շատ գեղեցիկ է։

— Բայց քիչ մ'առաջ չըսի՞ք ինձ թէ հանրականաց ընկերութեան գործարաններուն մէջ կ'աշխատիք։

— Այո՛, քիչ մը հեռի է բնակարանէս, բայց ես չեմ ուզեր մեկնիլ թաղէս... և բարեբաղդ կը համարիմ զիս, վասն զի հօն բնակելուս առթիւ է որ զիականարանը մտայ և ձեր թղթապա-

նակը գտայ, որով ձեր հինգ հազար ֆրանքն ալ գտնուեցաւ։

Դուք ժամը քանի՞ն գնացիք զիականարանը։

— Ժամն երեքին միջոցները, պատասխանեց երիտասարդն։

— Օ՛, ինձ պէս։ Ըսել է թէ կըրնայինք իրարու հանդիպիլ ապակափեղկին առջև։ Սակայն, եթէ ձեզ տեսած իսկ լինէի, պիտի չկրնայի պահ մ'առաջ ճանաչել... ի հարկէ ձեր հագուստները փոխած և զձեզ գեղեցկացուցած էիք այդ տիկիններն երթալ տեսնելու համար...։

— Այո՛, տունս վերադարձայ հանդերձներս փոխելու համար... և յայնժամ նշմարեցի թղթապանակիս գողցուած լինիլն։

— Անշուշտ մեծ ցաւ տուաւ ձեզ։ Եթէ ես լինէի ձեր տեղ, իսկոյն կը վաղէի ոստիկանութեան կ'իմացնէի։

— Ժամանակ չունէի... Պուլոյն կ'սպասէին զիս։

— Իրաւունք ունիք։ Երբոր մարդ-

սիրահարեալ լինի... և միանգամայն հարուստ... առաւել փոյթ կ'ունենայ իւր սիրուհին տեսնելու՝ քան թէ իւր դրամին ետեւէն վազելու :

Պ. Տը ժանթիյեի, փոխանակ այս դիտողութեան պատասխանելու, որ մարդկային սրտի ծանօթութեան վրայ հիմնեալ էր, կառքին անկեանք կըրթնեցաւ՝ խօսակցութեան վերջ տալ ուղեւում կերպիւ :

Այս բան չէր յարմարեր Բիէտուշի գործին, որ գոչեց յանկարծ .

— Օ՛ն, աղէկ միտքս եկաւ... դուք ուրիշ պատճառ մ'ալ ունէիք հանդարտ կենալու... վասն զի պարտէիք կասկածիլ թէ ձեզ պիտի նեղէին լուսանկարին պատճառաւ... :

— Զի՞ս, ամենևին, պատասխանեց կիրքով Թէրէզի նշանածը : Լուսանկար պատկեր մը կրե՞ն արգելուած չէ :

— Եթէ հասարակ պատկեր մը լինէր, ոչ ոք իրաւունք կ'ունենար խառնուելու... բայց դաշունահար սպանուած և արկղի մը մէջ դրուած ան-

ծանօթ կնոջ մը պատկերը... տարբեր բան է :

Օ՛, գիտեմ, աւելցուց Բիէտուշ ծիծաղելով, որ արկղը տանողը դուք չէիք, որովհետեւ կ'ըսուի թէ համբ մ'էր... իսկ դուք լաւ կախուած լեզու մ'ունիք :

Բայց միշտ ձանձրալի բան է պատասխանել ոստիկանութեան հարցաքննութիւններուն, մանաւանդ ձեր դիրքն ունեցող մարդոց համար : Ասկէ զատ, ոստիկանութեան գործակալք կասկածոտ են : Ի զուր պիտի յայտարարէք թէ այդ լուսանկարը գտած էք կամ տուած են ձեզ. գոհ չպիտի լինին :

Երբոր ուղեկիցն այս քիչ մխիթարական խորհրդածութիւնները կը քշէր, Լուի Տը ժանթիյեի թողած էր իւր անհոգ դիրքն :

Սկսած էր հարցնել ինքնիրեն թէ մարդուն այս խօսքերն իրեն հետ յարմարելու անուղղակի առաջարկութիւնք չէի՞ն :

Այն խղճմտութիւն, զոր Բիէտուշ

պարծանօք ցոյց կուտար Տիկին Լըքոն-
թի և անոր աղջկան առջև, նախագգու-
չութիւն միայն էր թերևս հնարաւոր
անխորհրդապահութեան մը գէմ, և
թերևս իւր լուսութիւնը վաճառել կու-
ղէր, առանց ունէ մէկու ներկայու-
թեան:

— Այդպէս է, պատասխանեց Պ.
Լըքոքի որդին, առանց անոր ըսածին
կարևորութիւն տալու երևութի. այս
գործ յոյժ դժպհի է ինձ համար: Իր-
տեք որ քիչ օրէն պիտի ամուսնանամ
օրիորդ Լըքոնթի հետ, և եթէ այս
պատմութիւն հետեանք ունենայ,
կրնայ վրիպման վտանգի մէջ ձգել ա-
մուսնութիւնս, որոյ կատարման կը
փափաքիմ անհամբեր:

— Անխոհեմութեան մը համար,
ոչինչ բանի մը համար, գոչեց Բիէ-
տուշ համոզմամբ:

— Արդ, ձեզնէ կախեալ է գործն
յառաջ չմղել: Արդէն աղաչեցի ձեզ
որ այդ թղթապանակը ձեզ համար պա-
հէք մէջը գտնուածներով հանդերձ:

— Լուսանկարէն զատ, կարծեմ,
ընդմիջեց Բիէտուշ բարեմտաբար ժըպ-
տելով:

— Անշուշտ, բայց մնացեալը ձեզ
կը թողում. մինչև իսկ . . . հինգ հա-
զար Փրանքը քիչ է: Ես հարուստ եմ
և առաւել պիտի հարստանամ, վասն
զի օրիորդ Լըքոնթ մեծահարուստ օժիտ
կը բերէ ինձ: Դուք, սիրելի՛ պարոն, ապ-
րելու համար աշխատելու հարկադրեալ
էք դժբաղդաբար, և երեք զաւակ ու-
նիք: Անոնց ապագայն ապահովելու
համար կը յօժարիմ եռապատկել այդ
գումար, եթէ հաճիք ինձ դարձունել
այդ լուսանկար:

— Տանեւհինգ հազար Փրանք
յիրաւի պատուական գումար մ'է:

— Այժմ քովս չունիմ այդչափ դը-
բամ, բայց հասցէս կուտամ ձեզ, և
եթէ վաղը ժամ չորսին լուսանկարը բե-
րէք ինձ, ամբողջապէս կուտամ ձեզ:

— Այսինքն տամ հազար Փրանք
պիտի տաք ինձ, որովհետեւ արդէն
հինգ հազարը քովս է:

— Կ'ուզէ՞ք որ քսան հազար լինի գումարն :

Այս հրապուրիչ առաջարկին դեռ Բիէտուշ պատասխան չտուած, կառքին դռնակը բացուեցաւ և բաժապետութեան պաշտօնեայ մը գլուխը կառքին մէջ խոթեց՝ իրենց սովորական խօսքը մրմնջելով .

— Այս պարոնները բան մը չունին յայտնելու :

— Ո՛չ, մրմնաց երիտասարդը կատուելով այս անհաճոյ հանդիպման վրայ, որ իւր խօսքն այսպէս անճահաբար կ'ընդմիջէր :

— Օ՛, քաղաքագուռն հասեր ենք, գուշեց Բիէտուշ . Ո՛րչափ շուտ կ'անցնի ժամանակը խօսակցութեամբ: Մեզ տակաւին Պուլոյն կը կարծէի :

Բաժապետական պաշտօնէին այցելութիւնը ձեւի համար միայն լինելով, կառքին դադարն երկար չտուեց :

Կառավարը մտրակեց և ձին սկսաւ նորէն սրարչաւ ընթանալ այն երկար ու լայն արահետէն, որ Սէն—Քլուի

դուռը կը յանգի և Բասիի գետափին շարունակութիւնն է :

Ժամանակը շատ ուշ չէր . խանութներն և մանաւանդ գինետունները դեռ բաց էին :

Պուլոյնի ճանբուն ամայութեան կը յաջորդէր բազմամարդ թաղի մ'ողուորութիւնն :

Եթէ պանքտոմասուոր մարդն երկիւղ դդացած էր գրպանին մէջ ունեցած դրամին համար, այժմ փարատած պէտք էր լինէր այն երկիւղ :

— Է՛, ըսաւ անոր Պ. Տը Ժանթիյեի, կ'ընդունիք առաջարկս, այնպէս չէ՞ : Վաղը պիտի փոխանակէք այդ լուսանկարը կլորիկ գումարի մը հետ, որ ձեր զաւակաց ապագայն կ'ապահովէ . . . և այս իրիկուն, փոխանակ ոստիկանապետին տունն երթալու, մեր տունը պիտի երթանք, որով պիտի տեսնէք բնակած տեղս, և . . .

— Այո՛, ընդմիջեց Բիէտուշ, յոյժ լաւ գործիս կուգար այդ առաջարկ . . . Եթէ վտանգի մէջ իյնալէ չվախնայի :

— Ի՞նչպէս կրնաք վտանգի մէջ իյնալ, քանի որ մարդ չպիտի գիտնայ . . .

— Բե՛հ, կ'իմացուի: Այս չարածճի լուսանկարն է որ զիս կը տադնապեցընէ: Եթէ հաստատուի թէ իմ ձեռքըս անցած է և ես ալ ձեզ տուած եմ, գործս բուրդ կը լինի:

— Պատուոյս վրայ խօսք կուտամ որ այրեմ ձեր աչքին առջեւ: Հաւատացէք որ պահելու տենչ չունիմ: Արդէն բաւական սուղ կը նստի ինձ:

— Չեմ ըսեր . . . չեմ ըսեր . . . բայց կրակէ վախնալու պէս կը վախնամ ոստիկանութենէն . . . և եթէ միլիոն մ'ալ տրուի՝ չեմ ուզեր վտանգաւոր գործի մը մէջ մտնել . . . հետեաբար . . . կը յայտարարեմ . . .

— Ի՞նչ:

— Կը յայտարարեմ թէ չեմ կրնար ընդունիլ, թէև լաճերուս ապագայն կորնչի:

— Չէք ընդունիր:

— Այո՛, չեմ ընդունիր. բայց և այնպէս դարձեալ բարեկամ կը մնանք, և այսպէս աւելի լաւ կը լինի:

Բիէտուշ կը խօսէր տակաւին, երբ կառքը կազի լապտերի մ'առջևէն անցած վայրկենին ատրճանակի մը փողին փայլումը տեսաւ, զոր երիտասարդն իւր քթին տակ դբաւ գոչելով.

— Ետ տուէք լուսանկարս, կամ մեռած էք:

— Չգուշացիք, երիտասարդ, ըսաւ Բիէտուշ առանց յուզուելու, պիտի աւրէք ձեր գործն:

Այս խօսք վերէն ինկած պաղ ջուր մ'եղաւ Պ. Տը ժանթիցիի բարկութեան վրայ, որ ատրճանակն ետ քաշեց:

— Խորհեցէք միանգամ որ մեք աստ ամայի ճանբու մը վրայ չենք, յարեց սրամիտ պահակը խորոտ պաղարիւնութեամբ: Ենթադրենք թէ զարկիք սպաննեցիք զիս. հարուածին ձայնը պիտի լսուի. կառքը պիտի կենայ . . . կառավարը կը ճանչէ զիս . . . իմ թաղիս մէջ կը կենայ . . . մարդիկ պիտի կուտուին . . . ոստիկան զինուորք պիտի հասնին . . . ձեզ բռնեն բանտը տանին,

և այլն և այլն . . . : Կը տեսնէք որ ըս-
պանեալ կնոջ պատկերը մեծ փնաս պի-
տի հասցնէ ձեզ :

— Իմ նպատակս ձեզ վախցնել էր ,
կակաղեց Պ. Լըբօքի որդին . լաւ չը-
րի . . . բայց դուք զայրացուցիք զիս . . . :

— Ոստիկանապետին քով կը հան-
դարտիք : Պիտի տեսնէք թէ ի՞նչպէս
չուտով մեր գործը պիտի կարգադրէ :
Անկեղծ մարդ մ'է , շատ չյոգնեցնե-
ր ձեզ : Հարցաքննութեանց վրայ ընդ-
հանրապէս անհաճոյ գաղափարներ
կան . բայց երբոր մէկը փորձով տես-
նէ , կը հասկնայ որ ծովուն ջուրը չպի-
տի խմէ :

Այս յորդորական խօսքերուն , զորս
Բիէտուշ կ'արտասանէր այն յանկուցիչ
լեզուաւ , որով տղայ մը կը համոզեն
ատամնաբոյժին երթալու , երիտասար-
դը պատասխան չտուաւ :

Ատրճանակը նորէն գրպանը դրաւ ,
կրնակն իւր ընկերին դարձուց և տը-
խուր լռութեան մը մէջ փակուեցաւ
այնուհետեւ :

Կ'երևէր որ ոստիկանապետի մ'առ-
ջեւ բացատրութիւն տալու անհաճոյ
հարկը ճանչելով ինքզինք չքմեղացը-
նելու փաստեր կը պատրաստէր , զորս
անշուշտ չպիտի դիւրացնէին իւր ըրած
բռնական փորձերը :

Կառքը քաշող երիվարն , որոյ նմանը
դուն ուրեք կը գործածուի հրապա-
րակի կառքերու , սրարշաւ քակեց
գետափանց անվախճան գիծն , Բոն-
նէօֆէն անցաւ , Օրլոժի գետափին
ծայրն հասնելով աջ կողմ դարձաւ , և
մեծ դռնէ մը ներս մտնելով կեցաւ
նրբանցքի մ'առջև , որոյ մուտքն եր-
կու ոստիկան զինուորք կը պահպանէին :

Ը .

— Ահա եկանք , սիրելի պարոն , ըսաւ
Բիէտուշ կառքին դռնակը բանալով և
և դուրս ցատկելով :

— Դուք ըսիք ինձ թէ ոստի-
կանապետին տունը կ'երթայինք , գո-
չեց Պ. Տը ժանթիյեի , որ իւր մտածու-

Թեանց մէջ ընկղմած, ուշադրութիւն չէր ըրած կառքին բռնած ճանբուն:

— Մի և նոյն բանն է, սիրելի՛ պարոն, պատասխանեց Բիէտուշ քաղցրութեամբ. ոստիկանութեան պաշտօնատունն է այս:

Երիտասարդը կառքէն դուրս նայելով՝ տեսաւ ոստիկան զինուորները, մթին նրբանցքք, զայն պատող բարձր շէնքերն, և յետս ընկրկեցաւ ուժգնապէս:

Կը հասկնար վերջապէս:

Բնազգարար՝ կառքին միւս դռնակէն դուրս նետուիլ ուզեց փախչելու համար:

Բայց հուժկու չարածճի մը կար իւր դէմ, որ նոյն ինքն Բիկաշ էր, կառավարի կերպարանք մտած:

— Կ'ուզէ՞ք որ օգնեմ ձեզ վարելունելու, քսաւ սիրուն Բիէտուշ:

Փախուստ անհնարին էր, իսկ այն ահարկու անցքին ծայրն անպատուութիւն կ'սպասէր:

Փոխանակ իւր ուղեկցին բարեկա-

մական հրաւերն ընդունելու, Թէրէզի նշանածն իւր գրպանը խուզեց:

— Աւելորդ աշխատութիւն է, ըսաւ պահակն հասկնալով երիտասարդին դիտաւորութիւնն, ատրճանակն հոն չէ. ես առի զայն ձեր վրայէն՝ երբոր կրնէլի և իէնայի կամուրջներուն միջեւ հասած էինք:

Կը հասկնաք անշուշտ . . . կը տեսնէի որ խենդութիւն մ'ընել կ'ուզէիք այդ խաղալիկով, կամացուկ մ'առի ձեր գրպանէն: Եթէ ձեր քով թողած լինէի, այժմ դուք խուրդներուն աշխարհը գնացած էիք, ես ալ տաշտին մէջ:

— Զիս մեռցնելու միջոց ալ չո՛ւնիմ, մրմռաց Լուի Տը Ժանթիյեի:

— Օ՛ն, սիրելի՛ պարոն, ձեզ կ'ըստպասենք, յարեց Բիէտուշ իւր ամենաքաղցր ձայնիւ:

— Ո՛ւր կը տանիք զիս:

— Վարպետիս քով, որ ոստիկանապետ է . . . բայց ոչ իմ թաղիս, ճըշմարիտ է . . . բայց հոգ չէ:

— Ուրեմն դուք . . .

— Ոստիկանութեան գործակալ եմ,
ձեզ ծառայելու համար, եթէ կրնամ:

— Թշուառակա՛ն:

— Իրաւունք չունիք զիս նախատե-
լու, նկատելով որ մեծ քաղաքավարու-
թեամբ վարուեցայ: Կրնայի ձեզ ձեր-
բակալել ձեր նշանածին առջեւ, բայց
չըրի:

Բիէտուշ կը սնապարծէր քիչ մը.
վասն զի թէև Բիկաշ ներկայ էր, զոր
իրեն օգնելու համար հետ տարած էր,
կրնար մեծ դժուարութիւն կրել ձեր-
բակալելու համար Պ. Տը ժանթիյեի
այնպիսի տան մը մէջ, ուր բազմաթիւ
սպասաւորք կային:

Այս պատճառաւ էր անշուշտ որ
դաւ գործածելու պարտաւորուեր էր:

Պորմի ոճրագործին ձերբակալումը
նոյն բանն էր Բիէտուշի համար, ինչ որ
էր Աւսթէրլիցի յաղթութիւնը Նաբո-
լէոն առաջնոյ համար. ուստի ո՛չ անոր
փառքը կ'ուզէր ուրիշի հետ բաժնել,
ո՛չ ալ իրեն գալիք շահը:

Հետևաբար կ'զգուշանար աղմուկէ,
որպէս զի իւր Բիկաշ բարեկամին օգ-
նութեամբ միայն տանէր ոճրագործն
ոստիկանութեան պաշտօնատունը:

Այս փափաքին հասած էր և կը
լողար ուրախութեան մէջ:

Հուի իջաւ վերջապէս կառքէն, և
հոն գտնուող պահակներն, որոց Բիէ-
տուշ բան մը յայտնած չէր, զարմացան
տեսնելով գեղեցիկ և սէգ երիտասարդ-
մը, որ երկու ոստիկանաց հետ կը
բռնէր այն ուղին, որ պատժական դա-
տարան, եղեռնադատ ատեան, Կեդ-
րոնական բանտ, Նոր-Քալէտոնիա կամ
Ռոքէթի հրապարակը կը հասնէր:

Դժբաղդ երիտասարդը զսպեց այն
սրտայուզութիւնն՝ որ ի սկզբան պա-
կուցած էր զինք, և բարձր գլխով և
վստահ նայուածքով անցաւ անոնց մէ-
ջէն:

Բիէտուշ և Բիկաշ ալ հետն ի վեր
կ'երթային:

Կառքը, զոր բարեկամ կառարա-
նապետէ մը վարձած էին, պահակի

մը պահպանութեան յանձնած էին :
Նրբանցքն և զայն շրջապատող յար-
կերքը վերջին ժամանակաց շինութիւնք
են :

Գիտեն ընթերցողք թէ սատիկանու-
թեան հին պաշտօնատունն ասկէց քա-
նի մը տարի առաջ նորոգուած էր :

Այն սոսկալի աւերակաց տեղ , որոց
մէջ զետեղեալ էին գրասենեակներն ,
հոյակապ տեսքով շէնքեր կառուցուած
էին :

Ապահովութեան պետին սենեակը
տանող սանդուղը ձախ կողմն է , նրբ-
բանցքի մը ծայրն , որոյ երկու կողմը
դէտերու կայաններ կային . շրջուն սան-
դուղ մը , որուն աստիճանները դեռ
մաշած չեն ամեն կարգի ոճրագործաց
անդուլ երթեւեկէն :

— Ո՞ր կողմ պիտի երթանք , հար-
ցուց Պ. Տը ժանթիյելի :

— Անցէ՛ք , երիտասարդ , բաւ Բի-
էտուշ , ուղղակի ձեր առջեւ , միջնա-
յարկին մէջ :

Լուի անցաւ : Այժմ կը հասկնար

թէ ինչո՛ւ իւր ուղեկիցն իւր ետեւէն
կ'երթար :

Սատիկանութեան գործակալք Բի-
րենց ձերբակալած մարդոց ետեւէն
կ'երթան որպէս զի լաւագոյն հսկեն
անոնց վրայ :

Իրենց քաղաքավարութիւնը պար-
զապէս խոհեմութիւն է :

Միջնայարկին մէջ Լուի մեծ նախա-
սենեակ մը գտաւ , ուր գրասենեկի
պաշտօնեայք կային , երկուքը ծեր և
մին երիտասարդ . կարասին , որ յոյժ
հակիրճ էր , կը բաղկանար մէկ վա-
ռարանէ , մէկ սեղանէ և երկու հին
թիկնաթուէ :

Բիէտուշ այն աթոռներէն մին մա-
տոյց իւր ձերբակալին , որ առանց բառ-
մ'արտասանելու նստաւ :

Երիտասարդը կ'զգար որ այնպիսի
թակարդի մը մէջ բռնուած էր , որոյ
դէմ մաքառիլ անօգուտ էր . ուստի
միայն ինքզինք պաշտպանելու միջոցնե-
րը կը մտածէր :

Բիկաշ չնստաւ միւս աթոռին վրայ ,

այլ սանդուղին վրայ բացուող դրան առջեւ կեցաւ, որպէս զի, եթէ Պ. Տը ժանթիյեի, ընդդէմ ամենայն հաւանականութեան, փախչելու քմահաճոյք մ'ունենայ, արգելու զայն:

Գրասենեկին պաշտօնեայներն, առանց իրենց տեղէն շարժելու, անտարբեր աչօք կը նայէին վայելչադէմ երիտասարդին, զոր պահակներն հոն բերած էին:

Ուրիշ շատեր տեսած էին:

Բիէտուշ հարցուց անոնց թէ պետը մինա՞կ էր, և երբոր ստորասաբար պատասխանեցին, երկրորդ նախասենեակ մը մտաւ, որ ապահովութեան պետին սենեակը կը բաժնէ սպասման սրահէն, սենեկին դուռը կէս բացաւ, և պետին ակնարկին վրայ կամացուկ մը ներս մտաւ:

— Նոր բան մը կա՞յ, հարցուց ապահովութեան պետն, որ թուղթեր աչքէ անցունելու զբաղած էր:

— Ներեցէք ինձ, տէ՛ր, շատ կայ:

— Ուրեմն, շուտ խօսէ: Ժամանակ չունիմ կորսունցներու:

Բիէտուշ հանեց գրպանէն հռչակաւոր թղթապանակն և գրասեղանին վրայ դրաւ ըսելով:

— Աւասիկ նոր, և առաջին կարգի նոր, կամ ես կը սխալիմ:

— Ի՞նչ է այդ, հարցուց ապահովութեան պետը բանալով զայն: Պանքտոմանե՛ր: Իմ սենեակս կորուսեալ նիւթոց գրասենեակ կը կարծես:

— Շարունակեցէք նայիլ, տէ՛ր իմ:

— Երկու անուն նամակի պատեանի մը վրայ գրուած... «Պ. Տը ժանթիյեի, Տիկին Լըքոնթի տունը, Պուլվար տիւ Քաթր-Սէրթանպր ի Պուլոյն:» Ես կը ճանչեմ ժանթիյեի մը, կամ ինքզինք այնպէս կոչող մը... բայց այն մարդը չխառնուեցաւ Արպալէթ փողոցի գործին... վասն զի չուզեց խառնուիլ...: Բացատրէ ինձ գործը՝ փոխանակ բառեղծուած տալու ինձ, որպէս զի գուշակեմ:

— Լուսանկարը նայեցէք, տէ՛ր իմ... լուսանկարն...

— Ի՞նչ լուսանկար է... Ա՛, չար

սատանայ, սպանեալ կիօջ պատկերն է:

— Իսկ և իսկ, տէ՛ր իմ:

— Եւ այս թղթապանակը գտար...

— Անգլիացւոյ մը գրպանէն, որ դիակնարանին մէջ գրպաններ խուզած ժամանակ բանուեցաւ այսօր ժամ երեքին:

— Եւ այժմ կուգաս տեղեկութիւն տալ ինձ, գոչեց պետք խօսիւ ոտքի վրայ ելնելով, և մարդը չե՛ս բերեր ինձ առանց վայրկեան մը կորսունցնելու:

— Մարդը Կեգրոնական բանտը պէտք է լինի:

— Հոս պէտք էր բերէիք, և ես սիտի...

— Ներեցէք ինձ, տէ՛ր իմ, կը կարծեմ որ զայն հարցաքննելով չէք կրնար օգուտ մը քաղել:

— Խե՛նդ ես թէ իմ վրայ կը ծիծաղիս:

— Հասկցնեմ ձեզ, տէ՛ր իմ: Գըրպանախոյզ գող մ'այս թղթապանակ ամբարձեր էր մարդու մը գրպանէն,

գոր և գաղտնաբար կը դիտէի դիակնարանի ապակորմին առջեւ...

— Եւ թող տուիր որ փախա՛ւ: Այս անգամ, տղա՛ս, չափը լցուած է, և ահա կը յայտարարեմ քեզ թէ այլ ևս գործ չունիս հոս:

— Փախուցի, ճշմարիտ է, բայց յետոյ գտայ... և առանց դժուարութեան... անունը սա թուղթի կտորին վրայ է:

— Ուրեմն, սա Պ. Տը ժանթլյետի՞ն է:

— Այո՛, տէ՛ր իմ: Եւ թղթապանակին իրենը լինիլը խոստովանեցաւ... և երբոր լուսանկարը ցոյց տուի իրեն՝ ցնցուեցաւ, և ի՛նչպէս ցնցուիլ...

— Վերջապէս մեր ձե՛ռքն է այժմ. վասն զի կը յուսամ որ տանը գրանն առջև հսկողութիւն հաստատած էք:

— Ադ կէց աւելին բրի, տէ՛ր իմ: Համոզեցի զինք որ հետս գայ ձեզ տեսնէ:

— Ի՞նչ կ'ըսես. ա՛ստ է:

— Ձեր նախասենեկին մէջ, տէ՛ր իմ, Բիկաչի հսկողութեան յանձնած եմ:

—Պատուական բան է այդ, տղա՛ս.
միայնա՛կ գործեցիր:

—Միայնակ, տէ՛ր իմ, առանց Պ.
Թոլլպիաքի՝ որ բնաւ տեղեկութիւն չու-
նի այս գործէն, և ես պէտք չունե-
ցայ անոր:

—Ի՞նչպէս ըրիր:

—Օ՛, քայցրութեամբ: Մարդը
Տիկին Լըքոնթի տան մէջ գտայ: Անոր
աղջիկը պիտի առնու: Հարուստ ըն-
տանիք մ'է: Ներս ընդունուելու հա-
մար ըսի թէ թղթապանակ մը գտած
էի պանքատոմաներով լի և կը բերէի
յանձնելու: Իմ հին հնարքն է այս, և
կը յաջողի միշտ: Բայց այս անգամ
պատմութիւնս ճշմարիտ էր:

Ասկէ զատ՝ լուսանկարին պատճա-
ռաւ զիս վտանգի մէջ ձգելու երկիւղ
կեղծեցի: Ըսի թէ ոստիկանապետին
առջևը միայն կրնայի յանձնել իրեն:
Երիտասարդը շատ դժկամակեցաւ,
բայց ի վերջոյ յանձն առաւ դալ: Նը-
շանածն իրեն կ'սպասէ այս իրիկուն:
Խեղճ աղջիկ. ուրիշ ամուսին մը թող
փնտռէ:

—Զարմանալի է որ այդ երիտասարդ-
յանձն առեր է հետդ գալ, եթէ
յանցաւոր է:

—Եթէ յանցաւոր է, տէր իմ. օ՛,
այդ մասին բնաւ տարակոյս չունիմ:
Մօրուքն, յօնքը, կրկնօցը, գորշ կըղ-
բենի ձեռնոցն և ձայնը ճանչեցի: Ըըշ-
դիւ այն սրիկայն է, որ խաղ ըրաւ ինձ
Սրպալէթ փողօցին մէջ:

—Ուրեմն ինքն ալ քեզ ճանչեց:

—Բնաւ: Այն գիշերը գռեհիկ տը-
ղու կերպարանք մտած էի, այսօր միջ-
նակարդ քաղաքացիի կերպարանք մը-
տած եմ, և դէմքս ալ փոխած:

—Ճշմարիտ է. ամեն ինչ լաւ խորհ-
ուած է: Գնա՛ ինձ բեր այդ երիտա-
սարդը, Բիէտուշ, և վստահ եղիր որ լաւ
պարգեւ մը պիտի ստանաս: Լաւ գործ
մը կատարած ես այսօր և ինձ ալ կա-
տարել կուտաս:

—Պարգե՛ւ, չեմ մերժեր, տէ՛ր իմ,
ըսաւ Բիէտուշ, թէ եւ . . . պարտիմ ը-
սել ձեզ . . . Պ. Թոլլպիաք ալ խոստա-
ցած է ինձ . . . գեղեցիկ պարգեւ

մը . . . հազարնոց պանքտոմս մը . . . :

— Ուրեմն երկուք պիտի ստանաս, պատասխանեց ապահովութեան պետը: Դու արժանապէս շահեցար այդ պարգևներ . . . մինչ թուլպիաք չկրցաւ շահիլ իրեն խոստացուածը, վասն զի մասն չունի այդ բանի մէջ: Եթէ հայր Լըքոք իւր վրայ առած լինէր գործը, քեզ պէս դիպուածի պէտք չէինք ունենար ոճրագործը ձեռք անցունելու համար:

— Այդ ճշմարիտ է, տէ՛ր իմ: Պ. Լըքոք ամենուս վարպետն է, և երբոր մէկն անոր հրամանին տակ ծառայէ, ինքզինք կրակին մէջ կը նետէ որպէս զի գոհ ընէ զայն:

— Աչերը խոշոր պիտի բանայ երբոր երթամ վաղը պատմեմ այս ձերբակալութիւն: Գալով թուլպիաքի, կրնայ տակաւին ծառայութիւններ ընել մեզ, վասն զի անտարակոյս եմ որ այդ ժանթիյեի պիտի պաշտպանէ ինքզինք և յանցանքն իւր վրայ չպիտի առնու: Քննութիւնը միայնակ չպիտի քալէ:

Հարկ պիտի լինի այդ երիտասարդին բոլոր կեանքը քննել, վասն զի երիտասարդ մ'է, այնպէս չէ:

— Քսան և հինգ, քսան և ութ տարեկան, ոչ աւելի:

— Լա՛ւ. հարստութիւն ունի. անշուշտ կը յաճախէր նորելուկ հաւիկներու քով . . . տարվուհիներ ունէր . . . ինչպէս նաև սպանեալ կինը . . . : Թուլպիաք շատ ճարտար է այդ միջավայրերուն մէջ խուզարկութիւններ ընելու . . . ուստի անոր պէտք պիտի ունենանք, եթէ չը կրնամ խոստովանցնել այդ երիտասարդ:

Ս.յս առաջին անգամ չէ որ առաջին հարցաքննութեան մէջ խոստովանութիւններ ձեռք բերեմ: Ս.մեն բան հարցաքննելու ձեւէն կախեալ է, վերջապէս տեսնենք:

— Հարցաքննութեան միջոցին ես պիտի կենամ ձեր սենեկին մէջ, տէ՛ր իմ:

— Ոչ, հարկ չկայ. բայց նախասենեկին մէջ սպասէ: Սակէ զատ, այս իրիկուն առանին խուզարկութիւն պի-

տի ընենք: Գննութիւնը փութապէս
յառաջ մղել կ'ուզեմ: Գեղ և Բիկլաշ
հետս պիտի տանիմ:

— Հասկցայ, տէ՛ր իմ: Պէտք է սա-
կայն երեք բան ըսեմ ձեզ, որպէս զի
որոշ գաղափար մ'ունենաք այդ անձին
վրայ:

Նախ, մինչեւ քսան և հինգ հազար
Ֆրանք առաջարկեց ինձ՝ լուսանկարն
իրեն տալու համար:

Յետոյ, երբոր տեսաւ որ խայծին
չէի բռնուիր, ատրճանակ մը դրաւ
քթիս տակ. յայնժամ ըսի իրեն թէ
իւր գործը պիտի գէշցնէր, և ասով
հանդարտեցաւ: Կ'երեւի որ շատ պար-
զամիտ է, և սակայն գիտէ թէ զինքն
երկու անգամ չպիտի գլխատեն:

Վերջապէս, երբոր հոս հասնելով
տեսաւ որ զինք ոստիկանութեան պաշ-
տօնատունը բերած էի՝ առանց իրեն
իմացնելու, գրպանը խառնեց ատրը-
ճանակն հանելու համար . . . որպէս
զի իւր ուղեղն այրէ . . . բայց չկրցաւ
խաղաղիկն ամբարձած էի գրպանէն,

և աւասիկ, եզրակացուց Բիէտուշ՝ զէն-
քը գրասեղանին վրայ դնելով:

— Օ՛, ըսաւ պետը բաւական յուզ-
ուելով այս պատմութեան պարզութե-
նէն, դու բարի և քաջ տղայ մ'ես .
քեզ համար պիտի խօսիմ Պ. Վերա-
տեսին:

Յետոյ, ձերբակալման պատմութիւ-
նըն ընել տուաւ՝ դիակնարանէն սկսեալ
մինչեւ Օրլոժի գետովը, Պուլոյնէն
անցնելով, և շատ մը հարցումներ ը-
րաւ, որոց իւր ստորագասը մի առ մի
պատասխանեց այն կերպիւ, որ գործին
մանրամասնութեանց վրայ կատարեալ
տեղեկութիւն տուաւ իրեն: Ապա շըր-
կեց բերել զՊ. Տը Ժանթիյեի:

Բիէտուշի դուրս ելնելուն և յան-
ցաւորին-Թէրէզի նշանածն արդէն յան-
ցաւոր մ'էր-ներս մտնելուն միջեւ ան-
ցած կարճ ժամանակին մէջ, ապահո-
վութեան պետը բացուելիք մենամար-
տին պատրաստուեցաւ:

Վասն զի առաջին հարցաքննութիւ-
նը ճշմարիտ մենամարտ մ'է, ուր ամեն

առաւելութիւնք հարցաքննիչին կողմն
են :

Յարձակողական միջոցներուն ընտ-
րութիւնն անոր ձեռքն է . իսկ հար-
ցաքննեալը չկրնար գուշակել իւր կը-
րելիք հարուածները :

Մին պաղարիւնութիւն ունի , միւ-
սը խորապէս յուզեալ է : Ուստի կռիւն
հաւասար չէ :

Բայց սկսելու եղանակները տարբեր
են : Հարցաքննիչը կրնայ ուղղակի հար-
ուածներով սխալ , անակնկալ և խիստ
հարցումներով վախցնել , կամ՝ ընդհա-
կառակն՝ քաղցրութեամբ , յարգանօք
և համբերութեամբ վարուիլ , թշնամին
իւր խօսքերէն բռնել , և մատակարա-
րած փաստերուն ցանցին մէջ փակելով ,
յամբարար՝ բայց թերեւս աւելի ապա-
հովութեամբ՝ յանցանքն ուրանալու
անհնարութեան մէջ ձգել :

Ապահովութեան պետն՝ ինքնիրեն
խորհրդածելով՝ այս վերջի դրութիւնն
ընտրեց , ամեն պէտք եղած նախա-
զգուշութիւններն ընելով :

Իւր գրասեղանը լուսաւորող կան-
դելին տեղը փոխեց և անոր լուսամ-
փովն այն կերպիւ տրամադրեց որ
լոյսը լիապէս այն աթոռին վրայ ինչայ ,
ուր պիտի նստէր Պ. Տը Ժանթիյեի :

Լուսանկարը թուղթերու ծանրոցի մը
տակ պահեց և ատրճանակը դարակի մը
մէջ դրաւ :

Դուռը բացուեցաւ , և երիտասար-
դը ներս մտաւ առաջնորդութեամբ
Բիէտուչի , որ իսկոյն դուրս ելաւ :

— Նստէք , պարոն , ըսաւ ապա-
հովութեան պետը քաղաքավարու-
թեամբ :

Պ. Տը Ժանթիյեի ողջունեց պաղու-
թեամբ , նստաւ , և լուծեամբ սպա-
սեց որ հարցում ընեն իրեն :

Ապահովութեան պետը զայն դի-
տելով՝ տարօրէն տպաւորութիւն մը կը
կրէր : Տեսած դէմքերը միտքը պա-
հելու մասին յոյժ կորովի յիշողութիւն
ունէր , և կը թուէր իրեն թէ ձերբա-
կալին դէմքն անձանօթ չէր իրեն :

Անշուշտ առկայծեալ ճրագի մը կե-

ղակարծ լուսով վաղանցուկ երևոյթէ մը չէր կրնար այնչափ յստակ և որոշ յիշատակ պահուիլ :

Պ. Տը ժանթիյեի յոյժ սև մօրուք մ'ունէր, ինչպէս այն մարդն որ կէս գիշերին գնացեր պորմին ներքնասենեկին մէջ Մարի փնտռեր էր :

Բայց բաղդատութեան ուրիշ կէտեր պէտք էին նմանութիւնը վճռելու համար, և ապահովութեան պետն այն այցելուին մօրուքը միայն տեսած էր :

— Գիտէ՞ք ինչո՞ւ համար իմ գործակալներէս մին ձեզ հոս բերաւ, հարցուց :

— Ս, յո՛, պարոն, պատասխանեց կրքով Լուի Լըքօք, և կը զարմնանամ որ պատուաւոր մարդ մը կը ձերբակալի այնպիսի տարտամ նշանակի մը վրայ :

— Ճշդիւ նոյն ճանբան է, խորհեցաւ ինքնիրեն ապահովութեան պետն, և երկրորդ խորհրդածութիւնն եղաւ .

Բարձրէն կը բռնէ . անձի վրայ սխալում պիտի փաստաբանէ . ուստի

սեղմ և կուռ պէտք է բռնեմ գործը : Յետոյ սկսաւ .

— Ներեցէք ինձ ըսել ձեզ, պարոն, թէ այսպիսի ծանր գործի մը մէջ բնաւ զանցառութիւն չեմ կրնար բնել . պարտականութիւնս է :

Կ'աւելցնեմ թէ դուք ձերբակալ չէք : Ձեզ բերել տուի որ հարցաքննեմ. և եթէ կրնաք գոհացուցիչ կերպիւ բացատրել ինձ ձեր թղթապանակին մէջ գտնուած լուսանկարին ինչպէս ձեր ձեռքն անցնիլը, կատարելապէս ազատ էք ձեր տունը վերադառնալու կամ երթալ անդորրելու այն անձինքն՝ որոց քովէն եկած էք :

Պետն այս խօսքերն ըսած միջոցին երիտասարդին դէմքը կը դիտէր սուր աչօք, և տեսաւ որ կը զուարթանար ուրախութեամբ :

— Կը տեսնեմ, չարածձի՛ս, ըսաւ մտքէն, որ այս գիշեր քու անկողնիդ մէջ ննջելու յոյս չունէիր : Սուսիկ նշանակ մը, և լաւ նշանակ : Եթէ անմեղ լինէիր, բնական պիտի թուէր քեզ այս :

—Շնորհակալ եմ, պարոն, որ այս գործն իւր ճշմարիտ գոյնովը կը տեսնէք, ըսաւ Պ. Տը Ժանթիյեի՝ ինքզինք անդորրամիտ երևցնել ջանալով:

—Շատ պարզ է: Դիտէք, գոնէ լրագրերէն, թէ մինչև ցայսօր չկրցինք համայն Փարիզի ուշագրութիւնն զբաղեցնող սոպանութեան մը զոհին անձնաւորութիւնն ստուգել:

Այն տարաբաղդ կնոջ լուսանկարը գտնուեցաւ ձեր վրայ: Ուստի բնական է որ հարցնեմ ձեզ թէ ինչպէս անցած է ձեր ձեռք. և եթէ նոյն իսկ կինը տուած է, ինչպէս որ չեմ երկբայիր, տարակոյս չմնար որ կրնաք անոր վրայ տեղեկութիւն տալ ինձ:

—Կը սխալիք, պարոն, ես չեմ ճանչեր այն կին:

—Զգոյշ կեցի՛ք, պարոն, հաւանական չէ որ ձեր երբէք չտեսած անձի մը լուսանկարը ձեր թղթապանակին մէջ պահէք:

Կարելի է սակայն որ ձեր բարեկամներէն մին տուած լինի ձեզ: Եթէ

այնպէս է, կրնաք ցոյց տալ մեզ այն բարեկամն, և մեք ալ անկէ տեղեկութիւն կ'ստանանք:

—Ոչ ոք տուած է ինձ այն լուսանկար:

—Ուրեմն ի՞նչպէս կը լինի որ . . .

—Ներեցէք, պարոն, ձեր գործակալն անշուշտ պատմեց ձեզ այդ թըղթապանակին ինչպէս իւր ձեռքն իյնալն:

—Անշուշտ: Դրպանախոյզի մը գրքպանէն գտած է, զոր նա ալ ձեր գրքպանէն գողցած էր . . . երբ դուք ի ցոյց դրուած դիակը կը դիտէիք:

—Ուրեմն, պարոն, անշուշտ այն գողը դրած է այդ լուսանկար իմ թըղթապանակիս մէջ, վասն զի տունէս դուրս ելած Ժամանակս մի միայն հինգ հազար Փրանքի պանքտոմս կար մէջն, և նամակի պատեան մը, որոյ վրայ իմ և Տիկին Լըքոնթի անունները գրուած էին: Այս մասին կատարելապէս աներկբայ եմ:

Ապահովութեան պետը լուրթեամբ մտիկ կ'ընէր այս արդարացում:

Կ'ըսէր մտովին .

— Բերնովդ կը բռնուիս , տղա՛ս ,
այժմ չես կրնար ազատիլ ձեռքէս :

Եւ ըսաւ բարձր ձայնիւ .

— Խոստովանեցէք , պարո՞ն , թէ ,
յոյժ անհաւանական է որ այդ գողն
աշխատութիւն յանձն առած լինի թըղ-
թապանակի մը մէջ դնելու զայդ լուսա-
նկար , զոր իւր շահը կը պահանջէր
անհետ ընել՝ մէջի պանքտոմաններն առ-
նելով : Գրպանախոյզները սովոր չեն
գողութեան ապացոյցներ պահել իրենց
վրայ :

Ասկէ զատ , քիչ մը խորհելով , բա-
ցարձակապէս անընդունելի կը գտնեմ
ձեր տուած բացատրութիւնն : Անգ-
լիացին դիակնարանէն դուրս ելած
վայրկենին բռնուած է , և այդ գո-
ղութիւնն ապակափեղկին առջև ըրած
էր : Անշուշտ ժամանակ չէր կրնար ու-
նենալ թղթապանակին պարունակու-
թիւնը զննելու , զոր շտապով իւր տա-
փատին ծածուկ գրպաններէն միոյն
մէջ պահած էր :

— Ինձմէ չէք սպասեր , կարծեմ ,
բացատրել թէ այդ գողն ի՞նչպէս դը-
րած է զայդ լուսանկար իմ թղթապա-
նակիս մէջ , պատասխանեց չորութեամբ
Պ. Տը ժանթիյեի : Ես չեմ ուսումնա-
սիրած այդ մարդոց գործողութիւն-
ները :

Վայրկեան մը լռութիւն տիրեց :

Ապահովութեան պեան աչերը կէս
կը փակէր՝ միտքն իւր վրայ ամփոփել
ուզող մարդու մը պէս , և մատները
մտազբաղութեամբ կը խաղային լուսա-
նկար-այցետոմսին հետ , զոր իւր գրա-
սեղանին վրայի թուղթերուն ծանրոցին
տակէն առած էր :

Յանկարծ գլուխը վեր առաւ , և
երիտասարդին երեսը նայելով ըսաւ .

— Անգլիերէն գիտէ՞ք :

— Այո՛ , պարոն , պատասխանեց Պ.
Տը ժանթիյեի քիչ մը վարանելով , գի-
տեմ : Ինչո՞ւ կը հարցնէք :

— Վասն զի կ'ուզեմ աղաչել ձեզ
որ հաճիք մեկնել ինձ այս տոմսին ե-
տեք գրուած երեք բառերուն նշանա-

կութիւնն , ըսաւ ապահովութեան
պետն :

Աւառիկ , կարդացէք . Փարսէն Ֆրանսի :

Զայս ըսելով՝ լուսանկարը ցոյց տը-
ուաւ երիտասարդին , որ ակներև կը
տժգունէր :

—Օ՛ն , պարո՛ն , թարգմանութիւնը
չատ դժուարին պէտք չէ լինի , յա-
րեց՝ առանց լուսանկարը ձեռքէն թող
տալու . ես որ անգլիերէն ուսած չեմ ,
կը թուի ինձ թէ կը գուշակեմ իմաստը :

Փարսէն Ֆրանսի . . . պարտի նշանա-
կել . . .

—Մի հոգնա՛ զի . . . կակազեց թէ-
րէզի նշանածն :

—Ես ալ այդպէս կը կարծէի . և
այս քաղցրիկ պատուէրն ստորագրուած
է փոքրիկ սիրուն անունով մը . . . Մա-
րի . . . որ սպանեալ կնոջ անունն է , և
ինքն ալ անգլիացի է , գիտենք :

—Գրպանախոյզն ալ անգլիացի է :

—Այո՛ , ճշմարիտ է : Աղկէց եզրա-
կացնել կ'ուզէք թէ այդ կնոջ տարփա-
ծո՞ւն էր :

—Ձեմ եզրակացներ , իրողութիւնը
կը ցուցնեմ :

—Լաւ . բայց մարդու չէք կրնար
հատուցնել որ այսպիսի գեղեցիկ և
սիրուն արարած մը սիրոյ յիշատակ մը
ձօնած լինի ամենացած տեսակէ սրի-
կայի մը . . . վասն զի այս կենդանա-
գիրը սիրոյ յիշատակ մ'է . . . և տար-
փաւորի մը տրուած պէտք է լինի բա-
ժանման մ'առթիւ . . . և այդ տարփա-
ւորն , որ անշուշտ երկար ուղևորու-
թիւն մը պիտի ընէր , գեղեցիկ . . .
նշանաւոր . . . հարուստ երիտասարդ մը
պարտէր լինիլ ձեզ պէս , պարո՛ն :

—Պարզ ենթադրութիւն մ'է այդ . . .
և կրկին կ'ըսեմ ձեզ թէ այսօր առա-
ջին անգամ է որ կը տեսնեմ այդ պատ-
կեր . . . և դորա ներկայած անձը . . . :

—Շատ լաւ . ձեր դրութիւնն է
այդ , որ ձախող կ'երևի ինձ , բայց
անցնինք : Անշուշտ հետաքրքրութիւնը
քաշեր էր ձեզ ի դիմակնարան :

—Այո՛ , պարոն , ցաւելով կը խոս-
տովանիմ , վասն զի կը գարչիմ անդ

տեսնուած սոսկալի տեսարաններէն :

— Արդարեւ ձեր դասուն վերաբերեալ անձինք չեն ախորժիր այդպիսի տեսարաններէ :

— Երբէք մտած չէի այդ նողկալի սրահը : Բայց լրագիրք ա'յնչափ խօսեցան այդ տարօրինակ դործին վրայ , որ դիակը տեսնելու իղձ եկաւ ինձ :

— Շատ բնական էր : Համայն Փարիզ ունեցաւ այդ իղձ : Հետեւաբար , ձեր տունէն դուրս ելաք . . .

— Ա,յո՛, պարոն , և որովհետեւ դիակինարանին առջեւէն կ'անցնէի . . .

— Հինգ հազար Ֆրանք ունենալով ձեր գրպանին մէջ :

— Գոհարավաճառի մը պիտի տանէի , որ ապարանջան մը վաճառած էր ինձ :

— Զոր ձեր նշանածին պիտի նուիրէիք : Գործակալս հասկցուց ինձ : Ա,յդ գոհարավաճառն անշուշտ Բալէ-Ռուա-յալի հրապարակը կը բնակի :

— Ոչ , Տըլա Բէ փողոցը :

— Եւ դուք , պարոն , ո՞ւր կը բնակիք :

Երիտասարդը ցնցուեցաւ , և պատասխանեց շփոթութեամբ .

— Մոն-Թագոր փողոցը :

— Դիակնարանը ձեր ճանքուն վրայ չէր , դիտել տուաւ քաղցրութեամբ ապահովութեան պետը : Բայց Մաշայի աղջիկով տիկինը տեսնելու համար կ'արժէր շրջան մ'ընել :

Ուստի , դիակնարանին առջեւէն անցնելով . . . ներս մտնել ուզող բազմութեան հետեւեցաք . . . :

— Ա,յո՛, պարոն . . . և շատ զղջացի այդ անխոստովանելի քմահաճոյքին անաշուտ վրայ . . . Դիակին տեսքը . . . սոսկալի էր . . . : Հազիւ քաջութիւն ունեցայ նայելու . . .

— Անշուշտ այդ պատճառաւ էր որ ձեր թաշկինակը ձեր աչաց վրայ կը բռնէիք :

— Ո՞վ բտաւ ձեզ . . .

— Օ՛, ես շատ բան դիտեմ . . . պաշտօնիս բնութեամբ : Կը հասկնամ որ ձեր սիրան յուզուած լինի : Ասկէ դատ , ձեր թղթապանակին կորուստն ալ ան-

չուշտ դառնապէս վշտացուցած էր ձեզ :

Ե՛րբ նշմարեցիք :

— Երբոր տունս վերադարձայ :

— Ձեր զգեստները փոխած ժամանակ , այնպէս չէ՞ :

— Այո՛ , պարոն , ճաշի պիտի երթայի Պուլոյն , Տիկին Լք. քոնթի տունն :

— Որում փեսայ պիտի լինիք ընդհուպ : Արդարեւ չէիք կրնար հոն երթալ այն կերպարանքով զոր ունէիք դիակնարանն այցելած ժամանակնիդ : Քառակուսեակ դունով կրկնոց , բուրդէ փողպատ և կակուղ փեղոյր ունէիք , որ վայելչութեամբ և նշանաւորութեամբ փայլիլ ուզող երիտասարդի մը համար տարօրինակ կերպարանք մ'է :

— Ձէի ուզեր իմ սովորական կերպարանքով երեւնալ այնպիսի տեղ մը , կակաղեց Պ. Տր ժանթիյեի , որ չփոթիլ սկսած էր : Դիտմամբ հին զգեստներ հագայ . . . :

— Քիչ մ'առաջ ըսիք ինձ թէ ձեր գոհարավաճառին կ'երթայիք : Կ'երեւի թէ անոր վստահութիւն ազդելու պէտք

չունէիք , ըսաւ պաղութեամբ ապահովութեան պետն :

Որովհետեւ կանխիկ պիտի վճարէիք , և անչուշտ կը ճանչէ ձեզ :

Պ. Տր ժանթիյեի չպատասխանեց այս հեգնական դիտողութեանց , որոց նպատակը քաջ կը գուշակէր : Կ'զգար որ հակասութեան մէջ կ'իյնար իւր խօսքերով , և քանի՛ կ'իյնար , ա՛յնչափ կը կորսնցնէր այն պաղարիւնութիւն՝ զոր ցոյց տուած էր հարցաքննութեան ըսկիզբն :

Այն կէտն հասած էր , ուր բերել կ'ուզէր հակառակորդն , որ յարեց գրեթէ հայրական ձայնիւ .

— Տեսէք , պարոն , կը կարծեմ որ դուք սխալ ճանքու մէջ կ'իյնաք , և իմ պարտքս է ազդարարել ձեզ զայդ : Դուք ունայն ճիգեր կ'ընէք ուրանալու համար ակներեւ իրողութիւն մը : Այս պատկերը ձերն է , և ես ոչ եւս կըրնամ երկբայիլ այն հակասութիւններէն և անհաւանականութիւններէն յետոյ , որոց մէջ ինկաք :

Թոյլ տուէք ինձ ըսել ձեզ թէ դուք այս պահուս այն մարդոց պէս կը վարուիք, որք դիակնարանին մէջ իրենց բարեկամին մարմինը ճանչել չեն ուզեր, վախնալով որ կասկածելի կը լինին :

Եւ ես մինչեւ մէկ աստիճան կը հասկնամ ձեր խղճմտութիւն : Գուք յոյժ լաւ գրից մէջ էք . պիտի ամուսնանաք, և չէք ուզեր խառնուած լինիլ եղեւնական գործի մը մէջ : Այս պատճառաւ է որ անտեղի պատճառանքներ կը հնարէք, փոխանակ խոստովանելու պարզաբար թէ երբեմն յարաբերութիւն ունեցած էք Արպալէթ փողոցի տիկնոջ հետ :

Ի՞նչպէս չէք հասկնար թէ անոր պատկերն ունենալն ոճիր չէ, և թէ յոյժ բնական կերպիւ կրնայ մեկնուիլ :

Կ'աւելցնեմ թէ ամեն պարկեշտ մարդոց համար պարտականութիւն մ'է լուսաւորել դատական արդարութիւնն, և թէ վատ գործ մ'ըրած կը լինիք ձեր գիտցածը ծածկելով մեզնէ :

Օ՛ն, պարոն, մի՛ յամառիք ճշմար-

տութիւնը ծածկելու : Այդ ողբալի դրութիւն ծանր կը նստի ձեզ, և . . . ներեցէք ինձ արտասանել աստ անուն մը, որ սիրելի է ձեզ . . . եթէ օրիորդ Լըքոնթ, ձեր նշանածը, ներկայ գըտնուէր այս հարցաքննութեան, թախանձանօք պիտի աղաչէր ձեզ որ խօսիք :

Պ. Տը Ժանթիլյէի, ակներև յուզեալ, բայց ինքզինք բռնել ջանալով, աչերը կը խօնարհեցնէր և պատասխան չէր տար :

— Խորհեցէք թէ օրիորդը ձեզ կ'սպասէ անձկութեամբ, և կը բաւէ ձեզ ընդունելի բացատրութիւն մը տալ ինձ, որպէս զի ձեր աղատութիւնը վերադարձնեմ ձեզ . . . այս իրիկուն . . . այս վայրկենիս . . . : Իսկ երբ շարունակէք ամեն բան ժխտել, պիտի հարկադրիմ, ձեզ յանցաւոր նկատելով, յուղարկել անդ . . . ուր մարդասպանութեամբ ամբաստանեալները կը զըրկուին :

Երիտասարդը սոսկալի կերպով արժ-

դունեցաւ, երեսին զիծերը կծկեցան, բերանը կէս մը բացուեցաւ խօսելու համար, և բաւական անյողդողդ ձայնիւ մ'ըսաւ.

— Ուրիշ պատասխան մը չունիմ՝ ձեզ տալու. ես անմեղ եմ. ինչ որ կ'ուզէք՝ ըրէք ինձ :

Ապահովութեան պետը չէր սպասեր այս յամառ ընդդիմութեան, բայց աւելի ապացոյց մը համարեցաւ զայս Պ. Տը Ժանթիյեի յանցաւորութեան, և յուսահատելով ի խոստովանութիւն բերելէ զայն, իսկոյն փոխեց իւր բերանն ու ձեւ :

— Ի՞նչ է ձեր անունն, հարցուց չոր կերպիւ. ո՞ւր կը բնակիք. ի՞նչ է ձեր արհեստն :

— Անունս Լուի Տը Ժանթիյեի է, Մոն—Թապոր փողոց թիւ 72 կը բնակիմ. իրաւագիտութեան տոքթէօր եմ և Պ. Լապուրոյ նօտարին քով առաջին դպիր :

— Հարստութիւն ունի՞ք :

— Հայրս ունի :

— Ի՞նչ կ'ընէ ձեր հայրն :

— Հասութառու է :

— Դուք անոր տունը չէ՞ք բնակիր :

— Ո՛չ :

Ապահովութեան պետը գրեթէ ըզբաղեալ դէմքով մ'ըրաւ այս ամեն հարցումներ, ձեւի համար միայն լսեց պատասխաններն, յետոյ, ծանօթութիւններ առնել կամ այնպէս կեղծելէ զկնի.

— Կը ճանչէ՞ք զՊ. Լէօրէօ, հարցուց յանկարծ երիտասարդին երեսը նայելով :

Փոխանակ ցնցուելու այս անունէն, որ Արպալէթ փողոցի տան մէջ սպանեալ վաճառականին անունն էր, Պ. Տը Ժանթիյեի պատասխանեց անխռով.

— Բնաւ :

— Չայլայլեցաւ, զարմանալի բան, ըսաւ ինքնիրեն ապահովութեան պետն : Եւ իսկոյն խօսքը փոխելով, յարեց.

— Ի՞նչ ըրիք յունուար 13 ի շաբաթ իրիկունն :

Եւ սպասեց՝ յուսալով որ ամբաստանեալը պիտի բռնուէր ծուղակին մէջ :

Յանցաւորք կանխաւ պատրաստած պատմութիւն մը կ'ունենան միշտ՝ երբոր ոճրին գործուած օրն իրենց ժամանակն ինչպէս անցուցած լինելնին հարցուի իրենց :

Լուի Տը ժանթիյեի պատասխանեց հանդարտութեամբ .

— Ձեմ կրնար ճշդիւ բտել ձեզ . այն իրիկունէն մասնաւոր բան մը չէ մնացած յիշողութեանս մէջ : Անշուշտ Տիկին Լըքոնթի տունն անցուցած եմ ուրիշ իրիկուններու պէս :

— Եւ յունվար 14 ի կիրակի՞ իրիկունն :

— Նոյն կերպիւ անցուցի : Միայն թէ այն օր հայրս ինձ հետ ճաշեց Տիկին Լըքոնթի տունը :

— Ձեր այդ ըսածները պիտի ըստուգուին : Առ այժմ ուրիշ բան մը չունիմ ձեզ հարցնելու :

— Ուրեմն՝ կրնամ մեկնիլ :

Ապահովութեան պետն ուսերը ցընցելով զանգակը քաշեց , և ըսաւ Բիէտուշի , որ ներս մտած էր .

— Կառք մը , շուտով :

— Մեզ բերող կառքը բակին մէջ կեցած է , պատասխանեց Բիէտուշ :

Տրֆն ու ձին ծանօթ կառապետէ մը վարձած եմ , և Բիկաշ կը վարէ , վասն զի ժամանակաւ թնդանօթավար եղած լինելով , կառք վարել զիտէ :

— Լա՛ւ , գնա վարն սպասէ ինձ նրբանցքին ծայրն , ըսաւ ապահովութեան պետը :

Պահակն աներեւոյթ եղաւ :

— Ո՛ւր պիտի երթանք , պարո՞ն , հարցուց Լուի Տը ժանթիյեի խեղդուկ ձայնիւ :

— Ձեր տունն :

— Իմ տո՛ւնս , ի՞նչ կը նշանակէ . . .

— Կը նշանակէ թէ ձեր բնակարանն աչքէ պիտի անցունեմ , և որովհետեւ ձեր ներկայութեամբ պիտի բնեմ այս այցելութիւն , պարտաւորուած եմ ինձ հետ տանիլ ձեզ :

Օ՛ , անհող եղիք , այն կերպիւ պիտի կատարուի որ բնաւ չդպչի ձեզ երբոր կարենաք զձեզ արդարացնել

այն ծանր ամբաստանութենէն՝ որ կը ծանրանայ ձեր վրայ :

Լսեցիք որ պահակին հրամայեցի երթալ սպասել ինձ : Ձեզ հետ ի միասին պիտի դուրս ելնենք . . . այնպէս ցոյց տալով որ իբր թէ գանգատող մ'էք դուք՝ և ոչ ամբաստանեալ : Եւ երբ ձեր տունն երթանք, այնպէս պիտի ընեմ որ ձեր դռնապանը չկրնայ բան մը կռահել :

—Շատ շնորհակալ եմ ձեզ արդարեւ այդ նախազգուշութեանց համար, քսաւ երիտասարդը դառնութեամբ, բայց բոլորովին աւելորդ կը թուին ինձ, եթէ, ինչպէս կ'ենթադրեմ, իմ կարասիներս խուզարկելու . . . թուղթերս քննելու պիտի ելնէք . . . :

—Անհրաժեշտ է :

—Եւ մանաւանդ եթէ ձերբակալէք զիս յետոյ :

—Եթէ ձեզ ձերբակալեմ, դուք ուզած պիտի լինիք : Տակաւին ժամանակ կայ զիս չհարկադրելու որ խիտ միջոցներու դիմեմ : Արդարացուցէք

զձեզ, ապացուցէք ձեր անմեղութիւնն, եւ պատրաստ եմ ըսել ձեզ, և երբոր ստուգեմ ձեր յայտարարութեանց ճշդութիւնն, ազատ կը թողում ձեզ :

—Ապացուցանել անմեղութիւնս : Բայց ձեզ կ'իյնայ ապացուցանել թէ յանցաւոր եմ ես :

—Շատ իրաւացի է ձեր այդ խօսք, և ճշդիւ այդ ապացուցութեան համար է որ ձեր բնակարանը պիտի խուզարկեմ :

Եկէք, պարոն :

Այս յոյժ տրամաբանական եզրակացութեան վրայ, ապահովութեան պեան իւր գրպանը դրաւ ըստանկարայցետոմսն, — պանքտոմսներն ու ատրրճանակը դարակի մը մէջ պահած էր—, նշանացի դուռը ցոյց տուաւ Պ. Տը ժանթիյեիի, և դուրս ելաւ անոր ետեւէն :

Գրասենեկին պաշտօնեայներն անոնց անցած ժամանակ նայեցան նոյն անաարբերութեամբ որով վարժուած էին մերթ ընդ մերթ պատուաւոր մարդոց

անկից անցնիլը տեսնել , ինչպէս արհեստով չարագործներուն :

Անոնցմէ մին հոն էր այն ժամանակէն ի վեր , յորում Քօսիտիէր (1848) ոստիկանութեան վերատեսուչ էր :

Գետնայարկն սպասող տեսուչները չչարժեցան իրենց տեղէն , նմանապէս պահակները :

Պաշտօնատան սովորոյթներուն անտեղեակ անցորդ մը կրնար կարծել թէ Պ. Տը Ժանթիյեի և անոր ընկերակցող անձը զուարճական պտոյտի մ'եղած էին :

Բիկաչ նստած էր կառքին վրայ և Բիէտուչ արդէն գնացած էր դռնակն :

Երիտասարդը նախ ներս մտնելով՝ նստաւ ետեւի բազմոցին վրայ . ապահովութեան պետն ալ անոր քով . իսկ Բիէտուչ իւր մեծին դիմացն , որ երիտասարդին տան հասցէն տուած էր առժամեայ կառավարին :

Կառքը մեկնեցաւ , և ճանբան երկար չտեւեց , վասն զի ձին հանգչելու ժամանակ ունեցած էր :

Պ. Տը Ժանթիյեի՝ կառքին անկեանը կըթնած , ամենեին բերանը չբացաւ այս արագ ուղևորութեան միջոցին :

Չատագովութեան միջոցնէ՛ր կը պատրաստէր թէ իւր նշանածին վրայ կը խորհէր , որ անհամբերութեամբ իրեն կ'պասէր :

Ինչ որ և էր , ապահովութեան պետը չուղեց վրդովել անոր մտածութիւններն , և առանց բառ մ'արտասանուելու հասան Մոն-Թապոր փողոցը :

Լուի , միջնակարգ քաղաքացւոյ դեղեցիկ տան մ'առաջին դաստիկոնին մէջ ճաշակով կահաւորեալ և վայելչապէս բաժանեալ բնակարան մ'ունէր , որ չորս սենեակէ կը բաղկանար , դահլիճէ մը , աշխատութեան սենեկէ մը , որք բաւական լայն սրահի մը վրայ կը բացուէին՝ առանց մէկէն միւսին մէջ մտնել հարկ լինելու :

Երիտասարդը , դուրսը ճաշելուն պատճառաւ , տանը մէջ ճաշարահի պէտք չունէր , ոչ ալ սենեկապան ծառայի :

Սպասուհին բացակայ լինելով, Պ. Տը ժանթիյեի անձամբ բացաւ իւր դուռն երկու այցելուներուն, զորս ակամայ կը մտցնէր յիւր տուն :

Իւր ձեռնաշտանակը դռնապանին օթեակէն առած ժամանակ՝ դռնապանը չէր զարմացեր տեսնելով որ իւր վարձակալաց վեհանձնագոյնն երկու պարոններու հետ կուգար :

— Ըրէք այժմ ինչ որ կ'ուզէք, ըսաւ իւր աշխատութեան սենեակը ցուցնելով անոնց :

Սպասուհիութեան պետն արագ նայուած մը ձգեց գրադարանին վրայ, ուր իրաւաբանական մեծահատոր գրքքեր կը տեսնուէին նուազ լուրջ և աւելի վայելչապէս կազմուած գրոց հետ :

Հին կաղնիէ որմագրուագներու վրայ հին փորագրութիւնք կային և երկու երեք ալ արդի նկարներ, բաւական մեծազին :

Գրասեղանին վրայ բազմաթիւ պարութայներ կային, որոց մի քանին նոր աչքէ անցած կը թուէին :

Լուրջ երիտասարդի մը սենեակ էր, զոր իւր արհեստական աշխատութիւնը չէր արգելուր գեղարուեստից և գրականութեան ալ զբաղելէ :

Սպասուհիութեան պետն այսպէս դատեց զայն, և միայն ձեւի համար թղթատեց գրասեղանին վրայ կեցած նախադիծերն և քաշեց բացադարակներն, ուր աննշան թուղթեր միայն տեսաւ :

Պ. Տը ժանթիյեի սպասեց, բաւական խորխտ դիրքով մը, մինչև որ պետն աւարտեց իւր խուզարկութիւններն, և յետոյ դահլիճը տարաւ զայն :
Հոն բազմոցներ, թրքական ծխափողեր և որմին վրայ կախուած դէնքեր միայն կային :

Բանալիով կղպուող կահ բնաւ չըկար, ոչ ալ սեղաններ, բաց ի քանի մը նկարէն փայտեայ պատուանդաններէ, որոց վրայ ծխախոտի ամաններ և սուրճի ամենամանր գաւաթներ դրուած էին :

Երիտասարդին դահլիճը բոլորովին արևելեան ձևով կահաւորուած էր :

Բիէտուշ հիանալով այս նորութեանց վրայ, ոտքին ծայրովը կը քայլէր, որպէս զի չաղտոտէ զմիւռնական գորգերն :

Ապահովութեան պետն, առաւել անվեհեր, առաջին նայուածքով անօգուտ դատեց խուզարկել անդ և մտաւ ննջասենեակն, ուր իւր աչքին հանդիպեցաւ նախ՝ ոչ թէ սիւնազարդ անկողինը Լուի ԺԳ. ի գեղեցիկ ոճով, այլ վարդենիէ փոքրիկ գրասեղան մը որ սենեկին մէկ անկիւնը ծածկուած էր :

— Հաճեցէք տալ ինձ սա գրասեղանի բանալին, ըսաւ առանց վարանելու :

Կը գուշակէր թէ երիտասարդին գաղտնիքն անոր մէջ պահուած էր :

— Աւասիկ, պարոն, ըսաւ պաղուծեամբ Պ. Տը Ժանթիյեի : Քննեցէք այդ գրասեղան, չեմ կրնար արգելուլ ձեզ. բայց կ'իմացնեմ ձեզ թէ ընտանեկան թուղթեր և մտերմական նամակներ միայն կը պարունակէ : Երբոր ստուգէք թէ ձեզ հոս բերող գործին հետ բնաւ յարաբերութիւն չունին, կը

յուսամ որ կը հաճիք նորէն ինձ յանձնել :

— Ձեր պարութային պիտի կցին : Քննութեան պէտքն այնպէս կը պահանջէ, ըսաւ ապահովութեան պետը, բայց յետոյ . . . կրնան նորէն ձեզ յանձնուիլ :

Մնաց որ՝ ես այժմ չպիտի քննեմ զանոնք : Շարունակենք, եթէ կը հաճիք :

Հագուելու խուցը սրահակէ դուռնակով մը միայն բաժնուած էր ննջասենեկէն :

Բիէտուշ վեր առաւ սրահակն՝ որպէս զի իւր պետը ներս մտնէ, և ըյս տալու համար երկու մոմով աշտանակ մը բռնեց ձեռքը, զոր երիտասարդին աշխատութեան սեղանին վրայէն առած էր :

— Յ.յս է ձեր բոլոր բնակարան, հարցուց ապահովութեան պետն՝ յետ աչքէ անցունելու մէկ նայուածքով՝ ճերմակ մարմարէ սեղանը, մեծամեծ քաղցրահամ, անգլիական յախճապակէ

խոշոր կուժերը , քանդակեալ բիւրեղէ շիշերը , փղոսկրեայ խողանակներն և այլ հազարաւոր մանրամասնութիւնք՝ որք վայելչասէր երիտասարդի մ'արդուզարդին կը ծառայեն :

— Բացարձակապէս այս է , պատասխանեց չորութեամբ Պ. Տը Ժանթիյեի , եթէ չէք ուզեր աչքէ անցունել խոհարանը , փայտանոցը , լաթերուս որմադարանը . . .

— Այս չափը բաւ է , պարոն : Իմ պաշտօնս աւարտած է հոս : Այժմ պիտի առնում և ձեր աչաց առջեւ կընքեմ ձեր թուղթերը , նամակներն և . . .

Պետք կանգ առաւ՝ Բիէտուշի ձեռքըն զգալով մեղմաբար իւր թեւին վրայ :

Ետին դարձաւ և տեսաւ որ Բիէտուշ՝ առանց բան մ'ըսելու՝ տախտակորմին մէկ կողմը պարսկական գորգով ծածկուած կէտ մը կ'ակնարկէր ընդ մէջ արդուզարդի սեղանին և պատուհանին :

Արհեստէն եղող անձանց միջեւ այս

մունջ լեզուն յոյժ գործածական է և յոյժ հասկնալի :

Պետք կուպերու կափմամբ մը պատասխանեց , որ կը նշանակէր թէ այն կէտն ալ պիտի քննուէր ,

Պ. Տը Ժանթիյեի տժգոյն , բայց ինքզինք բռնած , ներկայ կը գտնուէր այս ակնարկութեանց՝ առանց նշանակութիւնը գուշակելու :

Բայց շուտով հասկցաւ :

Բիէտուշ , որ կարգասէր մարդ մ'էր , նախ արգուզարդի հայելին քով կեցած չորս մոմերը վառեց , որպէս զի լաւ լուսաւորուի խուցը , մինչդեռ ինքն ալ ձեռքի ճրագը կը գործածէր :

— Հաճեցէք մտնել , ըսաւ պետք մէկ կողմ քաշուելով , որպէս զի ներս մտնէ Պ. Տը Ժանթիյեի :

Բնակարանին դուռը կղպուած չը լինելով , երիտասարդը կրնար փախչելու փորձ մ'ընել :

Թէեւ այնպիսի բան մ'ընելու փափաք չունէր , բայց իրեն եղած հրաւերն յայտնապէս վրդովեց զինք :

— Աւելորդ է, իմ արգուզարդի սե-
ղանս ծածուկ դարակներ չունի, ըսաւ
կատակ կեղծելով :

Սակայն վերջապէս յառաջ անցաւ
և ապահովութեան պետն ալ անմիջա-
պէս անոր ետին կ'ըցաւ :

Բիէտուշ արդէն դորդի սկսած էր :

Սրահակներուն ծալերէն բաւական
լաւ ծածկուած պղնձէ կոճակի մը վրայ
ձեռքը կոխելով՝ տախտակէ դռնակ մը
բացաւ :

— Թաքստո՛ց մը, գոչեց, ի՞նչ կըր-
նայ լինիլ մէջը :

Երանի թէ երրորդ դիակ մ'ալ աստ
չգտնուէր, աւելցուց ինքնիրեն :

— Ի՞նչ ու՛րիք, պարո՛ն, հարցուց
պետը Պ. Տը ժանթիյեիի նայելով :

Երիտասարդը ճիգ մ'ըբաւ պատաս-
խանելու, բայց ձայնը կոկորդին մէջ
մնաց :

Սակայն Բիէտուշ գլուխն ու ձեռ-
քը թաքստոցին մէջ երկնցնելով՝ ձեռքի
ճրագովն սկսաւ զննել հետաքրքրաբար :

— Զարմանալի՛ բան, ըսաւ ետ քաշ-

ուելով, տարօրինակ, անակնկալ բան,
որ դիւրաւ չկրնար մեկնուիլ :

Պեան առաւ ճրագն անոր ձեռքէն,
աչք ըբաւ որ հսկէ ձերբակալին վրայ,
և ինք գլուխը դռնակէն ներս խօթեց
հասկնալու համար թէ ի՞նչ էր որ այն-
չափ զարմանք կը պատճառէր իւր գոր-
ծակալին, որ յոյժ տարօրէն գիւտերու
վարժուած էր :

Գաղտնի դուռը կը բացուէր տե-
սակ մը նրբանցքի վրայ, որ ձևացած
էր պարսկական գորգով ծածկուած
տախտակորմին և քովի տունը Պ. Տը
ժանթիյեիի բնակարանէն բաժնող պա-
տին միջև :

Այս մենարան, աւելի երկայն քան
թէ լայն, լուսամուտ բնաւ չունէր, և
Ֆլանտրական հին գորգերով պատած
էր. տախտակամածը ծածկեալ էր
բրնձի յարդէ բարակ փսիաթով մը,
որոյ գործածութիւնն ընդհանրացած
է տաք երկիրներու մէջ :

Կահ բնաւ չկար՝ բաց ի քառակուսի
սեղանէ մը, որ խաղի սեղանի կը նմա-

ներ, և որոյ վրայ խաղի թուղթեր շարուած էին մասնաւոր կարգաւ :

Կարմիր արքայները (Բահլւ) սեւ աղջիկներուն հետ դրուած էին, սեւ միաւորները (պէ) կարմիր սպասաւորաց (պահա) հետ, և այսպէս միւսներն ալ :

Այս գիւտ՝ ուրիշ ամեն տեղ որ և է կասկած չէր կրնար հրաւիրել բնակչին վրայ, վասն զի սենեկի մը մէջ փակուելով քահանայ (համբերութիւն) բանալու գործն եղեռնական բան մը չունի : Նմանապէս յանցանք մը չէ այդ քահանայն ընդհատել և թուղթերը սեղանին վրայ մոռնալ :

Բայց ապահովութեան պետն սքանչելապէս կը յիշէր այն ներքնաստեղծիկին մէջի խաղի սեղանն, որոյ մօտ յոյժ անխորժ ժամեր անցուցած էր ժամացուցի մը պահարանին մէջ. ասկէ զատ իւր դրպանին մէջ էր սպանեալ կնոջ պատկերն, որ իւր լուսանկարն հանել տուած էր՝ Մաչայի աղջիկ մը մէկ ձեռքն և կամելիա մը միւս ձեռքը բռնած :

Մաղիկն ու թուղթը դիակնարանը կեցած էին կնոջ դիակին վրայ :

Թաքստոցին մէջի սեղանին վրայ ալ, չափակցաբար շարուած խաղի թուղթերուն քով, չորցած ծաղիկ մը կար՝ որոյ ձևէն կը ճանչուէր տակաւին :

Կամելիա մ'էր :

Այս տարօրինակ զուգադիպութիւնք բաւականապէս կ'ամբաստանէին զՊ. Տը Ժանթիյեի, և հանճարեղ ստիկանապետն՝ իւր երկար ասպարիզին մէջ՝ ըրած չէր այսպիսի նախախնամական գիւտ մը :

Կը հարցնէր ինքնիրեն թէ ինչպէս այս երիտասարդ կրցած էր այսպիսի անխոհեմութիւն մ'ընել այս սարսափելի ապացոյցները պահելով իբրև ճարտարարուեստ նիւթ մը թանգարանի մը մէջ :

Թաքստոցը գրեթէ աղօթարանի մ'երևոյթ ունէր, և տեսնելով այն երկիւղած խնամքն՝ որով Պ. Լըքոքի որդին այնպէս յարդարած էր զայն, կըրնար կարծել ոք թէ մերթ ընդ մերթ

կերթար ծունր կը դնէր թուեալ եր-
ջանկութեան մ'այդ նշխարներուն առ-
ջեւ :

—Անո՛ւր բան , կ'ըսէր ինքնիրեն ա-
պահովութեան պետն : Այս երիտասարդ
պաշտած պէտք էր լինէր զայն կին . . .
խաղի թուղթերը . . . ծաղիկն . . . և այս
ամենայն յայտնապէս կապակցութիւն
ունին տարփական տեսարանի մը յիշա-
տակին հետ . . . և սակայն սպաննած է
զայն . . . այո՛ , սպաննած է . . . արևու
լուսոյն պէս յայտնի է . . . և սպան-
նած է այն վարկենին որ բախնալ կը
բանար . . . ինչպէս որ կը տեսնուի լու-
սանկարին վրայ . . . :

Այս մարդ խելագար է արդեօք :
Չեմ գիտեր , բայց գրաւ կը դնեմ որ
իւր փաստարանը խելագարութիւն պի-
տի պաշտպանէ , և ես , եթէ երդուեալ
դատաւոր լինէի , պիտի հաւատայի
թերևս :

Այո՛ . . . բայց երդուեալ դատաւոր
չեմ ես , և ամեն խորհրդածութիւն
ընելով կը կարծեմ թէ Պ. Տը ժանթիյ-

եի զգայուն մարդասպան մ'է պարզա-
պէս : Բանինն՛ր տեսած եմ արդէն :

Եւ քիչ մ'երևակայութեամբ իւր
առջև կը կերպարանէ ոք այն ամեն
տեսարաններն՝ որոց հետքը կը գըտ-
նեմ աստ :

Տիկինը թուղթ բանալու մոլեգնու-
թիւնն ունէր . . . թերևս հասկնալու
համար թէ իւր տարփածուն պիտի ա-
մուսնանա՞ր իւր հետ . . . երբոր իրարմէ
պիտի բաժնուէին ուղևորութեան մ'առ-
թիւ . . . : Կենթադրեմ թէ այս ժան-
թիյեի Անգլիոյ մէջ ճանչած է զայն , և
օր մը Ֆրանսա կոչուեր է . . . : Այն օր
կինը բախնալ բացած և «էի-նէի» (յաջո-
ղութիւն) մ'ըրած է , որ յաջողած
պէտք է լինի . . . տարփածուն խոս-
տոցեր է պահել այն թուղթերն որք
իրենց երջանկութիւնը գուշակած էին . . . :

Աւասիկ այն թուղթերն են այս սե-
ղանին վրայ շարուածներն . . . և կը
զարմանամ որ ապակիի մը տակ գրած
չէ . . . :

Նամանակէ յետոյ կինը Փարիզ ե-

կեր է , և երիտասարդին յիշողութիւնն արթնցնելու համար՝ իւր լուսանկարը շինել տուեր է հանդերձ այն պարագայիւք , որք անոր խանդակաթ հրաժեշտը պիտի յիշեցնէին իրեն . լուսանկար տոմսին ետին Մէ՛ ծուռա՛ զէս՝ Գըրեր է . . . անդիւերէն . . . և ասոր զըրկեր է :

Ճշդիւ այսպէս եղած է : Բիէտուշ , Պուլոյն դիմելէ առաջ՝ լուսանկարչին գնացած էր , որ բսեր էր իրեն թէ տիկինը միայնակ եկած էր , և թէ մէկ օրինակ միայն խնդրած էր՝ պահանջելով որ կաղապարը ջնջուի :

Աւասիկ վիպասանութեանս երեք չորրորդը շինուած . . . այո՛ , բայց կընճուին լուծո՛ւմը . . . : Այն ալ գտնելուած է :

Ժանթիյեի , տիկինը վերստին տեսնելէ յետոյ կ'իմանայ թէ կը խարէր զինքն , և կ'ուզէ վրէժ առնուլ . . . : Իւր ընելիքը կը պատրաստէ . . . իրիկուն մը յանկարծ կ'երթայ , և հակառուփող հոմանին սեղանի վրայ գտնելով՝ կըս-

պաննէ . . . : Անկից կ'անցնի ներքնասենեակն , ուր գեղուհին . . . ուրիշի մը համար . . . յաջողութիւն բանալու զբաղած էր . . . կը զարնէ , զայն ալ կ'ըստպաննէ և Սլաքի տիկինը (*) (Մաչայի աղջիկը) սրտին վրայ կը դամէ . . . թուղթ մը , որ իրենց առաջին տարփանայ ժամանակ յատուկ նշանակութիւն մ'ունէր . . . : Իրենց երջանկութեան թուղթն էր . . . :

Եւ յանկարծ միտքը բան մ'ընկնե-

(*) Ըստ խնդրոյ բանասիրաց ոմանց , որոշեցինք խաղի թուղթերուն անունն հայերէնի վերածել Պրանսերէնին հետեւելով , որ յարմարագոյնն երևցաւ մեզ :

Սլաք (մալա)

Տերև (սպտի)

Քառակ (օրէս) փոխանակ քառակուսեակի

Միրա (+բա)

Սրբայ (մահու)

Տիկին (+ը)

Ծառայ (պահագ)

Մէկ (դէ)

Երկու (է+է)

Երեք , չորս , հինգ . . . մինչև տասն :

լով, ապահովութեան պետք սեղանին վրայ ծռեցաւ, և շարուած թուղթերը քննեց ուշադրութեամբ:

Սլաքի տիկին մը պակաս էր:

Ապահովութեան պետք ժամանակաւ համբերութեան բացած լինելով, կը յիշէր որ, քստ կանոնաց այդ խաղին, Սլաքի տիկինն ամուսնացած պարտ էր լինել Բառակի արքային (Օբեյտե Բահլէն) հետ: Արդ՝ Բառակի արքայն այրի էր:

Այսչափս բաւական էր: Պետն հագուելու սենեակը վերադարձաւ, ծածուկ փեղկն իւր տեղը դրաւ, և ճրագը Բիէտուչի տալով՝ ըսաւ.

— Տեսայ ինչ որ տեսնել կ'ուզէի: Զուենք:

— Եւ ձեր տեսածներէն չպիտի եզրակացնէք թէ ես յանցաւոր եմ, գոչեց Լուի Տը ժանթիյերի. կը յուսամ որ կարեւորութիւն չպիտի ընծայէք այն կարծեցեալ նշաններուն, որոց ոչ ոք չուրջ նշանակութիւն մը կրնայ տալ:

— Անոնց արժէքը քննելու ժամանակն եկած չէ: Քննիչ դատաւորին

գործն է այդ, պատասխանեց ապահովութեան պետն:

— Ըսել է թէ զիս ձերբակալելու, անպատուելու պատասխանատուութիւնը կ'ստանձնէք. . . վասն զի իմ վիճակս ունեցող մարդու մը ձերբակալումը, թէեւ վաղը թող տրուիմ, անպատուութիւն է. . . և դուք ուրիշ ապացոյց չունիք ինձ դէմ՝ բայց եթէ իմ վրայ դատուած լուտանկար մ'ե չեմ գիտեր ինչ մերձեցում մը, զոր հաճոյ կը թուի ձեզ հաստատել ընդ մէջ. . .

— Կը մոռնաք թէ ձեզ ոստիկանութեան պաշտօնատունը տանող գործակալին քսան հազար ֆրանք առաջարկեցիք որպէս զի թոյլ տայ ձեզ փախչիլ: Նմանապէս կը մոռնաք թէ յետոյ ուզեցիք զայն սպաննել, և ապա զձեզ: Կարծեմ թէ անմեղ մարդ մ'այդպէս չվարուիր:

— Գլուխս կորուսած էի:

— Աւելորդ խօսքեր են ադոնք: Դուք երկու ժամէ ի վեր ձերբակալման վիճակի մէջ էք. չուզեցի լսել ձեզ

զայս՝ յուսալով որ խոստովանութիւններ կ'ընէ՛ք : Այժմ ո՛չ ես բան մ'ունիմ ձեզ հարցնելու , ո՛չ ալ դուք ինձ ըսելու : Դատական արդարութեան կը վերաբերիք : Քալեցէք երթանք :

Պ. Տը ժանթիյեի բաւական անխըռովութեամբ կրեց այս սարսափելի հարուած :

Առանց բառ մ'արտասանելու նընջարանը մտաւ և առանց վրդովելու դիտեց ապահովութեան պետին գործողութիւններն , որ դրասեղանը բացաւ , թուղթերուն խուրձերն առաւ , մեծկակ ծրար մ'ըրաւ և կնքեց մոմով :

—Ո՛ւր պիտի զրկէք զիս , հարցուց երիտասարդը պաղութեամբ , երբոր կնքման գործն աւարտեցաւ :

—Ոստիկանութեան արգելարանը : Վաղը պիտի հարցաքննուիք քննիչ դատաւորէն , և յետոյ հաւանաբար Մազասի բանտը պիտի փոխադրիք :

—Կրնա՞մ մէկու մ'իմացնել իմ ձերբակալումս :

—Եթէ կ'ուզէք իմացնել այն ան-

ձանց , որոց հետ անցուցիք ելեկոյթը , չեմ կրնար ես ինձմէ թոյլ տալ որ գիր գրէք անոնց :

—Ո՛չ , անոնց չպիտի գրեմ . կ'ուզեմ որ հայրս իմանայ :

—Ես կ'իմացնեմ անոր վաղ առաւօտ : Ըսէք ինձ , ո՛ւր կը բնակի :

—Քոնթի գետափ , 49 :

—Քոնթի գետափ , 49՝ , կրկնեց ապահովութեան պետը զարմացման ակներեւ նշաններով : Եւ Պ. Տը ժանթիյեի՞ կը կոչուի :

—Լըքոք Տը ժանթիյեի :

Այս պատասխանէն ո՛չ միայն պետն ապշեցաւ , այլ և Բիէտուշ վերցատկեց դէմքը ծամածռելով :

—Ի՛նչ կ'ըսէք , դուք վաղեմի վաճառական Պ. Լըքոքի սրբի՞ն էք , ըսաւ պետը , Պ. Լըքոք Տը ժանթիյեիի , որ տասն տարիէ ի վեր այդ ձեր ըսած տունը կը բնակի :

—Այո՛ , պարոն :

—Ձեր հայրն արդարապէս յարգի մարդ մ'է , յարեց ապահովութեան

պետք վայրկեան մը լռութենէ յետոյ :
Կը ճանչեմ զայն և կը խոստանամ ձեզ
որ վաղ առաւօտ ես անձամբ երթամ
իմացեմ անոր այս իրողութիւն :

Դժբաղդարար ասկէց աւելի բան
մը չեմ կրնար ընել ձեզ համար , ա-
ւելցուց՝ բնակարանին դուռը ցուցնե-
լով երիտասարդին :

Լուի Լըքոք դուրս ելաւ նախ , և
սանդուղէն վար իջած ժամանակ , պետն՝
անկեղծապէս յուզեալ՝ քսաւ իւր գոր-
ծակալին ականջն ի վար :

— Չարաբաղդութիւն մ'է այս :
Խեղճ հայր Լըքոք , պիտի մեռնի սըր-
տին ցաւէն : Ես ալ կ'առաջարկէի իրեն
որ այս գործն իւր վրայ առնու , և
համբին դուրս ելած օրը Բոն-Նէօֆի
վրայ պատահեցաւ ինձ իւր որդւոյն
հետ : Երբոր այս չարածճի որդին սեն-
եակէս ներս մտաւ , կ'ըսէի ես ինձ թէ
ո՛ւր տեսած եմ այս դէմք : Եւ երբ
իւր Տը ժանթիյեի անունը լսեցի , պէտք
էր արթննայի : Բայց բոլորովին հեռի
էի մտածելէ թէ այդ բարի մարդուն

մերձաւորն էր : Չա՛ր սատանայ . աւա-
սիկ վերջին յայտնութիւն մը , որ ու-
րախութիւնս բոլորովին խանդարեց :

— Եւ ես , տէ՛ր իմ , հարուստ չեմ ,
բայց երբ կը խորհիմ թէ ես պատճառ
եղայ որ Պ. Լըքոք պիտի մեռնի սըր-
տին ցաւէն , յօժարակամ կը հրաժա-
րէի պարգևներէ , յառաջացումէ , և
այլ ամեն բանէ , որպէս զի այսօր դի-
ակնարանը գնացած չլինէի :

— Ի՞նչ պիտի ընես , արհեստդ է :
Վաղը , թերևս , հարկ պիտի լինի համ-
րը դէմ առ դէմ բերել այս երիտա-
սարդի հետ , և տարակոյս չունիմ որ
այդ երեսումը կառափնարան պիտի
ղրկէ իմ վաղեմի բարեկամին որդին :

Թ.

Առաւօտը նոր ծագած էր , ձմբան
դեղեցիկ առաւօտ մը , զոր մերթ ընդ-
մերթ Աստուած կուտայ փարիզցւոց՝
յունկար ամառյ մէջ :

Այնպիսի օրեր , փողոցները տօնա-
կան աւուրց երևոյթ ունին :

Փողոցները պարտելու պարտաւորեալ խեղճ մարդիկ կը զուարճանան եղկ օդ մը շնչելով և ցեխի մէջ քալելէ զերծ մնալով :

Հարուստք, վառարանին անկիւնը թողլով՝ դէպ ի Շանդ-էլիզէ կ'ուղեւորին՝ գարնան մօտենալը տեսնելու և մանաւանդ ախորժակ շահելու համար :

Վայելչասէր կանայք, իրենց բարձր կրուկներով կը կռանն չոր սալարկներն, և խանութներու ապակափեղկերուն առջեւ կը դեգերին :

Ուրախութիւն կայ օդին մէջ :

Այս ուրախութենէ հայր Լըքոք ալ բաժին մ'ունէր :

Ըստ սովորութեան, արշալուսին հետ ելած էր, և ամլուելէ ու լուացուելէ յետոյ հագուեր էր : Այս գործողութիւնք մէկ ժամէն աւելի կը տեւէին, վասն զի ծերուկը մեծ խնամ կը տանէր իւր անձին :

Պատուհանը բացաւ և հազարերորդ անգամ ի զնին կեցաւ այն սքանչելի համատեսիլ պատկերին, որ կը տեսնուի Քոնթի դետափէն :

Գիմացը Սէն գեան էր, ոգեւորեալ շողեմաւուց երթեւեկով, և Լուվր՝ ոգոզեալ լուսով :

Ձախակողմը դետեզերեայ դարատափին յաղթ մաշկամրդիներն էին՝ շառագնեալ արեւուն առաջին ճառագայթներէն :

Աջակողմն հին Փարիզ քաղաքը՝ նորոգեալ յորմնադրաց, իւր նորակառոյց շէնքերով, ոսկեզօծ սրածայր գմբէթով որ երկինք կը բարձրանայ ուղղաբերձ, և Նօթր-Տամի երկու հսկայակերտ աշտարակներն, որք ոտիկանական պաշտօնատան տանիքներուն վրայէն նայելու երեւոյթ մ'ունին :

Այս այլազան պատկերին մէկ կողմն անցեալը կը յիշեցնէր Պ.Լըքոքի, յօգնավաստակ, մրկալից և արկածաւոր անցեալ մը :

Միւս կողմն ապագային վրայ կը խօսէր, անամպ ապագայի մը վրայ, այն աշխատասէր մարդու ապագային վրայ, որ վերջապէս իւր պատշաճ տեղը գըրաւած է աշխարհի մէջ, որ փարթամ

և յարգի ծերութեան մը հասած է ,
որ կը հանգչի մտամբոյի և որ կը յու-
սայ երկար ապրիլ իւր սերնդեան մէջ :

Տարիէ մ'ի վեր ամեն բան յաջող
կ'երթար այս բարի ծերուկին :

Այն սրտատանջութիւնք , զորս որ-
դին ժամանակաւ կուտար , փարատած
էին , և այդ պաշտեցեալ որդւոյն մեր-
ձակայ ամուսնութիւնն իւր ամեն բաղ-
ձանքը կը լցնէր :

Լուի հարուստ և դեղեցիկ աղջկան
մը հետ պիտի ամուսնանար , զոր կա-
թողին կը սիրէր :

Հայրն , որ անոր բնաւորութիւնն
հիմնովին կը ճանչէր , ուրախ կը լինէր
այս քաջայարմար հանգիպման վրայ ,
վասն զի դիտէր որ այդ զարմանալի
տղան սէրը չէր զոհեր դրամի , և կըր-
նար անյարմար մէկու մը տալ զիւր սէր :

Պ. Լըբոք չէր մոռցած Լուիի ըրած
խենդ... թիւներն Անգլիոյ և Գերմա-
նիոյ մէջ , բայց ոչ եւս կը վախնար թէ
Ֆրանսայի մէջ ալ կրնային վերսկսիլ :

Սիրտը բռնուած էր , ամուսնու-

թեան օրն որոշուած էր , հարսանեկան
ընծայն կը գնուէր :

Մինչեւ իսկ շատ սուղ կը նստէր
ծերուկին այդ ընծայն : Դեռ նախորդ
օրն հինգ հազար ֆրանք տուած էր
ապարանջանի մը համար , և տակաւին
վերջն եկած չէր :

Բայց չէր կսկծար իւր դրամներն ,
և երբէք այն առաւօտեան չափ զու-
արթ եղած չէր , երբոր իւր պատշգա-
մին կրթնած էր արմուկովը :

Կը խորհէր երթալ գտնել իւր որ-
դին անկողնին մէջ և առաջարկել որ
ի միասին պտոյտ մ'ընեն այլեւայլ նիւ-
թեղինաց վաճառատուները :

Քանի մ'օրէ ի վեր Լուի ազատ ժա-
մանակ ունէր . հրաժեշտ առած էր իւր
նօտարական գրասենեկէն , և ստոյգ
չէր թէ վերստին հոն պիտի վերադառ-
նար երբէք , վասն զի հարսանեկան
ուղեւորութիւնն որոշուած էր , և օ-
րիորդ Լըբոթ չէր ախորժեր նօտա-
րութենէ :

Հայր Լըբոք կը հարցնէր ինքնիրեն

Թէ իւր ժառանգը, փոխանակ ինքզինք պայմանագրոց խմբագրութեան և մշտաբնականոր սպիտակ վզկապի նուիրելու, աւելի լաւ չընենք մեծ ազարակ մը գնել գաւառի մը մէջ և շահագործել:

Իւր անճնական հաշուին համար, վաղեմի խուզարկուն ուրիշ բան մը չէր խնդրեր, բայց միայն իւր կեանքը գիւղի մէջ անցունել, և ժամ մ'առաջ թօթափել իւր կօշկաց փոշին այս ապիրատ քաղքին վրայ, որոյ սալարկներն յաճախ իւր ոտքին տակ ծեծած էր մարդիկ որոնելով:

— Եւ ըսել թէ ուստիկանութեան պաշտօնատան մէջ կը կարծէին թէ իրենց հաճոյ լինելու համար նորէն ձեռք պիտի առնուի այդ արհեստ, միմուաց՝ արհամարհանօք նայելով ուստիկանութեան պաշտօնատան շէնքին, որ Օրֆէվրի գետափը կը պատէ:

Կը տեսնուի որ հայրութեան . . . և կարթով որսալու քաղցրութիւններուն անդէտ են: Ես, որ Լուին պիտի

ամուսնացնեմ և կալուածատէր պիտի լինիմ, եթէ սիրտս ուզէ, նորէն այդ ժխորին մէջ մտնեմ . . . օ՛, ո՛չ, ո՛չ. անցած է այն ժամանակ, ուր զիս հայր տարւել կը կոչէին, և ուր անունս չէի գողցած: Այժմ այդ արհեստ բնաւ չզուարճացներ զիս: Ես Պերանժէի երգին յիսնապետը չեմ . . . ծեր նժոյգն ոչ ևս կ'զգայ խթանը: Պարոն սրիկայները կրնան ուզածնուն չափ կանայք սպաննել, և մինչեւ իսկ խաղի թուղթ գամել անոնց կուրծին վրայ: Ես ոչ ևս պիտի վաղեմ անոնց ետեւէն:

Հայր Լքքօք թերեւս քիչ մը չափազանց կը գովէր զինք՝ հաստատելով թէ դատական խնդիրները բնաւ չէին գրաւեր զիւր ուշադրութիւն, վասն զի պահ մը յետոյ յարեց, ինքնիրեն խօսելով:

— Եւ սակայն ուշադրութեան արժանի է այդ գործ: Եթէ երիտասարդ լինէի և Լուին չունենայի, կրնար զիս գրգռել, մանաւանդ այն սատանայ համրն . . . որ առեղծուածին լու-

ճոււմը գիտէ, բայց չկրնար ըսել:

Ի՞նչ ըրին արդեօք ասն զի (ոստիկանութեան պաշտօնատան մէջ): Մինչեւ ցարդ անմտութիւններ: Ապահովութեան պետը, զոր երէկ տեսայ թիւյլրի պարտէզին մէջ, խոստովանեցաւ ինձ թէ առաջին օրէն աւելի բան մը չեն գիտեր: Թուպիաքէն կը գանդատի, որ անհոգ կը ննջէ իւր պաշտօնին վրայ: Կը զոջամ յանձնարարելուս վրայ: Այդ մարդ անպարծ մ'է որ գործէ աւելի աղմուկ կ'ընէ: Ասկէ զատ շատ վստահելի չեմ կարծեր: Տասնէն դուրս գործեր կը նիւթէ: Անգլիոյ մէջ կրնայ լաւ լինիլ այդ բան, բայց Ֆրանսայի մէջ շատ գէշ է:

Բարեբաղդաբար Բիէտուշն օժանդակ տուած են անոր: Այդ տղան պարկեշտ է. լաւ հայեացք և մինչեւ իսկ դատողութիւն ունի . . . բայց քիչ մը դիւրաւ կը խաբուի:

Պ. Լըքոք այս խորհրդածութիւնը կ'ընէր և պատուհանէն մեկնելու վրայ էր, լաւ լծեալ միանստարան կառք

մ'եկաւ կեցաւ տանը դրան առջեւ:

Առաւօտեան այն ժամուն, Գոնթի գետափին վրայ այնպիսի կառքի մ'երեւումն արտասովոր դէպք մ'էր, և վաղեմի ոստիկանն՝ ըստ սովորութեան կը սիրէր իմանալ ամեն բան:

Վար ծռեցաւ տեսնելու համար թէ ո՛վ էր որ այնպիսի գեղեցիկ կառքով մ'այցելութեան կուգար համեստ քաղաքացիներէ բնակեալ տան մը վարձակալներէն մէկուն:

Երկու տիկնայք իջան կառքէն և շտապով տանը ծառուղոյն մէջ մտան:

— Չարմանալի՛ բան, մրմռաց ծերուկը, կրնայ երգնուլ մարդ թէ Տիկին Լըքոնթ և աղջիկն են . . . բայց կը սխալիմ անշուշտ . . . առաւօտեան ժամ ութին հոս համներու համար հարկ է որ լուսնայէն առաջ ելած լինին . . . և սակայն կառքն անոնցն է . . . աւասիկ կառավարն ալ կը ճանչեմ:

Արդեօք դժուարութիւնք ծագած են, աւելցուց փակելով պատուհանն:

Սրդեօք Տիկին Լըքոնթ՝ տուած խօսքն ետ առնլո՞ւ կուգայ :

Բայց ոչ, անհնարին է այդ . . . եթէ այնպիսի միաք մ'ունենար, աղջիկն հետը չէր բերեր :

Չանդակն հնչեց, և տիկնանց դալուն պատճառը շուտով հասկնալու հետաքրքրութեամբ՝ Պ. Լըքոք անձամբ գնաց դուռը բացաւ :

Օրիորդ Լըքոնթ անմիջապէս հարցուց .

— Լուի հոս է, այնպէս չէ՞, պարոն՝ :

— Լուի՛, ո՛չ, օրիորդ, երէկ առաւուտէն ի վեր տեսած չեմ :

Հաճեցէք ներս մտնել, տիկինն :

— Չտեսա՞ք զայն, կրկնեց թէրէդ :

Ս՛հ, մեռնիդ միայն կը մնայ ինձ :

— Մեռնի՛լ, ի՛նչ կը նշանակէ . . . ի՛նչ ունիք, օրիորդ, կը զարհուրեցքնէք զիս :

— Ս՛հ, պարոն, ըսաւ Տիկին Լըքոնթ, եթէ գիտնայիք . . .

— Ներս եկէք, տիկնայ՛ք, կ'աղաչեմ, ըսաւ հայր Լըքոք դուռը փակե-

լով և այցելու հիները մեղմով փոքր դահլիճ մը մղելով, ուր արդէն կրակ վառուած էր :

Նստելու ժամանակ շառին :

— Պարոն՝, սկսաւ այրին, պատմեմ ձեզ եղելութիւնը : Չեր որդին, ըստ սովորութեան, ճաշելու եկաւ երէկ ի Պուլսյն : Իրիկուան, ժամ իննին միջոցները, կարծեմ, անձանօթ մարդ մ'եկաւ իրեն հետ խօսիլ ուղեց, ըսելով թէ Պ. Տը ժանթիյեի կորուսած թըղթապանակ մը բերած էր : Հրամայեցի որ ներս մտցնեն : Եւ արդարեւ ցոյց առաւ մեզ թղթապանակն, որոյ մէջ հինգ հազար ֆրանք կար . . .

— Չոր ես տուած էի Լուիի երէկ առաւօտ դոհարավաճառին տալու համար : Որդիս ծանծաղամտութիւն ըրած է կորսնցնելով այն պանքատմաներն, և արժանի չէր որ պարկեշտ մարդ մը զայն գտնելով իրեն բերէր յանձնէր : Եթէ այդ դժբաղդութեան վրայ է գործը, դարմանուած է, և . . .

— Աւա՛ղ, պարոն, տասն անգամ

կուտայի այդ գումարն, որպէս զի աղ-
ջիկս չտեսներ այն տխուր տեսարանն
որ յետոյ երեւան ելաւ: Թղթապանակը
լուսանկար մ'ալ կը պարունակէր . . .
լուսանկարն այդ դժբաղդ կնոջ որ ըս-
պաննուեր է . . . Արպալէթ փողոցին
մէջ, կարծեմ . . .

— Ի՛նչ . . . բայց Լուի չճանչեր
զայն . . . անհնարին է:

— Ճանչելք չուրացաւ, միմնջեց Թէ-
րէզ որ ջերմ արտասուք կը թափէր:

— Ձերկնցնեմ, պարո՛ն, ըսաւ այ-
րին, ոչ պակաս դառնութեամբ քան
զխեղճ նշանածը: Թղթապանակը բե-
րող մարդն ըսաւ թէ չէր կրնար յանձ-
նել զայն մինչեւ որ լուսանկարը ցոյց
չտայ ոստիկանագետին, և աղաչեց զՊ.
Տը Ժանթիլյեի որ իրեն ընկերանայ . . .

— Եւ որդիս անմտութեամբ հաճե-
ցա՛ւ, գոչեց Պ. Լըբոք յօնքը պոս-
տելով: Ստուգիւ անհաւատալի բան է:
Ի՛նչ դէմքով մարդ էր այդ պատ-
րուակաւ եկողը . . . վասն զի պատ-
րուակ մ'էր այդ, աներկբայ եղիք . . .

— Հասարակ դէմքով, աղքատիկ
կերպարանքով:

— Հասկցայ: Շարունակեցէք, տի-
կին, կ'աղաչեմ. Լուի գնա՞ց անոր հետ:

— Այո՛, խոստացաւ մեզ որ նոյն
երիկունը պիտի վերադառնար մեր
սիրան անդորրելու համար: Գիշերն ի
բուն սպասեցինք, բայց չեկաւ: Դա-
տեցէք մեր սրտատանջութիւնն և . . .

Սոյն միջոցին Պ. Լըբոքի տնկալուչը
ներս մտնելով բան մ'ըսաւ անոր ա-
կանջն ի վար:

— Ներեցէք ինձ, տիկին, ըսաւ մէ-
կէն ոտքի վրայ ելնելով: Այցելութիւն
մը կը ծանուցուի ինձ, որ գուցէ որդե-
ւոյս անհասկանալի բացակայութեան
հետ առնչութիւն ունի: Քանի մը
վարկենէն կը յուսամ ծանուցանել ձեզ
թէ ձեր երկիւղը չափազանց է:

Այս քաջալերական յայտարարու-
թենէն յետոյ, զոր իւր յուզեալ դէմ-
քը սուտ կը հանէր, Պ. Լըբոք դուրս
ելաւ դահլճէն և իւր սենեակը դիմեց:

Ապահովութեան պետն անդ կ'ըս-

պատեր : Իւր վաղեմի դործակցին տունը
լուելեայն մտնելու եղանակը գիտնա-
լով, փոխանակ դրան զանգակը բաշե-
լու՝ ելեկտրական կոճակը կոխած էր,
ոյր հնչիւն կ'ազդարարէր տնկալչին :

Ազահովութեան պետը տխուր և
չփոթեալ էր, վասն զի անկեղծ բարե-
կամութիւն մ'ունէր Պ. Լըքոքի վրայ,
և յոյժ դժնգակ տեղեկութիւն մ'ա-
նոր տալու եկած էր :

Սենեկին մէջ կը ճեմէր, հնար մը
խորհելով որպէս զի մեղմով իմացնէ
ողբալի լուրն այս տարաբաղդ հօր-
յանկարծ ծերուկը ներս մտնելով՝ հար-
ցուց առանց նախաբանի .

— Որդիս ձերբակալուած է :

— Իմացե՞ր էք, գոչեց ապահովու-
թեան պետն : Աւելի լաւ, սիրելի՛ բա-
րեկամս, վասն զի կը գժկամակէի այդ
գոյժը տալ ձեզ :

— Այո՛, իմացած եմ : Տիկին Լը-
քոնթ, որուն ազլիկն ամուսնութեան
պիտի առնու, յատկապէս հոս վաղեց
և իմացուց ինձ :

— Արդարեւ անոր տան մէջ . . .

— Բայց չեմ գիտեր պատճառն :

Ապահովութեան պետին դէմքը
տխրեցաւ :

Վայրկեան մը յուսացեր էր թէ
գործին ծանր մասը կատարուած էր
և առաջին տպաւորութիւնն եղած լը-
մքնցած, բայց այժմ ինքզինք դառն
հարկին առջև կը տեսնէր անձամբ հար-
ուածք տալու իւր վաղեմի ընկերին,
և ի՛նչ հարուած :

— Տիկին Լըքոնթ, յարեց Լըքոք,
լուսանկարի մը պատմութիւն բրաւ ինձ,
որում բնաւ կարևորութիւն չընծայեցի
ես : Լուի չկրնար, ո՛չ մօտէն, ո՛չ հե-
ռիէն, խառնուած լինիլ այն գործին
զոր դուք առաջարկած էիք ինձ հե-
տադօտել :

Բայց երբոր նկարագրեց բերող
մարդն և անոր ի գործ դրած հնարքն
որպէս զի ոստիկանապետին երթալու
համոզէ զայն, իսկոյն հասկցայ որ չա-
բաճճին ձեր գործակալներէն մին էր :

Զիս մի՛ տանջէք, կ'աղաչեմ : Ես

աներկբայ եմ որ գործը ծանր բան մը
չէ . բայց հայր եմ . . . ասկէ զատ , տը-
ղուս գտնուած վիճակը . . . տասնևհինգ
օրէն պիտի ամուսնանայ . . . ամենու-
փօրը վատ համբաւ մը մեծ փնաս կըը-
նայ տալ իրեն :

Ի՞նչ է գործն :

Ապահովութեան պետն առջին կը
նայէր , և չէր փութար պատասխանել :

— Կնոջական արկած մը , այնպէս
չէ , շարունակեց ծերուկը : Բայց շատ
կը զարմացնէ զիս , վասն զի Թրանսա
վերադառնալէն ի վեր Լուի օրինակելի
զգաստութիւն մ'ունի . միւս կողմէ
սաստիկ սիրահարեալ է օրիորդ Լը-
քոնթի : Բայց վերջապէս տարիքին պա-
հանջումն է , և ծանր բան մը չէ : Կը
մնայ միայն գայթակղութեան առաջն
առնուլ , և կը խոստովանիմ որ գործը
խեղդելու համար ինձ օգնելու մասին
յոյսս ձեր վրայ է . մանաւանդ որ նշա-
նածն յոյժ նախանձոտ է :

Պատասխան չէ՞ք տար , կը սխալիմ
արդեօք . Լուի վստահութեան զեղ-

ծո՞ւմ մ'ըրած է . . . ո՛չ , ո՛չ , անհնա-
րին է . . . քսան անգամ մեծամեծ գու-
մարներ յանձնուած է իրեն , և երբէք . . .
ասկէ զատ ես հարուստ եմ . . . ինքն
ալ պիտի լինի . . . իւր խնդրածէն ա-
ւելի գրամ տուած եմ իրեն միշտ :

— Իրամը գործ չունի , կարծեմ ,
այս ախուր պատմութեան մէջ , միմ ջնջ
ապահովութեան պետը :

— Խօսեցէք ուրեմն , չէ՞ք տեսեր
որ զիս խանձատելով կը մեռցնէք :

— Քաջասիրտ եղիք , վաղեմի՛ բա-
րեկամս : Ձեզ իմացնելիքս պիտի կե-
ղեքէ ձեր սիրտը : Սակայն աւելի լու-
է որ ես իմացնեմ ձեզ :

Ձեր որդին ամբաստանեալ է իրր
հեղինակ Արպալէթ փողոցի ոճիրներուն :

Պ. Լըքոք կուրծքէն զարնուած մար
դու մը պէս ընկրկեցաւ , և այլայի ալ
ձայնիւ միմնջեց .

— Որդիս . . . Արպալէթ փողոցի
ոճիրները . . . խելքիս կողմայ արդ-
եօք . . . կամ՝ դուք փորձե՛լ կ'ուզէք
զիս . . . Բայց ո՛չ , չափազանց անդը-

Թուօթիւն կը լինի այնպիսի բան մը . . .

— Ճշմարտութիւնը կ'ըսեմ ձեզ , աւա՛ղ . և եթէ ձերբակալեցի ձեր որդին , հարկադրեալ էի . Դուք ալ , եթէ իմ տեղս լինէիք , ինձ պէս պիտի ընէիք :

— Ապացոյցներ ունիք ուրեմն :

— Պէտք եղածէն աւելի : Ձեր որդին դիակնարանն եկաւ ծպտեալ : Անգթղթապանակ մը գողցուցեր է անգլիացի գրպանախոյզի մը , որ վայրկեան մը յետոյ բռնուելով , ուրիշ գողօններու հետ թղթապանակն ալ վրայէն ելաւ , որոյ մէջ կային սպանեալ կնոջ չուսանկարը , Պ. Տը Ժանթիյեի անունն և Տիկին Լըքոնթի անունն ու հասցէն :

Կրնաք գուշակել մնացեալը : Մեր գործակալը Պուլոյն գնաց և երիտասարդն ինձ բերաւ , զոր անմիջապէս հարցաքննեցի : Չէի գիտեր թէ ձեր որդին էր . . . և չէի յիշեր Ժանթիյեի անունն :

— Եւ խոստովանեցա՞ւ , հարցուց

Պ. Լըքոք տագնապալից :

— Այ , ընդհակառակն ամեն բան

ուրացաւ , մինչեւ իսկ զանժխտելին : Կը պնդէ թէ չճանչեր այն կին , և այս առաւօտ իւր գիրը տեսանք նամակի պատեանի մը վրայ , զոր Արպալէթ փողոցի պորմին մէջ գտած էինք :

— Առ առաւելն նշան մ'է այդ :

— Աւելի ծանր նշաններ ալ գտայ իւր Մօն-թապոր փողոցի բնակարանին մէջ : Բայց յոյժ դժնդակ է ինձ , սիրելի Լըքոք , այս մանրամասնութեանց մէջ մտնել ձեզ հետ : Բաւական լինի ձեզ գիտնալ թէ զինքը ոստիկանութեան պաշտօնատուն բերող կառքին մէջ , ձեր որդին նախ կաշառել ուզեց գործակալն և ապա սպաննել փորձեց . յետոյ ինքզինք սպաննել ուզեց :

— Տարաբաղդ տղան ոչ եւս գիտէր բրածն . . . ինքզինք խայտառակեալ տեսնելով . . . և իւր պաշտած խօսեցեալին դառն կսկիծը մտածելով . . . ինքզինք կորսնցուց , վասն զի անմեղ է . . . կը հաստատեմ զայս . . . և պիտի ապացուցանեմ :

— Բոլոր սրտէ կը փափաքեմ որ

արդպէս լինի, բարեկամ, բայց չեմ կրնար բռել թէ կը յուսամ, վասն զի աներկբայ եմ որ ոճրին յաջորդող գիշերն ինքն էր Արպալէթ փողոցի առնն եկողը :

Բիէտւոջ որ նոյն գիշերը խօսած էր անոջ հետ և փախուցած, կատարելապէս ճանչեց զայն երէկ իրիկուն :

Բիէտւոջ, որ երկար ժամանակ ծառայած է իմ ձեռքիս տակ, և շատ բարիք տեսած է ինձմէ, նա՛ ձերբակալած է զԼուի :

Այո՛, անշուշտ հարկադրեալ էր իւր պարտքը կատարել. միւս կողմէ չէր ճանչեր իւր ձերբակալած մարդն, և եթէ գիտնար որ ձեր որդին էր, թերևս չպիտի համարձակէր ոստիկանութեան պաշտօնատունը բերել. Այժմ իմանալով որ օրտափահար եղած է :

— Կոտանեմ զայն . . . կը խօսիմ անոր հետ . . . և կ'օգնէ ինձ իմ ընտրիք խուզարկութեանց մէջ . . . վասն զի ես անոյս չեմ Լուիի չքմեղութեանէն . . . քննութիւնը չէ աւարտած . . . :

— Հազիւ սկսած է : Չեր որդին երէկ իրիկուն ժամը առանձեկին մտաւ արդէլարանն, և այս առաւօտ չհարցարնեցաւ : Քննիչ դատաւորը գեռեկած չէր դատական պաշտօնատուն : Բայց կը կարծեմ թէ դորձը փութապէս առաջ պիտի տանի : Կէս գիշերին լուր արուեցաւ ոստիկանութեան վերատեսչին և ընդհանուր դատախառնն :

— Եւ այս իրիկուն համայն Փարիզ պիտի գիտնայ թէ որդիս մարդասպան մ'է, ըսաւ ծերունին սրտակէզ : Եւ քանի մը վայրկենէն դժբաղդ աղջիկն որ ներսն է իւր մօր հետ, պիտի իմանայ թէ իւր նշանածը թիակնարանի մէջ կամ կառափնարանին վրայ պիտի վերջացնէ իւր կեանք . . . վասն զի պիտի դատապարտեն զայն, կ'զգամ . . . երեւոյթներն անոր դէմ են . . . հանրային կարծիքը գրգռեալ է . . . չպիտի կըրնայ ինքզինք պաշտպանել . . . և ես կ'երդնում թէ մեղապարտ չէ . . .

Պ. Լըբոք արասուք կը թափէր, և իւր այս դառն կսկիծ շարժեց ապա.

հովութեան պետին սիրտն , որ կարեկցութեամբ ծերունուն ձեռքը սեղմելով ըսաւ .

— Սիրելի՛ բարեկամ, պէտք չէ իսպառ յուսահատիլ: Դուք ինձմէ լաւ գիտէք թէ ամենագէշ կերպիւ սկսուած գործ մ'երբեմն կերպարանափոխ կը լինի քննութեան միջոցին: Ձեր որդին, անկեղծաբար պատասխանելով, կը յաջողի թերեւս հաստատել թէ ինք անուղղապէս և մինչեւ իսկ ակամայ խառնուած է ոճրին: Կրնան զինքը չքմեղացնելիք իրողութիւններ երեւան հանել: Եթէ ոճրին կատարուած գիշերն ուրիշ տեղ գտնուիլը կարենայ հաստատել . . . եթէ համրն անոր հետ երեսուած ժամանակ չձանչէ զայն . . .

— Ճամարիտ է. համրը կայ . . . որ միայն կրնայ լուսաւորել այդ օտակալի դաղտնիք . . . նա միայն կրնայ ապահովապէս ցուցնել ոճրագործն . . . և չձանչեր որդիս, տարակոյս չունիմ . . . ո՛ր տեսած կրնայ լինիլ զայն . . . : Այդ մարդ Փարիզի մէջ չբնակիր, ինչ-

պէս որ հասկցաք այն փորձէն ի վեր զոր թելադրեցի ձեզ . . . և Լուի Փարիզ կը բնակի քանի տարիներէ ի վեր . . . : Թող այդ փորձն ընեն, և ամեն բան կը լմնայ:

— Պիտի ընեն, անկասկած եղիք, սիրելի՛ դիմ, և ի սրտէ կ'ըզամ որ ձեր որդւոյն դէմ չդառնայ:

— Այդ կողմէ երկիւղ չունիմ: Թող կը տրուի՞ ինձ տեսնել որդիս:

— Այո՛, բաւական դժուարութեամբ հաճեցուցի որ այդ շնորհ չզլացուի այնպիսի մարդու մը, որ բացառիկ ծառայութիւններ ըրած է մեզ: Միայն թէ դուք միայնակ չպիտի տեսնէք զայն, մինչեւ ցնոր տնօրինութիւն: Ես ներկայ պիտի գտնուիմ ձեր տեսակցութեան, և՛ եթէ կ'ուզէք՝ առաջինն այս առաւօտ կատարուի:

— Շնորհակալ եմ, վաղեմի՛ բարեկամ: Մէկ ժամէն ձեր սենեակը կուգամ:

Տակաւին խօսք մ'ալ: Թողպիաք գործակցեցա՛ւ այդ ձերբակալման:

— Բնաւին : Մինչև իսկ ըսեմ ձեզ թէ շատ չգրազեցաւ այս գործին և մեք ալ շատ գոհ չենք անկէ : Սակայն հաւանելի է որ գործը շառնուի անոր վրայէն , վասն զի դեռ գործը պարզուած չէ և մեք մէկը չունինք անոր տեղ դնելու :

— Զայդ կ'ուզէի դիտնալ , ըսաւ Պ. Լըքոբ մինչև դուռն երթալով ապահովութեան պետին հետ :

Երբոր այցելուն դուրս ելաւ , Պ. Լըքոբ բնակարանին դուռը փակեց , և իւր աչերը սրբելով և դէմքն յարգաբեւոյժ գահլիճը վերագարձաւ , ուր Տիկին Լըքոնթ և աղջիկն իրեն կ'սպասէին սրտատանջ :

— Անհոգ եղիք , ըսաւ անոնց զըլարթ դէմքով : Լուի սխալման մը զոհ եղած է : Իմ անունս տուեր է , և որովհետև պատուաւորացէս ճանչուած եմ , ոստիկանութեան պետերէն մին անձամբ եկաւ պատմեց ինձ իրողութիւնն : Այժմ ոստիկանութեան պաշտօնատունը պիտի երթամ և յոյս ունիմ

որ ընդհուպ . . . թերևս այս իրիկուն կը բերեմ ձեզ Լուին :

Թէրէզ ցատկեց Պ. Լըքոբի պարանոցին փաթթուեցաւ , և մրմնջեց ահանջն ի վար :

— Ըսէք իրեն թէ կը ներեմ ինձ պատճառած վիշտը . . . կը ներեմ պայմանաւ որ իմինէս զատ ուրիշ պատկեր չբերէ ինձ :

Տիկին Լըքոնթ կուլար ուրախութենէն :

Մերունին հաստատապէս կը հաւատար իւր որդւոյն անմեղութեան , բայց երևնալ ուղածին չափ քաջայոյս չէր . վասն զի կը հասկնար որ իւր պաշտած որդւոյն գլուխն էր գրաւ այն սարսափելի խաղին , որ պիտի մշուէր ոտիկանութեան գործակալաց թշնամութեան և դատաւորաց նախապաշարման դէմ :

Սակայն , Տիկին և օրիորդ Լըքոնթ մինչև բնակարանին դուռն յուղարկելէ յետոյ , ս'չ հառաչ մ'արձակեց , ո'չ արասուք մը թափեց :

Ապահովութեան պետին առջև ինք-
զինք բռնած էր, վասն զի չէր ուզեր
կարևորութիւն տալ Լուիի վրայ եղած
ամբաստանութեան :

Կանանց առջև ալ ինքզինք բռնած
և մինչև իսկ անհոգութիւն կեղծած էր,
վասն զի անպատճառ քաջալերել կ'ու-
զէր զանոնք :

Մինակ մնացած ժամանակն ալ կը
բռնէր ինքզինք, վասն զի կ'զգար թէ
գործել պէտք էր և ոչ լալ :

Սիրտը կը ճմլուէր, բայց ինքզինք
կը պնդէր, և փոխանակ կողկողելու,
այրաբար իւր որդին պաշտպանելու կը
պատրաստուէր :

Միւս կողմէ, անմեղ կը համարէր
զայն, և կը յուսար առանց մեծ դժ-
ուարութեան ապացուցանել ամբաս-
տանութեան անտեղութիւնը :

Փորձով գիտէր թէ շատ անգամ,
եղեռնական քննութեան մ'սկիզբը սը-
խալ քայլեր կ'առնուին :

Զօրեղապէս համոզուած էր թէ
սխալմունք եղած էր, թէ իւր վաղեմի

օժանդակը, Բիէտուշ, տխմարաբար
խաբուած էր զուգադիպութիւններէ,
և յափշտակուած իւր եռանդէն. թէ
երիտասարդը՝ խելայեղեալ՝ չէր կըր-
ցած պէտք եղածին պէս բացատրու-
թիւններ տալ, կամ, որ աւելի գէշ է,
ձախող պատասխաններ տուած էր :

Սրդ, ինքն Լքքոբ, մականուան-
եալն «արւել», կնճռոտ կամ մթին գոր-
ծերը պարզելու, մոլար վարկածներն
ու դատողութիւններն ուղղելու և սը-
խալ դիտուած իրողութիւններն իրենց
բուն վիճակին մէջ ներկայելու արուես-
տին մէջ վարպետ ճանչուած էր :

Ուստի անտարակոյս էր որ անկեղծ
խոստովանութիւն մը պիտի ձեռք բե-
րէր իւր որդիէն. խոստովանութիւն,
որ զայն պիտի արդարացնէր կատարե-
լապէս, և ապացուցանէր թէ պարզ
նշաններու վրայ զայն ձերբակալելով
ու բանտարկելով մոլորած էին :

Սակայն վիճակին ծանրութիւնն ալ
կը հասկնար :

Ոճիրը մեծ ձայն հանած էր : Լքա-

գիրք միմիայն Արպայէթ փողոցի գաղտնեաց վրայ կը խօսէին . հանրային կարծիքն յուզեալ էր : Կը զարմանային որ մարդասպանը չէր կրցած գտնուիլ, և կը պարսաւէին ոստիկանութեան գործակալներն որք տակաւին չէին կրցած գտնել զայն :

Ապահովութեան պետն և դատական պաշտօնեայք, բնականաբար ըզգածուելով, մեծ կարեւորութիւն պիտի տային հաստատելու թէ առաջին բռնուած մարդն ստուգիւ մարդասպանըն էր . հետեւաբար վաւերականութիւն պիտի բնծայէին Լուիի վրայ ծանրցած ամբաստանութեանց, և մեծ եռանդով պիտի հետախուզէին անոր գործն :

Ամենէն արդարաւորով և ամենէն լուսամտ դատաւորք կրնան ուրիշ որ և է մարդոց պէս զգածուիլ այն խնդրոց մէջ, որք իրենց արհեստական ինքնասիրութիւնը կը շոյափեն, և կը դժկամակին ճանչել իրենց սխալմունքն :

Հայր Լքքքք քաջ գիտէր թէ իւր

մղելիք անհաւասար զէնքով մենամարտին մէջ երեք ահաւոր հակառակորդաց պիտի հանդիպէր . դատական պաշտօնատան, ոստիկանութեան և ժողովրդային զգացման, որ հակամէտ է միշտ առանց քննութեան դատապարտել ամբաստանեալ մը որ երեւոյթներն իրեն դէմ ունի :

Գիտէր նաեւ որ իւր որդին, եթէ ազատ իսկ թողուէր ապացոյց չգտնուելուն պատճառաւ, ծանրագէտ վիրաւորեալ դուրս պիտի ելնէր այս մարտէն :

Իրաւամբ կամ յանիրաւի, հանրային կարծիքը շատ չհաւատար թող տրուած կամ անպարտ արձակուած մարդոց անմեղութեան, և դատուած կամ միայն բանտարկուած լինելու իրողութիւնն այնպիսի արատ մը կը թողու անոնց համբաւին վրայ, զոր յոյժ դժուարին է սրբել :

Բայց ծերունին կը յուսար տակաւին թէ բաւական էր Լուիի անկեղծ յայտարարութիւններ բնել, որպէս զի առօրին իսկ արձակման հրաման մ'ըստացուէր անոր համար :

Եթէ այս ցաւալի արկած այսպէս վերջանար, ոչ ոք կ'իմանար բացի Տիկին և օրիորդ Լըքոնթէ, որք անշուշտ առաւել տրամադիր էին արդահատելու զերիտասարդը, քան անոր անխօհեմութիւնները կշտամբելու:

Այս համոզմամբ զօրացեալ, և վրատահ իւր ճարտարմտութեան վրայ, Պ. Լըքոք չուզեց յատակագիծներ յօրինելով ժամանակ անցունել:

Հագուեցաւ, քանի մը պատուէրներ տուաւ իւր տնկալին, և տունէն դուրս ելաւ ոստիկանութեան արգելանոցն երթալու համար:

Քաջ գիտէր այն բանտին ճանբան, ուր ի պահ կը դնեն գողերը, մարդասպանները, մուրացիկներն և մոլորեալ սղայքը:

Փարիզի սալարկին վրայէն ժողովուած մարդկային ամեն բեկորները նախ հոն կ'երթան կը խրին:

Չեն մնար անդ, այլ առժամապէս հոն կը շրկուին երբոր ինչեւիցէ պատճառաւ կը ձերբակալուին:

Ոճրի և թշուառութեան այս աւանդատունը բաւական նոր ժամանակի չէնք մ'է, և դատական պաշտօնատան ստորին կողմը գրաւած է:

Դուրսէն չտեսնուիր, վասն զի բարձր չէնքերէ չըլապատեալ է, որք կը ծածկեն զայն անցորդաց աչքէն, և քանի մը կողմէ մուտք ունի:

Փարիզի այլեւայլ պահականոցներէն եկող արգելափակ կառքերն Օրլոթի դետափէն կը մտնեն իրենց պարունակութիւնն յանձնելու համար. բայց Սէյթ-Շարէլի բակէն անցնելով ալ կարելի է մտնել հոն, Պ. Լըքոք անկից անցաւ, վասն զի չէր ուզեր հանդիպիլ ոստիկանութեան գէտերուն և գործակալաց, որք ապահովութեան դիւանին շուրջը կ'երթեւեկեն:

Անոնցմէ ոմանք իւր ժամանակէն ի վեր կը ծառայէին, և կրնային զարմանալ տեսնելով զինքն այնպիսի տեղ մը, ուր քանի տարիներէ ի վեր երեւցած չէր:

Իեղճ մարդը կը կարծէր տակաւին

Թէ իւր անունը չպիտի խառնուէր այն
գործին, որ կ'ըրարեցնէր զողջոյն Փա-
րիզ, և՛ աւելի մեծ իրաւամբ՝ ոտախ-
կանութեան ամբողջ պաշտօնատունը:

Կը յուսար արգելարանին դիւանս-
տունը գտնել ապահովութեան պետն,
որ իր ս ծածուկ տեսակցութիւն մ'ը-
նել պիտի տար բանտարկելոյն հետ,
և որ անշուշտ ինքզինք պարտաւոր-
եալ չպիտի համարէր իւր Լըքոք բա-
րեկամին կրօմ տաղնապն յայտնել իւր
ստորագրասելոց:

Անգ տեսաւ զԲիէտուշ, բանտին
դրօն առջի կեցած, այնպիսի մարդու
մը գիրքով, որ ծանուցեալ այցելու-
թեան մը կ'սպասէ:

Ծերունին չէր կրնար բերկրութեամբ
տեսնել իւր որդին ձերբակալող գոր-
ծակալն, և սակայն ինքզինք բռնեց՝
զժգո՛՛ գէմը մը չցուցնելու համար,
և սպառի անոր քով գնաց:

Բիէտուշ Պ. Լըքոքէն աւելի շուար-
եալ դէմք մ'ունէր, վասն զի անկեղծա-
բար կը ցաւէր, որ իւր պարտականու-

թիւնը կատարած ժամանակ մեծ վիշտ
պատճառած էր իւր վաղեմի պետին:

Փեղոյրը վար առաւ գլխէն և չըք-
մեղանաց խօսք մը կը փնտուէր, երբոր
Պ. Լըքոք ըսաւ անոր քաղցրութեամբ.

—Է՛, տղա՛ս, երէկ իրիկուն ցո-
փութիւն մ'ըրիր, այսպէս չէ՞: Բայց
չեմ սրդողիր քեզ. քու տեղդ ուրիշ
ներն ալ լինէին, պիտի սխալէին: Քու
պետդ ամեն բան պատմեց ինձ այս ա-
ռաւօտ, և չեմ զարմանար քու խաբ-
ուելուդ վրայ: Թղթապանակին խաղն
սքանչելապէս գործադրուած է, և չը-
նորհակալ եմ իմ մասիս, որ քաղցրու-
թեամբ կատարած ես: Որդիս պիտի
ամուսնանայ, և իւր զօրանչին տան
մէջ յարուցուած գայթակղութիւն մը
կրնար վնասել իրեն:

Բիէտուշ չէր հաւատար իւր ականջ-
ներուն, և կը հարցնէր ինքնիրեն թէ
ծերուկին խելքի՞ն եկած էր արդեօք:

—Կարծես կ'երևակայէ թէ տակա-
ւին հարսնիք պիտի լինի, կ'ըսէր ինք-
նիրեն:

—Ամեն բան կը կարգադրի այս առաւօտ, յարեց Պ. Լըքոքը: Բու պետք ինձ կ'սպասէ տեսակցիլ տալու համար այդ թեթեամտին հետ, որ խելք չըրաւ երէկ իրիկուն իմ որդիս լինին հասկցնել, որպէս զի բաճառը չպառկէր: Հինգ վայրկենի խօսակցութիւն բաւական է գործը կարգադրելու, վասն զի հարկ է որ պարոն որդիս ճշմարտութիւնն ըսէ ինձ: Պէտք էր որ սկիզբէն այնպէս ընէր, բայց այդ չարածճիներն իսկոյն կը խելայեղին երբոր ոստիկանութեան գործակալի մը քթին ծայրը տեսնեն:

Կուզեմ որ դու ալ ներկայ գտնուիս, որպէս զի լսես թէ ինչպէս պիտի ցընցեմ զայն:

Բախէ դուռը, ծերունի՛ Բիէտուշս, աստ խօսքի բռնուելով հարբուխ կը լինիմ:

—Ներեցէք, պարոն Լըքոք, կակազեց գործակալը, ձեր տղան այս պահուս չէք կրնար գտնել իւր խցիկին մէջ... և պետս զիս աստ դրաւ ըսե-

լու համար ձեզ թէ կ'աղաչէ որ սպասէք իրեն:

—Ո՛ր է Լուի: Մազասի բանտը փոխադրուեցաւ: Բայց ոչ ոք չի գիտարկէ:

—Քննիչ դատաւորը սենեակը կուրուեցաւ:

—Արդէ՛ն:

—Ս.յո՛, դատաւորն յանկարգէս եկած է... սովորական ժամն որ ամբայց առաջին հարցաքննութիւնն երկար չտևեր երբէք...

մանաւանդ որ մեր պետը դեռ ժամանակ չունեցաւ հաւքելու պէտք եղած տեղեկութիւններն, որք անհրաժեշտ են քննութեան համար: Ուստի տասն վայրկենէն աստ կը վերադառնայ ձեր որդին:

Պ. Լըքոք տժգունեցաւ: Գործակալին տուած լուրը վերիվայր կը տապալէր իւր հաշիւներն: Իւր ամենամեծ փափաքն էր տեսնել զԼուի՝ հարցաքննութեան ներկայանալէն առաջ, որպէս զի ճշմարտութիւնը քաղէ անոր բերնէն, և ըստ այնմ պաշտպանողական ընդունելի գրութիւն մը սովորե-



ցքնել, զգուշացնել իրեն ուղղուելիք հարցմանց դէմ, և շատ խօսք ընելու, ինչպէս նաև բողոքովին լուռ կենալու վտանգները ցուցնել:

Ոչ թէ հայր Լըքօք կը հաւատար իւր որդւոյն յանցաւորութեան, այլ կը վախնար որ անխոհեմութիւններ կ'ընէր. միւս կողմէ փորձառութեամբ գիտէր թէ ինքզինք դիւրաւ արդարացնելու համար անմեղ լինիլը բաւական չէ միշտ:

Այժմ շատ ուշ էր: Դիւանագպիր մ'արձանագրած էր ամբաստանելոյն առաջին պատասխանները, զորս անակրկալ բանտարկման մը շփոթիչ ազդեցութեան ներքեւ ըրած էր, և որք մահապարտական ամբաստանութեան մը հիմ լինելու պիտի ծառայէին:

— Ի՞նչ ըսաւ արդեօք, կը հարցնէր ինքնիրեն Պ. Լըքօք անձկութեամբ:

Այս անստուգութիւն երկար չտեւեց:

Նրբանցքին խորէն տեսաւ նախ ապահովութեան պետն, որ կուգար դէ-

տի մը հետ խօսակցելով, յետոյ երկու պահակներու միջեւ, որոց մին դաստակն անցուցած շղթայի մը ծայրէն բռնած էր, կուգար Լուի, այլագունեալ, շուարեալ, գլխակոր, կառափնարան տարւող դատապարտելոյ մը դողդոջ քայլերով:

Նոյն միջոցին հայր Լըքօք տեսիլ մ'ունեցաւ:

Թուեցաւ իրեն թէ Սէնթ-Շարէլի բարձր պատերուն ձգած ստուերին մէջ կառավանագործիին թեւերը, Ռոքէթի չարագոյթ դուռը, խուժանը, պահակներն և ողորմաբաշխ քահանային կառքը կը նշմարէր, գլխատման այն ամեն սոսկալի և ցած հանդերձանքը, զորս երբեմն յաճախ դիտած էր հանդարտ աչօք:

Այս անգամ իւր որդին էր մահապարտն, և վաղեմի ոստիկանը կը դողար խորհելով թէ արդարութեան մատնած եղեռնաւորաց մէջ թերեւս անմեղ մ'ալ կար:

Ապահովութեան պետն հասկնալով

հայր Լըքոքի զգացած դառն ցաւն ,
իսկոյն յառաջ քալելով կեցաւ այն կեր-
պիւ որ երիտասարդն , որ աչերը խո-
նարհած կը քալէր , կարենար անցնիլ
առանց իւր հայրը տեսնելու :

Ամբաստանեալն անցաւ արգարեւ
առանց զլուխը վեր առնլու , և զայն
տանող պահակները բանտէն ներս մըտ-
ցուցին զայն :

Ապահովութեան պետն ալ ներս
մտաւ անոնց հետ , և Բիէտուշ խոհե-
մաբար մէկ կողմ քաշուեցաւ :

— Է՛յ , քսէք նայիմ , հարցուց Պ.
Լըքոք :

— Ի՞նչ քսեմ , վաղեմի՛ ընկերս , պա-
տասխանեց տիրութեամբ ապահովու-
թեան պետն , բարի բան մը չունիմ ձեզ
իմացնելիք : Ձեր որդին հարցաքննե-
ցաւ . կը յուսայի որ կէս օրին միջոցնե-
րը պիտի կոչուէր ի հարցաքննութիւն ,
բայց գործն ա՛յն աստիճան ծանր է
որ դատաւորը կանխեց ժամը . . .

— Դժբաղդաբար , վասն զի եթէ
յառաջուց տեսած լինէի զԼուի , ամեն

բան կը բացատրուէր . . . իսկ այժմ
խեղճ տղան սրտադողէն շփոթելով վը-
տանգաւոր պատասխաններ տուած կըը-
նայ լինիլ :

— Ո՛չ , վասն զի գրեթէ բան մը չը-
սաւ : Կը պնդէ միշտ թէ սպանեալ կը-
նոջ պատկերը գրպանախոյզը դրած է
թղթապանակին մէջ :

— Ինչո՞ւ չէ :

— Անհնարին է , բարեկա՛մ , և ասով
ձախող ճանբու մը մէջ կը ձգէ ինք-
զինք : Ձինքն երեսեցին գրպանախոյ-
զին հետ , որ պնդեց իւր ժխտման վը-
րայ , և այնպիսի մանրամասնութիւններ
տուաւ որք լռեցուցին ձեր որդին :

Եւ այսպիսի պարագայից մէջ լռու-
թիւնը գրեթէ հաւասար է խոստովա-
նութեան :

Միւս կողմէ , մեք ալ արդէն տե-
ղեկութիւններ ստացած ենք Անդլիաց-
ւոյն վրայ , և հաւաստի ենք թէ երէկ
առաւօտ հասած է Փարիզ , հիւսիսա-
յին երկաթուղիով :

— Ըսել է թէ Լուիի գրութիւնն է

պնդել թէ չէր ճանչեր սպանեալ կիսն:

— Այո՛, բարեկամ, և խօսքը մէջերնիս, այդ գրութիւն անպաշտպանելի է: Արդէն ըսի ձեզ պատճառն: Առանց Սւսէ «Ինչ» խօսքն ընելու, որ իւր տունը գտնուած խաղի թուղթերուն մէջ կը պակսի, անժխտելի է թէ ձեր որդին, կիրակիէն երկուշաբթի լուսցած գիշերն, այն է ոճրին հետևեալ գիշերըն, Արպալէթ փողոցի պորմը մտաւ: Ես հոն էի, և քիչ մ'առաջ ճանչեցի ձայնը: Բիէտուշ, որ նոյն գիշերը փողոցին մէջ խօսակցեցաւ անոր հետ, ճանչեց զայն յօնքէն, մօրուքէն և գորշ կղբենի ձեռնոցներէն: Վերջապէս, իւր զգեստուց պահարանէն գտնուեցաւ այն կրկնօցն ու փողպատ, զորս կը կրէր Արպալէթ փողոցն եկած գիշերը:

— Կէս գիշերին:

— Այո՛, իրիկունն անոր հետ անցուցած էիք, բայց անշուշտ կէս գիշերէն առաջ մեկնեցաք քովէն:

Կը տեսնէք որ ապացոյցներն առատ են, և անշուշտ ուրիշներ ալ պիտի գտնենք:

Այս պատճառաւ է որ, բարեկամ, ձեր ընելիք ամենէն մեծ ծառայութիւնն է՝ յորդորել զինքն որ ակներեւ ճշմարտութիւնն ուրանալու դրութենէն հրաժարի:

— Ուրեմն թոյլ կուտաք ինձ տեսնել զայն:

— Խոստացայ ձեզ, և կ'ուզեմ բըռնել խոստումս, սիրելի՛ Լըքօք: Քննիչ դատաւորին ալ յայտնելով՝ հաւանութիւնն ստացայ որպէս զի տեսակցիք ձեր որդւոյն հետ... մէկ անգամ միայն, և իմ ներկայութեամբ:

Կ'ըզամ որ յաջողիք համոզել ձեր որդին անկեղծ խոստովանութիւններ ընելու, վասն զի, թերևս իւր լուրջութեամբ կարծեցնել տուածէն նուազ յանցաւոր է: Զանացէք որ իւր փատարանը կարենայ գոնէ մեղմացուցիչ պարագայներ պաշտպանել:

Ծերունին ցնցուեցաւ այս խօսքը լսելով, որ ոճրադատ ատենին պատկերը կը ներկայէր:

Իւր յոյսերը կը ցնդէին մի առ մի:

Եւ սակայն բռնեց ինքզինք, և ան-
յողդողդ ձայնիւ մ'ըսաւ ապահովու-
թեան պետին .

— Շնորհակալ եմ, սիրելի՛ բարե-
կամ, ասկէց պակաս չէի սպասեր ձեզ-
նէ . բայց առաջարկ մը պիտի ընեմ,
զոր կ'ընդունիք անշուշտ :

Կ'ուզէք ներկայ գտնուիլ Լուիի
հետ ընելիք խօսակցութեանս : Կը հաս-
կընամ զայս, և չեմ հակառակիր : Կը
փափարիմ իսկ որ լինելիք խօսքերէն
ոչ մին կորսնցնէք : Միայն թէ, կը բաղ-
ձամ որ Լուի չգիտնայ թէ դուք կը
լսէք իւր խօսքերը :

Խցիկ մ'ունիք աստ, որոյ տախ-
տակորմին մէջ բացուած ծակերէն կըր-
նայ խցիկը կեցող մարդ մ'ամեն բան
տեսնել և ամեն բան լսել :

— Թիւ 10 խցիկն, որոյ մէջ դրուած
է ձեր որդին, դուրսէն հսկողութեան
ծառայելու կերպիւ տրամադրեալ է :
Բայց չեմ հասկնար թէ ի՞նչ նպատա-
կաւ կ'ուզէք որ պահուըտիմ . . .

— Հասկցնեմ ձեզ, պատասխանեց
ծերունին տնկուելով :

Ձեր ինձ յայտնած պատճառաբա-
նութիւնք չկրցին համոզել զիս : Կը
կարծեմ, որ այսպիսի նիւթոց մէջ ու-
նեցած հմտութիւնս ու փորձառու-
թիւնս կը ճանչէք : Արդ, ես կարծիքէ
զատ ուրիշ բան չեմ տեսներ այս գոր-
ծին մէջ, և ի հարկին կրնամ ապացու-
ցանել թէ լուրջ չեմ : Բայց չպիտի հար-
կադրիմ մինչեւ հոն հասնիլ . վասն զի
բացարձակապէս վստահ եմ թէ Լուի
անմեղ է, և թէ բաւական պիտի լինի
ինձ խոստովանցնել զայն, որպէս զի
իւր անմեղութիւնն ամենէն աւելի նա-
խապաշարելոց իսկ աչքին ցայտէ :

Ձեր առջև, երէկուան ըրածը կը-
նէ, քիչ մ'առաջ քննիչ դատաւորին
առջեւ ըրածը կ'ընէ : Չխօսիր :

Բայց ինձմէ բան մը չծածկեր, և
որովհետեւ ինձ ըսելիքներուն ամենն
ալ պիտի կրնաք լսել, հետեւաբար
ճշմարտութիւնը կատարելապէս պիտի
իմանաք :

Կ'ընդունիք, այնպէս չէ՞ :

— Ձեմ կրնար մերժել, վասն զի

այնպիսի առաւելութիւն մը կուտաք ինձ, զոր չպիտի համարձակէի խնդրել ձեզնէ :

Բայց զգուշացիք, սիրելի՛ Լըքոք : Այդ միջոց վտանգաւոր է : Ենթադրենք թէ ձեր որդին յանցաւոր է և խոստովանի ձեզ . . . ոչ ևս ազատու՞մ կ'ունենայ, վասն զի իմ պարտականութիւնս պիտի հարկադրէ զիս կրկնել ամեն լրսածս, և յայնժամ . . .

— Գիտե՞մ վտանգին մեծութիւնը, բայց կրպնդե՞մ դիտաւորութեանս վրայ : Դուք ալ իրաւունք պիտի տայիք պնդելու եթէ ինձ չափ ճանչէիք որդիս : Թերութիւններ ունի, բայց բարեսիրտ է, ուղղամիտ է և մանաւանդ անկարող է վտուութիւն ընելու :

Եւ գիտէք, վաղեմի բարեկամ, թէ մարդ յստակ կը տեսնէ երբոր մարդիկ ուսումնասիրելու արհեստին կը ծառայէ, ինչպէս որ ես կ'ուսումնասիրեմ երսուն տարիէ ի վեր : Այս տղան ծնանելէն ի վեր ուսումնասիրած եմ և բերնուց գիտեմ :

Արդ, պիտի ըսէք ինձ թէ ձեր որդին մարդ մ'սպաննած է բարկութեան մը միջոցին : Կը պատասխանե՞մ ձեզ թէ կարելի է : Բայց երբոր ըսէք ինձ թէ սոսկալի մարդասպանութիւն մ'ընել մտածեր էր կանխաւ, և դիակն անհետացնելու միջոցներ հնարած էր, կը պատասխանեմ ձեզ վստահութեամբ թէ ո՛չ, բրած չէ :

— Կրնայ մէկը բռնութեամբ սկսիլ և հնարիմացութեամբ վերջացնել, ըսաւ ապահովութեան պետը կէս ձայնիւ :

Յետոյ բարձրաձայն .

— Ոչ ևս առարկութիւն ունիմ, սիրելի՛ Լըքոք, և եթէ կ'ուզէք արգելաբանը մտնել ինձ հետ, ձեզ թիւ 10 խցիկը տանիմ :

— Խօսք մ'ալ ըսեմ, յարեց ծերունին : Հաւանական չէ որ ամեն ինչ Լուիի դէմ լինի : Ծանր նշաններ կ'ամբաստանեն զայն, կը խոստովանիմ ես ալ . . . բայց ամբաստանութեան մէջ տկար կէտեր պէտք է լինին : Կրնա՞ք ցուցնել ինձ՝ առանց դատական քննութեան վնասելու :

—Տկար կէտեր . . . չեմ տեսներ . . .
 Ի մեծ ցաւ սրտիս . առ առաւելն քանի
 մը պարագ կէտեր կը մնան քննութեան
 մէջ : Օրինակի համար, գիշերն Արպալէթ
 փողոցի պորմն եկող մարդն ըսած էր
 Բիէտուչի թէ ոստիկանութեան մարդ էր
 ինք , և մինչև իսկ գործակալի տոմսակ
 ցոյց տուած էր անոր , և այն տոմսակ
 չդտնուեցաւ ձեր որդւոյն բնակարանին
 մէջ : Ճշմարիտ է թէ տակաւին ման-
 րամասնօրէն խուզարկուած չէ բնակա-
 րանն :

—Ուստի՞ց կրնայ ձեռք բերած լի-
 նիլ : Ոստիկանութեան պաշտօնատան
 մէջ մարդ չճանչեր , և բացարձակապէս
 անգէտ է ժամանակաւ ձեր օժանդակ-
 ներէ մին լինելու :

—Ասկէ դատ , ըսաւ ապահովու-
 թեան պետն առանց պատասխանելու
 Պ. Լըքոքի փաստին , տակաւին չերես-
 ուեցաւ արկղը տանող համրին հետ :
 Եթէ , ինչպէս որ կը վախնամ , համրը
 ճանչէ զայն , ձեր որդւոյն կորուստը
 վճռեալ է : Մինչև այն ժամանակ կըր-

նայ ինքզինք պաշտպանելու փորձ ընել :

—Ետքն աւելի լաւ կը պաշտպանէ
 ինքզինք , ըսաւ Պ. Լըքոք վատահու-
 թեամբ , վասն զի պիտի ապացուցուի
 թէ համրն երբէք տեսած չէ զայն , և
 ես կը խնդրեմ որ հնար եղածին չափ
 շուտով երեսուին :

—Այսօր կամ վաղիւ : Խնդիրն է
 գիտնալ թէ քննիչ դատաւորին գրա-
 սենեկին մէջ թէ այլուր պիտի երես-
 ուին : Այս մասին կարծիքները տար-
 բեր են :

—Ո՞ւր է համրը :

—Մաղասի բանտն է , և ձեր որդին
 ալ հոն պիտի փոխադրի քառսուն և
 ութ ժամէն : Ես բացարձակ իշխանու-
 թիւն ունիմ երեսուելու գործը կար-
 դադրելու և տեղն ալ որոշելու : Այս
 մասին պիտի խորհրդակցիմ թողպիաքի
 հետ :

—Թողպիաքի՛ : Կ'ուզէի տեսնել զայն :

—Ժամէ մը պիտի գայ , և գոհ պի-
 տի լինի խօսակցելով ձեզ հետ . ի սըր-
 տէ կը ցաւի ձեր վրայ , և տարակոյս

չունիմ որ շատ ուրախ կը լինի եթէ
գործը ձեր որդւոյն նպաստաւոր ելք
մ'ունենայ :

Կը տեսնէք, սիրելի Լըքօք, ո՞ր-
չափ անկեղծութեամբ կը վարուիմ ձեզ
հետ : Ձեզ ըստ բաւականի ճանչելով,
աներկմիտ եմ թէ դուք ալ ձեր կող-
մանէ չպիտի վրիպիք մեր պայմանա-
դրութենէն : Դուք միայնակ պիտի տե-
սակցիք ձեր որդւոյն հետ կէս ժամ,
և տարակոյս չունիմ թէ ո՛չ բանիւ, ո՛չ
ալ նշանացի չպիտի իմացնէք անոր
թէ ես մտիկ կ'ընեմ ձեր խօսակցու-
թիւնք :

— Պատուոյս վրայ խօսք կուտամ :

— Եկէք ուրեմն : Մի՛ մոռնաք թէ
դուք ուղեցիք ձեր որդին անցունել
այդ փորձէն :

Աստուած տայ որ նպաստաւոր լի-
նի իրեն :

Ապահովութեան պեան երկու հար-
ուած տուաւ արգելարանի դրան, որ
անմիջապէս բացուեցաւ :

Բանտերուն դռները միշտ դիւրաւ
կը բացուին մտնել ուզողներուն :

Պ. Լըքօք ներս մտաւ ապահովու-
թեան պետին ետեւէն, Բիէտուշ ալ
իրեւել տողափակ :

Արգելարանի պաշտօնեայք փոխ-
ուած էին այն ժամանակէն ի վեր, ուք
վաղեմի հետախոյզը կը յաճախէր ոս-
տիկանութեան պաշտօնատունն, և
միայն դիւանադպիրն ու պահնորդ մը
ճանչեցին զայն :

Պետին հետ կարճ խօսակցութենէ
մը յետոյ, յիշեալ պահնորդին յանձ-
նուեցաւ տանիլ զՊ. Լըքօք թիւ 10
խցիկս, որ սալարկեալ և ապակեպատ
մեծ սրահի մի ձախակողմն էր :

Կարծես թէ Ատլանտեան Ովկիանո-
սի մէջ բանող շոգենաւի մը սրահն էր՝
օթեակներով չըջապատեալ :

Միայն թէ այս օթեակները բնա-
կող ուղեւորք երբէք դուրս չեն ելներ
տախտակամանին վրայ օդ առնելու :

Արգելարանին մէջ հասարակաց
սրահ մ'ալ կայ, ուր կը շեղձակուտեն
միջնայարկի օւղեւորներն, այսինքն այն
թշուառներն որք զատ օթեակի մէջ դըր-

ուելու արժանի չեն դատուիր, ստորին
դասու խառնազանճն, որք հանապա-
զօրեայ ցանցին մէջ բռնուելով կը հա-
ւարուին:

Այս վերջիններուն առջեւ իրիկուն-
ները մազալից անկողիններ կը նետուին,
որոց վրայ խառնիսուռն կը պառկին.
ցերեկներն ալ թոյլ կը տրուի անոնց
խօսակցիլ և երգել:

Քանզի այդ դժօխոց մէջ շատ կ'եր-
գեն, և բանաստեղծ մը, որ Խզէ Խոյ-
նէ ռե-նը կոչէ զայն, կեղծիքը քիչ մը
հեռի կը մղէ:

Խցիկներու բնակիչք նուազ զուարթ
են:

Ասոնց մէջ փակուած անձինք ընկե-
րային աւելի բարձր դասերէ են, կամ
ծանր ոճիրներով ամբաստանեալ, որոց
առանձնութիւնն հարկաւոր կը դատուի:

Պ. Լուի Տը Ժանթիյեի այդ տխուր
չնորհին արժանի լինելու ամեն իրաւուն-
քն ունէր: Այս պատճառաւ, բանտը
մտնելէն ի վեր՝ միայն ապահովութեան
պետն և պահնորդները տեսած էր, որք

գնացեր զինքն առեր էին հարցաքննիչ
դատաւորին քով տանելու համար:

Իւր զարմանքն և սրտայուզու-
թիւնն յոյժ մեծ եղան, երբոր իւր
վրայ փակուած դրան նիգերուն ճաքն-
չիւնը լսելէ յետոյ իւր հօրն առջեւ
տեսաւ ինքզինք:

Ծերունին թեւերը բանալով՝ սրտին
վրայ սեղմեց զայն, մինչ բանտապանը
կը մեկնէր:

Այս սրտազեղումն երկար չտեւեց:

Պ. Լըբոք գիտէր որ կորսնցնելու
ժամանակ չունէր, ուստի զօրութիւն
ունեցաւ համառօտելու իւր հայրական
գգուանքն, որպէս զի շուտով սկսի այն
խօսակցութիւնն որ իւր որդւոյն բաղ-
դը պիտի որոշէր:

Թեթեւ շունդ մ'իմացուց իրեն թէ
ապահովութեան պետն ուկնդրութեան
մտած էր քովի խցիկը:

— Սիրելի՛ Լուիս, ըսաւ Պ. Լըբոք
անյողդողդ ձայնիւ, ոստիկանութեան
գործակալներու առջեւ չես այժմ, ոչ
ալ դատաւորի. ինձ հետ ես, միայն

ինձ հետ : Ես, պէտք չունիմ քեզ ըսելու , համազուած եմ որ դու սխալման մը զոհ եղած ես : Բացատրէ ինձ, խօսէ առանց շփոթելու , և բռն մի՛ պահեր ինձմէ :

Երիտասարդը տժգունեցաւ , դէմքին գիծերը կձկեցան : Յայտնի կը տեսնուէր թէ սրտին մէջ հակառակ զգացմանց բուռն պայքար մը կար , և հարկ եղաւ զօրեղ ճիգ մ'ընել իւր վրայ որպէս զի պատասխանէր :

— Բան մը չունիմ քեզ հասկցնելու , հայր իմ . դու գիտես ի՛նչ բանի համար կ'ամբաստանեն զիս : Պարտիս գիտնալ ի՛նչպէս պաշտպանած եմ զիս, որովհետեւ տեսած ես զիս ամբաստանողներն :

Ապշելով այս յայտարարութենէն , Պ. Լըքոք երկու քայլ ընկրկեցաւ և գոչեց .

— Լաւ լսեցի՞ : Խելքի՞ս եկած է արդեօք : Ո՛րդեակ , այնպիսի ամբաստանութեան մ'ենթարկեալ ես , որ կրնայ քեզ ի կառավինարան տանիլ . ամբաս-

տանութիւն մը , որ քու մէկ խօսքովդ կրնայ ցրել . . . և այն խօսքը չե՛ս ուզեր արտասանել . . . երբոր մեք միտակ ենք . . . երբոր ոչ եւս երկիւղ ունիս թէ անխորհուրդ պատասխան մը կրնայ չարաչար մեկնուիլ :

— Զիս արդարացնել փորձեցի և չը յաջողեցայ . ուստի ոչ ևս պիտի փորձեմ :

— Բայց ինքզինքդ կորսնցնե՞լ կ'ուզես ուրեմն : Զիս մեռցնե՞լ կ'ուզես սրտիս ցաւէն ու ամօթէս : Ո՛վ կը մղէ դքեզ ինքնասպան լինելու , խեղճ հայրըդ մեռցնելու : Միթէ երջանիկ չե՞ս , սիրելի չե՞ս :

— Էի , ըսաւ Լուի խուլ ձայնիւ :

— Կը կարծես ուրեմն թէ ոչ եւ՞ս ես : Մոռցա՞ր որ ես քեզ համար միայն կ'ապրիմ . . . մոռցա՞ր որ նշանած մ'ունիս . . . :

— Թէրէ՛զ . . . տեսա՛ք զայն :

— Այո՛, տեսայ : Այս առաւօտ իմ տունս դիմեր էր մօրը հետ : Խեղճ կանայք սարսափելի գիշեր մ'անցուցեր

են : Բայց ես խրախուսեցի զանոնք ,
և դժուարին ալ չէր . վասն զի չեն
հաւատար և երբէք չպիտի հաւատան
թէ դու մարդասպան մ'ես . . , և ես
խօսք տուի անոնց թէ այս իրիկուն
քեզ Պուլոյն պիտի տանիմ . . . ուր
քեզ կ'սպասեն . . . :

Լուի ցնցուելով խոնարհեցուց գը-
լուխն , որպէս զի ծածկէ իւր արտա-
սուքը :

— Տե՛ս , յարեց եռանդեամբ ծե-
րունին , որ կ'զգար թէ ճիշդ զարկած
էր : Օրիորդ Լքքոնթ այնչափ յուսալից
է քու ազատմանդ վրայ , որ ըսաւ ինձ
ծիծաղելով .

« Այնչափ ուրախ պիտի լինիմ զայն
վերստին տեսնելով , որ քաջութիւն չբ
պիտի ունենամ կշտամբելու . բայց
պէտք է որ հասկցնէ ինձ թէ ինչո՞ւ
համար կնոջ մը պատկերք կը կրէր իւր
սրտին վրայ : »

— Այդպէ՞ս ըսաւ ձեզ . պատկերին
խօսքն ըրաւ ձեզ :

— Այո՛ , և աներկբայ եմ որ դու

դժուարութիւն չպիտի կրես անոր նա-
խանձութիւնն անգորրելու , վասն զի
դու չես ճանչեր այն Անգլիուհին՝ զոր
սրիկայ մ'սպաննած է դաշոյնով , ինչ-
պէս նաեւ չես ճանչեր այն մարդը՝ զոր
թողաւմահ սպաննած են Արպալէթ փո-
ղոցի պորմին մէջ : Միթէ դու կը յա-
ճախե՞ս տարիամոլ կանանց և խառ-
նակեաց վաճառականներու քով , դու
որ անարատ մանկամարդուհի մը կը
պաշտես , և երեք ամսէ ի վեր կեան-
քըդ անոր մօրը տունը կ'անցունես ,
յոյժ հեռի Մուֆթար թաղի այդ նէլի
աշտարակէն : Միթէ գիտե՞ս Արպա-
լէթ փողոցին ո՛ւր լինիլը :

— Թէրէզ չպիտի ներէ ինձ երբէք ,
միմնջեց Լուի՝ փոխանակ հօրը սրտա-
յոյզ բացադարձութեան պատասխա-
նելու :

— Լո՛ւու կը կենաս , գոչեց տարա-
բաղդ հայրը . չե՛ս գթար ուրեմն իմ
վրայ , նշանածի՛դ վրայ . չե՛ս տեսներ
ուրեմն թէ կը յուսահատեցնես զիս :

— Աստուած կը կարդայ օրտերուն

մէջ : Աստուած պիտի դատէ զիս . ես արդէն ըսածէս աւելի բան մը չունիմ ըսելիք զիս արդարացնելու համար :

—Ուրեմն կը հաստատես միշտ թէ այն լուսանկար քուկդ չէր . . . թէ առանց քու գիտութեանդ թղթապանակիդ մէջ դրած են :

—Այո՛ :

—Ուրեմն ինչո՞ւ գիականարանը դընացիր . . . ծպտեալ :

—Անմիտ հետաքրքրութիւն մը զիս հոն մղեց : Եւ որովհետեւ չէի ուզեր որ ամբօխին մէջ տեսնեն , հին զգեստները հագայ հոն երթալու համար :

—Այդ ըսածդ կրնայ պաշտպանուիլ , ըսաւ Պ. Լըքօք , տեսնելով այն վատահոլութիւնն որով խօսիլ սկսած էր որդին : Բայց . . . այն խաղի թուղթերըն որ գտնուեցան բնակարանիդ մէջ . . . սեղանի մը վրայ շարուած . . . թաքրատօցի մը մէջ . . . :

—Յիշատակ մ'է , պատասխանեց երիտասարդը քիչ մը վարանելէ յետոյ :

—Յիշատակ , ինչ կը նշանակէ . . . :

—Այո՛ , Գերմանիոյ յիշատակ մ'է : Հայտէլպերկի մէջ ուսում առած ժամանակս , ինչպէս որ գիտես , սիրահարած էի աստուածաբանութեան տօքթօրի մ'աղջկան : Երկար ժամանակ կ'անցունէինք ի միասին : Աղջիկը կը սիրէր հաֆթեր-Նի-ն բանալ , հասկնալու համար թէ պիտի ամուսնանայինք արդեօք : Այն օր յորում պարտաւորեցայ ծանուցանել իրենց թէ Ֆրանսա կը վերադառնայի , տեսայ որ թուղթերուն վրայ ծռած էր , որք կ'ըսէին իրեն թէ իմ կ'ինս պիտի լինէր . . . հաֆթեր-Նի-ն յաջա՞ծ էր . . . : Պահանջեց որ իւր երջանկութեան այդ տարօրէն գրաւականն հետս տանիմ , և երդում առաւ ինձմէ որ թուղթերը նոյն կարգաւ շարեմ սեղանի մը վրայ Փարիզ , տանս մէջ , և այնպէս թողում մինչեւ որ հայրս հաւանութիւն տայ մեր միութեան :

Տակաւին տարփացած էի այն աղջրկան , երբոր դու զիս առիր Փարիզ բերիւր , հակառակ իմ բաղձանաց , ինչպէս որ կը յիշես . և ես ալ կատարեցի

այդ տղայական առաջարկ : Վեց կամ եօթն տարիէ ի վեր խաղի թուղթերը շարուած կը կենան նրբանցքի մը մէջ , ուր չեմ մտնելու երբէք :

— Այդ իրողութիւն չպատմեցի՞ր քննիչ դատաւորին :

— Ի՞նչ օգուտ ունի , պիտի կարծէր թէ սուտ մը կը հնարէի : Միւս կողմէ գիտեմ որ աննշան զուգադիպութիւն մը չկրնար հիմ լինիլ լուրջ ամբաստանութեան :

— Արդարեւ ոչ ոք կրնայ համարձակիլ մարդու մը գլխատուութիւնը ինդրել երգուեալ դատաւորներէ , առարկելով թէ այդ մարդ թղթախաղ մ'ունի , որոյ մէջ Սէ+է ո՛րքէն մը կը պակսի :

Բայց . . . նամակի պատեանն որ գտնուած է սպանեալ կնոջ բնակարանին մէջ . . . կը պնդեն թէ հասցէն քու գիրդ է :

— Կը սխալին :

— Եւ ապահովութեան պետն որ ճանչեր է քու ձայնդ : Եւ գործակալն որ ճանչեր է քու դէմքդ ու կերպարանքդ :

— Կը սխալին :

Լուի յստակ կը խօսէր այժմ , տըւած պատասխանները վարանոտ չէին ինչպէս տեսակցութեան սկիզբը :

Դիտող մը — և յոյժ խորամանկ մը կար տախտակորմին ետին — դիտող մը կրնար անշուշտ նշմարել թէ երիտասարդն՝ իւր հօր յորդորանքէն զգած ուելով՝ խոստովանութեանց ճանբուն մէջ մտնելու կէտին հասնելէ յետոյ , յանկարծ որոշեր էր վերջնապէս մտնել բացարձակ ուրացմանց դրութեան մէջ , զոր ընդունած էր ի սկզբան :

Թերեւս այն դիտող պիտի նշանակէր նաեւ թէ այդ գրից և լեզուի փոփոխում կ'սկսէր այն վայրկենէն , ուր Պ. Լըքոք օրիորդ Լըքոնթի նախանձոտ սրտատանջութեանց խօսքն ըրած էր :

Հայրը կարծելով միշտ թէ որդին դատական սխալման մը զոհ եղած էր , ըսաւ անոր .

— Սիրելի որդեակ , երեւոյթք կ'ամբաստանեն քեզ , և ժամանակ պէտք պիտի լինի որպէս զի ճշմարտութիւնն

երեւան ելնէ : Դու մինակ պիտի մնաս, վասն զի չեմ յուսար որ նորէն քեզ տեսնելու շնորհը կարենամ ձեռք բերել : Շարունակէ պաշտպանել քեզ և մի՛ վհատիր : Գու վրայ տեղեկութիւններ պիտի առնուի : Ես ալ պիտի առնում, և պիտի ապացուցանեմ որ անմեղ ես :

Կը կասկածիս յաջողելուս վրայ, աւելցուց ծերունին որ Լուիի երեսին վրայ կը կարգար : Դու չես գիտեր որ գաղտնիք պարզելն իմ արհեստս է : Մինչեւ ցայսօր ծածկեցի քեզնէ թէ ժամանակաւ ես դատական հետախուզութեամբք կ'զբաղէի : Կուզէի յաւիտեան ծածկել զայս քեզնէ, բայց քեզ սրտապնդելու համար . . .

— Ես գիտէի, մրմնջեց երիտասարդը :

— Դիտէի՛ր, ի՛նչպէս, գոչեց Պ. Լըքոք անխոհեմաբար :

— Օր մը . . . թուղթերուդ մէջէն . . . ոստիկանութեան գործակալի տոմսակ մը դատայ . . . որոյ մէջ քու անունդ գրուած էր :

Եթէ կայծակ ընկնէր Պ. Լըքոքի ոտքին տակ, չէր կրնար այնչափ սարսափահար ընել զՊ. Լըքոք, որչափ այս պատասխանն ըրաւ :

Որդին կը խոստովանէր թէ ոստիկանութեան լրտեսի տոմսակ մ'անցուցեր էր իւր ձեռք, և ապահովութեան պետն, որ տախտակորմին ետեւէն մըտիկ կ'ընէր, յսած էր այս խոստովանութիւն :

Հէզ տղան, մէկ խօսքով ցրտր էր այն բովանդակ տպաւորութիւն, զոր իւր ժխտական յայտարարութիւնք ըրած էին այնպիսի մարդու մը վրայ, որոյ վկայութիւն յոյժ ծանրակշիռ էր :

Կարելի՞ էր չկարծել թէ այն տոմսակ ճշդիւ նոյնն էր, զոր մարդասպանը ցոյց տուած էր Բիէտուշի՝ Արպալէթ փողոցի տան վանդակորմին առջև :

Սակայն վշտաբեկ հայրը կը յուսար տակաւին թէ բացատրութիւն մը կըրնար դարմանել չարիքը կամ գոնէ թեթեւցնել :

— Դու երբէք խօսք ըրած չես ինձ այդ գիւտիդ վրայ, ըսաւ Պ. Լըքոք անձկութեամբ :

— Ոչ, կը վախնայի որ կը վշտացնեմ քեզ, պատասխանեց Լուի՝ խոնարհեցընելով աչերն :

Յետոյ գլուխը վեր առնելով .

— Պէտք ունի՞մ ըսելու թէ առաջուանէն ոչ նուազ կը սիրեմ քեզ, յարեց խանդաղատանօք :

— Շատ ժամանակ կա՞յ որ գիտես զայդ, հարցուց Պ. Լըքոք դողալով :

— Քանի մ'օր միայն : Բայց պէտք է որ խոստովանութիւն մ'ընեմ քեզ : Այն տոմսին վրայ ձեր անունը տեսնելուս վրայ դժգոհելով՝ այրեցի զայն :

— Անմիջապէ՞ս :

— Այո՛. սենեկիդ վառարանին մէջ կրակ կար, հոն նետեցի : Գէշ ըրի :

— Ո՛չ . . . ո՛հ, ո՛չ . . . գոչեց ծերունին քիչ մ'սփոփանք զգալով այս վերջին յայտարարութենէ : Ես շատ տարիներէ ի վեր հրաժարած եմ այն պաշտօնէն՝ զոր ճաշակիս յարմար դատե-

լով ընտրած էի և միշտ պարկեշտօրէն վարած եմ : Կ'ուզէի ջնջել անոր յիշատակը . . . քու պատճառաւ . . . այն ընտանեաց պատճառաւ, որուն հետ սլիտի կապուիս :

Եւ սակայն ոստիկանութեան ապահովական ճիւղի պատուական պետին հետ ունեցած հին յարաբերութեանցս շնորհիւն է որ այս միջոցիս կրնամ խօսակցիլ քեզ հետ :

Մի՛ կարծեր թէ թշնամի է քեզ. կը ցաւի վրագ. և ի բոլոր սրտէ կ'ըղձայ որ անմեղութիւնդ ապացուցուի . . . վասն զի աստ ամեն մարդ կը սիրէ զիս . . . : Նոյն իսկ քեզ ձերբակալող գործակալը ժամանակաւ իմ օժանդակներէս մին էր, և քեզ համար ինձ խօսած ժամանակ աչքը լի էր արտասուօք :

Այս ամենը կ'ըսեմ քեզ որպէս զի չվհատիս, սիրելի՛ զաւակս : Խորհէ որ ես միակ մտածութիւն մ'ունիմ . . . ապացուցանել թէ դու յանցաւոր չես . . . : Եւ շուտով կը հասնիմ բաղձանքիս : Ես քու գործէդ շատ աւելի կ'սնճուող գործեր պարզած եմ :

Կ'ուզե՛ս գիտնալ թէ ո՛ւրկէ պիտի սկսիմ: Արկղի մը մէջէ գիակ մը գըթ-նուած լինելուն պատմութիւնը կարգացած ես լրագրաց մէջ . . . գիտես նաև թէ արկղը տանողն համր մ'էր, որ չէր կրցած կամ չէր ուզած որ և է բացատրութիւն տալ: Այն համրն անշուշտ կը ճանչէ մարդասպանն, որ քանի մը քայլ առջևէն կ'երթար համրին բըռնուած փողոցին մէջ . . .

— Լա՛ւ, լինդմիջեց Լուի, թող երեսնն զիս այդ համրին հետ:

— Ուրեմն, հարցուց հայրն ուրախութեամբ, կը փափաքիս որ երեսնն քեզ անոր հետ:

— Անշուշտ: Եթէ չառաջարկեցի արդէն քննիչ դատաւորին, այն պատճառաւ էր որ վաղ կամ անագան պիտի կատարուի այդ գործ:

— Ա՛, գոչեց Պ. Լըքոքը, եթէ կրնայի երբէք կասկածիլ քու վրադ, այժմ ոչ եւս կարելի է:

Բարեկամս, ապահովութեան պետը, խօստացաւ ինձ որ այսօր կամ վաղը տեսնես համրն:

Նորոր հաստատուի թէ չճանչեր քեզ, մնացեալն ինքնին կը քալէ. ես կ'ստանձնեմ ամբաստանութեան ամեն կէտերը մի առ մի ցրել: Եւ դժուարին չէ, վասն զի չեն բռներ զիրար:

Պիտի ջանամ նեղը լծել այն անգլիացի գրպանախոյզն, որ այսպէս իւր վրայէն նետել կ'ուզէ այդ վատագաւոր լուսանկար: Ստուգիւ շատ հետաքրքրօրայաբժ բան կը լինի հաւատալ այն պիտի անզգամի մը խօսքին:

Բայց կը շատախօսեմ, և վայրկեանք թանկագին են: Համբուրէ զիս, սիրելի որդեակ, և համբերէ: Նրթամ տեսնեմ բարեկամս . . . համրին հետ երեսուելու գործը կարգադրեմ անոր հետ, և յետոյ ելնեմ Պուլոյն երթալով քաջալերեմ զՏիկին Լըքոք . . . : Պիտի ըսեմ աղջկանը թէ երեք շաբաթէն պիտի ամուսնանաք և իտպիտ պիտի ուղեւորիք:

— Ըսէ անոր թէ կը սիրեմ զինքն և թէ իրմէ դատ ոչ զոք սիրած եմ երբէք, մըմնջեց Լուի իւր հօր թեւերուն մէջ ընկնելով:

իրենց հրաժեշտի ողջոյնը կարճ եղաւ, վասն զի Պ. Լըքոք կ'աճապարէր երթալ խօսիլ տպահովութեան պետին հետ, և չէր երկբայեր թէ նպաստաւոր տրամադրութեան մէջ պիտի գըտնէր զայն:

Բայց իւր այս վստահութիւնը զեղջել հարկ եղաւ իրեն՝ երբոր տեսակցեցաւ անոր հետ դիւանատան ետեք գտնուած սենեկի մը մէջ:

— Սիրելի՛ բարեկամ, ըսաւ մէկէն ապահովապետը, կը խոստովանիմ ձեզ թէ ձեր որդւոյն հետ ըրած խօսակցութիւննիդ լսելէս յետոյ ալ առաջուանէն աւելի լուսաւորեալ չեմ:

Բռնած գիրքն և տուած բացատրութիւններն առաւել ևս չեն բռնաւորեր զայն, կը ճանչեմ զայս, բայց չեն ալ չքմեղացներ:

Մինչև իսկ յոյժ ծանր խոստովանութիւն մ'ալ ըրաւ յականայից:

— Սենեկէս գտած ոստիկանութեան գործակալի տոմսակն ըսել կ'ուզէք. բայց չէ կրցած գործածել զայն, որով-

հետեւ անմիջապէս կրակը նետած է:

— Ս.յնպէս կ'ըսէ: Բայց դատաստանն հարկադրեալ չէ հաւատալու: Եւ նկատեցէք սա ցաւալի պարագայն ալ: Ձեր տոմսակը քսան տարուան էր, և Բիէտուշ լաւ կը յիշէ թէ փողպատաւոր մարդն հին ձևով տոմսակ մը ցոյց տուած էր իրեն:

— Բիէտուշ քաջ տղայ մ'է, բայց դուք ալ գիտէք ինձ չափ թէ քիչ մը դիւրահաւան է, և դիւրահաւան մարդը կը սխալի:

— Օ՛, ես չեմ քններ, այլ միայն բարի և յոռի հաւանականութիւնները կը նկատեմ:

Ձեր որդւոյն պատմած տարփական պատմութիւնն հաւանական է, բայց դիւրաւ չկրնար ստուգուիլ:

— Ի՞նչ պատճառաւ: Բաւական է գրել ի Հայտէլպերկ և տեղեկութիւն ստանալ:

— Լա՛ւ, բայց չեմ յուսար որ իւր եօթն տարի առաջուան տարփուհին յօժարի այժմ խոստովանիլ թէ պատե-

րազմէն առաջ յաջողութիւններ բացած էր Ֆրանսացւոյ մը հետ :

Ասկէց զատ , լուսանկարն , որոյ մէջ սպանեալ կինը թուղթեր շարելու զբազած կ'երևի , կրնայ տպաւորութիւն ընել երգուեալ դատաւորաց վրայ . . . ընդհանուր դատախազը դիտել պիտի տայ անշուշտ թէ ամբաստանեալն Անգլիա բնակած է և թէ կինն անգլիացի է :

— Իրպանախոյզն ալ անգլիացի է :

— Կը պատասխանեմ ձեզ թէ այդ ալ պիտի քննուի թէ՛ աստ և թէ՛ ի Լոնտրա : Իրպանախոյզն արդէն աներկբայ է իւր վեցամսեայ բանտարկութեան վրայ : Եթէ այն կողմէ տեղեկութիւնք կան սպասելիք , պիտի ըստացուին . կը վստահամ միայն որ ձեր որդին չքմեղացնելու չծառայեն :

— Պիտի տեսնենք : Ես կը կարծեմ որ բովանդակ գործն ադոր մէջ է , Բայց առ այժմ՝ ուրիշ բան մ'ալ կայ փորձելու :

— Անշուշտ : Պիտի ստուգենք նախ թէ ամբաստանելոյն քայլերը կը յար-

մարի՛ն այն քայլերուն , զորս ոճրագործը թողած է ձիւնին մէջ : Գիտէք որ կաղապարել տուած եմ այն ոտքինը շաններն : Ասկէց զատ , երեսելու գործը կայ դրացիներուն հետ , ածխավաճառին , ածխավաճառուհւոյն , և այլոց հետ . . . :

— Կը յուսամ որ համբէն պիտի սկսիք :

— Արդէն միաքս դրած էի , բայց ձեր որդին լսելէս ի վեր կ'ուզեմ շուտով կատարել զայդ :

Ուստի անմիջապէս կարգադրենք զայդ գործ և . . . ահա թողպիաք կուգայ ճիշդ յարմար պահուն՝ իւր կարծիքը մեզ տալու :

Գոնէր լուելեայն ներս մտեր էր : Յարգական քաղաքավարութեամբ մ'ողջունեց զՊ Լըքոք , և ըսաւ .

— Իմացայ , պարոն , ձեր գլխուն եկած փորձութիւնն , և կ'աղաչեմ զձեզ հաւատալ թէ մեծ ցաւ կ'զգամ այդ բանի վրայ :

Եթէ ոստիկանական վարչութիւնն ինձ

յանձնէ հետախուզել այդ ողբալի գործ,
աներկմիտ եղիք թէ ամեն ճիգ կը թա-
փեմ . . . առանց պարտականութենէս
վրիպելու . . . հաստատել ձեր որդւոյն
անմեղութիւնը :

Մերունին շնորհակալ եղաւ յուզեալ
սրտիւ :

— Իրաւունք ունէիք ըսելու ձեր
որդւոյն թէ աստ ամեն մարդ ձեր կող-
մին է , յարեց ապահովութեան պետն :

Այս օրէն պիտի ձեռնարկենք մեծ
գործին :

Ըսէք ինձ , թողպի՛ք , ամբաս-
տանեալն համբին հետ պիտի երեսենք :
Դուք կ'զգաք այս փորձի կարեւորու-
թիւնն : Մ'ստ կատարենք թէ Մազասի
բանտին մէջ , ի՞նչ կ'ըսէք :

— Որովհետեւ իմ կարծիքս հարցը-
նել կ'ուզէք , պատասխանեց թողպիաք
վայրկեան մը խորհելէ յետոյ , դիտո-
ղութիւն մը պիտի ընեմ որ , կարծեմ ,
անկարեւոր չէ :

Փորձը վճռական լինելու համար
պէտք է որ ինչ ինչ պայմաններու մէջ

կատարուի : Համբն ուշիմ մարդ է . . .
դոնէ այսպէս ըսին ինձ . . . վասն զի
տեսած չեմ զայն . . . պատճառներ
ունէի , և , փակագծի մէջ , իմացած եմ
թէ պաշտօնատան մէջ զարմացողներ
կան եղեր զայն տեսնել չուղեւուս վրայ ,
և քիչ մնացեր է որ զիս իբրեւ անոր
մեղսակից ամբաստանեն , աւելցուց թո՛ղ-
պիաք ծիծաղելով :

— Այդպէս չէ . միայն թէ կը տես-
նէի որ փոյթ չունէիք :

— Եթէ խօսակցած լինէի անոր հետ ,
չէի կրնար սա առաջարկն ընել ձեզ .
համբն . . . որ զիս չճանչեր , լաւ ուշ
դրէք այս կէտի . . . ես տանիմ Պ. Լուի
Լըքոքի բնակարանն :

— Ինչո՞ւ հոս չկատարուի :

— Վասն զի , եթէ այդ մարդ ծա-
ռայած է ամբաստանելոյն , — ներեցէք
ենթադրութեանս , սիրելի՛ր իմ Պ. Լը-
քոք , — տարակոյս չմնար թէ , իւր տէրը
Մազասի կամ արգելարանի խցիկներէն
միոյն մէջ տեսնելով , դիւրաւ կը հաս-
կնայ թէ նա ալ իրեն պէս բռնուած ու

բանտարկուած է , և կատակերգութիւն կը խաղայ , ինչպէս որ խաղցած է այլուր :

Բայց եթէ այն կերպիւ կատարուի այդ գործ , որ կարծէ թէ զինքն ազատ կը թողուն , դիւրաւ կուգայ ինձ հետ Մոն-Թապոր փողոց , ուր Պ. Լուի պիտի սպասէ անոր . . . ձեր հսկողութեան ներքեւ անշուշտ :

— Լաւ չեմ հասկնար :

— Ի՞նչպէս չէք հասկնար թէ , ամբաստաններոյն յանցաւորութեան համոզուելու համար , բաւական պիտի լինի ձեզ ներկայ գտնուիլ այդ երեսման , առանց համբին գիտնալուն թէ դուք անդ էք :

Երկուքէն մին . կամ համբը մեղսակից է Պ. Լուի Լըքոքի , և այն ժամանակ , երբոր զայն տեսնէ , կարծելով թէ միայնակ է անոր հետ , նշանացի կամ կամ ուրիշ կերպիւ գոհութիւն պիտի յայտնէ այդ անակնկալ տեսակցութեան համար . կամ , ընդհակառակն , երբէք տեսած չէ զՊ.

Լուի , և յայնժամ , ինչպէս որ աւելի հաւանական է , բնաւ ցոյց չընեն , և Պ. Լուի անմեղութիւնը լիպպէս կը հաստատուի :

Մեք առաջին կը լինինք , դուք և ես , վկայելու թէ փորձը վճռական եղաւ . ակներև տեսնուեցաւ թէ ամբաստանեալն երբէք յարաբերութիւն ունեցած չէ արկղի մէջ դրուած դիակը տանող մարդուն հետ , և թէ , հետեաբար , մարդասպանը չէ և չկրնար լինիլ :

Համոզուած եմ թէ մեր տեղեկաբարին վրայ քննիչ դատաւորը կը պարտաւորի անմեղութեան հրամանագիր մը տալ և արձակել զամբաստանեալն :

Իսկ իւր գրասենեկին , կամ Սազաի և կամ արգելաբանի մէջ երեսում մը՝ երկբայութեան մէջ կը թողու զայն , վասն զի պիտի կասկածի միշտ թէ համբըն զՊ. Լըքոք չճանչել կը կեղծէ :

— Ս.յո՛ , ըսաւ ապահովութեան պետը , ձեր առաջարկած միջոցը վճռական ապացոյց մը կ'ընձեռէ մեզ :

Իմ մասին ես չեմ դժկամակիր գործադրել զայդ և ինձմէ կախեալ է, վասն զի գրեթէ լիազօր իշխանութիւն տրուած է ինձ :

Մակայն բոլորովին հակառակ լինելով դատական սովորութեանց, պարտ կը համարիմ նախ իմացնել քննիչ դատաւորին :

—Նա չքնդդիմանար այս կերպիւ կատարուելիք տեսակցութեան մը, եթէ առաջարկէք որ ինքն ալ ներկայ գլտնուի ձեզ հետ :

—Ներկայ գտնուի՛ . . . պահուրտած :

—Սնչուչտ : Ես Մոն-Թապոր փողոցի տունը չեմ գիտեր, բայց անչուչտ քանի մը սենեակներէ կը բաղկանայ : Դուք այն սենեակներէն միոյն մէջ կը կենաք, Պ. Լուի Լըքոք միւսին մէջ : Հաղորդակցութեան դուռը կիսաբաց կը մնայ. ձեր կեցած սենեկին մէջ լոյս չդրուիր, իսկ երեսման սենեկին մէջ շատ լոյս կը վառի, որով դուք ամեն բան կը տեսնէք, տեսարանի մը ներ-

կայ գտնուածի պէս . իսկ անոնք չեն կրնար ձեզ տեսնել :

—Սրդարև գէշ խորհուրդ չէ :

Կը մնայ գիտնալ թէ հաճոյ կը լինի՞ վաղեմի բարեկամիս, աւելցուց գործակալապետն :

—Ո՛չ միայն հաճոյ է ինձ, գոչեց Պ. Լըքոք, այլ ամենամեծ շնորհ մ՛ըրած կը լինիք ինձ՝ եթէ այսօր իսկ գործադրէք :

—Լաւ խորհեցա՞ք այսպիսի երեսման մը հնարաւոր հետեւանաց վրայ : Քաջ կը հասկնա՞ք թէ համբին մէկ շարժումը, դէմքին մէկ խաղը կրնայ ձեր որդւոյն դատապարտութեան պատճառ լինիլ : Եթէ մասնէ ինքզինք, — և պիտի մատնէ երբոր ճանչէ զամբաստանեալը՝ չգիտնալով որ զինքը կը դիտեն — եթէ մատնէ ինքզինք, ոչինչ կրնայ հակակշռել այդ առաջին տեսարանին աղետարեր ազդեցութիւնն, ո՛չ ձեր որդւոյն ցոյց տալիք անզգածութիւնն, ո՛չ համբին ձեւափոխութիւնն երբոր իւր մեղսակցին յօնքերուն պուստումէն ազդարարուի :

—Սյդ ամենն ալ գիտնալով կը պնդեմ, վասն զի անկասկած եմ լուրիի համար :

Եթէ աստ լինէր, նա ալ ինձ հետ պիտի աղաչէր ձեզ որ անյապաղ կատարէք այդ փորձ, որ յստակապէս պիտի ապացուցանէ ամբաստանութեան անտեղութիւնն :

Եւ շնորհակալութիւն կը յայտնեմ Պ. Թոլպիաքի՝ թէ՛ որդւոյս և թէ՛ իմ կողմէ :

—Տեսակցութեան կատարումէն յետոյ կրնաք յայտնել այդ շնորհակալութիւն, ըսաւ Թոլպիաք ժպտելով : Ես կ'ըզձամ որ գոհացուցիչ արդիւնք մ'ունենայ ձեզ համար, և անկեղծօրէն խօսելով, իմ այս ըզձանքս բաւական արժէք ունի, վասն զի իմ շահս կը պահանջէ որ յանցաւորը գտնուի, և կը խօստովանիմ թէ արդէն ձեռք անցուցած կը կարծէի :

— Ի՞նչպէս պիտի ընենք, աւելցուց ապահովութեան պետը՝ կարճ կտրելու համար Պ. Թոլպիաքի քաղաքավարութիւնները :

— Կարծեմ թէ շատ պարզ է մեր ընելիքն : Սյս իբիկուն, օրինակի համար ժամ ութին միջոցները, կուղաք կ'առնուք աստի Պ. Լուի Լըքոք, և կը տանիք իւր բնակարանը, ծանուցանելով իրեն թէ նոր քննութիւնք պիտի լինին իւր տան մէջ, և ինքն ալ ներկայ պիտի գտնուի :

Վասն զի, ես կը կարծեմ, և անշուշտ քննիչ դատաւորն ալ ինձ պէս պիտի խորհի՝ թէ պէտք չէ իմացնել ամբաստանելոյն թէ զինք պիտի երեսն համրին հետ :

— Փորձն այդ պայմանաւ միայն կրնայ զօրութիւն ունենալ, ըսաւ հայր Լըքոք առանց վարանելու :

— Շատ ուրախ եմ տեսնելով որ համամիտ էք ինձ այս կէտի վրայ, սիրելի պարօն :

Սյդ կ'ըսենք թէ կ'առնուք կը տանիք զԼուի Լըքոք Մոն-Թապոր փողոց, ժամ ութ ու կէսին միջոցներն հոն կը հասնիք. վեր կ'երնէք, զդուշանալով անշուշտ որ դռնապանը չկրնայ նշմա-

րել թէ իւր վարձակալը ձերբակալ եր-
ղած է :

Պահակները փողոցը կը թողուք ,
բացի մէկէն , որ ամենէն ուշիմը պար-
տի լինիլ և որ ձեզ հետ բնակարանը
մտնելով նախասենեկին մէջ պիտի կե-
նայ :

Ամբաստանեալը դահլճին մէջ կը
նստեցնէք և քովի սենեկին մէջ խու-
զարկութիւններ ընել կը կեղծէք :

Տասը վայրկեան կամ քառորդ մը
յետոյ դրան զանգակը կը հնչէ : Համբն
է եկողը : Պահակը կը բանայ դուռը :
Համրը զայն սպասաւոր կը կարծէ , և
դահլճը տանել կուտայ զինք :

Մնացեալը ձեզ կը պատկանի , սի-
րելի՛ վարպետ :

—Յոյժ լաւ : Բայց ո՞վ պիտի եր-
թայ հանէ համրը Մազասէն և հոն
տանի :

—Ես ինքն , եթէ անպատեհու-
թիւն մը չէք տեսներ : Զիս չճանչեր ,
և թոյլ տուէք ինձ նշմարել տալ ձեզ
անցողակի թէ ո՞րչափ իրաւունք ու-

նէի զայն մինչև այսօր տեսնել չուզե-
լու , վասն զի , եթէ զիս ճանչեր , կը
կը կասկածէր իմ վրայ , և պէտք է
բացարձակապէս որ իւր յօժար կամօք
գայ իմ հետ :

—Ի՞նչպէս պիտի ընէք որ իւր յօ-
ժար կամօք գայ ձեր հետ :

—Նախ՝ կ'աղաչեմ ձեզ հրահանգ-
տալ , որպէս զի Մազասի դիւանատան
մէջ այնպէս ընեն , որ մեր մարդը կա-
րենայ հաւատալ թէ այս անգամ վերջ-
նապէս կ'արձակեն զինք :

Ուստի արձակման համար պէտք
եղած օրինական գործողութեանց ա-
մենն ալ պէտք է կատարուին :

Բաւական խելք ունի անշուշտ հաս-
կընալու համար որ եթէ արձակման
հրամանը լուրջ չլինէր , այսպէս չէին
վարուեր :

—Ձեր կարծածէն աւելի ուշիմ է ,
և գէշն այն է որ արգէն խաղցած ենք
այդ կատակերգն՝ արգելարանէն դուրս
հանելու համար զայն : Բայց , վերջա-
պէս , կ'ընդունիմ որ բանտէն ելնելու

համար դժկամակութիւն չցուցներ :

Ի՞նչ պատրուակաւ պիտի մօտենար իրեն երբոր Մազասի դռնէն դուրս ելնէ :

— Չեմ մօտենար իրեն . հեռիէն նշան կ'ընեմ :

— Բացատրեցէք յստակօրէն , սիւրբի՛ բարեկամ :

— Իմ գաղափարս այս է : Կը յիշէք անշուշտ թէ երկու պահակներն յայտնեցին թէ արկղաբարձ մարդը ձերբակալած ժամանակին կառքի մը հեռանալուն ձայնը լսած էին :

Ամենուս ալ կարծիքն է թէ այն կառք համրէն առաջ գնացող քաղաքացիին կ'սպասէր , որ երբ իւր մեղսակցին բռնուիլը տեսաւ , իսկոյն կառքը մտաւ ու հեռացաւ :

— Կատարելապէս :

— Արդ , ես կ'եզրակացնեմ այդ իրողութենէ թէ համրը կառք ունեցող մարդու մը կը ծառայէր , վասն զի դիակի փոխադրելու համար հրապարակի կառք չկրնար գործածուիլ : Ուստի , եթէ

համրը , դուրս ելած ժամանակ , տընական կառք մը կեցած տեսնէ բանտին դրան առջեւ և կառքին քով վայելազգեստ պարոն մը որ քաղցրութեամբ զինքը կոչէ , ներելի է ենթադրել թէ չլախչի . հաւանական իսկ է թէ կը մօտենայ տեսնելու համար թէ որո՛ւ հետ է գործը :

— Կարելի է , բայց շուտով կը տեսնէ թէ սխալած է :

— Ինչէ՞ն . երկու պահակներուն տեսած քաղաքացին միջահասակ էր . . . Ինձ պէս . . . կրկնօցին օձիքը մինչեւ ականջներուն վրայ քաշած էր . . . ես ալ այնպէս պիտի ընեմ . . . :

— Եւ կը կարծէք թէ մեր մարդը կը հաճի ձեր կառքը մտնել :

— Տարակոյս չունիմ , և անգամ մը որ հոն մտնէ , մնացեալն ինքնին կը քալէ :

Խօսակցութեան մասին հոգ չունիմ , վասն զի հնարին չէ խուլ—համրի մը հետ :

Եթէ նշանական շարժումներ ընէ ,

ես ալ կ'ընեմ, և առանց դժուարութեան կ'անդորրեմ զայն, վասն զի կը հաւտացնեմ թէ զինքն այնպիսի տուն մը կը տանիմ, ուր կրնայ կատարելապէս ապահով լինիլ:

Խորհեցէք անգամ մը. Մաղասի բանտէն դուրս կ'ելնէ, տնական կառք մը կը տեսնէ որ իրեն կ'սպասէ: Բնականաբար կը խորհի թէ իւր քաղաքացին բաւական ազդեցիկ մարդ մ'է որ զինքն արձակել կուտայ բանտէն և անձամբ կուգայ զինքն առնուլ տանիլ:

Եւ երբ նշմարէ թէ ես այն օրաքացին չեմ, անոր բարեկամներէն մին կը համարի՝ անոր կողմէ զրկուած:

— Բայց երբոր Պ. Լըքոքի տան առջեւ հասնի:

— Եթէ արդէն գնացած է հոն առանց վարանելու ներս կը մտնէ: Եթէ, ընդհակառակն, դժկամակութիւն ցուցնէ, ես կը հաճեցնեմ զայն:

Արդ, սիրելի վարպետս, համաձայն ենք:

— Այդ միջոց քիչ մը կնճռոտ է,

ըսաւ ապահովութեան պետը քիչ մը խորհելէ յետոյ, բայց ուրիշ որ և է միջոց ալ նոյնչափ կնճռոտ կրնայ լինիլ: Միայն թէ, դուք չէք կրնար միայնակ ստանձնել այդչափ կարեւոր գործողութեան մը պատասխանատուութիւնն:

— Հաւատացէք որ ես ալ չեմ ուզեր: Եթէ համրն՝ առանց ուշադրութիւն ընելու ինձ՝ մեկնի երթայ, դժուարութեան մէջ կ'իյնամ, վասն զի չեմ կրնար ետեւէն հսկողութիւն ընել կառքով:

Ուստի կը խնդրեմ որ գոնէ երկու գործակալ հսկողութեան դէմք Մաղասի դրան առջեւ, և երկու գործակալ որք արդէն տեսած լինին մեր մարդը:

— Բիէտուշ և Բիկաշ յոյժ լաւ կը կատարեն ձեր գործն:

— Այո՛, բայց ծպտեալ, վասն զի պէտք չէ որ համրը ճանչէ զանոնք:

— Տարակոյս չկայ: Կէս աւուր մօտ դրասենեակս եկէք: Մինչեւ այն ժամանակ ես խորհրդակցած կը լինիմ քննիչ դատաւորին հետ, և կ'որոշենք մեր ը-

նելիքն երկու գործակալաց հետ : Գործը փափուկ է , ամեն բան նախատեսել , ամեն բան ճշդել պէտք է , ժամը , ձեր կառքին կենալու տեղը , բռնուելիք ընթացքն երբոր մեր մարդը փախչի :

—Ս.դոնք ի միասին կը կարգադրենք , սիրելի՛ վարպետ , և ես աներկրայ եմ որ ամեն ինչ լաւ կը կատարուի :

—Կը ներէ՞ք ինձ որ այս իրիկուն ձեր տունն սպասեմ ձեզ , տեսակցութենէն յետոյ , հարցուց Պ. Լըքոք պահովութեան պետին :

—Ս.յո՛, վաղեմի՛ բարեկամ , պատասխանեց պետը սեղմելով ձերունուն ձեռքն , և շատ ուրախ պիտի լինիմ եթէ բարի լուր մ'ունենամ ձեզ տալու :

Թողպիաք վերստին եռանդուն բարեկամութեան յայտարարութիւնները բաւ , և հայր Լըքոք՝ զգածեալ իրենցոյց տրուած համակրութիւններէն՝ մեկնեցաւ լի յուսով և շնորհակալութեամբ :

Ժ.

Գիշերը բաւական յառաջացած էր արդէն , երբոր Մաղասի ծառուղւոյն մէջէն սեւաթոյր և միաձի գեղեցիկ կառք մ'երեւցաւ , զոր մուշտակներով ծածկեալ կառապան մը կը վարէր :

Ս.յս գեղատեսիլ կառք թեթեւապէս ձախ կողմ դարձաւ և բանտին պատին առջեւ կեցաւ տասն քայլ հեռի կամարակապ մեծ դռնէն , որ ձերբակալ բերող ստտիկանական կառքերու միայն կը բացուէր :

Երկու մարդ վար իջան և ուղղուեցան դէպ այն զառիվերն որ Լիոնի երկաթուղւոյն կայարանը կ'ենէ , և որ նոյն միջոցին գրեթէ ամայի էր , որովհետեւ իրիկունան կառախմբոց ժամը չէր տակաւին :

Մէկը փնտռել կը թուէին , և մին ըսաւ միւսին ցած ձայնիւ .

—Պարտէին արդէն իրենց տեղը գտնուիլ : Սըհեստ մ'այսպէս չկատարուիր՝ եթէ լաւ կատարել ուղուի :

—Գիշ մը ներողամիտ պէտք է գլտ-

նուիլ այդ մարդոց, սիրելի՛ վարպետ, պատասխանեց միւսն : Այդ մարդիկ երկաթէ չեն, և եթէ դաւաթ մը դինի խմելու համար դինետուն հանդիպին, ես չեմ սրդողիր :

Մնաց որ, աւելցուց ժամացոյցը նայելով, ուշ մնացած չեն, մեք կանուխ եկած ենք :

— Երկար ժամանակ չունինք մեր հրահանգները տալու, և եթէ տակաւին հինգ վայրկեան ուշանան, ամիս մը պիտի զրկեմ թոշակէ :

Զիս խիստ կը գտնէք : Բայց գիտէ՞ք, Թոլպիաք, որ եթէ այդ գործակալք զինուորական հնազանդութեամբ ծառայելու չհարկադրին, անհնարին է լաւ գործ տեսնել :

Անդիոյ մէջ չենք, ուր վարդեջրով ոտտկանութիւն կ'ընեն :

Ասկէ զատ, մեր այս գիշերուան գործն հասարակ գործ չէ. ծանր պատասխանատուութիւն մ'ստանձնած ենք, դուք և ես, և սխալ գործ մը բաւական է մեզ ամենաձախող վիճակի մը մէջ դնելու :

Բաւական դժուարութիւն կրեցի ձեր առջարկած խաղն այս իրիկուն խաղալու համար. ջանանք որ չկորսընցընենք :

— Ձենք կորսնցներ, սիրելի՛ վարպետ, մեր նախադուշութիւնք լաւ կարգադրեալ են :

— Հոգ չէ. բայց ես կ'ուզեմ բացարձակապէս որ գործողութիւնը կրկնել տանք մեր աչաց առջեւ : Նախ ձեր կառքը պարտի կենալ ճշդիւ այն տեղն՝ ուր կեցած է այս միջոցիս :

— Անհոգ եղիք. իմ հայեացքս անվրիպելի է, և ես հոս եմ պէտք եղած հրամանները կառապանիս տալու համար :

— Վստահելի՞ է այդ կառապան :

— Վստահելի է և խորհրդապահ : Վեց ամսէ ի վեր քովս է, բնաւ շատ խօսութիւն քրած չէ միւս ծառայնորուս, ո՛չ ալ դռնապանիս հետ : Եթէ ընէր, կ'իմանայի, կ'ըսէին ինձ :

— Եւ չի՞ զարմանար երբոր մէկ գիշերուան մէջ երկկիցս կ'սպասեցնես զայն Մաղասի պատին առջեւ :

—Կը կարծէ թէ Լիոնի կառախմբով
գայիք մէկու մը կ'սպասեմ:

—Լաւ, ուրեմն որոշուած է: Եր-
բոր մեր երկու թիւերուն հետ խօսինք,
զիս ոստիկանութեան պաշտօնատունը
կը տանիք, և դուք հոս կը վերադառ-
նաք, այն կերպիւ որ ժամ ճիշդ ու-
թին աստ գտնուիք: Համբին դուրս
հանուելուն համար այդ ժամը նշա-
նակած եմ անօրէնին:

—Օ՛, ես չեմ վրիպիր. բայց բոլր-
րովին անօգուտ է աւելի կանուխ գա-
լըս, վասն զի դուք կէս ժամէ առաջ
չէք կրնար Մոն-Թապոր փողոցն հաս-
նիլ. իսկ իմ ձիուս համար քսան և հինգ
րոպէ բաւական է աստի հոն երթալու:

Լաւ միտքս եկաւ. երեսու մէն յե-
տոյ համը կառքով աստ պիտի վե-
րագարձնէք, այնպէս չէ՞: Ես անձամբ
պիտի բանտարկեմ զայն:

—Գործակալներուն պիտի յանձ-
նեմ. . . դեռ չեկան անիրաւները: Բայց
ի՞նչ կը գուշակէք տեսակցութեան ար-
դիւնքէն:

—Իրաւ որ, կը խոստովանիմ ձեզ
թէ տակաւին որոշ կարծիք մը չունիմ:
Պահ մ'առաջ ըսի թէ արդիւնքը նը-
պաստաւոր պիտի լինի Պ. Լյւբըք Տը
ժանթիյեի, բայց հայրն հոն էր, և
ես չէի ուզեր վշտացնել զայն:

—Ես համոզուած եմ, սիրելի՛ս, թէ
Լըքոք բարի մարդ մ'է, զոր ի սրտէ կը
սիրեմ. բայց որդին ժանտաժուտ տե-
սակէն սրիկայ մ'է և ես գրեթէ աներկ-
բայ եմ թէ գլխատման պիտի դատա-
պարտուի:

—Տարակոյս չկայ որ եթէ համը
զայն ճանչէ, դորժը լմնցած է:

Ասկէ զատ, ես գրած եմ Անդրիա,
ուր քանի մը տարի կեցած է իւր պա-
տանեկութեան ժամանակ, և կը կաս-
կածիմ որ անդ ճանչած լինի Արպա-
լէթ փողոցի կինն: Եթէ Անդրիայէն
սպասած տեղեկութիւններս քանի մ'օ-
րէն հասնին, ինչպէս որ կը յուսամ,
թերեւս նոր բաներ պիտի իմացնեմ
ձեզ:

—Կ'ըզմամ. . . բայց աւասիկ, եթէ

չեմ սխալիր, մեր մարդիկը մեզ կը փնտռեն :

Արդարև կայարանին շրջակայները լուսաւորող կաղերուն լուսով բեռնակիր մ'և երկաթուղւոյ սպասաւոր մը կը տեսնուէին, որք դէպի կայարանը կուգային :

Բեռնակիրը Բիկաշ էր . սպասաւորն ալ, որ Բ. Լ. Մ. սկզբնատաւերով գլխարկ մը դրած էր, Բիէտուշ էր :

Ապահովութեան պետն առաջին նայուածքով ճանչած էր զանոնք :

Երկաթուղւոյ գործաւորի կերպարանքով մարդու մը հետ կը խօսակցէին :

— Ի՞նչ կ'ընեն այդ չարաճճիները, մրմուաց ապահովութեան պետը . պէտք է որ քիչ մը թողփեմ ադոնք : Ի՞նչ բսել է անձանօթ մարդու մը հետ խօսակցիլ պաշտօնավարութեան ժամանակ, երբոր զիրենք իբրեւ Լիոնի երկաթուղւոյն կայարանի պաշտօնեայ կարծեցնել կ'ուզուի . . . պատուոյս վրայ կ'երդնում թէ չեմ հասկնար զայս :

Բիէտուշ նշմարած էր անշուշտ իւր պետը, վասն զի իսկոյն բաժնուեցաւ իւր դէմն երնող ընկերէն, որ ծանրաքայլ դէպի զառիվերն երթալ սկսաւ :

— Կուգա՛ք վերջապէս, գէշ չէ, ըսաւ զօրավարն իւր յամեցեալ զօրականաց : Արդէն Մազասի դրան առջև պահպանութեան կեցած պարտէիք լինիլ, և փողոցին մէջ կը դեգերիք :

— Ներեցէք, տէր իմ, պատասխանեց 29 թիւը . մեր հսկողութեան ժամանակ նշանակուած է ժամ ութ, մինչդեռ հիմա ժամ վեցը քառսուն անցած է :

— Ո՞վ է այն մարդ, որ կը շաղակրատէր ձեզ հետ :

— Օրլէանի երկաթուղւոյն ընկերութեան աքժանող մը, որ ժամանակաւիրեն ծանօթն եղող և այժմ Լիոնի գծին վրայ աշխատող գործաւորի մը վրայ տեղեկութիւն կը հարցնէր ինձ : Եթէ ամպերէն վար ընկածի պէս դէմք մը ցուցնէի, կը հասկնար իմ կեղծ լինիլս . ուստի սուտ մը յերիւրեցի : Մարդ

մ'իւր դերը լաւ պարտի կատարել, տէ՛ր իմ: Յայնժամ Բնդանօն (գաւաթ մը գինի) մ'առաջարկեց ինձ գիմացի գինեառուէն, և չկրցի մերժել... խաղցած գերիս պատճառաւ:

— Բաւ է: Փոխանակ դէմդ ելնող ո և իցէ մարդոց հետ երթալ գինի խմելու, պաշտօնդ պարտէիր կատարել: Եթէ այդպէս շարունակես, կը ճանրեմ քեզ:

— Բայց, տէ՛ր իմ, ըսաւ Բիէտուշ վեհերոտ կերպիւ, երէկ գոհութիւն յայտնեցիք ինձ, և աներկբայ եմ որ Պ. Թոլպիաք դժգոհ չէ ինձմէ: Մինչև իսկ կը կարծեմ թէ շահեցայ ինձ խոտացած պարգեւը...:

— Մինչև որ համրը չերեսուի, չը պիտի տամ քեզ այն պարգեւն, ըսաւ Թոլպիաք. վասն զի, վերջապէս, եթէ սխալած լինիս, եթէ երիտասարդը չէ մեր փնտռած ոճրագործը, տարակոյս չկայ որ բան մը չեմ պարտիր քեզ:

— Ծշմարիտ է, պատասխանեց Բիէտուշ քիչ մը շփոթելով: Մինչև իսկ...

հաւատացէք ինձ եթէ կ'ուզէք... բայց, այս սլարագայի մէջ, կը մխիթարուիմ եթէ չստանամ. հայր Լըքօք պատուական մարդ մ'է. իւր որդւոյն վրայ հոգի կուտայ...:

— Լաէ՛ և մտիկ ըրէ, ընդմիջեց ապահովութեան պետը: Կը տեսնե՞ս սա կեցած կառքն:

— Այո՛, տէ՛ր իմ, անցած ժամանակս դիտեցի. սեւ ձի, մուշտակ հագած կառավար, թուխ-կապոյտ սընտուկ: Սխալելու երկիւղ չունիմ:

— Լաւ, այդ կառքով պիտի երթանք: Ժամ ութէն հինգ վայրկեան առաջ պիտի դայ կենայ ճշգիւ այդտեղ ուր հիմա կը գտնուի:

— Օ՛, կը ճանչեմ. և որովհետև արդէն հասկցուցած էք ինձ մեր ընկերքը...:

— Պիտի կրկնեմ քեզ արուած հրահանգը. Դու և Բիկաշ Մաղասի դրան միւս կողմը պիտի կենաք, պատին մօտ, և իրարու հետ խօսակցիլ պիտի ձեւացընէք...: Դրան քով կեցող պահա-

կլին պատուէր պիտի տրուի որ բան մը չըսէ ձեզ :

— Հազիւ կրնայ տեսնել մեզ , տէ՛ր իմ . մեք գիտենք կենալու կերպը :

— Ժամ ճիշդ ութին , կը հասկնա՞ս , համբը դուրս պիտի ելնէ աջ կողմի փոքր դռնէն : Նոյն վայրկենին Պ. Թողպիաք դուրս պիտի ելնէ կառքէն և նշանացի առ ինքն պիտի կոչէ համբն :

Ահա այդ միջոցին չորս պիտի բանաք ձեր աչքը :

— Կը բանանք :

— Եւ ուշմութեամբ պիտի վարուիք : Եթէ համբը Պ. Թողպիաքի հետ կառքը մտնէ , խաղը կատարուած է . իսկոյն կառք մը կը նստիք , և կուգաք մեզ կը դռնէք Մոն-Թապոր փողոցն :

Եթէ , ընդհակառակն , համբը խուսափէ , և հեռանալով պտըտի ըստ դիպաց , առանց տեսնելու իրեն եղած կոչը , մեղմով կը լրտեսէք զայն :

Այս պարագայի մէջ ձեր պարտքը պիտի լինի աչքէ չվրիպեցնել զայն , և կէս ժամու չափ յետոյ քովը երթալ ,

երբոր տեսնէք թէ ո՛ւր երթալը չգիտեր :

Իսկ բաւական լաւ ծպտեալ լինելով՝ չկրնար ճանչել ձեզ . ուստի կը հաճի ձեր հետ գալ եթէ ճարտարութեամբ վարուիք , և քալելով կամ կառքով , ինչպէս որ ընտրէք , ինձ կը բերէք :

Ես չպիտի մեկնիմ Մոն-Թապոր փողոցի տունէն , մինչեւ որ համբը չգայ անդ Պ. Թողպիաքի կամ ձեզ հետ :

Հասկցա՞ր :

— Հասկցայ , տէ՛ր իմ :

— Նայէ որ անմտութիւն մը չընես . կը վռնտուիս :

Այս սպառնալից պատուէրէն յետոյ , ապահովութեան պետք Թողպիաքի ձեռքէն բռնելով դէպի կապոյտ կառքը գնաց :

Իիէտուչ տեսաւ որ երկուքն ալ այն թեթեւ կառքը նստելով՝ հեռացան Լիոնի փողոցէն :

— Կարծես թէ մեր պետք մեզ համբակ զօրականներու տեղ դրած է , ը-

սաւ ուսերը թօթվելով: Ժամէ մ'ի վեր պատուէրներ կուտայ մեզ: Եւ սակայն դժուարին բան մը չէ մեր ընելիք գործըն, և . . .

Նոյն միջոցին ձեռք մը դրուեցաւ իւր թեւին վրայ, և ձայն մ'ըսաւ իրեն .

— Առանց հրամայելու ձեզ, ընկե՛ր, կը ճանչէք այն երկու մարդիկն որք կառքը նստելով մեկնեցան :

Բիէտուշ մէկէն ետին դառնալով տեսաւ որ Օրլէանի երկաթուղոյն գործաւորն էր, որուն հետ բարեկամացած էին գինետան մը դրամասեղանին առջեւ :

Զարմանալով զայն իւր ետին կեցած տեսնելուն վրայ, առաւել եւս զարմանալով ըրած հարցման վրայ, Բիէտուշ պատասխանեց խոհեմութեամբ .

— Գնացող երկու քաղաքացիներն : Երբէք տեսած մարդիկս չէին : Ես այնպիսի շքեղ կառքեր ունեցող անձանց հետ գործ չունիմ: Տեղեկութիւն կը հարցնէին ինձ այն նոր գծին վրայ՝ որ

բացուեցաւ դէպի Պուրկոյն . . . որպէս թէ չէին կրնար երթալ կայարանին մէջ կախուած ծանուցումն ընթեռնուլ . . . բայց այդ հարուստներն ամենն ալ նոյն են . հոգ չեն ըներ անհանդիսաւ ընել խեղճ պաշտօնեայ մը, որ մէկ ժամ արձակուրդ ունի :

— Տերողամիտ եղիք, ըսաւ մարդն . որովհետեւ կը խօսակցէիք անոնց հետ, կարծեր էի . . .

— Կը ճանչէք ուրեմն զանոնք :

— Մին կը ճանչեմ :

— Ո՞րը :

— Մեծը . մօրուք չունեցողը :

— Կառքին աէրը պիտի լինի, ըսաւ Բիէտուշ խորամանկ դէմքով մը, վասն զի երբոր կառքը պիտի մտնէին, նախ միւսը մտցուց : Դուք կը տեսակցիք ուրեմն այդ անձի հետ :

— Ո՛չ, չեմ տեսակցիր . բայց անունն ու հասցէն գիտեմ :

— Ի՞նչ է անունը :

— Պ. Թոլպիաք տը . . . չեմ գիտեր ինչ, և Կոտոյ-տը-Մօրուա փողոցը կը բնակի :

—Մատչէնի թաղին մէջ :

—Այո՛, Օրբիթալի պողոտայէն հեռի, ուր ես կը բնակիմ. դեռ ժամանակ չունեցայ երթալու զինքը տեսնելու, բայց վաղն ազատ եմ, պիտի երթամ տեսնեմ :

—Գործ ունիք ուրեմն անոր հետ, հարցուց Բիէտուշ, որ արհեստական սովորութեամբ առիթ չէր փախցնել տեսած մարդիկը խօսեցնելու :

Անշուշտ պիտի խնդրէք իրմէ որ ձեր մեծերուն յանձնարարէ ձեզ :

—Ո՛չ, այդ չէ զինքը տեսնել ուզելուս պատճառը : Կորուսած դրամը գտած եմ . . . իւր այցետոմսին հետ . . . և կ'ուզեմ տանիլ իրեն յանձնել :

—Լաւ առիթ մ'ունէիք աստ եղած միջոցին :

—Այո՛, բայց դրամը վրաս չէ : Ասկէ զատ կ'ուզեմ քիչ մը խօսակցիլ անոր հետ :

—Իրաւունք ունիք . . . ձեր ստանալիք վարձատրութեան վրայ . . .

—Հերն անիծեմ վարձատրութեան .

զինքը շողմելու համար չէ որ պիտի երթամ տեսնել :

—Ի՞նչ բրաւ ուրեմն ձեզ :

—Անցեալ շաբթու կայարանն եկաւ զիս դտաւ աքժանիս քով, ժառանգութեան մը վրայ խօսելու համար, որ, իւր խօսքին նայելով, աղջկանս կ'իյնայ եղեր, և քիչ մնաց որ աղջիկս այդ մարդուն թափած ոսկիները ճանբուն վրայէն ժողված միջոցին պիտի ջախջախուէր կառախմբէ մը : Մեկնեցաւ զընաց առանց իւր ոսկիներն ուզելու, և որովհետեւ յուր կատակող մը թուեցաւ ինձ, իւր դրամներն իրեն տանելու առթիւ պիտի հարցնեմ իրեն թէ ի՞նչու համար եկաւ խել մ'առասպելներ պատմեց ինձ :

—Աւասիկ նորանշան պատմութիւն մը, գոչեց Բիէտուշ, որ մեծ ուշադրութեամբ մտիկ ըրած էր աքժանողին ըրած պատմութիւնը . բայց հոգ չէ . եթէ ես լինիմ ձեր տեղ, չեմ աւրուիր այդ մարդու հետ, վասն զի կ'երևի որ ձեռքն երկայն է :

Սակայն, ներողամիտ եղիք ինձ, ընկեր, կինս ինձ կ'սպասէ, և սա բարեկամս ալ հրաւիրած եմ որ ապուրն ինձ հետ ուտէ :

— Ինձ կ'իյնայ ներում խնդրել ձեզնէ՝ ըրած երկար շաղակրատութեանս համար : Գիշեր բարի և առանց մնաք բարեաւի : Երբոր Օրլէանի կայարանը գործ ունենաք, Բիէր Քամպրըմէր հարցուցէք : Ամեն մարդ կը ցուցնէ ձեզ իմ տեղս, և գինին ի միասին կը խըմենք :

— Չեմ մերժեր ձեր հրաւերն, բսաւ երկաթուղւոյ սուտ սպասաւորն՝ հեռանալով իւր բարեկամ սուտ բեռնակրին հետ :

Երբոր Շարպոնիէ փողոցին անկիւնն հասան, որ Մազասի բանտէն յիսուն մեթրոյ միայն հեռի է, Բիէտուշ կանգ առաւ ստուգելու համար թէ աքծանողն իրենց ետեւէն եկած չէր :

Յետոյ հասկնալով որ Քամպրըմէր կայարանը մտած էր, վասն զի չէր տեսնուեր, սկսաւ ծիծաղիլ և բսաւ Բիկաչի .

— Աւատիկ մարդ մը, որ բնաւ չը կասկածիր թէ ոստիկանութեան բարձր լրտեսի մը հետ գործ ունեցած է : Եւ որովհետեւ այնպիսի պահու մը մէջ կը հանդիպի Թոլպիաքի, յորում սա Ֆեդան համար կ'աշխատի, սաստիկ պիտի նեղացնէր զայն՝ եթէ հետը խօսէր : Ապացոյց մ'է այս թէ մեր արհեստին մէջ անակնկալն ի հաշիւ պէտք է ունուլ միշտ :

— Աստուած տայ որ նորէն չգայ մեզ ձանձրացնէ երբոր համր դուրս ելնէ, մրմուսց Բիկաչ :

— Վտանգ չկայ, մեք զայն կը տեսնենք ի հեռուստ, իսկ նա չտեսներ մեզ, որովհետեւ պատին պիտի կրթընինք :

Գիտե՞ս, ծերո՛ւկ, թէ Թոլպիաք պատուական ստախօս մ'է, որ մեր պետին քիթէն կը բռնէ պարծելով թէ մինչեւ մէկ ամիս պիտի պարզէ Արպալէթ փողոցի գործը : Սատանան տանի զիս եթէ երբէք զբաղած է այդ խընդրով : Իւր բոլոր ժամանակը ժառան-

գութեան մը պատմութիւններով կ'ան-
ցունէ, որոյ մէջ պարարտ շահեր կը
տեսնէ . . . Ինչպէս որ աքճանողին
մեզ պատմած իրողութեանն ալ կը հաս-
կըցուի :

— Ինչ որ ալ լինի, այդ տեսակ ու-
տիկանական գործակալ մ'իմ գործիս
չգար :

— Լսեցի՞ր քիչ մ'առաջ երբոր հազար-
նոց պանքտոմսին խօսքն ըրի ձեւով մը :
Աղուեսութիւն չէ՞ ըրածն, երբոր կ'ըսէ
ինձ թէ երեսու մէն յետոյ պիտի տայ,
պատճառելով թէ տակաւին յայտնի չէ
ոճրագործին բռնուած լինիլն : Ա՛, կ'ու-
ղէի այնչափ աներկբայ լինիլ այդ ստա-
կըն ստանալուս վրայ որչափ աներկբայ
եմ թէ Լըքոքի որդին սպաննած է
Արպայէթ փողոցի կինն ու վաճառա-
կանն :

Եւ նորէն իւր սովորական ծայրա-
յանգը կրկնեց Բիէտուշ :

— Խեղճ հայր Լըքոք, ո՛րչափ պի-
տի վշտակրի : Ահա այս է տղայոց շատ
երես տալուն և անոնց ամեն ուզածը

կատարելուն պատուին : Եթէ մեր գոր-
ծին մէջ դնէր իւր որդին, այս փոր-
ձութիւն չէր գար գլխուն :

— Աղով հանդերձ լաւ մարդ է հայր
Լըքոք : Ես անոր քով ալ ծառայած
եմ ժամանակաւ : Չէր ճոխանար, մեծ
մեծ չէր ջարդեր . բայց տուած խօսքը
կը բռնէր :

— Եւ անոր մեթոտն անհամեմատ
լաւագոյն էր թուլպիաքի մեթոտէն :
Հայր Լըքոք այսպէս կառքերու և տա-
նը մէջ երեսելու հնարողութիւններ չէր
ըներ : Ասոնք պարզապէս արուեստա-
կութիւնք են ինքզինք և իւր անդիւա-
կան մեթոտները պանծացնելու համար :
Բայց ո՞ն մէջ ամենն ալ բռնուած են
անոր : Կը հարցնեմ քեզ քիչ մը թէ
համին արգելարանին մէջ ալ չէր կրնար
ճանչել ամբաստանեալն :

— Առանց հաշուելու թէ այդ հը-
նարիմացութիւնք շատ անգամ ձախող
ելք կ'ունենան : Եթէ դժուարութիւն
կամ արգելք մը պատահի, բոլոր ծան-
րութիւնը մեր վրայ կ'իյնայ, մեք կը
տուժենք :

— Ճշմարիտ է, բայց ի՞նչ պիտի ընես, ըստ Բիէտուշ փիլիսոփայաբար. ամեն մարդ չկրնար զօրավար լինիլ, ո՛չ ալ սպայ, և հարուածներն իրաւամբ զօրականներուն վրայ կ'իյնան :

Բաւական խօսեցանք, ծերո՛ւկս, կէսը զարկաւ, և մեր պահակերութեան ժամանակն եկաւ :

Բիկաշ ոչ եւս խօսեցաւ, և երկու գործակալք մեղմաբար բանտին մօտենալով՝ պատին տակէն գնացին, և իրենց տրուած հրահանգին համեմատ դռնէն տասն քայլ հեռի կանգ առին :

Անդ բարձր պատին կրթնելով և անոր ձգած ստուերին մէջ զիրենք ծածկելով՝ կեցան լռիկ և ուշադիր :

Սաստիկ ցուրտ կար, մինչեւ իսկ կը ձիւնէր քիչ մը : Մաղասի դրանքով սպասող պահակն իւր խղիկին մէջ ապառտանած էր, և ձմրան իրիկուններն անցորդք յոյժ քիչ են Մաղասի պողոտային վրայ :

Ընդհակառակն Լիոնի փողոցին մէջ անցուղարձը կը շատնար քանի որ ե-

րեկոյեան կառախմբոց հասներուն ժամը կը մօտենար :

Կարասի բեռցած հասարակ կառքերը, տնական կառքերն, և հանրակառքերը խուճը խուճը կուգային Պասթիլի կողմէն, և Մաղասը ձախ կողմ թողլով՝ կայարանը հանող զառիվերը կը մտնէին :

Ուրիշներ ալ իրենց ուղեւորները կայարանին առջեւ հանելէ յետոյ ետ կը դառնային :

Իտալիա և Մոնաքոյ երթալու եղանակը լինելով, կայարանին բակն ու շրջակայ փողոցները խռնեալ էին :

— Ի՛նչ անմիտ մարդ է սա Թուպիաք, միմեաց Բիէտուշ՝ նեղուելով իւր հսկողութեան մէջ այն անդուլ երթեկէ : Իբր թէ չէր կրնար ուրիշ ժամ մը գըտնել իւր համբը խաբելու :

Բիէտուշ և ընկերն արդարեւ նեղութիւն կը կրէին իրենց առջեւէն անցած ամեն տեսակ կառքերը դիտելու :

Սակայն, որովհետեւ այն կառքեր

իրենց կողմը չէին գար, սխալելու վրտանգ չունէին, ուստի առանց կասկածի կ'սպասէին որ ծանուցեալ կառքը գար:

Կայարանին ժամացոյցն երեք քառորդ զարկաւ և շարժումն աւելի շատցաւ: Կառախումբը մեկնելու վրայ էր, և ուշ մնացողք խումբ խումբ կայարան կը հասնէին:

Տասն վայրկեան ալ անցաւ, և երբ ժամացուցին մեծ սլաքը տասն և մէկին վրայ կուգար, կառք մը դարձաւ Լիօնի փողոցին անկիւնէն և եկաւ պատին տակ կեցաւ դռնէն տասն քայլ և երկու պահակներէն քսան քայլ հեռի:

— Ինքն է, մրմուսաց Բիէտուշ: Կառքին գոյնը չեմ կրնար որոշել, բայց ձին կը ճանչեմ... սակայն կը թուի ինձ թէ կառապանն իւր մուշտակը չէ հագած...: Սւանակն իւր լապտերներն ալ չէ յարդարած, վասն զի լուսաւոր չեն վառիր:

— Ո՞վ կրնայ լինիլ, եթէ Թոլպիաք չէ, ըսաւ Բիկաշ ցած ձայնիւ: Միթէ

ուրիշ մէկը կուգայ կը կենայ բանտին պատին տակ:

Բիէտուշ ալ անշուշտ իւր ընկերին կարծիքն ունէր, վասն զի լուսաց:

Ժամ ութ զարկաւ, Մաղասի փոքր դուռը բացուեցաւ և գրեթէ խոլոյն գոցուեցաւ:

Դռնապան մը դուրս հրած էր համրըն:

Հսկող գործակալք չշարժեցան իրենց տեղէն:

Պետը պարզապէս կրաւորական դեր մը տուած էր անոնց: Համրին շարժումները միայն դիտելու, և եթէ կառքը մտնել չուզէր, ետեւէն երթալու և լրտեսելու պաշտօն միայն ունէին:

Մնացեալը Պ. Թոլպիաքի կը վերաբերէր. և, որովհետեւ կապոյտ կառքն հինգ վայրկեան է վեր իւր որոշեալ տեղըն էր, իրենց վրայ պատասխանատուութիւն չէր մնար, գոնէ նոյն պահուն:

Ուստի բաւականացան դիտելով, և

այքէ չվրիպեցողցին համին, որ երեք քայլ յառաջ երթալէ յետոյ յանկարծ կանգ առաւ՝ շլանալով կայարանին լուսերէն, դղրդելով կառքերուն թաւալումէն :

Ուղղակի իւր դէմը կը նայէր՝ առանց գլուխն ալ կամ ձախ դարձուներու :

Կը թուէր թէ իւր ճանբան գտնել կ'ուզէր :

—Մեզ շատ չպիտի յոգնեցնէ, մերմուաց Բիէտուշ. վազելու միտք չունի :

Յանկարծ սև ձիով կառք մը, որ մուշտակաւոր թիկնոցակով կառապան մ'ունէր, դէպի կայարանն ելնող կառաց շարէն յամրաբար բաժնուելով եկաւ նշանաւոր ճշգուծեամբ մը կեցաւ մեծ դռնէն չորս մեթրոյ հեռի, ծածկելով հսկող գործակալաց այքէն հինգ վայրկեան առաջ եկող կառքը, զոր թողպիաքի կառքը կարծած էին :

Ոչ ես հնար էր սխալիլ : Ետքէն եկող կառքն ստուգիւ թողպիաքիսն էր : Երկու պայծառ լապտերներու լու-

սով կատարելապէս կը ճանչուէր կառքին գոյնը, ձիուն վրայի ծածկոցն, և կառապանին ուսոց վրայի աղուխսներն :

Իսկոյն դռնակը բացուեցաւ և լայն կրկնոցի մը մէջ փաթթուած մարդ մը վար իջաւ՝ նոյն վայրկենին, ուր համբը, յոգնելով կազի կտուցները դիտելէ, այքն ալ կողմ կը դարձունէր :

Կառքին տէրը ձեռքով և գլխով կոչեց զայն՝ առանց թող տալու դռնակը, զոր միւս ձեռքով բռնած էր : Համին՝ առանց վարանելու՝ գնաց թողպիաքի քով, որ բարեկամական նշաններ կ'ուղղէր անոր :

—Կարծես թէ անուակներու վրայ դրուած է, ըսաւ կամացուկ մը Բիէտուշ : Այդ ապուշ համին որ կողմ քաչեն, կ'երթայ :

Տեսնենք սակայն թէ պիտի մտնէ՞ կառքն . . . : Այո՛, մտաւ :

Համբը լայն կրկնոցով պարոնին մտնենալով՝ առանց բնաւ դժկամակելու կառքին մէջ մտեր էր, պարոնն ալ ա-

նոր ետեւէն մտնելով իսկոյն փակեր էր դռնակը :

— Թողլիաք իրաւունք ունի եղեր , ըսաւ Բիէտուշ . ես չէի յուսար որ համրն այսչափ դիւրութեամբ պիտի քալէր :

Ինչ և իցէ , աւելցուց ցած ձայնիւ , Թողլիաք ուշ եկաւ . կրնար ինք ալ սխալիլ , մեզ ալ սխալեցնել . . . վասն զի , վերջապէս , եթէ միւս կառքն ա- նորը կարծէինք . . . :

Կառապանն որ ձիուն երասանակը բռնած էր , թեթեւ մը շնեցուց իւր խարաղանը , կառքն անմիջապէս ճան- բայ ելաւ նետի պէս , և գրեթէ երկու գործակալներուն քսուելով սրացաւ դէպ ի Թրոնի հրապարակը , Մաղասի պողո- տայէն անցնելով :

— Մեր կողը լմնցաւ , գոչեց Բի- կաշ : Կը մնայ մեզ այժմ երթալ պե- տը գտնել , և որովհետեւ հրամայեց մեզ կառք մը վարձել վարչութեան ծախքով և այնպէս երթալ , մեր կօշիկ- ները չենք մաշեցնել :

— Լռէ՛ , ըսաւ մէկէն Բիէտուշ անոր թեկն բռնելով :

— Ա՛հ , չար սատանայ , ի՞նչ կայ , միմռաց 33 թիւն :

Համրը տանող կառքին մեկնելովը միւս կառքն երեւան ելաւ , և հանդար- տաքայլ կը յառաջանար :

Դլուխ մը կը տեսնուէր կիսաբաց դռնակին մէջ , գլուխ մը , որ Պ. Թո- ւլիաքի գլխուն կը նմանէր :

Բիէտուշ կը հարցնէր ինչնիրեն թէ արդեօք աչքի պատրա՞նք մ'էր տե- սածն , երբոր ձին — սեւ ձի մը — կանգ առաւ :

Կառքէն դուրս նայող մարդը վար իջաւ կառքէն և սկսաւ դիտել :

Բանտին դրան կը նայէր ուշադրու- թեամբ :

Կերպարանքէն , ձեւէն , շարժմուն- քէն և մանաւանդ հետախուզական դիրքէն երկու գործակալք ճանչեցին զՊ. Թողլիաք , որուն օժանդակելու պաշտօն ունէին , և յոյժ մեծ եղաւ իրենց զարմանքը :

Բիկաչ չէր կրնար տակաւին հաս-
կընալ գործը, բայց Բիէտուչ, որ աւելի
սթափ հասկցողութիւն ունէր, կասկա-
ծիլ սկսեր էր թէ ծանրապէս խաբ-
ուած էին :

Սակայն աներկբայ լինելու համար,
կառքէն դուրս ելնող պարոնին քով
գնաց ուղղակի :

Արդարեւ Թուլպիաք էր, որ սա
կարճ և կցկտուր խօսքն ուղղեց գոր-
ծակալաց .

— Ես արգիլած էի ձեզ մեկնիլ ձեր
տեղէն . շուտով հոն վերագարձէք,
ժամ ութ զարկաւ . համրը դուրս պի-
տի ելնէ . պէտք չէ որ զիս ձեզ հետ
տեսնէ :

Օն, հեռացէք քովէս : Ինչո՞ւ կ'ըս-
պասէք :

— Համրը՛, մրմուաց Բիէտուչ . բայց
. . . գնաց :

— Ի՛նչ, գնաց, խե՛նդ ես :

— Ս.մենեւին : Նա հեռացող կառքը
նստաւ գնաց :

— Եւ թողուցի՛ր որ գնաց, թշուա-

ռական, գոչեց Պ. Թուլպիաք խեղճ
գործակալին օձիքէն բռնելով և ուժ-
գնապէս ցնցելով .

— Թող տուէք զիս, ըսաւ Բիէտուչ,
որ տրամադիր չէր երեւեր իւր անձը
բռնաբարել տալու :

— Թող չպիտի տամ մինչև որ չբա-
ցատրես ինձ քու վարմունքդ, անզգամ :

— Օ, թշնամանք պէտք չէ, պա-
տասխանեց 29 թիւն ինքզինք կողմելով
անոր ձեռքէն : Անտանելի է ձեր այդ
ըրածն : Եթէ համրը փախաւ, յանցանքը
ձերն է և ոչ իմն :

— Կը յանդգնի՞ս ըսել :

— Կ'ըսեմ թէ ձեր ամեն հնարիմա-
ցութիւններով հանդերձ դուք էք սը-
խալողը : Պէտք էր որ դրան մօտ կե-
նայիք, որպէս զի միւս կառքը ձեր
առջեւ չանցնէր :

— Բայց դու տեսեր էիր իմ կառքս,
և ճանչեր էիր . . . :

— Ոչ այնչափ : Նախ՝ ձեր լապտեր-
ները լուսաւոր չէին . երկրորդ՝ ձեր կա-
ռապանն իւր մուշտակէ թիկնոցն հա-

նած էր . . . ճշմարիտ է որ այժմ հա-
գած է, բայց եկած ժամանակ հա-
գած չէր :

— Սուտ կը խօսիս :

— Ո՛չ, սուտ չեմ խօսիր, և չէի
կրնար գուշակել թէ ձերինն նման
կառք մը պիտի գար ձեր ոտքն առ-
նուր . . . ճիշդ այն վայրկենին յորում
ժամ ութ կը զարնէր :

— Ես ազդարարած էի ձեզ թէ ժամ
ութին հինգ մնալով աստ պիտի գըտ-
նուիմ, և արդարեւ գտնուեցայ :

— Ճշմարիտ է, բայց՝ եթէ ուղէի
իսկ՝ չպիտի կրնայի արգելուլ համբը
միւս կառքը մտնելէ, վասն զի արգել-
ուած էր ինձ անոր վրայ երթալ և բըռ-
նութիւն գործածել :

— Գիտէիր որ ես վար պիտի իջնէի
կառքէս . . . ձեռքս պիտի կոչէի համ-
բը . . . :

— Պարոն մը, որ ձեր կերպարան-
քը, ձեր կրկնոցն ունէր, այդ ամենն
ըրաւ : Ընկերս ալ ինձ հետ տեսաւ :

Չարմանալի բան է, բայց այսպէս է :

— Այնչափ զարմանալի է, ըսաւ Պ.
Թողալիաք խտուութեամբ, որ անպատ-
ճառ բացատրութիւն կը պահանջեմ
քեզնէ :

— Ի՞նչ բացատրութիւն :

— Աւանակութիւն մի՛ կեղծեր : Քաջ
կը հասկնաս իմ խօսքս : Դրամ առիր,
և փախուցիր համբն :

— Աւասիկ նոր գի՛ւտ մը :

— Ի՞նչ տուաւ քեզ հայր Լըբոք
այդ խաղը խաղալու համար :

— Պ. Լըբո՛ք, տեսած չեմ առա-
ւօտէն ի վեր :

— Ապացուցանել պէտք է զայդ :
Ես կը պնդեմ թէ դուք համաձայնած
էիք անոր հետ, և կը յայտնեմ քեզ
թէ այս բան չկրնար այսպէս անցնել :

Մոն-թապոր փողոցը մեզ կ'սպա-
սեն : Դուք երկուքդ ալ հոն պիտի գար
ինձ հետ, և տեսնենք թէ ձեր պետն
ի՞նչ պիտի քսէ այս գործին համար :

— Այո՛, պիտի երթանք տեսնենք
զայն, գոչեց Բիէտուշ. եթէ խարդա-
ւանք մը կայ գործին մէջ, կա՛մ դուք

ըրած էք, կամ ես. և պէտք է որ երեւան ելնէ ընողը: Պետք կրնայ որոշել:

Եւ անցնող կառք մը կոչելով՝ Բիէտուշ անյողդողդ ձայնիւ մ'ըսաւ Պ. Թուլպիաքի:

—Սհա այս կառքը պիտի նստինք ու երթանք Բիկաշի հետ: Եթէ կը վախնաք որ կը փախչինք, կրնաք ձեր կառքով մեր ետեւէն դալ: Բայց անհող եղիք, չեմ խարեր ձեզ, վասն զի ես ալ ձեզ չափ կը փափաքիմ որ այս դործ հասկցուի:

Թուլպիաք զգաց անշուշտ թէ առաջարկն ընդունելէ զատ ուրիշ բան չէր կրնար ընել:

—Լա՛ւ, ձեր ետեւէն կուգամ, ըսաւ. և որովհետեւ իմ ձիս այդ կառքին ձիէն արագ կը քալէ, ձեզ փախցընելու երկիւղ չունիմ: Միայն կ'իմացընեմ ձեզ, որ եթէ ձեր պետն իմ խորհրդիս հետեի, ձեզ այս իրիկուն բանս պիտի զրկէ իբրև համախոհ ոճրագործութեամբ ամբաստանեալ Լքքի:

—Կը տեսնենք, պատասխանեց Բիէտուշ ուսերը թոթովելով: Բայց, ըսէք ինձ քիչ մը. որովհետեւ ձեր ձիս անչափ լաւ կը քալէ, պարտէիք հրամայել ձեր կառապանին որ համբը տանող կառքին ետեւէն վազէր: Չէք կըրնար ըսել թէ զայդ ալ ես թող չտուի, և կրնաք աներկբայ լինիլ որ պիտի պատմեմ զայս մեր պետին:

Եւ ցատկեց կառքը մտաւ իւր ընկերին հետ՝ երբոր Պ. Թուլպիաք ալ իւր կառքը կ'եղնէր:

—Ս'ա նոր փորձանք մ'ալ մեր գըլխուն, ըսաւ Բիկաշ:

—Կ'արհամարհեմ, պատասխանեց Բիէտուշ, որ սաստիկ զայրացած կ'երեւէր: Բաւական է ինչ որ աշխատեցայ այդ հաւկթի հետ, որ հազարնոց տոմսակ մը կը խոստանայ ինձ և այժմ կ'ուզէ վռնտել տալ զիս՝ իւր տխմարութիւններն իմ վրայ բեռցնել ուղելով: Տեսնենք թէ պետք զիս յանցաւոր պիտի դատէ:

Բիկաշ փիլիսոփայութիւն ունէր, և շատախօս չէր:

Երկու գործակալք ոչ ևս խօսակ-
ցեցան մինչեւ այն վայրկեան, յորում
երկու կառքն ալ Մոն-Թապոր փողոցն
հասան :

Հայր Լըքոք համբերութիւն ունե-
ցած չէր սպասելու մինչև պայմանեալ
ժամանակը զոր տուած էր իրեն ապա-
հովութեան պետն, և եկած կեցած էր
այն տան առջեւ, ուր իւր որդւոյն
բաղդը պիտի որոշուէր :

Սպահովութեան պետն այս ծանր
փորձին ձեռնարկելու համար՝ հարկա-
ւոր չէր դատած, և ոչ առանց պատ-
ճառի, դատական քննութեանց սովո-
րական ձեւերը տալ գործին :

Սյս պատճառաւ, միայն հարցա-
քննիչ դատաւորին և ամբաստանելոյն
հետ կառք մը նստելով Մոն-Թապոր
փողոցն եկած էր՝ առանց ուրիշ պաշ-
տօնական մարդիկ և պահակներ հետ
բերելու :

Քաղաքացիի կերպարանքով գոր-
ծակալ մ'և երկու պահակ կ'սպասէին
զայն տանը դրան առջեւ :

Գործակալն ամբաստանելոյն բնա-
կարանն ելած էր իւր պետին հետ :
Երկու պահակներուն ալ հրաման եղած
էր փողոցին մէջ սպասել՝ պատրաստ ի
կոչ :

Պ. Թոլպիաքի առաջարկած ծրագի-
րը կէտ առ կէտ գործադրուած էր :

Միայն հայր Լըքոք, իւր մասին,
փոփոխութիւն մ'ըրած էր :

Փոխանակ ժամը տասնին, ինչպէս որ
պայմանեալ էր, ապահովութեան պե-
տին սենեակն երթալու, ժամ ութին
եկեր կ'սպասէր իւր որդւոյն բնակա-
րանին դիմացն աներեւելի խորշի մը
մէջ :

Չայն բերող կառքին անցնիլը տե-
սած էր, ինչպէս նաեւ տանը միջնա-
յարկի պատուհաններուն լուսաւորին,
և անհամբերութեամբ համրին գալուն
կ'սպասէր, որպէս զի երբոր երեսուելէն
յետոյ դուրս ելնէր, ինքն ալ ապահո-
վութեան պետին ներկայանար :

Կը յուսար որ իւր բարեկամը չէր
մեղադրեր զինք որոշեալ կարգադրու-

Թե՛նէն խոտորելուն համար, և չէր դժկամակեր տեսակցութեան արդիւնքն իրեն ծանուցանելու :

Կը յուսար իսկ, խեղճ հայրը, թէ այս տեսակցութեամբ Լուիի անմեղութիւնն յայտնուելով, իրեն պիտի յանձնուէր որդին :

Ուստի սիրտն աւելի ուժգնապէս տրոփել սկսաւ երբոր Պ. Թոլպիաքի կառքն եկաւ կեցաւ 72 թուին առջև, հասարակ կառքի մ'ետին, որ երկու կամ երեք ձիու երկայնութեամբ անորմէ առաջ կուգար :

Ծերունին հեռիէն տեսաւ երկու գործակալներուն և գոթիւն կառքերէն իջնելը : Նմանապէս լսեց տանը դրան փակուելն և կարծեց թէ համրն ալ անոնց հետ մտած էր, վասն զի յոյժ թերի կերպիւ տեսած էր կառքերէն իջնողներն :

Երկու կառքերը գնացին քիչ մը հեռին կեցան մայթին եզրն, այն կառքին քով, որ ամբաստանեալը բերած էր ապահովութեան պետին և քննիչ գատաւորին հետ :

Պ. Լըքոք աչերը վերցուց դէպի պատուհաններն այն բնակարանին, ուր իւր որդւոյն բաղդը պիտի վճուուէր, և շատ չանցած՝ տեսաւ որ ստուերներ կ'անցնէին վարագոյրներուն ետեւէն :

Քաջածանօթ էր յարկին ամեն կողմերուն, զոր վայելչապէս կահաւորած էր իւր սիրելի Լուիին համար, և ըստուերաց շարժումներէն կրնար գուշակել երեսման սրտայոյզ տեսարանին գարձուածներն :

— Հոն է, կ'ըսէր ինքնիրեն՝ մէջտեղի պատուհանին նայելով : Դահլճին մէջ թողած են զայն . . . իրենք ալ ննջասենեկին մէջ նստած են . . . կը դիտեն զայն . . . գործակալք և թոլպիաք ախատութեան սենեակք մտան . . . իրենց ստուերներուն տատանումը կը տեսնեմ . . . համրը դահլճին մէջ պիտի մղեն . . . երանի թէ այդ թշուառականը չքնէ այնպիսի նշաններ, յորոց կարենան խաբուիլ . . . : Երբ կը խորհիմ որ զաւկիս կեանքը ձեռքի կամ գլխու շարժումէ մը, դէմքի խաղէ մը կախեալ է . . . կը դողամ :

Եւ կ'սկսէր անիծել զԹողալիաք, որ այս վտանգաւոր փորձին գաղափարը թեւադրած էր :

— Զարմանալի բան, ըսաւ ինքնիւրեն. աշխատութեան սենեկին մէջ կեցած են . . . ննջասենեկին մէջ եղողներն ալ՝ դահլիճէն անցնելով՝ կուգան անոնց քով . . . կարծես թէ ի մի վայր կը ժողովին խօսակցելու համար . . . սակայն այսպէս չէին կարգադրած տեսարանն . . . ի՞նչ պատահած է ուրեմն :

Ա', լոյսն ալ կը նուազի աշխատութեան խուցին մէջ . . . դահլիճին դուռը գոցեցին . . . մէջի մոմերուն ամենն ալ վառեցին, որպէս զի աւելի լաւ դիտեն այն ազդեցութիւնն՝ որ Լուիի հետ հանդիպումը պիտի ընէ համբին դէմքին վրայ . . . և չեն աճապարեր այդ փորձն ընելու . . . :

Լուին մինակ թողուցին . . . բարի նշան մ'է այս : Եթէ յանցաւոր համարէին զնա, մինակ չէին թողուր :

Պ. Լըքոք, խրախուսեալ այս քիչ մը կեղակարծ խորհրդածութեամբ,

ձեռքը ճակտին տարաւ, յորմէ արտասուաց խոշոր կաթիլներ կը վիժէին, թէև օդը սաստիկ ցուրտ էր :

— Ա', տէ՛ր Աստուած, մրմնջեց յանկարծ, ինքն է . . . պատուհանին քով եկաւ . . . վարագոյրը մէկ կողմ ըրաւ . . . փողոցը կը նայի . . . չգիտեր թէ հայրն հոն է, խեղճ սիրելի տղայ . . . : ի՞նչ կը խորհի արդեօք իմ վրայ, նշանածին վրայ . . . Աստուած չթողուր որ առնուն զայն մեր ձեռքէն . . . և վաղը, գուցէ այս իրիկուն կրնամ համբուրել զայն և տանիլ նշանածին, որ անոր կ'սպասէ սոսկալի սրտատանջութեամբ . . . իմինէս աւելի սոսկալի անձկութեամբ, վասն զի չգիտեր անցածն, իսկ ես կը յուսամ . . . աներկբայ եմ որ այս զարհուրելի ամբաստանութիւն ինքնին պիտի ցրի՝ երբ որ համրն . . .

Ա', ինչո՞ւ գործի չեն սկսիր, ըսաւ ծերունին կուրծին զարնելով :

Զարմանքը դեռ անցած չէր, որդւոյն ստուերն հեռացաւ պատուհանէն,

և լոյսն յանկարծ մարեցաւ այն սենեկին մէջ, ուր խորհրդակցութիւն մ'եղած էր, որոյ նպատակը չէր կրնար գուշակել Պ. Լըքոք:

Վայրկեան մը յետոյ տանը փոքր դուռը բացուելով՝ մարդ մը դուրս ելաւ և քանի մը խօսք ըսաւ երկու պահակներուն, որոց մին գնաց անմիջապէս յառաջ քշել տուաւ այն կառքն որ ամբաստանեալը բերած էր:

Երբոր կառքը տանը դրանն առջև գնաց, Պ. Լըքոք լսեց որ դռնակը կը բանային, և սնտուկին ցնցուելէն հասկըցաւ որ քանի մ'անձինք կը մտնէին անոր մէջ:

Այս դանազան գործողութիւնք նըշանաւոր արագութեամբ կատարեցան, վասն զի մինչեւ որ ծերուկը ժամանակ ունեցաւ փողոցն անցնելու, կառքն, որ վեց մարդ առնլու չափ մեծ էր, հեռացաւ գնաց դէպի ոստիկանական պաշտօնատուն:

Պ. Լըքոք ոչ եւս տեսաւ պահակներն, ոչ ալ անոնց հետ խօսող մարդը:

Մինչ կը հարցնէր ինքն իրեն թէ արդեօք տունէն ներս մտած էին թէ բոլորովին մեկնած, յարկին երկու պատահանները տակաւին լուսաւորող ճրագն ալ մարեցաւ:

Տարակոյս չէր մնար որ ատենը փակուած էր:

Գրեթէ իսկոյն երեք անձինք տեսնուեցան տանը դրան առջևի մայթին վրայ, և Պ. Լըքոք առանց դժուարութեան ճանչեց ապահովութեան պետը, քննիչ դատաւորն և Պ. Թոլպիաք:

Կարճ խօսակցութենէ մ'զկնի բաժնուեցան իրարմէ. քննիչ դատաւորը մտաւ այն կառք, զոր Բիլէտուշ և Բիկաշ ժամով բռնած էին, Թոլպիաք ալ իւր միանստարան կառքն:

Երկու կառքերն հեռացան միանգամայն, և ապահովութեան պետը, մինակ մնալով, յամբարար ճանբայ ելաւ դէպի Քասթիլիոն փողոց:

Պ. Լըքոք չէր կրնար աւելի յարմար առթի մը բաղձալ իւր վաղեմի բարեկամին հետ խօսակցելու համար:

Վաղեց քովը գնաց և սա միակ
խօսքն ըսաւ .

—է՛յ :

—Ա՛, դ՞ո՛ւք էք, պատասխանեց
պաղութեամբ ապահովութեան պետն :
Ի՞նչ գործ ունիք աստ :

—Ձկրցի համբերութիւն ունենալ
սպասելու որ ոստիկանութեան պաշտօ-
նատունը վերադառնաք . . . կը հաս-
կընաք . . . կեանքս կեանք չէր . . . ո՞ւր
է որդիս . . . Ի՞նչ անցք անցաւ :

—Ձէ՞ք գիտեր :

—Ո՛չ, կակազեց ծերունին զարմա-
նալով այս չոր և գրեթէ հեզնիչ հարց-
ման վրայ : Տեսայ թուլիաքի . . . գոր-
ծակալաց . . . համրին գալը, բայց . . .

— Ոչ, չտեսաք համրին գալը,
վասն զի չեկաւ : Փախաւ . . . կամ մա-
նաւանդ փախուցին :

—Փախուցին, ո՞վ փախուց :

—Շնորհապարտ կ'ընէք զիս եթէ
իմացնէք . բայց ես կ'ընամ ըսել ձեզ թէ
մեծ կասկած ունիմ Բիէտուշի վրայ, թէ
օգնած է այդ փախստեան :

—Բիէտու՛շ, կը ճանչեմ զայն . . .
անկարող է պարտազանցութիւն ընելու :

—Պիտի հասկնանք զայդ մինչև քանի
մ'օր, վասն զի արդելարանը զրկեցի
իւր Բիկաշ ընկերին հետ, և այդ եր-
կու չարածճիները բանտարկեալ պիտի
մնան, մինչև որ բացատրեն իրենց ըն-
թացքն :

—Եւ որդի՛ս, հարցուց Պ. Լըքոք
դողալով :

—Ձեր որդի՛ն, կը յորդորեմ ձեզ
որ մոռնաք անոր հայրը լինելիդ,
վասն զի ոչ ևս պիտի տեսնէք զայն :

Եւ չեմ ծածկեր ձեզնէ թէ դուք
իսկ պիտի պարտաւորիք թերևս հա-
մար տալ ձեր գործոց :

—Բացատրեցէք . . . չեմ հասկնար :

—Ըսածս յոյժ յստակ է սակայն :
Համրին հետ երեսուելով՝ ձեր որդին
պիտի ըմբերանէր . այժմ ընաւ երկ-
բայութիւն չէ մնացած այս մասին,
վասն զի նոր ապացոյց մ'ալ գտանք
անոր դէմ :

—Ի՞նչ ապացոյց :

—Կարծեմ դուք ալ պատշաճ չէք
դատեր որ քննութեան գաղտնիքն հա-
ղորդեմ ձեզ : Ձեր որդին սպաննած է
Սրպալէթ փողոցի կինն , այս մասին
բացարձակապէս աներկբայ ենք : Բայց
համբը պիտի ճանչէր զայն , և աներե-
ւոյթ եղաւ : Ո՞վ կրնար շահ ունենալ
զայն աներեւութացնելու գործին մէջ :
Դուք :

—Ե՛ս , գոչեց Պ. Լըքոք ցասամբ :
Ես որ իմ բոլոր յոյսս այդ տեսակցու-
թեան վրայ դրած էի զաւկիս անմե-
ղութիւնն ապացուցանելու համար :
Բայց կը մոռնաք ուրեմն թէ ամենէն
առաջ ես խնդրեցի ձեզնէ երեսել համ-
րին հետ :

—Դուք գիտեիք, թերեւս, թէ զայդ
խնդրելով բան մը չունէիք վտանգե-
լու : Երբոր մարդ մը հարուստ և հան-
ճարեղ է ձեզ պէս , երբոր մարդ մ'ի-
րեն անձնուէր ոստիկանական գործա-
կալներ ունի , ինչպէս դուք , փախուստ
մը կազմաւորելու համար դժուարու-
թիւն չկրեր :

—Ուրեմն կ'ամբաստանէք զիս , ը-
սաւ տարաբաղդ հայրը կսկծագին սրը-
տիւ , և կը դատապարտէք որդիս :

—Ձեմ ամբաստաներ ձեզ , և մարդ
դատապարտելու պաշտօն չունիմ . բայց
պարտականութիւն ունիմ անաչառու-
թեամբ վարուիլ ոճրագործաց դէմ . . .
ինչպէս նաեւ այն մարդոց , որք արդա-
րութեան գործին արգելք կը լինին :

Ուրիշ բան մը չունիմ ըսելիք : Ձեր
բարեկամն էի , և այդ բարեկամու-
թիւն շատ ծանրագնի եղաւ ինձ : Մեր
յարաբերութիւնք դադարեալ են այ-
սուհետեւ :

Մնաք բարեաւ :

Ս.յո խիստ եզրակացութենէ յետոյ՝
ապահովութեան պետն հեռացաւ փու-
թանակի :

Պ. Լըքոք , գեանահար եղած , փորձ
չբրաւ զայն կեցնելու , ինչպէս նաեւ
փորձ չէր բրած ինքզինք արդարացե-
նելու :

Իւր ամբաստանուիլն հոգ չէր ընել :
Իւր որդին կ'ուզէր պաշտպանել , և
տակաւին կը յուսար ազատել զայն :

Ութ օր զկնի այն տխուր երեկոյին որ Թէրէզի դժբաղդ նշանածին վերջին յոյսը տարած էր, հայր Լըքօք Թիւյլըրի պարտիզին նստարաններէն միոյն վրայ նստած էր, և մեծ կառուղիէն անցնող սակաւաթիւ ճեմողք կը զարմանային տեսնելով այս ծերունին, որ փետրվարի սառնաշունչ առաւօտ մը նստած էր այնպիսի տեղ մը, զոր ցուրտ քամին կ'աւելէր:

Հիւսիսային հովէն կորզեալ վերջին տերեւներն անոր մերկ գլխուն վրայ կը տեղային. դառնահոտ մրրիկն ուժգնութեամբ անոր վերարկուն մէջ մըտնելով կը թռցնէր. իսկ ինքն անշարժ կը կենար ձեռնամած, աչքն անթարթ, առանց տեսնելու անցորդներն որք կարեկից հայեացք մը կը նետէին անոր վրայ, և առանց ցուրտէն սարսուելու:

Ճնճղուկներն, որոց հաց կը փշրէր միշտ, կը թռչաէին իւր շուրջն, և իրենց լեզուով կ'ըսէին իրարու. «Ի՞նչ

ունի արդեօք մեր բարեկամն. ինչո՞ւ համար կը մոռնայ մեզ:»

Աւա՛ղ, Պ. Լըքօք ամեն բան մոռցած էր, բաց յիւր որդւոյն. մտքովն անդադար զայն կը տեսնէր, անոր ետեւէն կը պտըտէր բանտային սոսկալի կենաց ամեն ժամերուն մէջ:

Նոյն պահուն իսկ կը խորհէր թէ Լուի թերեւս քննիչ գատաւորին կը ներկայանար, որ ճարտար հարցաքննութեան մը կապերուն մէջ կը պրկէր զայն:

— Իրենց ձեռաց մէջ բռնած են զայն, չպիտի թողուն, կ'ըսէր ինքնիրեն, և խեղճ տղան ոչ ևս պաշտպան ունի զիս:

Բանտին դուռը փակեցին իմ առջեւ, ոստիկանութեան վերատեսչին աչքն իմ վրայ է: Եթէ ապահովութեան պետը չգլխար իմ վրայ, ես ալ պիտի բանտարկուէի: Բիէտուշ արդէն բա՛նտըն է:

Ամենն ալ կը կարծեն թէ թշուառ համրը փախցնելու համար դրամով կաշառեր եմ չեմ գիտեր զո՛վ: Այո կը

նմանի ամբաստանելու զիս թէ սպաննել
ուզած եմ որդիս :

Եւ եթէ ձեռնարկ մը կամ քայլա-
փոխ մ'ընեմ անոր օգնելու համար,
եթէ ուզեմ գործը քննել, նշաններ
հաւքել, վկայութիւններ ժողովել . . .
զայն ազատել փորձելով՝ անոր կո-
րըստեան պատճառ պիտի լինիմ :

Կը հսկեն իմ վրայ, Դեռ երէկ տե-
սայ որ իմ վաղեմի գործակալներէն մին
զիս կը լրտեսէր գետափին վրայ :

Եւ ոչ ոք գիտէ թէ ի՞նչ կ'ընեն :
Դատաւարութիւնը ծածուկ կը պահ-
ուի : Լրագրաց պատուէր եղած է
ոչ ևս խօսիլ Սրպալէթ փողոցի գոր-
ծին վրայ : Ծանուցին թէ ոճրագործը
բռնուած է . . . հարուստ երիտասարդ-
մը, որ ազնուականութեան անուն ա-
ռած է, բայց պարզապէս Լըքոք կը
կոչուի . . . և այժմ կը լռեն : Միայն
կը պատմեն ամեն օր թէ յանցաւորու-
թեան նոր ապացոյցներ երեւան ե-
լած են ամբաստանելոյն դէմ . . . և
հասարակութիւնը կ'ուրախանայ, եղեռ-

նադատ ատենին գումարման կ'սպասէ :
Սրդէն տոմսակներ կը խնդրուին . . .
անտի ալ Ռոքէթի հրապարակ :

Ծերունին ցնցուեցաւ և գլուխը խո-
նարհեցուց մրմուռով .

— Պիտի դատապարտեն զայն . . .
և ես չեմ կրնար բան մ'ընել . . . ո՛հ,
չեմ կրնար . . .

— Ողջո՛յն, պարոն Լըքոք, ըսաւ
կերկերեալ ձայն մը վեհերոտ կերպիւ :
Հայր Լըքոք իսկոյն գլուխը վեր
առնելով՝ իւր առջեւ կանգնած տեսաւ
զԲիէտուշ :

Խեղճն ստուգիւ բանտէ ելած մար-
դու մը դէմք ունէր, և հանդերձներն
նշ բաւական ճարտասանօրէն կը ծա-
նուցանէին անոր դրամական վիճակն :

— Այո՛, վարպետս, ես եմ, յարեց
տեսնելով որ Պ. Լըքոք կը վարանէր
զինքը ճանչել :

Կրնամ ձեզ վարպետս կոչել, որով-
հետեւ ժամանակաւ ձեր ձեռքին տակ
ծառայած եմ :

Եւ այս փակագիծ խոր հառաչով

մը շեշտելով՝ շարունակեց Բիէտուշ .

— Միւս կողմէ , ձեզնէ զատ ոչ ոք ունիմ այժմ , վասն զի վաճառուեցայ ; ոստիկանութեան գործակալութենէ , շաբաթ մ'արգելարանին բանտը կենայէ և օրն երկու անգամ հարցաքննուելէ յետոյ , որպէս զի խոստովանիմ ինչ որ չէի գիտեր :

Երբոր տեսան որ բան մը չէին կրընար քաղել ինձմէ , զիս դունէն դուրս ըրին . . . երէկ առաւօտ . . . հաց մը թեւիս տակ և տասն և մէկ սու գըրպանիս մէջ . . . : Հացը լաճերուս տուի , տասն և մէկ սուերն ալ հացագործին տուի առ հաշիւ այն հացերուն զորս իմ բանտարկութեան միջոցին տուած էր . . . : Յետոյ գնացի ոստիկանութեան պաշտօնատունէն ամսականէս վար դըրուած դումարը խնդրեցի , և . . . ո՛հ , ջնջուած գտայ : Ամսականս վար դըրուած էր պաշտօնիս մէջ կանոնազանցութիւն ըրած լինելու պատճառաւ : Յայնժամ զգեստս տարի գրաւի դրի . . . և ահա այս պատճառաւ է որ կտուէ զգեստ հագած եմ :

Պ. Լըքոք՝ առանց խօսք մ'արտասանելու՝ մտիկ կ'ընէր այս քիչ մը կըցկտուր ճառք , բայց Բիէտուշի կը նայէր այնպիսի աչերով , որք կը թուէր թէ մինչև անոր սրտին խորերը կարդալ կ'ուզէին :

— Դուք ցաւած էք ինձ դէմ , ըստ և նախորդ 29 թիւն յուզեալ ձայնիւ այժմ , ցաւած էք , վասն զի ես ձերբակալեցի ձեր որդին : Ս՛հ , եթէ կարելի լինէր դարմանել , եթէ գիտնայի միայն թէ ձեր որդի՛ն էր :

— Ինչո՞ւ պիտի ցաւիմ ձեզ դէմ , մըմնջեց ծերունին :

— Ճշմարիտ է , կը ներէ՞ք ինձ : Ուրեմն կատարելապէս կը մխիթարէ զիս այդ . վասն զի ամենէն աւելի զիս տըրտմեցնողն այն մտածութիւնն էր թէ վիշտ պատճառեցի ձեզ առանց ուզելու : Դժբաղդարար , չեմ կրնար դարմանել չարիքն որ իմ անմտութեամբս գործուեցաւ :

— Թերևս կրնաք :

— Ս՛հ , եթէ հաւատայի ադոր . . . :

Տեսէք, վարպետ, մտքիս մէջ եղածը
խոստովանիմ քանի որ աստ եմ: Կը
խորհիք անշուշտ, թէ Պ. Լուիի հա-
մար ես ալ այլոց հետ խաբուեցայ
և պատրաստ էի ձեռքս կրակը խոթե-
լու թէ նա ըրած էր Արպայէթ փողոցի
սպանութիւնը. բայց այժմ գլուխս կա-
ռափնատի դանակին տակ դնելով
կ'երդնում թէ ձիւնի պէս ճերմակ է:

— Կ'ուզե՞ս օգնել ինձ ապացուցա-
նելու համար թէ անմեղ է:

— Կ'ուզե՞մ, անշուշտ: Միայն պար-
տիմ բսել ձեզ թէ պետք զիս վնասած
ժամանակ սպառնացաւ ինձ, որ եթէ
լրտեսութեան, հետախուզութեան և
այս տեսակ որ և իցէ բանի մը խառ-
նուիմ, զիս շղթայակապ բանտարկու-
թեան պիտի զրկէ առանց դատաստա-
նի: Այս պատճառաւ կը մտածեմ թէ
ի՛նչ ծառայութիւն կրնամ բնել ձեզ:

— Ես կրնամ գործածել քեզ առանց
վտանգի մէջ ձգելու: Գիտե՞ս ի՛նչ վի-
ճակի մէջ է որդւոյս գործը:

— Բիկաշ երէկ երկու խօսքով հաս-

կըցուց ինձ արգելարանի բակին մէջ . . .
նա ինձմէ աւելի բաղդաւոր եղաւ . . .
տասն եւ հինգ աւուր թռչակը միայն
տուժելով պաշտօնին մէջ մնաց . . . և
ինձ բարեկամ լինելէ չդադրեցաւ: Ը-
սաւ ինձ թէ քննութիւնը մեծ փու-
թով յառաջ կը տարուէր . . . և թէ
շատ մ'ապացոյցներ գտնուած էին:

— Ի՞նչ ապացոյցներ:

— Ա՛հ, վարպետ, չեմ ուզեր ձեր
սիրտը վշտացնել:

— Մի՛ վախնար, ես կրնամ ամեն
բան լսել, բսաւ ծերունին դառնու-
թեամբ:

— Զրոյց կը պտրտի թէ Պ. Լուիի
բնակարանին մէջ կապարածոյր ցուպ
մը գտնուեր է, որոյ վրայ արեան բի-
ծեր կան եղեր . . . և պորմին ճաշա-
րանին մէջ գտնուած ծերուկն սզան-
նելու գործածուած է . . . :

Ասկէ զատ, Պ. Լուիի մէկ նամա-
կը գտնուեր է . . . սպանեալ կնոջ ուղ-
ղեալ, և այն նամակին մէջ սպառնալիք
կայ եղեր . . . :

Այս ամենուն հետ համրը կը փնտրուեն և չեն կրնար գտնել: Պրանսայի ամեն դատարաններուն դրած են:

Բայց կ'ըսեն թէ համրը չգտնուելով ալ Պ. Լուի կրնայ տասն անգամ դատապարտուիլ... և կ'ուզեն որ գործը մինչեւ երկու ամիս եղեւնադատատենին առջեւ ելնէ:

—Մինչեւ երկու ամիս, կրկնեց Պ. Լըբոք: Պէտք եղածէն աւելի ժամանակ է:

Յետոյ թողլով զայս գաղափար.

—Հոն էիր դու, ըսաւ, երբոր համրը փախուցին, և գիտես հարկաւ թէ ես բնաւ մասն չունիմ այդ գործի մէջ: Կասկած ունի՞ս մէկէ մը:

—Ոչ ճշգիւ: Սակայն մեծ եղաւ զարմանքս թողլիաքի այնպէս տխամարաբար խաբուելուն վրայ, և եթէ պետն ուղէր մտիկ ընել զիս, ձեր կողմը պէտք չէր փնտռեր: Բայց բռնուած է այն կենդանիէն, որ խորամանկ չարածճի մ'է, և որ իւր բոլոր ժամանակը ժառանգական յաջորդութիւններ գտնելու

և մեքենայութիւններ նիւթելու կը գործածէ փոխանակ ուն համար աշխատելու: Համրին առեւանգման իրիկունը, Մաղասի առջեւ, մարդ մը, որ գաւաթ մը գինի խնցուցած էր ինձ, զարմանալի բան մը պատմեց ինձ անոր վրայ:

—Բիէտո՛ւշ, ըսաւ մէկէն Պ. Լըբոք, ես առաջարկեցի քեզ ինձ հետ առնուլ. կ'ուզե՞ս դալ անպայման անկեղծութեամբ: Քաջութիւն կ'զգա՞ս ամեն բան զոհելու մեր կետադրած նպատակին համար:

—Ի բոլոր սրտէ, վարպե՛տ... մանաւանդ եթէ անկասկած լինիմ թէ լաճերո առանց հացի չպիտի մնան:

—Ես իմ վրայ կ'առնում զանոնք բարի կնոջ մը քով դնել, որ իւր բուն զաւակաց պէս խնամէ:

—Օ՛, յայնժամ բոլորովին ձերն եմ, վարպե՛տ, հոգւով մարմնով: Եթէ ոստիկանութեան կողմէ արգելք կամ դժուարութիւն մը հանել ուզուի ինձ դէմ, Բիկաշ կ'իմացնէ ինձ: Եւ հոգ

չեմ ընե՛ր . ես այսուհետեւ պարզ քաղաքացի մ'եմ . ոստիկանութիւնն իրաւունք չունի զիս նեղելու , երբոր չարութիւն մը չեմ ընե՛ր :

—Մի՛ վախնար այն կողմէ : Պիտի չուենք :

—Երկա՞ր ժամանակի համար :

—Չեմ գիտեր :

—Ո՞ւր պիտի երթանք :

—Դու ըսիր ինձ հիմա թէ պատրաստ ես ծառայել ինձ . պէտք է կա՛մ ծառայել ինձ կուրաբար , կա՛մ բնաւ չը ծառայել :

—Իրաւունք ունիք , վարպե՛տ , բերնէս փախաւ , բայց այսուհետեւ չեմ սխալիր . . . մինչեւ Չինաստան կ'երթամ ձեզ հետ , եթէ հաճոյ լինի ձեզ :

—Մտիկ ըրէ՛ , ըսաւ Պ. Լըքոր ոտքի վրայ ելնելով նստարանէն , ուր Ռիէտուշ ալ նստած էր իւր քով , դեռ չեմ գիտեր ինչ պիտի ընեմ : Դեռ չեմ գիտեր թէ Դերմանիա՞ պիտի երթամ , Անգլիա՞ պիտի երթամ , ամեն տեղ ,

ուր կարենամ ապացոյցներ հաւաքել ցրելու համար այդ անհեթեթ ամբաստանութիւն : Չեմ գիտեր թէ Փարիզի մէջ թաքելով՝ գիրկընդխառն և ոտն առ ոտն պիտի մարտնչի՞մ : Բայց գիտեմ թէ որդիս յանցաւոր չէ և պիտի կորզեմ աղոնց ձեռքէն :

Առ այժմ , բաժնուինք իրարմէ . պէտք չէ որ մեզ ի միասին տեսնեն :

Իրիկուան ժամը տասնին տունս եկ , և ըսեմ քեզ ինչ որ կ'սպասեմ քեզնէ :

Այս խօսքի վրայ , գլուխն ու զօրականք բաժնուեցան իրարմէ . բայց նոյն վայրկենէն պատերազմը բացուած էր :

ԺԲ .

Երեք ամիս անցաւ :

Երեք ամիս Փարիզի մէջ , դար մ'է : Երեք ամսոյ մէջ ամեն բան կը մոռցուի անդ , մինչև իսկ յեղափոխութիւնք :

Արպալէթ փողոցի դուրծն , որ յուն վարի մէջ տասն և հինգ օրէն աւելի

յուզած էր մեծ քաղաքն, արդէն հընախօսութեան կարգ անցած էր մինչև գարուն :

Ոճիրներն իրար կը հալածեն, և Փարիզի մէջ ոճրագործք պարապ չեն կենար շատ : Չմբան միջոցին իրենց ձեռները ծոցերնին գրած չէին, և բուռն սրտայուզութեանց սիրահարներն հասած էին իրենց բաղձանաց :

Լրաբերք չէին գիտեր ո՛ր մարդասպանի ունին դնել, և լրագրաց էջերը չէին բաւեր պարունակել այն սրտածմիրկ պատմութիւնները, զոր դատական լուրեր փնտռողներն ամեն օր կը տանէին անոնց :

Արդարև Արպալէթ փողոցի գաղտնեաց չափ հետաքրքրաշարժ բան մը չէին գտած, բայց Փարիզի պէս քաղաք մը չկրնար ամբողջ եռամիս մ'ապրիլ մի միայն գեղանի կնոջ մ'և ծեր վաճառականի մը եղերական մահուան վրայ, թէև այդ կին Սլաքի տիկնոջ մը վրայէ դաշունահար եղած լինի :

Դիակնարանի ցոյցը վերջացած էր՝

առանց զոհը դրապէս ճանչուելու : Գիտէին թէ ոճրագործը բռնուած էր. և հասարակութիւնն իւր հետաքրքրութիւնը կը պահէր այն մեծ աւուր, յորում յանցաւորն երդուեալ դատաւորաց առջև պիտի ելնէր :

Միւս կողմէ, ոստիկանութիւնը միջոցներ ձեռք առած էր, որպէս զի լուութիւն տիրէ այս դատի վրայ :

Ոստիկանութեան պետերն, որք միշտ հաճոյակատար են լրագրութեան համար, տարտամ անդեկութիւններ միայն կուտային այս գործի վրայ. բաւական կը համարէին ըսել թէ քննութիւնն արագապէս կը յառաջանար, և թէ գործն եղեռնադատ ատենին առջև չեղած, ամեն ինչ պիտի պարզուէր :

Խառն լրոց խմբադիրք, «Դասական էշխանութիւնը կը քննէ» սովորական բանաձևը կրկնելու միայն հարկադրեալ, ընդարձակօրէն գրելու համար ոճրագատ ատենին առջև ելնելուն կ'սպասէին, և համեստաբար ուրիշ աւելի հասարակ եղերերգութեանց առաջին

արարուածով կ'զբաղէին : Ընկերային անձինք առաւել գործին դէմ զգածուած էին , քան թէ գործողներուն :

Ի սկզբան համրին վրայ հետաքրքրեալ էին , այն տարօրինակ անձնաւորութեան , որ միայն կրնար յայտնել զառեղծուածն եթէ կարող լինէր խօսիլ . բայց համր մը միշտ երեւակ մ'է անխօս , եթէ , ինչպէս Խաչատուրի թատրերգին մէջ , յանկարծ լեզուն բացուելով չ'իայտառակէ դաւաճանն :

Եւ զրոյց ելնելով թէ համրն աներեւոյթ եղած էր , հասարակութիւնն հաւատացեր էր վերջապէս թէ երկրորդական դեր մը միայն խաղցած էր , և ոչ ևս կը խորհէր անոր վրայ :

Ոստիկանութեան և բանտերու պաշտօնէից պատուէր տրուած էր լռել այն պարագայից վրայ , որոց մէջ կատարուած էր այդ զարմանալի փախուստ , և ոստիկանութեան պաշտօնատունէն դուրս քիչ մարդիկ գիտէին թէ գլխաւոր վկայն կը պակսէր քննութեան մէջ :

Իսկ ամբաստանեալն , ինչ ինչ նրկատմամբք , ամեն պէտք եղածն ունէր ուշադրութիւն դրաւելու համար :

Իւր կրթութեամբն և ընկերային դիրքով , Լուի Լըքոք Տը Ժանթիյեի արդարեւ նախասահմանեալ չէր ոճրագործաց նստարանին վրայ նստելու , և կարելի չէր շփոթել զայն արհեստիւ ոճրագործաց հետ , որք կողոպտելու համար կ'սպաննեն :

Բայց Լուի բաղմածանօթ չէր . դահլիճներն և մանաւանդ զբօսավայրերը չէր յաճախեր : Իւր անունը չէր տեսնուեր առաջին ներկայացմանց յաճախորդներուն ցանկին մէջ : Ոչ մի ակմբի անդամ էր , և չէր ընկերակցեր այն երիտասարդաց հետ , որք իրեն պէս նօտարութեան կը պատրաստուէին :

Միով բանիւ , անակնկալ դժբաղդութեամբ մը յանկարծ ընկերութեան մէջէն վերնալով , դատարկ չէր թողուր ո՛չ լուրջ և ո՛չ զբօսասէր աշխարհի մէջ :

Այս պատճառաւ ոչ ոք կը հարցընէր կը փնտռէր զայն :

Տիկին և օրիորդ Լքքոնթ ալ այն
դիրքը չունէին, որպէս զի անոնց վրայ
ալ դբաղողներ գտնուէին :

Մայրն յոյժ հարուստ էր և աղջիկը
չքնաղագեղ : բայց հարստութիւն և
գեղ կատարելապէս անծանօթ կը մը-
նան՝ եթէ չցուցնեն զիրենք :

Փարիզի մէջ կը վիտան անծանօթ
միլիոնատէրք և ծածկեալ հրաշալիք :

Հարիւր հազար ֆրանք հասոյթ ու-
նեցող անձինք կան, որք դաւառական
քաղաքի մը մէջ բնակածի պէս քաշ-
ուած կ'ապրին :

Նմանապէս բնութենէն և իրենց ծնու-
ղացմէ լաւագոյն կերպով օժտեալ գեղա-
շուք օրիորդներ յաճախ զուրկ կը մնան
յարաբերութիւններէ այն անհուն մայ-
րաքաղաքի մէջ, ուր ամերիկացի և ռուս
օրիորդք մեծ ազդեցութիւն կ'ընեն,
քիչ մը սիրուն գէմք և հարստութեան
երեւոյթ ունենալով :

Թէրէզ մին էր այն մանիշակներէն,
որք կ'սպասեն որ վնասուելով յայտ-
նուին :

Կը ծածկէր ինքզինք, մայրենի ա-
մարանոցին հովանիներուն տակ, այն
փայլուն տօներէն զորս կը հռչակեն
արդի ժամանակագիրք :

Իւր ամուսնութիւնն առանց ձայնի
որոշուած էր. իւր ընտանեաց քանի մը
հին բարեկամք միայն իմացած էին,
վասն զի սեղանաւորին այրին կատար-
եալ առանձնութեան մէջ ապրած էր
ամուսնոյն մահուանէն յետոյ :

Ուստի օրիորդ Լքքոնթի անունը
չէր արտասանուած իւր դժբաղդ նշա-
նածին ձերբակալման առթիւ, և գայ-
թակղութեան հրապոյրը կը պակսէր
այն հռչակաւոր դատին, որուն դիւ-
ցազնը պիտի լինէր Լուի Տը Ժանթիլյէի :

Գալով հայր Լքքոքի, արդարեւ ար-
ժանի էր դատական կազմի ու թրեպիանօ
լրագրին բնթերցողաց հետաքրքրու-
թիւնը գրգռելու :

Եղեռնական դատի մը մէջ յաճախ
չտեսնուիր օստիկանութեան գործակալ
մը, որ քիչ մնաց իւր օրդին կառափ-
նարան զրկելու պաշտօնը պիտի ստանձ-

նէր , և այս նորօրինակ կացութիւն յոյժ յարմար էր թատրերգակի մը սիրտը բերկրեցնելու :

Բայց Պ . Լըքոք , հին և ճշմարիտ Պ . Լըքոք , ա՛յնպիսի անձանց միայն ծանօթ էր , որք սովորութիւն չունին իրենց բարեկամութեանց գաղտնիքն հասարակութեան հաղորդել :

Վաղեմի հետախուզին համբաւը տարածուած չէր հասարակութեան մէջ , և ամենէն աւելի լաւ տեղեկութիւն ստացող լրագրագետք իսկ կը կարծէին թէ Լուի Տը Ժանթիլյեի աննշան քաղաքացւոյ մ'որդին էր :

Քոնթի գետափին բնակիչներն ալ ճիշդ տեղեկութիւն մը չունէին այն բարի ծերունւոյն վրայ , որ բազում տարիներէ ի վեր իրենց խաղաղ թաղին մէջ կը բնակէր :

Գիտէին միայն թէ բանտարկուած էր այն երիտասարդ , որ ամեն կիրակի իրենց առջևէն կ'անցնէր թեւ Պ . Լըքոքի սուած , և որ կրկին սպանութեան յանցանքով ամբաստանեալ էր :

Լըքոք յոյժ սիրելի էր իւր դրացեաց : Կը ցաւէին իւր վրայ , և շատ չէին հաւատար որդւոյն յանցապատութեան . բայց կ'սկսէին խորհիլ թէ ետ կեցած էր զայն պաշտպանելէ , վասն զի , դէպքէն քիչ օր յետոյ չուեր էր՝ ծանուցանելով թէ երկար ուղեւորութիւն մը պիտի ընէր , և վերադարձած չէր :

Ոստիկանութեան պաշտօնատունն ալ յուզուեր էր անոր տարակայութենէն :

Ապահովութեան պետն ալ չէր կրնար մեկնութիւն մը տալ , վասն զի քաջ կը ճանչէր զԼըքոք , և չէր հասկընար թէ ի՛նչպէս կը լքանէր խաղ մը , որոյ գրաւն իւր որդւոյն գլուխն էր :

Իսկ Պ . Թոլպիաք իւր ուզածին պէս կը մեկնէր : Կըսէր թէ ծերունի համրին քով գնացած էր , զոր երեսուելէ արգիլելու համար փախցունել սուած էր , և անոր այս յանկարծական հեռացումէն ամբաստանելոյն աննպաստ եզրակացութիւններ կը հանէր :

Իւր այս կարծիքն յաղթելով, հայր
Լըքոք փնտռուեր էր փութոյ պնդու-
թեամբ, բայց ի զուր: Ամենաճարտար
լրտեսաց հետախուզութիւններն ի դե-
րեւ ելած էին: Մերուկն անդտանելի
եղած էր:

Կենթադրէին թէ իւր կակիճն ու
ամօթն հեռաւոր երկրի մը մէջ երթալ
ծածկելու համար մեկներ էր Ֆրան-
սայէն:

Տիկին Լըքոնթի ալ հարցում եղած
էր այն անձին վրայ, որ իւր աղջկան
սկեսրայրը պիտի լինէր, բայց նա ալ
պատասխաներ էր թէ տեղեկութիւն
չունէր:

Ճշմարիտ կ'ըսէր: Ապահովութեան
պետը կ'երկբայէր: Բայց չէր կրնար
ստիպել զայն. հետեւաբար քննութիւ-
նըն անկէ անդին չէր կրցած անցնիլ:

Սակայն, դատական քննութիւնը
պնդապէս յառաջ կը տարուէր, և Պ.
Թոլպիաքի կորովամտութեան օգնու-
թեամբ բաւական զօրաւոր ապացոյց-
ներու խուրճ մը հաւաքուած էր համ-

րին ամենակարեւոր վկայութեան տեղը
բռնելու և սպանելոյն վրայ ճիշդ տե-
ղեկութեանց թերին լցնելու համար:

Պարութեան ամբաստանութեան ա-
տենին ներկայացած, նա ալ ոճրագատ
ատենին յղելու վճիռ տուած էր:

Եւ ապրիլի մէջ օր մը լուր ելաւ
թէ Արպալէթ փողոցի կինն սպանող
ոճրագործը պիտի դատուէր այս գե-
ղեցիկ ամսոյ երկրորդ հնգետասնեկին
վերջն, ուր եղրեւանիները ծաղկիլ կ'ըս-
կըսին:

Փարիզցիք, քաղաքական դիպաց
օգնութեամբ, գրեթէ կորուսած էին
այս սարսափելի ոճրագործութեան յի-
շատակը. բայց առաւօտեան ու երե-
կոյեան լրաթերթք սկսան յիշեցնել ա-
նոր սրտայոյզ պարագայներն և հետա-
քըքրութեան երկրորդ հունձք մը քա-
ղել՝ տարօրինակ պատմութիւններ շք-
ջարբութեան հանելով Լուի Լըքոքի
վրայ:

Տոն ժուան և Օթէլլոյ մը, Ֆրա-
Տիավոլոյ մը, Լովէյս մ'ըրին զայն,

գեղեցիկ, խրոխտ, տխուր և նախան-
ձոտ : Այնպիսի արկածներ վերադրեցին
անոր, որք դիւրաւ կրնային կէս երկո-
տասանեակ թերթօն—վէպերու նիւթ
մատակարարել :

Շատ չանցած, Փրանսայի մէջ կին
մը չմնաց որ չերազէր ներկայ գտնուիլ
այս բանաստեղծական ոճրագործի հո-
գեվարքին :

Անդլիայէն երեք կանայք գիր գը-
րեցին անոր և ամուսնանալ առաջար-
կեցին :

Թէրեզ և մայրը պէտք չունէին,
աւա՛ղ, մոռտք խնդրելու դատական
ատենասրահն, ուր պիտի դատուէր
լուի :

Արդէն հրաւիրուած էին ընդհա-
նուր դատախազէն, որ անոնց վկայու-
թիւնն յառաջ կը կոչէր հաստատելու
համար թէ ոճրին գործուած ժամուն
ամբաստանեալն իրենց տունը չէր :

Արդ, ապրիլի վերջին օրը, գար-
նան քաղցրիկ առաւօտ մը, մեծ բազ-
մութիւն խոնեալ էր եղեռնադատ ա-

տենի սրահին մէջ . առանձնաշնորհեալ
բազմութիւն մը, վասն զի երբէք թա-
տերական նոր հեղինակի մ'առաջին
ներկայացում մ'այսչափ ընտիր հանդի-
սատեսներ ունեցած չէր :

Համայն Փարիզ հոն էր, ձիարչաւ-
ներու, ակումբներու, դահլիճներու
Փարիզը : Բարձր ազնուականութիւնն
ու բարձր սեղանաւորութիւնն իրար կը
խթէին անդ : Ակադեմիան իւր ներկա-
յիչներն ունէր, և աշխարհավարական
անձինք ալ պակաս չէին :

Աւելորդ է ըսել թէ լրաբերաց բա-
նակն ամբողջապէս հոն էր, յաւելուած
ունենալով բազմութիւ լրագրաց տնօ-
րէններ և նշանաւոր հրատարակիչներ,
առանց հաշուելու հոչակաւոր թատ-
րերգականերն և յաջողակ վիպագիրներն :

Ամենէն գեղեցիկ դերասանուհիք
ջանահնար եղեր էին փոքրիկ տեղ մը
ձեռք բերել, և դատաւորաց աթոռ-
ներուն ետին ալ, յատուկ շնորհիւ,
նշանաւոր օտարազգիք նստած էին,
որոց մէջ կը տեսնուէր հնդիկ նապապ

մը, փառաւոր ծերունի մը, արևելեան ճոխութեամբ հազուած :

Այս տարաշխարհեայ մեծատունն երկայն մօրուք մ'ունէր սպիտակ, որ իւր ցորենագոյն երեսին երեք չորրորդը ծածկած էր : Սեւամորթ ծառայ մ'անկէ երեք քայլ հեռի կանգուն կեցած էր, և դրեթէ իւր տիրոջ չափ իւր վրայ կը հրաւիրէր հետաքրքիր բազմութեան հայեացքը :

Բոսան վայրկենի չափ սպասումէ յետոյ, դատաւորաց համար պատրաստեալ աթոռներուն դիմացի կողմէն փոքրիկ դուռ մը բացուելով, սարսուռ մ'անցաւ ներկայ գտնուողներուն վրայէն :

Լուի Լըքոք ներս մտաւ երկու պահակներու հետ և նստաւ՝ առանց նա յելու բազմութեան, որ զինքը տեսնելու համար կը յուզուէր :

Բոլորովին սև հագած էր, և բաւական հանդարտ դէմք մ'ունէր, թէ և յոյժ տոգոյն :

Նստելէն յետոյ՝ ծռեցաւ քանի մը

խօսք բաւ իւր փաստաբանին—ականաւոր մը որ հետամուտ եղած և զայն պաշտպանելու շնորհը ձեռք բերած էր — . յետոյ արմուկոյն իւր առջեւի անջրպետին կրթնեցաւ, գլուխն երկու ձեռներուն վրայ, և արձանի պէս անշարժ կեցաւ :

Գեղուհիներն, որք ամբաստանելոյն դէմքին վրայ սրտայուղութեան նշաններ տեսնել կը յուսային, բացարձակապէս խաբուեցան :

Պ. Լըքոք կը թուէր թէ բնաւ չէր կասկածեր թէ իւր գլուխը վտանգի մէջ էր : Այցելութեան գնացող և դահլրճի մը մէջ սպասող բարեկիրթ մարդու մը կեցուածք ունէր :

Իւր համարձակ և քիչ մ'ալ սէգ ձեւերը չար մտօք մեկնուեցան :

Եղեռնական դատերու ներկայ գլուխուող հասարակութիւնն՝ ամբաստանելոյն անձկութիւնը կը սիրէ տեսնել, և գոհ կը լինի շիտեալ տեսնելով զայն : Այս պատճառաւ, ամբաստանելոյն պաշարիւնութիւնն անամօթութիւն կը հա-

մարի , և համբերատարութիւնն անըզ-
գայութիւն :

Ըստ իրենց դատողութեան՝ այդ
գեղեցիկ երիտասարդ չէր խոնարհեր
ըստ բաւականի : Կուզէին որ լար :

Բայց զայն մեղադրողները թէ իւր
վիճակին սարսափելի ծանրութիւնը չէր
զգար , եթէ կարենային անոր սրտին
մէջ կարգաւ , աւելի ներողամտութիւն
կ'ունենային :

Տարաբազդ երիտասարդը նոյն մի-
ջոցին իսկ սոսկալի տանջանք կը կրէր ,
և գերմարդկային ճիգեր կ'ընէր իւր
տագնապը ծածկելու :

Ոչ թէ կառափնարանէ կը վախնար ,
այլ այն չարչարանքէ՝ զոր դատաւարա-
կան սովորութիւնք պիտի տային իրեն
վատանունութեան նստարանին վրայ :

Գիտէր որ Թէրէզ վկայութեան կոչ-
ուած էր , գիտէր որ զինքը կորացած
պիտի տեսնէր ցասուցեալ ամբաստանչի
մ'անագորուն խօսքերուն ներքեւ , և
իւր պատասխանները պիտի լսէր դա-
տաւորի մը հարցմանց , որ մարդաս-

պանի մը հետ ակնածութեամբ վար-
ուելու պէտք չպիտի զգար :

Կը գուշակէր մանաւանդ թէ դա-
տաւորն իրենց սիրոյն վրայ , սոսկալի
չարաբաստութեամբ խզուած ամուս-
նութեան վրայ պիտի խօսէր , իւր բեր-
նէն խոստովանութիւն մը քաղելու հա-
մար իւր փղձկեալ նշանածը պիտի ցուց-
նէր իրեն , և սիրտը կը մորմոքէր
խորհելով թէ յակամայից դառն տան-
ջանք պիտի պատճառէր այն դժբաղդ-
աղջկան , զոր տակաւին կը սիրէր նոյն
բուռն սիրովն որով սիրած էր այն օրն
ուր միմիանց հետ ի սպառ միանալ
ուխտած էին փոխադարձաբար :

Մաղասի ցուրտ խցիկներէն միոյն
մէջ կրած երկար բանտարկութեան մի-
ջոցին՝ Թէրէզի պատկերը չէր դադրած
իւր մտքին առջեւ ներկայ գտնուելէ :
Հանապազ զայն կ'երազէր , և անդառ-
նալի կերպիւ թռած երջանկութեան
դառն յիշատակը գիշեր ցերեկ կը խոչ-
տանգէր զայն :

Քանի՛ քանի անգամ մեռնելու փա-

փառքեր էր դատաստանի ծանականքը չկրելու համար: Քանի՛ քանի անգամ ըսեր էր ինքնիրեն թէ իւր նշանածը սոսկում և արհամարհանք միայն կրնար զգալ իւր վրայ:

Երեք ամսէ ի վեր բացարձակ առանձնութեան մէջ կ'ապրէր: Մարդ տեսնելու արդելքն ոճրադատ ատենին գումարումէն ութ օր առաջ վերցած էր:

Համբին փախստեան վրայ զայն հարցաքննած ժամանակ՝ քննիչ դատաւորը պարտաւորուեր էր իմացնել անոր թէ հայր Լըքոք աներեւոյթ եղած էր, և թէ կասկած կար թէ նա նպաստած էր համբին փախստեան:

Քայց երբոր Լուի լուր հարցուցեր էր օրիորդ Լըքոնթի վրայ, երբոր թոյլտուութիւն խնդրեր էր նամակ մ'անոր գրելու, պատասխան տրուեր էր թէ անհնարին էր, վասն զի վկայութեան կոչուած էր. հետեւաբար բնաւ լուր չունէր անոր վրայ:

Ամեն բան կրեր էր անտրտունջ: Յուսահատութիւնն առաւել կը գրդռէր

անոր կորովն. ամեն բան աչքն առած էր, ամեն բանի պատրաստ էր. և եթէ կ'ուզէր մինչեւ ցվերջ մաքառիլ, պատճառն այս էր որ, համոզմամբ մը զօրացեալ, պատուոյ խնդիր կը համարէր պարտութիւն չխոստովանիլ՝ մինչեւ իսկ մահուան դատակնիքը լսելէ յետոյ:

Ուտի իւր դատաստանին մէջ՝ բերդի մը վրայ յարձակող և մեռնելուն վրայ աներկբայ եղող զօրականի մը համբերատար քաջարտութիւնը կը բերէր:

Հետեւաբար՝ դէմքին վրայ տեսնուած խրոխտութիւնն, որ այդ քաջարտութեան արդիւնքն էր, զարմանք և դժգոհութիւն կը պատճառէր ներկայ գտնուողներուն:

Սակայն կանայք թշնամի չէին իրեն: Կենթադրէին թէ բուռն կիրքեր այդ ոճրին առաջնորդած էին զայն, և սիրած լինին ի հաշիւ կ'առնուին:

Թերեւս նուազ ներողամիտ կը լինէին եթէ տգեղ լինէր. բայց Լուի Լըքոք իւր Փիզիքական առաւելութիւն-

ներէն բան մը չէր կորուսած բանտին մէջ : Տժգնութիւնն առաւել կը փայլեցնէր դէմքին բնական աղնուութիւնն , և այն կապուտակ ակօս , զոր վշտակրութիւնը պեղած էր աչքին կոպերուն տակ , առաւել ևս կը ցայտեցընէր սև խոշոր աչերուն գեղեցկութիւնն :

Երդուեալ դատաւորաց և ատենակալաց ներս մտնելէն առաջ քանի մը վայրկեան անցան , որոց միջոցին բազմութիւնը չդանդաղեցաւ իւր զգացած տպաւորութիւնն յայտնել հծծելով , որոյ շշունջը բնաւ չչփոթեց զամբաստաննալն , որ անդգամ էր միշտ :

Իէմքն ոչ ևս կը տեսնէին , բայց ատենասորահին մէջ տեղը մեծ սեղանի մը վրայ դրուած ապացուցական նիւթերը կը ցուցնէին միմեանց : Այն նիւթոց մէջ կային արդարեւ բաներ , որք տեսնելու արժանի էին :

Սեւցած կրօր պողովատէ ծայրով դաւազանի մը քով , որ ամբաստանութեան խօսքին նայելով՝ Պ. Լէօրէոյի

սպանման ծառայած էր , դաճէ կաղապարներ կը տեսնուէին , որք ոճրագործութեան գիշերը պորմին ձիւնեւրուն վրայէն քալող ոտքերուն ճիշդ ձևն հանած էին :

Քիչ մ'անդին կը տեսնուէին փղօսկրէ երախակալով դաշոյնն և Սլաքի տիկինը՝ զոր ոճրագործը զոհին սրտին վրայ դամած էր , փոքրիկ սեղանն՝ որոյ վրայ բացուած էր ամբաստանելոյն տան մէջ դանուած հոբէր-Նիւն , արեան քիծեր ունեցող ժանեկազարդ սենեկազգեստը , վարդագոյն մուճակներն և թառամեալ կամելիան :

Բայց ամենէն աւելի ուշագրութիւն գրաւողն էր մեղրամամէ կիսարձանն այն տաբաբաղդ կնոջ , զոր անդ դանուողներէն շատեր դիակնարանին մէջ տեսած լինելին կը յիշէին :

Կիսարձանն սքանչելի նմանութիւն մ'ունէր , և այնչափ ճարտարութեամբ կաղապարուած էր , որ կարծես թէ այն վաղեմի մամադործ վարպետներուն միոյն ձեռքէն ելած էր , որոց արհեստն ,

յոյժ ծաղկեալ եօթեւտաններորդ դա-
րու մէջ, այժմ բոլորովին լքեալ է:

Արդիւնքն հիանալի էր, բայց դա-
տական իշխանութիւնն հետաքրքիր
գեղուհեաց սիրտք շարժելու համար
չէր որ այն հրաշակերտն ի ցոյց դրած
էր, այլ կը յուսար որ սպանելոյն անձ-
նաւորութիւնը ճանչելու կրնար ծա-
ռայել, որովհետեւ տակաւին չէր ճան-
չուած:

Դիպուածք կրնար ունկնդրութեան
բերել օտարազգի մը, անգլիացի մը.
և որովհետեւ անգլիուհի լինիլն ստուգ-
ուած էր, կը յուսացուէր որ կրնար
պատահիլ այն միջադէպերէն մին, որ՝
ինչպէս կ'ըսեն՝ թատրոնի մը սրահը կը
յափշտակեն:

Եւ իրօք, հասարակութեան մեծ
մասին համար, եղեռնադատ ատեան
մը թատրոնէ տարբերութիւն չունի:

Միայն թէ, այս պարագայի մէջ,
հանգուցին լուծումն ուրիշ ներկայաց-
ման մը կը յղուի, այսինքն երգուեալ
դատաւորաց մէկ ուրիշ մտաւոր նստին.

և կային մարդիկ որք յատկապէս ե-
կած էին ջահերով արտասանուած մահ-
ուան դատակնքոյ մ'աղղեցութիւնը
տեսնելու:

Ասոնք կը մաղթէին որ Լուի Լըբոք
նոյն նստին մէջ ի մահ դատապարտուէր:

Ամեն օր առիթ չներկայանար գե-
ղեցիկ և վայելչաշուք երիտասարդի
մ'այլազուհիլն ու գողըոջելը տեսնելու,
երբոր դատաւոր մը, յուզեալ սրտիւ,
ինչպէս որ կը վայլէ, պատժական օ-
րինաց 302 րդ սարսափելի յօդուածը
կարդայ:

Գլխաւորապէս կանայք կը փափա-
քէին որ այս հաճոյական տեսարանէն
բան մը չկորսնցնէին:

Երկար չսպասեցին վարագուրին բաց-
ման:

Բարապան մը ծանոյց. Ատենակա՛լը:

Եւ ահա ներս մտան ատենակալք:

Երգուեալ դատաւորք նստան. լու-
թիւն տիրեց, խոր լուութիւն մը, որ
տեսարանին ահարկութիւնը կ'աւելցնէր:

—Ամբաստանեա՛լ, ոտքի վրայ ելէք,
ըսաւ նախագահն:

Ամբաստանեալն արդէն ոտքի վրայ էր , ուղղաբերձ և բարձրադժուխ կանգնած :

— Ի՞նչ է ձեր անուն :

— Լուի-Սլպէր Լըքոք :

— Դուք շատ անգամ ուրիշ անուն մ'ալ առած էք , զոր իրաւունք չունէիք գործածելու :

— Հայրս այն անունով ճանչուած էր :

— Ս,յնպէս թող լինի , անցնի՛նք :

Ձեր տարի՞քը :

— Քսանեւութ :

— Ո՞ւր ծնած էք :

— Փարիզ :

— Ձեր արհէ՞ստը :

— Տոքթոր իրաւաբանութեան :

— Ձեր վրայ ամբաստանութիւն կայ թէ վերջին յունուար ամսոյ մէջ երկու սպանութիւն գործած էք :

Նստէ՛ք և ուշադրութեամբ ունկնդրէք ամբաստանագրին ընթերցման :

Լուի Լըքոք հնազանդեցաւ , և ատենագրպիրն սկսաւ յստակ ձայնիւ կարգալ խեղճ թէրէզի նշանածին վրայ

ծանրացած սարսափելի ամբաստանութեանց հետեւեալ տեղեկագիրը .

Վերջին յունվար ամսոյ 13 էն 14 լուսցած գիշերը , ժամ երեքին միջոցները , Փարիզի տաներեքերորդ շրջանակին պահակախմբերէն միոյն վերաբերեալ երկու պահակ , Քորվիզար փողոցին և Շան-աը-լ'Սլուէթ փողոցին անկիւնը մարդ մը բռնեցին , որ մեծ արկղ մը շարկած կը տանէր :

Կասկածելով թէ գողցած էր , բռնեցին պահականոցը տարին՝ առանց զբաղելու ուրիշ երիտասարդ և գեղանի մարդու մը վրայ , որ արկղաբարձէն քանի մը քայլ առաջ կ'երթար , և հեռացաւ գնաց դէպի Պուլվար տ'Իթալի պողոտային կողմն :

Սրկղը բացուեցաւ պահակապետին հրամանաւ : Մէջը դեռատի և գեղեցիկ կնոջ մը դիակ կար , որ սրտէն զարնուած էր դաշոյնով :

Չէնքը վերքին մէջ մտացած էր , և խաղի թուղթ մը ծակած , զոր ոճրագործն իւր զոհին կուրծքին վրայ թո-

ղած էր, իբր թէ իւր գարշելի գործն ստորագրել ուզելով :

Բռնուած մարդն անմիջապէս հարցաքննուելով հասկցուց նշանացի թէ խուլ-համր էր և ստուգուեցաւ որ ճշմարիտ էր :

Դատական իշխանութիւնը չէր կրնար անկէ բացատրութիւններ սպասել մանաւանդ սա պատճառաւ որ այդ մարդ պարզապէս կրաւորական դեր մ'ունեցած կ'երևի գործին մէջ, և գուցէ անգիտակից գործակատար մը միայն եղած է :

Հետեւեալ օրը, դատական իշխանութեան արամադրութեանը ներքե գտնուող ապահովութեան տեսչին հազուադիւտ ճարտարմտութեամբ կատարած հետախուզութեանց շնորհիւ գրտնուեցաւ որ ոճիրն Արպալէթ փողոցը տան մը մէջ գործուած էր, ուր քանի մ'ամսէ ի վեր կը բնակէր սպանեալ կինը :

Մինչեւ իսկ կրցին որոշել թէ տանը ո՞ր սենեկին մէջ զարնուած էր կինն,

որուն ո՞վ լինիլը դեռ չէ կրցած ստուգուել, բայց անգլիուհի լինիլ կը թուի :

Միանգամայն տանը ճաշարանին կից մառանի մը մէջ Պ. Լէօրէօ անուն վաճառականի մը մարմինը կը գտնուէր, թողամահ սպաննուած :

Այդ երկու ոճիրք միակ անձէ մը գործուած կրնային լինիլ. անշուշտ մին հետեւանք էր միւսոյն, և ոճրագործը կ'ուզէր մի և նոյն եղանակաւ անհետացընել երկու դիակներն :

Սպանութեանց նպատակը գողութիւն եղած չէր, վասն զի որ և է թանկագին նիւթ վերցած չէր :

Գուռ կամ պատուհան կոտրելով ներս մտնելու նշան մը չկար, և ոճրագործը պարտէր յարաբերութիւն ունենալ տան վարձակալուհւոյն հետ, որոյ դուռը կամովին բացուած էր :

Այդ կին, ըստ ամենայն երևութի, յարաբերութիւններ ունէր սպանեալ վաճառականին հետ այնպիսի պատճառաց վրայ հիմնեալ, զորս բարոյականը կը դատապարտէ. և եթէ այդ յարա-

բերութիւնք չեն կրցած յստակապէս ստուգուիլ, պատճառն այն է որ երկու զոհերն ալ հաւասարապէս շահունէին գաղտնի պահելու :

Վաճառականն ամուսնացեալ էր և ընտանեաց հայր . Անգլիոսէին ալ տարփածու մ'ունէր, զոր կը խաբէր :

Այդ տարփածուն, կոխելով զայն՝ երբոր հակառակօր հոմանիին հետ կը ճաչէր, վրէժ առաւ երկուքն ալ ըսպաննելով :

Ամբաստանութիւնն ի սկզբան ուրիշ ենթադրութիւն մ'ըրած էր : Խորհած էր թէ պարօն Լէօրէոյի սպանութիւնը տարփաւորին և տարփուհւոյն համախոհութեամբ կատարուած էր, և ապա տարփուհին ալ սպաննուած էր իւր մեղսակցէն :

Բայց վաճառականն իւր վրայ կարեւոր արժէքներ ունէր, որոց ձեռք դպած չէր :

Ուրեմն շատ հաւանական է որ այդ ոճիրք նախանձէ ու վրիժառութենէ զատ ուրիշ շարժառիթ չեն ունեցած :

Եւ, ինչպէս որ ալ լինի, ապացուցուած է թէ ամբաստանեալը միայնակ գործած է զանոնք :

Այնպիսի հայր մ'ունենալով, որ գեղեցիկ հարստութիւն մը դիզած է թաքուն՝ եթէ ոչ անխոստովանելի արհեստի մը շնորհիւ, Լուի Լըքոք փայլուն կրթութիւն մ'ստացած է նախ Անգլիոյ մէջ, ուր քանի մը տարի անցուցած է, յետոյ Գերմանիոյ մէջ, և վերջապէս ի Փրանսա, ուր իրաւագիտութեան երկաստիճան տալթորութիւն ստացած է :

Նօտարութիւնն իրեն ասպարէզ ընտրած լինելով, գրասենեակ մը գնելու և յոյժ պատուաւոր ընտանիքէ աղջիկ մ'ամուսնութեան առնլու վրայ էր, երբոր ձերբակալեցաւ այնպիսի դիպուածով մը, որ արդարեւ կրնայ նախախնամական կոչուիլ :

Իւր յանցապարտութեան ապացոյցներն առատ են :

Սպանեալ կնոջ լուսանկար պատկերը գտնուեցաւ իւր քով, պատկեր մը,

որ համբերութիւն կոչուած խաղի մ'ըբաղ-
եալ կը ներկայացնէ զայն :

Այդ պատկերին կրայ , որ մէկ օ-
րինակ միայն հանուած է փարիզցի
լուսանկարչէ մը՝ որ ճանչեց զայն և վը-
կայեց իրողութեան , ուղերձ մը գրուած
է սպանելոյն ձեռօք , որ բնաւ տարա-
կոյս չթողուր :

Կինը Լուի Լըբոքի տուած էր զայն,
սիրային տեսարան մը յիշեցնելու հա-
մար , ուր համբերութեան խաղն ալ մասն
ունէր :

Նոյն խաղը գտնուեցաւ նաեւ ամ-
բաստանելոյն բնակարանին մէկ ծածուկ
սենեկին մէջ : Թուղթերը սեղանի մը
վրայ բացուած էին՝ ինչպէս լուսանկա-
րին մէջ , և հատ մը կը պակսէր , ճշգիւ
այն՝ զոր դաշոյնը ծակած էր , - Սլաքի
տիկինն :

Ամբաստանեալը փորձ փորձեց մեկ-
նել այդ զուգադիպութիւն այնպիսի
բաներ ըսելով , որոց ստուծիւնն հաս-
կըցուած է :

Այդ իրողութիւն բաւական էր ծանր

կասկած մը կազմելու իւր դէմ . բայց
ուրիշ նիւթական ապացոյցներ ալ գըտ-
նուած են , որք անժխտելի կերպիւր կը
հաստատեն Լըբոքի մեղապարտու-
թիւնն :

Հաստատուած է թէ յունվար 14էն
15ի գիշերն , որ ոճրին հետեւեալ օրն
է , Արպալէթ փողոցի պորմը մտած է :

Անդ չէր կրցած բռնուիլ , վասն զի
յաջողեր էր պրծիլ տանը վրայ հսկող
պահակաց ձեռքէն , որք յետոյ ճան-
չեցին զայն , ո՛չ թէ դէմքէն , զոր խնա-
մով ծածկած էր , այլ ձայնէն և զգեստ-
ներուն ինչ ինչ պարագայներէն :

Միւս կողմէ , այն գիշերն ոստիկա-
նութեան գործակալի տոմսակ մը ցոյց
տուած էր , որպէս զի թող տան զինքն,
և կը հասկցուի իւր իսկ խոստովանու-
թիւններէն թէ իւր ձեռքն անցած էր
իւր հօր ժամանակաւ ոստիկանութեան
ծածուկ օժանդակի պաշտօն վարելուն
առթիւ ստացած տոմսակը :

Նմանապէս կապարածայր գաւա-
զան մը գտնուած է ամբաստանելոյն

բնակարանէն , գունտին վրայ արեան բիծերով , և ապացուցական նիւթերէ մին է :

Այդ գաւազանով տրուած է անշուշտ այն հարուածն , որ պարոն Լէօրէոյի գանկը ջախջախած է :

Արպալէթ փողոցի տան մէջ գըտնուած է նամակի պատեան մը , որոյ վրայ սպանեալ կնոջ անունը գրուած է , Մարի Փասիթ , և Թէաթր-Փրանսէի հրապարակի թղթատարական գըրասենեկին գրոջմը կը կրէ : Հասցէն ամբաստանելոյն ձեռագիրն է , որ Րիվոլի փողոցը նօտարական գրասենեկի մը մէջ կ'աշխատէր յիշեալ թղթատարական գրասենեկէն քիչ հեռի :

Վերջապէս , չկրցաւ արդարացնել յունվար 13 էն 14 և 14-15ի գիշերներն իւր ժամանակն ի'նչպէս անցուցած լինին . և այս ծանր գործը քննող դատաւորը Լըքոքի գրչէն ելած նամակ մ'ստացած է այնպիսի անձէ մը , որ չէ ուզած ինքզինք յայտնել . նամակ մը , որոյ պարունակութիւնն համազօր է խոստովանութեան :

Արպալէթ փողոցի կրկին ոճիրը ծանուցուած է անոր մէջ , սպառնալեաց ձեւով , Մարի Փասիթի , ամենայտակ և ամենաբացորոշ կերպիւ :

Այս ընկճող ապացոյցներուն դէմ ամբաստանեալը չոր ժխտումներ միայն կ'առարկէ , որք սուտ կ'եղնեն իրողութեամբք և վկայութեամբք :

Լուութեան մէջ կ'ապաստանի , որ կը դատապարտէ զինքն , և երբոր խօսի , գանգատելու համար է միայն թէ զինքը չերեսեցին խուլ-համբին հետ , որ սպանեալ կնոջ դիակն արկղի մը մէջ տարած միջոցին բռնուած է :

Իւր այնչափ թախանձանօք խընդրած երեսումը չկրցաւ կատարուիլ յոյժ ցաւալի միջադէպի մը պատճառաւ :

Խուլ-համբը փախաւ այն պահուն՝ յորում Մաղասի բանտէն դուրս հանուած էր Լըքոքի հետ երեսուելու համար :

Ո՛չ անունը գիտէին , ո՛չ բնակավայրն , և՛ հակառակ ամենէն փութաջան հետախուզմանց՝ չկրցաւ դեռ դըտնուիլ :

Հայր Լըքոք դիւրացուցած է այդ փախուստ՝ անհաւատարիմ գործակալի մ'օգնութեամբ, և ինքն օտար երկիր չուած է հրապուրած գործակալին հետ: Այս փախուստ յորդառատապէս կը հաստատէ ամբաստանելոյն յանցաւորութիւնն:

Արդարեւ, հայր Լըքոք իւր որդւոյն անմեղութիւնն ապացուցանելու ձեռնարկած էր: Ի սկզբան կրցաւ հաւատալ անոր անմեղութեան, բայց յետոյ, ոչ եւս հաւատալով և գիտնալով որ համբը պիտի ճանչէր իւր որդին, անհետացնել տուաւ այդ վտանգաւոր վկայն:

Դատական իշխանութիւնը չէր կրնար զինաթափ լինիլ այնպիսի յանդուգն խաղով մը, որոյ նպատակն էր ճշմարտութեան յայտնութիւնն արգելուլ:

Արպայէթ փոզոցի սպանութեանց հեղինակը պէտք չէ օգտի իւր հօր մեղապարտ հնարիմացութիւններէն:

Ընկերութեան համար կարեւոր է որ եղեռնագործին պատիժը չյապաղի,

և այդ սոսկալի ոճրին զոհերուն վրէժն արագապէս լուծուի:

Այս մարդասպան, որ չվախցաւ անգէն ծերունի մը հարուածել և վատաբար տարփուհի մը դաշունել, զոր թերեւս սիրած էր, Լուի Լըքոքն է:

Իրողութիւնք ցոյց տրուեցան. այժմ կը մնայ մարդը ճանչեցնել:

Իւր վարքը կանոնաւոր էր. յոռի նախքնթացներ չունի, կամ գոնէ չերեւիր որ, Ֆրանսա վերադառնալէն ի վեր, եպերելի գործ մ'ըրած լինի:

Իւր արհեստին պարտականութիւնները ճշդիւ կը կատարէր. իւր դրամական վիճակը լաւ էր և յոյժ շահաւէտ ամուսնութիւն մը կնքելու վրայ էր:

Կրնայ իսկ հարցուիլ թէ իւր սպաննած կնոջ հետ ունեցած յարաբերութեանց յայտնուելէն աներկբայաբար յառաջ գալիք խզման մ'երկիւղը չէ՞ մղած զի՞ք այդ սպանութիւն բնելու: Դատաւորաց կը մնայ գնահատել:

Բայց եթէ Լըքոք ցոփ չէր, անառակ չէր, յայտնի եղած է թէ բարե-

կամներ ալ չունէր, ընկերութեանց մէջ չէր յաճախեր, իւր հասակին ներելի եղած զուարճութեանց բնաւ հետամուտ չէր. միով բանիւ, առանձնասէր և դրեթէ ծածուկ կեանք մը կը վարէր :

Վերջապէս, բուռն և ծածկամիտ բնաւորութիւն մը ցոյց տուած է միշտ :

Այսպիսի մարդ մը կարող էր պատրաստել և ի գործ դնել Արպալէթ փողոցի կրկին ոճիւններն :

Հետեւաբար Լըքօք (Լուի-Սլլպէր) ամբաստանեալ է, և այն, և այն »

Սոյն ամբաստանագրին ընթերցումն երկիւղած ուշադրութեամբ լսուեցաւ երդուեալ դատաւորներէն և ներկայ հասարակութենէն :

Նապապն ալ անոր մէկ բառք չկորսընցուց, վասն զի կատարելապէս կը հասկնար Ֆրանսերէն լեզուն :

Լուի Լըքօք ալ մտիկ բրաւ անհողդէմքով մը, որ եղեռնադատ ատենին ամենէն հին յաճախորդներն իսկ կը զարմայնէր :

Կրնար երդնուլ մարդ թէ խնդիրն անոր վրայ չէր :

Նորէն ոտքի վրայ ելաւ նախագահին հրաւիրանօքն, որ ըսաւ իրեն .

— Ձեր վրայ եղած ամբաստանութիւնք յոյժ ծանր են : Ձեզ լինելիք հարցմանց միջոցին պիտի պատասխանէք անոնց :

Բայց նախ պարտիմ հարցնել ձեզ թէ տակաւին կ'ուրանա՞ք ձեր մասնակցութիւնն այն եղեռանց՝ որովք ամբաստանեալ էք :

— Բացարձակապէս, պատասխանեց Լուի Լըքօք անյողգողգ ձայնիւ :

— Ուրեմն իմ պարտականութիւնս է դիտել տալ ձեզ թէ ձախող ճանբու մը մէջ կը մտնէք :

Եւ հասկցնեմ ձեզ :

Ամբաստանութիւնը կը հաստատէ թէ դուք էք հեղինակն երկու անիւծապարտ սպանութեանց, բայց չճշգրտ շարժառիթն որ ձեզ մղած է գործել :

Ի ուր բաւական ուշմութիւն ունիք քաջ զգալու համար թէ ձեր

յանցանքը կը ծանրանայ կամ կը թե-
թեւնայ այս կամ այն պատճառաւ՝ զոր
ունեցած է ձեր գործն :

Օրինակի համար , եթէ հաստատուի
թէ ձեր զայրացած միջոցին զարկած էք
Պ. Լէօրէօ և Մարի Փասիթ , յայնժամ
ձեր յանցանքն առաւել թեթեւ կը լինի
քան եթէ կանխամտածութեամբ սպան-
նած լինէիք :

— Ես բնաւ չքմեղանք չունիմ յա-
ռաջ կոչելիք . ես անմեղ եմ :

Այս պարզ պատասխան խոր տպա-
ւորութիւն մ'ըրաւ համայն ունկնդրաց
վրայ :

— Ձեր օգտին համար էր որ կը
յորդորէի ձեզ փոխել այդ դրութիւն ,
ըսաւ նախագահը : Թերևս պիտի ստոր-
ջանաք իմ խորհրդիս չանսալնուդ վրայ :

Կը հրաւիրեմ ձեզ այժմ պարզ և
մեկին կերպիւ պատասխանել ձեզ ուղ-
ղելիք հարցմանցս :

Հարկաւ չպիտի շփոթեցնեն ձեզ՝
քանի որ անմեղ էք :

Ե՞րբ վերադարձաք ի Ֆրանսա :

— Ութ տարի կայ :

— Գերմանիայէ՞ն կուգայիք :

— Այո՛ , պարոն , Հայտէլպէրկէն ,
ուր համալսարանին ուսմանց կը հե-
տեւէի :

— Հոն աստուածաբանական տոք-
թորի մը տունը չէի՞ք յաճախեր :

— Այո՛ , ամուսնութեան խնդրած
էի անոր աղջիկն և հաճութիւնն ստա-
ցած , բայց հայրս դէմ կեցաւ :

— Այդ կէտի վրայ կը վերադառ-
նանք մէկ պահէն : Դուք Գերմանիա
երթալէ առաջ Անգլիա բնակած էք :

— Այո՛ , բանի մը տարիներ :

— Ուրեմն անգլիերէն կը խօսիք :

— Կատարելապէս :

— Ի՞նչ յարաբերութիւններ ունէիք
Անգլիոյ մէջ :

— Ինչ որ կրնայ ունենալ վեշտա-
սանամեայ տղայ մը , աշակերտ գիշե-
րօթիկ վարժարանի , ուր առաւել ա-
զատութիւն կայ քան Ֆրանսայի վար-
ժարանաց մէջ : Անդ շրջակայ հարուստ
երկրագործներէ ոմանց տունը կ'եր-
թեւեկէի :

—Մինչեւ իսկ անոնցմէ միոյն աղ-
ջիկն առեւանգել փորձեցիք :

—Ճշմարիտ է, պարոն :

—Անունն ի՞նչ էր :

—Ճորճինա Սմիթ :

—Ճիշդ է : Բայց նոյն ժամանակ-
ները Լոնտրայի մէջ կամ շրջակայները
ծանօթութիւն չունեցա՞ք Մարի Փասիթ
անուն կնոջ մը հետ :

—Ո՛չ, պարոն :

—Անցնինք, ըսաւ նախագահը :

Պատերազմին սկիզբէն զինուոր գըր-
ուեցաք յառաջախաղաց գունդի մը
մէջ, և գովելի վարժունք ունեցաք պա-
տերազմին ժամանակ :

Յետոյ ձեր իրաւաբանական ուս-
մունքն աւարտելով տոքթորութեան
ատիճան ստացաք, նօտարի մը գրա-
սենեակը մտաք, և մտադիր էիք նօ-
տարական պաշտօն մը գնել : Ձեր հօր
հարստութիւնը կարող կ'ընէր ձեզ
առ այդ :

Վերջապէս յոյժ պատուաւոր ընտա-
նիքէ աղջկան մը հետ ամուսնանալու
վրայ էիք :

Լուի Լըբօք գլուխը խոնարհեցուց
ի նշան հաւանութեան, բայց պատաս-
խան չտուաւ, և հետաքրքիր գեղու-
հիներն որք ուշադրութեամբ զայն կը
դիտէին, կարծեցին տեսնել թէ կը
ստգունէր :

—Ի՞նչպէս կեանք կ'անցունէիք Փա-
րիզի մէջ :

—Բաւական քաջուած կեանք մը :
Ես չեմ ախորժիր ընկերութիւններէ .
ուստի յոյժ քիչ անգամ կ'երթայի : Միւս
կողմէ շատ զբաղեալ էի, և ազատ
վայրկեաններս ալ հօրս կը նուիրէի :

—Ներեցէք, արդարև ձեր ամեն
կիրակիները ձեր հօր հետ կ'անցու-
նէիք . բայց շարժուն մէջ իրիկուններն
ի՞նչ կ'ընէիք :

—Շատ անգամ գրասենեակս կը
վերադառնայի ճաշէս յետոյ : Երբոր
հարկադրեալ չլինէի, տուն կը վերա-
դառնայի և անդ կ'աշխատէի :

—Ձեր հասակին մէջ քիչ հաւանա-
կան է այդ : Ձեր դռնապանը վկայեց
թէ ամառուան վերջէն ի վեր յաճախ

կէս գիշերէն յետոյ տուն կը վերա-
դառնայիք :

—Թատրոն կ'երթայի մերթ ընդ
մերթ :

—Կ'ընդունիմ զայդ . բայց պարտիք
խոստովանիլ թէ զարմանալի բան է որ
ձեր երեկոյեան պարագ ժամերն ու
ընչ կերպիւ գործածած չլինիք երբէք :

Ամբաստանութիւնը կը հաստատէ
թէ Արպալէթ փողոցը կ'անցունէիք :

—Ամբաստանութիւնը կը սխալի .
վերջին ժամանակներս Պուլոյն կ'ան-
ցունէի :

—Տիկին Լըքոնթի տունը : Ժխտող
չկայ զայդ . բայց ժամը տասնին (կէս
գիշերէն երկու ժամ առաջ) կը մեկ-
նէիք , երբեմն աւելի կ'անուխ :

Այսպէս , յունվար 13 ին իրիկունը
ժամ իննուկէսին մեկնեցաք անտի :

—Կարելի է :

—Ի՞նչ ըրիք յետոյ :

—Թրամուայը նստայ , և Քոնքորտի
հրապարակն իջնելով տունս գնացի

—Դժուարին է ապացուցանել թէ

ճշմարիտ չէք խօսիր : Ձեր դռնապանին
յիշողութիւնն ալ բաւական ճիշդ չէ ,
որպէս զի ձեր ըսածին հակառակն
հաստատէ : Բայց կը յիշէ կատարելա-
պէս թէ հետեւեալ կիրակի օրն , յուն-
վար 14, գիշերը շատ ուշ տուն մտեր էք :

—Ճշմարիտ է : Հայրս ինձ հետ ճա-
շած էր Տիկին Լըքոնթի տունը : Ձինքը
Քոնթի գետափը տարի , իւր բնակա-
րանն , և անտի բալեթով վերադարձայ
ի Մոն-Թապոր փողոց , Մոնմարթը փո-
ղոցէն , Պուլարներէն և Տըլա Բէ փո-
ղոցէն անցնելով :

—Անյարմար ժամանակ կ'ընտրէիք
շրջագայութեան համար : Օդը սաստիկ
ցուրտ էր այն գիշեր :

—Գլուխս կը ցաւէր և օդ առնլու
պէտք կ'զգայի

Այս պատասխան թեթեւ շունջ մը
զրդուեց ունկնդրաց մէջ , և նախագա-
հը շարունակեց յամբուլթեամբ .

—Ամբաստանութիւնը կը պնդէ թէ
Արպալէթ փողոցը գնացիք , պորմը մը-
տաք կէս գիշերին , և հսկողութեան

դրուած ոստիկանական գործակալներէն բռնուելով, ծածուկ ոստիկանի տոմսակ մը ցոյց տուիք, և ձեր օձիքն ազատեցիք անոնց ձեռքէն :

Արդ, դուք խոստովանեցաք քննիչ դատաւորին առջեւ թէ ժամանակաւ այն պաշտօնը վարող ձեր հօր տոմսակը ձեր ձեռքն անցած էր :

—Արդարեւ գտայ այն տոմսակն հօրս թուղթերուն մէջէն, բայց այրեցի : Աւելորդ է հասկցնել ձեզ թէ ինչո՞ւ փութացի ջնջել զայն :

—Ստոյգ է որ Լըքոնթի ընտանիքն, որում պիտի փեսայանայիք, չէր գիտեր թէ դուք վաղեմի ծածուկ ոստիկանի մ'որդին էիք : Ուստի ձեր շահը կը պահանջէր անհետացնել այն տոմսակն որ ձեր հօր անցեալը կը յիշէր :

Կրնայ սակայն առարկուիլ թէ անհնար էր որ այդ տոմսակ Տիկին Լըքոնթի կամ անոր աղջկան ձեռքն ընկնէր երբէք :

Մնաց որ, պորմին մէջ հսկող գործակալք կատարելապէս ճանչեցին զձեզ :

Անոնցմէ մին ներկայ չէ հոս, վասն զի խուլ—համրին փախստեան օգնած լինելով, ինքն ալ փախած անհետ եղած է :

Բայց անոր պետին վկայութիւնը պիտի լսուի, և ուրիշ վկայք ալ պիտի հաստատեն թէ դուք քանիցս անգամ գնացած էք սպանեալ կնոջ տունն :

Ուրիշ նիւթական ապացոյց մ'ալ կայ, զոր դատաւոր տեսրց գնահատման ներկայացնելու ժամանակն եկած կը համարիմ :

Բարապա՛ն, բերէք սա դաճէ կաշապարներն և դետինը դրէք, աւելցուց ու նախագահն :

Ապա, երգուեալ դատաւորաց դառնալով .

—Տեա՛րք, ըսաւ, այս կաղապարներ պորմին բակը ծածկող թարմ ձիւնին վրայի օտից տիպերէն առնուած են :

Առաջին երկուքը խուլ—համրինն են որ արկղը կը տանէր, և անոր ընկերացող մարդուն :

Երրորդն՝ ոճրին հետեւեալ օրը կէս
գիշերին Արպալէթ փողոցի տունը մտ-
նող մարդունն է :

Առաջին գիշերը թողուած հետ-
քերն ի սկզբան անբացատրելի կ'երե-
ւին, վասն զի ամենն ալ դուրսէն դէպ
ի պորմը կ'երթային : Կը թուէր թէ
ներս մտած և ոչ ևս դուրս ելած էին :
Բայց այսօր յայանի եղած է թէ դուրս
ելնելու համար՝ ոճրագործն և մեղսա-
կից խուլ-համբն ետ ետ գնացած են :

Այդ զգուշութիւն ըրած չէ ոճրա-
գործն հետեւեալ գիշերը, փախչելու
հարկադրեալ լինելով :

Ամբաստանեալ Լըքոք, յառաջ ե-
կէք և ձեր ալ ոտքը խոթեցէք երկու
գաճէ կաղապարներուն մէջ՝ զորս բա-
րապանը պիտի ցուցնէ ձեզ :

Լուի Լըքոք, առանց վարանելու,
դուրս ելաւ ամբաստանելոց վերապահ-
եալ խորչէն և յառաջ գնաց ատենա-
սրահին մէջ :

Ունկնդրաց մէջ հետաքրքրութեան
յոյժ զգալի շարժում մ'եղաւ :

Կանայք միահաղոյն ոտքի վրայ ե-
լան : Կուղէին տեսնել թէ ոճրագործը
բարեձեւ ոտք ունէ՞ր :

Նապասն, որ անդուլ ուշադրու-
թեամբ մտիկ կ'ընէր վիճաբանութիւն-
ները, նա ալ ոտքի վրայ ելաւ՝ փորձը
ճշդիւ դատելու համար :

— Սա լայն տիպը, դատաւոր տեա'րք,
ըսաւ նախագահը, խուլ-համբին ոտ-
քերունն է :

Միւսն, որ աւելի փոքր է, անոր
ընկերացող մարդունն է :

Լըքո'ք, փորձեցէք զայն :

Թէրէզի նշանածն իւր ոտքը գաճէ
կաղապարին մէջ խոթեց, նեղ, կոր,
և նուրբ կոշիկներ հագած ոտք մը, որ
դիւրութեամբ մէջը մտաւ և յոյժ հան-
գիստ կերպով կը շարժէր :

Ունկնդրաց մէջ միմեանջ մ'ելաւ ի
նպաստ ամբաստանելոյն, և դատաւորը
ալ նոյն մտօք տպաւորեալ երևցան :

— Միւսը փորձեցէք այժմ, ըսաւ
նախագահն :

Այս անգամ երիտասարդին ոտքը

բաւական ճշդութեամբ յարմարեցաւ կաղապարեալ տիպին :

— Պարտիմ գիտել տալ դատաւոր տեարց , ըսաւ ընդհանուր փաստաբանը , թէ տիպերուն ձևը կրնայ տարբերիլ՝ աւելի կամ պակաս ծանրութեամբ , աւելի կամ պակաս արագութեամբ քալելով :

Սուաջին գիշերն ոճրագործը ժամանակ ունէր ծանր քալելու . երկրորդ գիշերը կը փախչէր :

— Ես ալ կը հաստատեմ , պատասխանեց ամբաստանելոյն պաշտպան փաստաբանը , թէ յոյժ զգալի տարբերութիւն կայ երկու տիպերուն մէջ : Միևնոյն մարդու ոտից հետքեր չեն :

— Դատաւորք կը գնահատեն անշուշտ , եզրակացուց նախագահն երբոր ամբաստանեալն իւր տեղը կը վերադառնար :

Անցնինք ուրիշ տեսակ ապացոյցներու :

Կը պնդէք թէ սպանեալ կնոջ լուսանկարը ձերը չէր , թէ դիակնարա-

նին մէջ բռնուած գող մը , որ ձեր թղթապանակը գողցած էր , զայն մէջը գրած է :

Ի՞նչպէս կը բացատրէք լուսանկարին ետեւը գրուած Փրօքի ֆ Նոթ բառերը : Դատաւոր տեարք գիտեն թէ « Մի մոռնա՛ր շէն » ըսել են :

Դատաւորաց մի քանին իրենց գլուխը շարժեցին հասկցնելու համար հասարակութեան թէ գիտէին անգլիերէն :

— Այդ խօսք ինձ ուղղեալ չէր , պատասխանեց ամբաստանեալն առանց յուզուելու :

— Շատ զարմանալի է որ կինն իւր լուսանկարին մէջ ինքզինք ներկայացընէ հոմբերո-թիւն կոչուած թղթախաղը խաղալու զբաղած , և ձեր բնակարանին մէջ ալ ճշդիւ անոր նման հոմբերո-թիւն մը գտնուի ծածուկ խուցի մը մէջ , սեղանի մը վրայ բացուած :

Եւ ամենն այս չէ : Կինը Սլաքի տիկին մը բռնած է ձեռքն , իսկ ձեր այնչափ խնամով պահած թղթապանակին

մէջ Սլաքի տիկինը պակաս է, որ զոհին սրտին վրայ գամուած գտնուեցաւ :

—Ես բացատրած եմ այդ զուգադիպութիւնները քննիչ գատաւորին առջեւ :

—Ս.յո՛, ըսեր էք թէ ձեր Գերմանիա բնակած ժամանակ հաճեցի՞նք ինչ կը բանայիք աղջկան մը հետ, որում սիրահարեալ էիք, և թէ՛ ի յիշատակ այդ սիրոյ՝ որ մոռցուած է բոլորովին, վասն զի օրիորդ Լըքոնթի հետ ամուսնանալու վրայ էիք, յատուկ կարգով մը շարուած թուղթեր պահած էք :

Անհաւանելի և նոյնչափ տղայական չքմեղանք մ'է այդ :

—Նուազ տղայական քան զամբաստանութիւն մը; որ այդպիսի անկարեւոր իրողութեան մը կը յենու, ըսաւ Լուի Լըքոք խտաբար :

—Ցաւալի է ձեզ համար, որ գըրուեցաւ ի Հայտէլպէրկ, և ձեր սիրած աղջկան հայրը սուտ հանեց ձեր ըսածներն :

—Աղջիկը պատերազմէն յետոյ բըրուսիացի սպայի մը հետ ամուսնացած է: Բնական է որ չուզէ այժմ յիշել ռիտ :

Ս.յո պատասխան, յոյժ բնական ձայնիւ մը տրուելով, լաւագոյն տպաւորութիւն մ'ըրաւ :

Նախագահն ետ կեցաւ պնդելէ, և թուղթեր խառնելէ յետոյ ըսաւ .

—Ձեր բնակարանին մէջ գտնուած գաւազանին գունտին վրայ արեան բիծեր կան : Յայտնի է որ անով զարկած էք զՊ. Լէօրէօ : Վէրբը քննող բժիշկները կը հաստատեն զայս :

—Ես երբէք տեսած չեմ զՊ. Լէօրէօ :

—Թերեւս երբէք տեսած չէիք զայն արդարեւ ձեր տարփուհւոյն տան մէջ անոր հանդիպելէ առաջ : Եւ իրաւունք կայ ենթադրելու թէ ձեր սիւուհւոյն հետ ճաշ որած միջոցին յանկարծ վրայ երթալով՝ սաստիկ զայրացած էք : Հետեւանքը գիւրաւ կը գուշակուի :

Մարդուն վրայ յարձակեր էք, նա ալ պաշտպաններ է ինքզինք . . . կա-

տաղի կռուոյ մը հետքեր տեսնուած են . . . : Դուք անկէ աւելի երիտասարդ եւ կորովի լինելով, մինչեւ մառանին դուռը քշեր էք զայն, և ազատելով զձեզ անոր ձեռքէն, հարուած մը տը-ւեր էք անոր գլխուն, միակ հարուած մը:

Լուի Լըքոք պատասխան չտուաւ: Հարցաքննութեան սկիզբէն ի վեր առաջին անգամ էր որ կը կասէր իւր անզգածութենէն:

— Խօսեցէ՛ք, ըսաւ նախագահն, որ նշմարած էր անոր շփոթումն: Սյսպէս չեղա՞ւ:

Լըքոք դարձեալ լուռ կեցաւ:

— Թերեւս ամբաստանութեան կարծածին չափ մեղաւոր չէք դուք: Ձեր հակառակորդը կրնայ ծանրապէս թըշնամանա՞ծ լինիլ ձեզ . . . ապտակ զարկած լինիլ ձեր երեսին . . . : Դուք ալ արդէն կրակոտ, ցասկոտ . . . թշնամանքը բոլորովին զայրացուցած է ձեզ . . . կռիւ ծագեր . . . կռիւ մը, զոր դուք չէք գրգռած . . . և վերջապէս չկըրնալով ձեր զայրուցը զսպել, ձեր դա-

ւազանը գլխուն իջուցեր և սպաններ էք զայն առանց ուզելու . . . :

Սմեհուն աչքն ամբաստանելոյն վերայ սեւեռած էր, որ գլխահակ կը կենար, և երբոր վեր վերցուց, պահ մը կարծուեցաւ թէ պիտի խոստովանէր:

— Կրկին կ'ըսեմ ձեզ, պարօ՛ն, ըսաւ ինքզինք սեղմելով, թէ երբէք տեսած չեմ զՊ. Լէօրէօ:

Սարսուռ մը շրջեցաւ ունկնդրաց մէջ, և նախագահն ըսաւ իւր լուրջ և յամր ձայնիւ.

— Կը յարատեւէք ձեր բռնած ողբալի դրութեան մէջ: Կազդարարեմ ձեզ անգամ մ'այ թէ կը վստահէք ձեր դատին, վասն զի տակաւին ձեռքս մնացած ապացոյցները, զորս դատաւոր տեսարց պիտի ներկայացնեմ, ջախջախիչ են, և դուք ճշմարիտը խօսելով, կրնայիք անոնց ներողամտութիւնն հրաւիրել ձեր վրայ:

Սուտիկ Մարի Փատիթի ուղղեալ նամակի պատեան մը, որոյ վրայի հասցէն ձեր գիրն է:

—Ո՛չ, պարոն :

—Բարապա՛ն, դատաւորաց ներկայացուցէք սա պատեանն և սա բաղդատական թուղթն՝ որ ամբողջապէ՛ս ամբաստանելոյն ձեռագիրն է :

Մինչ այս թուղթեր երդուեալ դատաւորաց ձեռքը կը պտըտէին, հասարակութիւնը կը հծծէր . դատողութիւնք կը փոխանակուէին որք նպատաւոր չէին թէրէզի նշանածին :

Իւր երիտասարդութիւնը, կեցուածքը, լեզուն, ի սկզբան համակրութիւն հրաւիրած էին իւր վրայ, զոր կաղապարաց փորձն առաւել աճեցուցած էր :

Բայց նախագահին սրտայոյզ յորդորանաց դէմ պահած յամառ լռութիւնն իբրեւ կէս խոստովանութիւն նկատուելով, հասարակաց կարծիքն այժմ անոր դէմ վճիռ կուտար :

—Բայց գրի վարպետներուն վկայութիւնն ալ պիտի լսուի, ըսաւ նախագահն՝ երբոր բարապանն իրեն վերադարձուց երդուեալ դատաւորաց քննած թուղթերն :

Եւ աւելցուց ամբաստանելոյն դառնալով և թուղթ մը ցոյց տալով, զոր պարութային մէջէն առած էր .

—Աւասիկ նամակ մը, որոյ ձեր գրածը լինիլը կը ճանչէք :

—Ս.յո՛, կը ճանչեմ, ըսաւ Լուի Լըքոք, բայց . . .

—Կարդայէս յետոյ կրնաք տալ ձեր բացատրութիւնները : Կաղաչեմ զձեզ, դատաւոր տեա՛րք, որ ուշադրութիւն նուիրէք, որովհետև դատաստանին հոգին ասոր մէջ է :

Եւ կարդալ սկսաւ նախագահը .

« Սիրելի՛ Մարիս , »

—Նամակը, տեա՛րք, ըսաւ, ֆըրանսերէն է, բայց Մարի անունն անգլիական ուղղագրութեամբ Մերէ գըրւած է, որ սպանեալ կնոջ անունն է, և տարակոյս չկայ թէ այն կնոջ գրած է ամբաստանեալն ինչ որ պիտի լսէք այժմ .

« Սիրելի՛ Մարիս , »

« Կը սիրեմ զքեզ յամենայն զօրութենէ հոգւոյս : Ապացուցած եմ քեզ

զայս, և կ'երդնում տակաւին թէ պիտի սիրեմ զքեզ միշտ: Ինչո՞ւ կը չարչարես զիս այդպէս. ինչո՞ւ չես ուզեր փախչիլ ինձ հետ: Միթէ իմն չե՞ս ամբողջովին, և սիրող բաժնա՞ծ ես: Ի զուր կը յեղյեղես ինձ թէ ազատ չես, պարտականութիւններ ունիս կատարելիք: Ի՞նչ էն պարտականութիւնք սիրոյ առջեւ: Ես ալ ունիմ պարտականութիւններ, բայց կը մոռնամ քեզ համար: Կը կարծե՞ս որ հայրս հաւանութիւն տայ երբ իմանայ թէ ես իմ կեանքս քեզ նուիրել որոշած եմ:

«Բայց այդ մարդ՝ որ կը ծանրանայ քու կենացդ վրայ, այդ մարդ՝ յորմէ դու կը վախնաս և զոր ես կ'ատեմ, ի՞նչ իրաւունք ունի քու վրայ. ո՞վ կը հարկադրէ քեզ որ զիս ադոր զոհես:

«Համբերութիւնս և արիւթիւնս սպառած է. գթա՛ իմ վրայ, հաճութիւն տուր փախչելու. քանի մ'ամսէ ի վեր կեանքս անտանելի ըրած ես: Վերջ տուր չարչարանացս, կ'աղաչեմ, կը պաղատիմ քեզ յանուն մեր սիրոյն:

«Եթէ չլսես աղաչանացս, Մարի, եթէ չուզես ազատել քեզ այդ թշուառականին բռնութենէն, ոճիր մը գործելու պիտի մղես զիս:

«Ս'հ, լաւ ըրիր որ չթողուցիր ինձ հանդիպիլ անոր ձեր տան մէջ, վասն զի եթէ ճանբուս վրայ գտնէի, կ'սպաննէի, և պիտի սպաննեմ եթէ անոր իշխանութեան ներքեւ մնաս:

«Բայց ոչ, պիտի թօթափես անոր լուծն, և պիտի փախչիսք քեզ հետ: Ի՞նչ բանէ կը վախնաս: Եթէ համարձակի ետեէդ գալ, ես հետդ չեմ քեզ պաշտպանելու համար: Քաջ գիտես թէ չկրնար թողուլ իւր երկիրն ու գործերը:

«Կ'ուզե՞ս որ չուենք երեք օրէն: Կ'ուզե՞ս որ իրիկուան գամ քեզ առնում անոր բացակայութեան ժամուն: Այո՛ ըսէ, և երեք օրէն միանանք միմեանց հետ՝ առանց այլ ևս բաժնուելու: Պատասխանդ, որում կ'ըս պասեմ անձկութեամբ, պիտի որոշէ մեր բաղդն:

«Աւելի կ'ընտրեմ հարիւր անգամ մեռնիլ, աւելի կ'ընտրեմ մեռած տեսնել քեզ իմ ոտից տակ, քան հրաժարիլ քեզնէ : »

—Այդ նամակ իմն է արդարեւ, պատասխանեց Լուի Լըքոք, բայց շատ տարիներ առաջ գրած եմ :

—Որո՞ւ :

—Կնոջ մը, զոր կը սիրէի այն ժամանակ :

—Ըսէք անունը :

—Չեմ կրնար :

—Ինչո՞ւ :

—Վասն զի վտանգի մէջ կ'իյնայ : Բայագաճանջութիւնք և ծիծաղք արձակուեցան ատենասրահին այլ եւ այլ կողմերէն :

Բարապանը վերահաստատեց լուծութիւնն, և նախագահը նորէն խօսիլ սկսաւ եւս քան զեւս շեշտեալ խըստութեամբ :

—Չէք յուսար, կարծեմ, թէ ատեանն և երդուեալ դատաւորք՝ այս ընթերցում լսելէ յետոյ՝ կ'ընդունին այդպիսի մեկնութիւն :

Այս նամակ կէտ առ կէտ կը պատշաճի Արպայէթ փողոցի կրկին սպանութեանց : Կը ծանուցանէ, գրեթէ կը նըկարագրէ զայն :

Մարի, այն տարաբաղդ կիւնն է զոր սպաննեցիք : Մարդն ալ, որոյ իշխանութիւնը կը կրէր, Պ. Լէօրէօ է, զոր նոյնպէս սպաննեցիք, վասն զի կ'ատէիք զայն իբրեւ հակատուփող, վասն զի կոխեցիք զայն ձեր տարփուհւոյն քով, որում գրած էիք թէ «պիտի սպաննեմ երբոր տանը մէջ հանդիպիմ անոր : »

Դատաւոր տեարք չպիտի մոռնան ձեր նամակին այդ պարբերութիւն :

Փախուստի առաջարկը Մարի պիտի գործադրէր : Արկղերը պատրաստուած էին, իւր սենեկապանուհին մեկնած էր արդէն : Բայց Մարի ձեր ձեռքէն կ'ուզէր փախչիլ :

Որոշած էր Անգլիա վերադառնալ՝ ազատելու համար ձեր ժտանքէն, ձեր անդլարար սպառնացած բռնութիւններէն :

Իւր երկիւղն յայտներ էր զինքը պաշտպանող մարդուն, ծանուցեր էր անոր իւր չուն, նա ալ եկած էր այն վերջին երեկոյթն անոր հետ անցունելու :

Տոմսակ մ'ելաւ վրայէն, որոյ մէջ Մարի կ'ըսէր անոր թէ ժամը տասնին կ'սպասէր իրեն :

Նախանձէ մղեալ՝ հոն գնացիք . Պ. Ղէօրէօ կ'ընթրէր Մարիի հետ . վէճ մը ծագեցաւ, և սպանութեամբ վերջացաւ :

Եւ յայտամ, արբեալ մոլեգնութեամբ և քինով, դժբաղդ կինն ալ ձեր մօտ քաշեցիք և դաշունահար ըսպաննեցիք :

Այս խաղի թուղթ, զոր անոր կուրծքին վրայ գամեցիք, ժամանակաւ ըրած երգումներուն յիշատակ մ'էր : Առիք զայն ներքնասենեկի սեղանին վրայէն, Մարիի ցոյց տուիք կշտամբելով անոր երգմադրութիւնն, ամբաստանելով զայն թէ ձեր հակառակորդին վրայ մտածելով շարած էր այն թուղթերն, որոց մէջ երջանկութեան

գուշակութիւններ կը կարդար, և ձեր կատաղութիւնն առաւել եւս բորբոքելով՝ թուղթն և սիրտը մէկ հարուածով ծակեցիք :

Այս կերպիւ կատարուեցան այդ երկու ոճիրք, այնպէս չէ :

Լուի Լըքոք յոյժ գունատ էր . բայց չխոնարհեցուց աչերն և ըսաւ անսասան ձայնիւ .

— Կ'երդնում առաջի Աստուծոյ թէ ես չսպաննեցի զՄարի Փասիթ :

Մառնային լուութիւն մը տիրեց այս պատասխանի վրայ : Հասարակութիւնն ոչ եւս կը շնջէր : Համոզումը կազմուած էր :

Երգուեալ դատաւորաց վճիռը կրնար ուշանալ : Ամբաստանեալն արդէն դատազարտուած էր :

Այս տեսարանին տպաւորութիւնը քիչ մը թեթեւցնելու համար՝ պաշտպան փաստաբանն ոտքի վրայ ելնելով խնդրեց նախադահէն որ հաճի յայտնել թէ այս նամակ անձանօթ անձի մը ձեռք եկած է ի դատարան :

Եւ աւելցուց .

—Կ'աղաչեմ զտէր դատաւորները դիտել, թէ իրենց ներկայացած են . թաղրութեան մէջ անհնարին է մեկնել թէ ամբաստանեալն ի'նչպէս կրցաւ արկղ մը պատրաստ ունենալ դիակը վերցնել տանելու համար, որովհետեւ չէր նախատեսեր այն տեսարանն որ Պ. Լէօրէոյի հանդիպելուն հետեւանքն եղած է :

Նմանապէս չկրնար ընդունուիլ թէ խուլ-համբն ալ հետը տարած էր . . .

—Այդ փաստերը ձեր պաշտպանողական ճանին ժամանակ կրնաք գործածել, ըսաւ նախագահն ընդմիջելով :

Պարտիմ սակայն յիշեցնել ձեզ թէ արկղը Մարի Փասիթին էր, և ըսել ձեզ թէ Լըքոք, ոճիրը գործելէ յետոյ, կրնար երթալ և խուլ-համբը բերել :

Ամբաստանեալ, բան մ'ունի՞ք աւելցնելու :

—Չունիմ, պարո'ն :

—Կրնաք նստիլ : Այժմ վկայները պիտի լսենք :

Բարապանը կոչեց զանոնք : Շատուոր չէին : Ամբաստանութիւնը զանոնք միայն կոչած էր, որք անհրաժեշտ էին : Ամբաստանեալը վկայ կոչած չէր բնաւ :

Միակ վկայն զոր ինքզինք պաշտպանելու համար պիտի կրնար կոչել, խուլ-համբն, անհետ եղած էր :

Նախ ապահովութեան պետը լսուեցաւ, որ՝ մեծ չափաւորութեամբ՝ բայց և յոյժ հաստատողաբար վկայեց ամենակարեւոր կէտի մը վրայ : Յայտնեց թէ ինքն և իւր գործակալք, մասնաւորապէս այն որ այժմ փախած էր, կատարելապէս ճանչած էին զԼուի Լըքոք, որ ոճրին հետեւեալ օրն Արպալէթ փողոցի պորմն եկած էր :

Ածխավաճառն և կիսն այնչափ որոշապէս չվկայեցին : Տեսած էին որ ամբաստանելոյն նման լաւ հագուած պարոն մը քանիցս անգամ հոն եկած էր, բայց չէին կրնար ապահովապէս հաստատել թէ նոյն իսկ ամբաստանեալն էր :

Անգլիացի գրպանախոյզն ալ ըսաւ

Թէ բնաւ չէր ճանչեր զՄարի Փասիթ ,
 և թէ ինք բան մը դրած չէր թղթա-
 պանակին մէջ , յայտարարութիւն մը ,
 որոյ վրայ արդէն կասկածող չկար :

Յետոյ ներկայացան ուրիշ անկա-
 բեւոր վկայք . սպանեալ կնոջ հետ ա-
 ուստուր ընողներն , որք մեծ բան մը
 չէին գիտեր անոր սովորութեանց վրայ .
 Պ. Լէօրէոյի երկու բարեկամք , պար-
 կեշտ վաճառականք , որ անոր առեւ-
 տրական ուղղութիւնը ներբողելով՝
 յայտարարեցին թէ ամենափոքր կաս-
 կած մ'ունեցած չէին Մարի Փասիթի
 հետ ունեցած յարաբերութեան վրայ .
 լուսանկարիչն , որ կնոջ պատկերն հա-
 նած էր . հարկահաւաքն , որ տանք
 տուրքերուն գումարն ստացած էր Անգ-
 լիայէն . Մոն-Թապոր փողոցի դռնա-
 պանն , որ հաւաստեց թէ իւր վարձա-
 կալն ոճրին հետեւեալ գիշերը ժամ
 երկուքին (կէս գիշերն երկու ժամ ան-
 ցած) տուն վերադարձած էր , և թէ
 երբէք կին ընդունած չէր յիւր բնա-
 կարան :

Ապա եկան փորձագէտ բժիշկներն ,
 որք գիտնական բացատրութիւններ
 տուին սպանելոց վէրքերուն և անոնց
 վերջին ճաշին և մահուան միջեւ ան-
 ցած ժամանակին վրայ . գրի վարժա-
 պետներ , որ հաստին ու բարակին վրայ
 ճառելով հաստատեցին վճարար թէ
 Մարի Փասիթի բնակարանին մէջ դըտ-
 նուած նամակի հասցէն Լըքոքի ձեռա-
 գիրն էր :

Յետոյ նամակ մը կարգացուեցաւ
 գրեալ ի տնօրէնէ անգլիական գիշերօ-
 թիկ վարժարանին , ուր ամբաստանեալն
 իւր առաջին ուսումն առած էր : Կըսէր
 թէ Լըքոք պատանին՝ իւր վարժարանը
 բնակած ժամանակ՝ բազմիցս կանոնա-
 ղանցութիւն ըրած և քանի մը պատ-
 ուաւոր դրացեաց աղջիկներն հրապու-
 ըել փորձած էր :

Կարգացուեցաւ նաեւ Հայտելպեր-
 կի վարժապետին պատասխանն որ ցաս-
 մամբ կը հերքէր ամբաստանելոյն յայ-
 տարարութիւններն և բացարձակապէս
 կ'ուրանար իւր Պէթինա դասեր երբէք

համբերութիւն բացած և ամբաստանելոյն հետ ուխտադրութիւն ըրած լինելը :

Վերջապէս կոչուեցաւ օրիորդ Լըքոնթ :

Մայրն , հիւանդ լինելով , չէր կրօնացած դալ ի դատական պաշտօնատուն , և խեղճ աղջիկն հարկադրուեր էր միայնակ կրել դատարանին ներկայանալու վիշտն , յորմէ կրնային խնայել զինքն եթէ չյուսային թէ իւր ներկայութիւնը կրնար ամբաստանելոյն վրայ ազդեցութիւն ընել և բռնած դրութիւնը փոխել տալ :

Թէրէզ յառաջ եկաւ միայնակ , սեւեր հագած , իբր թէ արդէն իւր նշանածին սուգը կը բռնէր , և երեսն հաստ քօղով մը ծածկած :

Ներս մտնելը տպաւորութիւն ըրաւ ունկնդրաց վրայ :

Ամեն աչերն անոր վրայ դարձան , ի բաց առեալ Լուի Լըքոք որ ծռելով քանի մը խօսք փոխանակեց իւր փաստարանին հետ :

Թերեւս կը յուսար որ Թէրէզ չպի-

տի տեսնէր զինքն և ատեանն ալ չը պիտի ստիպէր զինք որ իւր պաշտած օրիորդին խօսք ուղղելու դառն կրտսանքը կրէր :

Կը սխալէր :

Նախագահը մեծ ակնածութեամբ վարուեցաւ օրիորդ Լըքոնթի հետ : Աթոռ մը բերել տուաւ անոր , ժամանակ թողուց սրտայուզութիւնն հանդարտելու , և ծայրագոյն քաղցրութեամբ հրաւիրեց երգում ընելէ առաջ բանալ երեսին քօղն և հանել ձեռնոցներն :

—Օրիորդ , ըսաւ յետոյ , հաճեցէք ըսել մեզ թէ յունվար 13ին իրիկունք Պ. Լըքոք ժամը քանի՞ն մեկնեցաւ ձեր տիկին մօր դահլիճէն :

—Ժամ իննուկէսին , կարծեմ , պատասխանեց մանկամարդուհին հաղիւ լսելի եզոզ ձայնիւ :

—Եւ հետեւեալ յունվար 14ին իրիկունք :

—Ժամ տասնին :

—ձյմարիտ է ձեր ըսածն , օրիորդ ,

և ատեանք շնորհակալութիւն կը յայտնէ ձեզ՝ հասկնալով այն տխուր վիճակ յորում կը գտնուիք :

Բայց աւելի բան մը կ'սպասէ ձեզ : Կը յուսայ որ կը հաճիք լուսաւորել զինք Պ. Լըքոքի զգացմանց վրայ :

Թէրէջ տժգունեցաւ և չպատասխանեց :

— Բացատրեմ ըսածս , յարեց նա խաղահը : Մեր առջեւ մարդ մը կայ , որոյ կեանքն անստղիւտ եղած կ'երեւի մինչեւ օրն այն ոճրին որով ամբաստանեալ է : Ոչ ոք կայ հոս որ ուրախ չլինի անոր արդարացումը լսելով . բայց նա չուզեր ընել , և միայն կ'ուրանայ , մինչեւ իսկ ակներեւ ճշմարտութիւնն :

Իրաւունք չունինք հարցնելու թէ անհասկանալի զգացում մը կը տիրէ անոր վրայ . թերեւս կը վախնայ խոստովանիլ սխալ մը , հարիւրապատիկ թեթեւ քան զայն սպանութիւններն որովք ամբաստանեալ է , բայց գուցէ ծանր կուգայ իրեն խոստովանիլ :

Եթէ ճշմարտութիւնը խոստովանի , անշուշտ նուազ մեղապարտ պիտի երբելի : Իսկ եթէ յամառի ուրանալ , յայնժամ պէտք է հաւատալ թէ բնամեղմացուցիչ պարագայ չունի ընդունել տալու :

— Ես աներկբայ եմ թէ երբէք սուտ խօսած չէ , մրմնջեց օրիորդ Լըքոնթ :

— Իցի՛ւ թէ դատաւոր տեսք բաժանորդ լինէին ձեր այդ համոզման , օրիորդ : Եւ այժմ կ'աղաչեմ զձեզ պատասխանել հարցման մը , և սխալ չը հասկնալ նպատակս որոյ համար կ'ուզեմ ձեզ :

Կը հաւատա՞ք թէ Լուի Լըքոք անկեղծաբար կը սիրէ զձեզ :

— Կը հաւատամ , պատասխանեց օրիորդն հեղձեալ ձայնիւ :

— Լսեցիք , ըսաւ պատուարժան նախագահն ամբաստանելոյն դառնալով : Պիտի դժկամակի՞ք տակաւին փորձել արդարացում մը , զոր ձեր նշանածին պատասխանը կը դիւրացնէ ձեզ :

Այս հարցապնդումէն Լուի Լըքոք

ցնցուելով կէս մ'ոտքի վրայ ելաւ :

Վայրկեան մը կարծուեցաւ թէ պիտի խօսէր , բայց նորէն իւր նստարանին վրայ ընկաւ և մունջ մնաց :

— Զէ՛ք հասկնար ուրեմն թէ լուռ կենալով դուք ինքնին կը դատապարտէք զձեզ : Զէ՛ք մեղքնարձուրեմն ազնիւ օրիորդ մը , որ տակաւին հաւատք ունի ձեր վրայ : Եթէ կը սիրէք զայն , ո՞րպիտի տխուր քաջութեամբ կը յամառիք չխոստովանիլ սխալ մը , զոր աչներկբայ եմ որ կը ներէ ձեզ :

Լռութիւն տիրեց : Դատաւորք և հասարակութիւն կը հեային սրտայուզութենէ : Նապապն արտօսւքը կը սրբէր :

— Բարի շարժում մ'ունեցիք , Լըքո՛ք : Ըսէք մեզ թէ ժամանակաւ ճանչեցիք զՄարի Թասիթ , թէ չարաբաղդութիւնը ձեզ Արպալէթ փողոցի պորմէն առաջնորդեց , բուն զայրուցի մը տեղի տուիք , թէ կանխաւ խորհած չէիք ոճիրը : Վստահ եղիք թէ դատաւորք և ատեանն ի հաշիւ կ'առնուն ձեր անկեղծութիւնը :

Բայց մի՛ յամառիք պնդել ստախօսութիւն մը որ ի կորուստ կը տանի զձեզ :

Խօսեցէ՛ք , ձեր նշանածն է որ կը պաղատի ձեզ իմ բերնով :

Այս անգամ եւս ամբաստանեալք բերանը բացաւ իբր թէ խոստովանութիւն մը դուրս փախցնելու համար :

Բայց իւր աչերը Թէրէզի՛ արտասուած որ աչերուն հանդիպելով , մէկէն ետեւուն վրայ ինկաւ և թոթովեց .

— Ո՛չ . . . ո՛չ . . . չեմ կրնար . . . չեմ կրնար . . . :

Օրիորդ Լըքոնթ դողդօջեց : Բարապան մը զայն թեւերուն մէջ առնելով բռնեց և սասանեալ բաղմութեան մէջէն անցունելով դուրս տարաւ :

Նախագահն սպասեց որ օրիորդը դուրս ելնէ ատենաարահէն , և ըսաւ խսաիւ .

— Ամբաստանեալ , բան մ'ունի՞ք աւելցնելիք ձեր պաշտպանութեան համար :

— Ո՛չ , պատասխանեց Լուի Լըքոք :

—Վիճարանութիւնք փակուած են :
Խօսքն ընդհանուր դատախաղինն է :
Այս խօսք մահագոյժ զանգակի պէս
հնչեց :

Ամեն ոք կը հասկնար թէ ամբաս-
տանեալը կորսուած էր :

Արհամարհելով նախագահին ընծա-
յած փրկութեան միջոցն , ինքնին կը
վճռէր իւր դատակնիքն :

Ընդհանուր դատախաղին գործը
դիւրացած էր , և կատարեց ճարտար
չափաւորութեամբ :

Ամբաստանելոյն բարի նախընթաց-
ներն յիշեց , դատին մի քանի աղօտ
կէտերէն ծագելիք երկրայութեանց
վրայ խօսեցաւ , և յայտարարեց թէ
ինք առաջին պիտի լինէր պատժոյ մեղ-
մացում մը խնդրելու՝ եթէ Լըքոքը խօս-
տովանութիւն ընէր :

Այս անկողմնակալ նախաբանէն յե-
տոյ մի առ մի քննեց այն ապացոյց-
ներն որք կը յորդէին Լըքոքի դէմ .
համակարգեց զանոնք , և սեղմ հետե-
ւութեամբք ժամանեց ապացուցանելու

թէ Լըքոք միայն կրնար լինիլ հեղինակ
Արպալէթ փողոցի կրկին սպանու-
թեանց :

—Անշուշտ , տեա՛րք , ըսաւ եղ-
րակացնելով , ցաւալի է որ այդ սպա-
նութեանց շարժառիթը չէ կրցած ճըշ-
գուիլ : Բայց ինչ որ ալ լինի այդ շար-
ժառիթ , վրէժխնդրութիւնը , նախան-
ձը կամ հարուստ ամուսնութեան մ'օ-
գուտներէն զրկուելու երկիւղը զինած
լինի Լուի Լըքոքի բազուկը , կնոջ մ'և
ծերունւոյ մ'սպանիչն արժանի չէ ձեր
գլխութեան :

Եւ եթէ պաշտպանող փաստա-
բանութիւնը գայ յիշեցնել մեզ թէ ինչ
ինչ տարերք կը պակսին ամբաստանու-
թեան , թէ զոհերէն միոյն յատկանձ-
նութիւնը չէ հաստատուած բաւակա-
նապէս , թէ խուլ-համբը , զովող ան-
գիտակից կամ կամաւոր , չկրցաւ ե-
րեսուել գլխաւոր հեղինակին հետ , չը
պիտի կապուիք այս առարկութեամբք ,
որք չեն կրնար դատին հիմը խախտել .
ձեր խղճին հետ միայն պիտի խորհըրք :

դակցիք և մտածէք ինչ պէս թէ ընկերութիւնը վտանգի մէջ կ'ընկնի եթէ յանցապարտք յաջողին պրծիլ օրինաց ձեռքէն, վասն զի ցաւալի պարագայներ զրկեցին դատական արդարութիւնքն ամբաստանող վկայէ մ'և տեղեկութենէ :

Չպիտի կամիք անպատիժ թողուլ մեծ ոճիր մը, որոյ նմանը շատ տարիներէ ի վեր չէր զարհուրեցուցած զՓարիզ, և բնաւ ներողամտութիւն չպիտի չնօրհէք այս մարդու :

Մարտու մը պտըտեցաւ բազմութեան մէջ : Յանցաւորին գլուխը կը խնդրէր ընդհանուր դատախազն երդուելու դատաւորներէն :

Միայն Լուի Լքքոք անզգած մնաց. միայն նա չցնցուեցաւ այս վրէժխընդրական խօսքէն :

Կը հասկնար որ իւր գործը լմնցած էր, և կանխաւ կ'ընդունէր զիւր դատապարտութիւն :

Յուզումը գեռ հանդարտած չէր, ամբաստանելոյն փաստարանն ոտքի վըրայ ելաւ :

Նախ գովեստ ընծայեց ընդհանուր դատախազին արդարապիտութեան և նախադատին անկողմնակալութեան. յետոյ, իրողութիւններն յիշելով, ամբաստանութեան պակասներն և անհաւանելի կէտերը ցոյց տուաւ :

Հարցուց թէ Լուի Լքքոքի վիճակին մէջ գտնուող մարդ մ'ի՛նչ շահ կրնար ունենալ ինքզինք մահուան պատժոց ենթարկելու, մինչեւ իսկ տարփուհիէ մ'և հակատուփողէ մ'ինքզինք աղատելու համար :

Յիշեցուց թէ ոչ ոք կրցաւ հաստատել թէ ամբաստանեալը կը ճանչէր զՊ. Լէօրէօ և զՄարի Փասիթ :

Յոյց տուաւ ամբաստանութեանց անկապակցութիւնն ու հակասութիւններն, որովհետև մէկ կողմէ կը պընդէին թէ Լքքոք երկու զոհերն ի միասին կոխելով սպաննած էր, միւս կողմէ կըսէին թէ դիակներն անհետացնելու միջոցներ պատրաստած էր :

Տարաբաղդ Մարիի դիակն ո՞ւր կը յուսար տանիլ ամայի թաղի մը փողոցներէն անցունելով :

Եւ համրն , ուստի՞ կուգար , ո՞վ տեսած էր զայն Լըքոքի հետ : Եւ սակայն անշուշտ ոճրին գիշերը չէր որ առաջին անգամ հանդիպած կրնար լինիլ ոճրագործին : Եթէ փախաւ անհետ եղաւ այդ խուլ-համր , յանցանքն ամբաստանելոյն չէ , որ իւր հարցաքննանութեան սկիզբէն ի վեր չէր դադարած խնդրելէ որ երեսուի անոր հետ :

Եւ ընդունելով իսկ թէ Լըքոք ոճրին հետեւեալ օրն համարձակած լինի Սրպալէթ փողօցն երթալ , ի՞նչպէս կը լինէր որ իւր Մարի անուամբ կը կոչէր զայն ինն : որ առջի օրը դաշունահար սպանուած էր սրիկայէ մը :

Եթէ Լըքոք ինք սպաննած լինէր , անշուշտ պիտի գիտնար թէ ոչ ևս էր անդ , և չէր կրնար պատասխանել իրեն :

Ի՞նչ ապացոյցք յառաջ բերուեցան իրեն դէմ :

Մինչև իսկ չկրցաւ հաստատուիլ թէ իւր ոտքը կը յարմարէր ոճրագործին թողուցած ոտից տիպերուն :

— Ըսուեցաւ ձեզ , տեա՛րք դատաւորք , գոչեց փաստաբանն իւր խօսքն աւարտած ժամանակ , ըսուեցաւ ձեզ թէ ընկերութեան համար կարելոր է որ անպատիժ չմնան երկու նողկալի ուճիրք : Ես ալ կըսեմ ձեզ թէ առաւել ևս կարելոր է ընկերութեան , որ անմեղի մը գլուխը կառափնարանի վրայ չեղնէ :

Չէք կրնար մարդ մը դատապարտել կասկածներով , և կասկածներ միայն կան Լըքոքի դէմ : Թո՛ղ դտնեն բերեն անգիւտ համրը , թո՛ղ ճանչէ զամբաստանեալն , և յայնժամ անողոք եղիք :

Լըքոքի գլուխը կը խնդրուի ձեզնէ : Ես ձեր դատավճռին թեթեւացումը չեմ հայցեր ձեր գթութենէն . եթէ յանցաւոր է , արժանի է մահուան : Բայց չապացուցուեցաւ յանցաւորութիւնն , և անտարակոյս եմ որ պիտի արձակէք :

Հասարակութիւնն զգածուեցաւ : Երդուեալ դատաւորներէն ոմանք ար-

տասուեցին : Բայց կրնայ մարդ ար-
տասուել և չհամոզուի :

Կըսէին իրարու ցած ձայնիւ թէ
փաստաբանն օրիորդ Լըքոնթի վրայ
չխօսեցաւ և խոհեմութիւն էր ըրածն-
ոչ ալ ամբաստանելոյն գրած նամակն
յիշեց :

Ս.յն ձախող նամակ ազիտաբեր էր
ամբաստանելոյն , վասն զի գործելիք
ոճիրները կանխաւ ծանուցանել կը
թուէր , և սարսափելի ծանրութեամբ
պիտի կշռէր դատաւորաց վճռոյն վրայ :

Հանրային դատախազը չպատաս-
խանեց բնաւ , և նախագահը կատար-
եալ արդարութեամբ համառօտեց վի-
ճարանութիւններն , զգայնելով սակայն
թէ ամբաստանեալն յանցաւոր կը հա-
մարէր :

Լուի Լըքոք դուրս տարուեցաւ :

Երգուեալ դատաւորաց խորհրդ-
դակցութիւնն երկու ժամ տեւեց , և
երբոր ատենասրահը վերադարձան ,
տրուելիք վճիռը կրնար կարգացուիլ
անոնց տխուր երեսին վրայ :

Քանի մ'երկվայրկեան սրտանմիկ
լռութիւն մը տիրեց երբոր երգուեալ
դատաւորաց գլուխն արտասանեց այս
խօսք . «Ս.յո՛ , ամբաստանեալն յանցա-
ւոր է» :

Ի զուր սպասեցին ունկնդիրք . մեղ-
մացուցիչ պարագայ չկար : Մահ էր դա-
տալինիքք :

Նորէն ներս բերուեցաւ ամբաս-
տանեալն : Սչօքն իւր փաստաբանը
վնասեց . իսկ նա զգուշացաւ անոր
նայուածքէն :

Երիտասարդն հասկցաւ : Եւ երբոր
նախագահը , դատաւճիռը կարդալով ,
հարցուց անոր թէ պատժոյն գործա-
դրութեան վրայ բան մ'ունէ՞ր ըսելիք ,
պատասխանեց պաղութեամբ .

—Չունիմ , պարո՛ն , և կը հրաժա-
րիմ վճռաբեկ ատենին դիմելէ :

—Երեք օր ժամանակ ունիք դի-
մելու համար , ըսաւ նախագահը՝ դա-
տապարտեալէն աւելի յուզեալ :

Լուի Լըքոք պիտի գլխատուէր :

Ողջունելով դուրս ելաւ այն փոք-

րիկ դռնէն որ կառափնաբեմի ճան-
բուն վրայ կը բացուի :

Բազմութիւնն հետզհետէ դուրս ե-
լաւ մտախոհ , գրեթէ լռին և խորա-
պէս յուզեալ : Ոչ ոք կ'երկմտէր վճռոյն
արդարութեան վրայ . և սակայն ամեն
մարդ կը խորհէր թէ կը պակսէր մե-
ղապարտութեան այն բացարձակ ըս-
տուգութիւնն որ դատաւորաց խիղճը
կ'ապահովէ :

Նապապն ամենէն առաջ դուրս ել-
նողներէն մին էր իւր սեւամորթին առ-
ջեւէն , համոզեալ անշուշտ թէ եւրո-
պական դատաստանը կը գերազանցէր
իւր երկրին համառօտ դատաստանն :

Երբոր Լուի Լըքոք մութ նրբանց-
քէն կ'անցնէր , հետը գնացող պահակ-
ներէն մին սա խօսքը մրմնջեց անոր ա-
կանջն ի վար .

—Չեր հայրը կ'աղաչէ ձեզ որ այս
իրիկուն ստորագրէք ձեր բողոքն առ
վճռաբեկ ատեան :

Նոյն վայրկենին , օրիորդ թէրէզ
Լըքոնթ , որ վկայից սենեկէն դուրս

կ'ելնէր , զգաց որ տոմսակ մը կը դնէ-
ին իւր ձեռքին մէջ :

Լապտերի մը քով երթալով կար-
դաց .

«—Մի՛ յուսահատիք . կ'երդնում
ձեզ թէ պիտի ազատեմ : »

Տոմսակն ստորագրեալ էր «Լըքոք» :



~~Mr Henry F. [unclear] [unclear]~~

~~Mr Henry F. [unclear] [unclear]~~

~~Mr Henry F. [unclear] [unclear]~~


~~[Faint, illegible handwriting]~~

~~Handwritten text, possibly a signature or name, written in cursive script.~~

~~Handwritten text, possibly a signature or name, written in cursive script.~~

~~Handwritten text, possibly a signature or name, written in cursive script.~~

~~Handwritten text, possibly a signature or name, written in cursive script.~~



~~Handwritten text in cursive script, possibly a name or title.~~

~~Handwritten text, possibly a date or reference number.~~

~~Handwritten text in cursive script.~~

~~Handwritten text in cursive script.~~

ГІН 5 ГОЛРОЛ

~~Handwritten text in cursive script.~~

~~Handwritten text in cursive script.~~

1772

2013

